


國學基本叢書

樂城

集

上



上海图书馆藏书



A541 212 0006 1487B

類
著作
登記號 加 115

~~177932~~



陸

書叢本基學國

集 城 樂

(上)

撰 轍 蘇



行發館書即商

樂城集序

物之顯晦。各有其時。故荆山之玉。俟卞和而始獻。豐城之劍。待雷煥而始出。鹽車之驥。須伯樂而始重。況文章爲天地間至寶。弗遇其人。則空歷年所。湮沒無聞。曾謂顯晦不有時乎。有宋文運弘開。五星再聚。故三蘇並出於眉山。若文定者。天性高明。資稟渾厚。既有父文安以爲之師。又有兄文忠以爲之友。故其文章遂成大家。議者謂其汪洋澹泊。深醇溫粹。似其爲人。文忠亦嘗稱之。以爲實勝於己。信不誣也。夫何老泉東坡全集盛行。獨公所著。雖附三蘇集。而采輯未備。雖有穎濱集。而脫誤實多。君子未嘗不三歎焉。玉溪家有樂城集善本。謀諸石川。以公眉人也。故托合川。欲刻之眉州。合川能以是書爲己任。謀諸藩臬。謂公蜀產也。故命有司。欲刻之蜀省。蜀王殿下聞之。毅然曰。文定三蜀之豪傑也。其文章三蜀之精華也。孤忝主蜀。可諉之他人乎。於是令高長史鵬舒教授文明。校正鈔梓。以廣其傳。噫。文定之文。固無終晦之理。然匪玉溪。則夜光蘊於石。匪石川。則龍精沈於獄。匪蜀殿下。則驩騶綠耳。混於鶩駘款段。又烏能有今日之顯哉。玉溪乃張公。名潮。吏部左侍郎。四川內江人。石川乃張子。名寰。通政司右參議。直隸崑山人。合川乃王子。名珩。巡按四川監察御史。直隸交河人。蜀殿下則號適庵。實我太祖高皇帝七葉孫。其樂善好古。率多類此云。

嘉靖二十年。歲在辛丑。五月吉日。儀封劉大謨書。

欒城集序

余庚子被命按蜀。數月。得吾師玉溪公所錄欒城集八十四卷。通政張子石川亦以書道公意。謂文定眉之文英。其所爲文與詩。宜刻於眉。庶先賢精華。不至淪沒。此公意也。是時適秋試士。未暇付之。有司旣而撤闈。又聞蜀王殿下素被服禮義。學閑詩書。常於寒士爲忘勢之交。尤好蓄古今書籍。迺與巡撫東阜公。以其集詢之王。王大悅。謂三蘇西蜀豪傑。宋興文運之盛。以文鳴于世。與歐陽公並稱者。蘇之外無聞焉。文定之文與詩。又素稱冲雅。不事豔麗。今幸得覩其全集。卽命付諸鋟。不必眉也。復令長史高鵬與教授等官司其事。余時亦以地方少歉。南歷嘉眉公暇。卽詣蘇祠。訪其遺跡。亦以夙仰其風也。有指其池以相告者。曰。此東坡所濬蓮池。卽其讀書處也。近有生徒剗荷爲畹。樹以稻。其人夜夢三蘇公令人笞之。旣而司道來謁。詰之。得其狀。怒而重責之。禁不得再藝。衆皆異之。謂東坡之精靈未泯也。有指其樹以相告者。曰。此者老泉手所植榆也。大數十圍。中枯有罅。可容數人。牧童往往攀入戲蹂。近以塵飛雨注。罅漸以合。而枝葉復生。衆皆異之。謂老泉之精靈未泯也。嗚乎。池開于東坡。樹植于老泉。數百年之後。猶能使盜者被譴。枯者起榮。況其所爲文與詩。發乎性情。會乎神景。才思精縑。盡在于斯。使其淪沒不傳於世。彼文定者。其在天之靈。又當何如也邪。或又曰。眉舊有三蘇集。迺前大巡朱兩崖檄其州守所刻也。謂三蘇眉人。而眉無集刻。亦所以重其里也。但板已昏漉。而詩體未備。終爲缺典也。然則今日斯集之刻。是又不但補蘇集之未備。而文定公數百年才思所發。得以流布天下。垂諸不朽。其視東坡之蓮。老泉之榆。水木花草。

一物之微。尙克永世者。豈可同年語邪。歸成都。適集刻告成。因以所聞者爲王言之。王喜其說。謂此正不忘先賢遺澤之意也。遂書以爲序。

嘉靖辛丑夏五月。巡按四川監察御史。前翰林吉士交河王珩序。

欒城集凡例總目

- 一、文定諡議共七葉。原本在三卷目錄之後。今冠諸目錄之前。以諡議重自朝廷。而三集亦公生前事也。
- 一、欒城三集目錄。舊總一冊。今惟前集附諡議後。而後集三集俱附各集前。蓋以類相從。且便閱也。
- 一、詩類同題各出。除同卷相去不遠者歸併。餘仍因之。如九日九首。散見於後集三集。凡三出之類。意亦隨年遞書云爾。
- 一、廟號。舊本每空二字。今一直書下。時非宋也。
- 一、欒城集。舊五十卷。今并目錄。總九百七十二葉。
- 一、欒城後集。舊二十四卷。今并目錄。總三百四十三葉。
- 一、欒城三集。舊十卷。今并目錄。總一百零九葉。

蘇文定公諡議

承淳熙三年七月十三日勅。中書門下省尙書省送到吏部狀。准禮部關。准都省批下。故門下侍郎蘇轍定諡事。今具下項。一准禮部關。承淳熙三年二月二十四日勅。試禮部尙書兼侍讀兼給事中兼吏部尙書趙雄劄子奏。臣竊詳國朝故實。名臣旣歿而不乞諡者。往往因臣寮建請。特賜徽稱。故楊徽之之諡文莊。宋綬寔請之。宋祁之諡景文。張方平寔請之。張方平之諡文定。蘇轍寔請之。凡以尙賢報功。昭示無極。聖王之所以寵綏臣子者。於是至矣。臣伏見故門下侍郎蘇轍。初以制舉對策。受知仁宗。乍起草萊。而鯁亮切直之聲。固已震耀天下。晚乃歷踐臺省。遂躋政途。其絕學長才。嘉言讜論。與夫進退終始大節。天下公論。可考不誣。而寥寥數十年。易名之恩。未加在於盛明之朝。總覆之政。誠爲闕典。況自頃歲。陛下加惠蘇軾。賜諡文忠。德音流行。天下傳誦。轍之平生梗概。與軾略同。而宦達過之。臣愚欲望聖明。依軾近例。特與蘇轍賜諡。以示褒勸。臣謬司拜禮。職所當言。況有宋綬張方平建請故事。則區區僭越之罪。或可望於裁赦也。取進止。三省同奉聖旨。依令禮部太常寺擬定。申尙書省。續准淳熙三年四月十五日勅。三省同奉聖旨。今後王公及職事三品以上。法應得諡。并勳德節義。聲實彰著。不以官品特命諡者。並先經有司議定。申中書門下省。具奏取旨。依舊制。更不命詞。止備坐所議。給告。吏部牒本家照會。禮部太常寺。今擬定諡曰文定。道德博聞曰文安。民大慮曰定。并承議郎行太常博士章謙撰到諡議一本。頭連在前。伏乞朝廷詳酌。指揮施行。申都省後。批禮部太常寺申。擬定蘇轍賜諡。五月二十三日送禮吏部。照應淳熙三

年四月十五日已降指揮施行。一檢准淳熙三年四月十五日勅。三省同奉聖旨。今後王公及職事官三品以上。法應得諡。并勳德節義。聲實彰著。不以官品特命諡者。並先經有司議定。申中書門下省。具奏取旨。依舊制。更不命詞。止備坐所議。給告吏部牒。本家照會。一尋行下太常寺擬諡。去後。據太常寺申繳到承議郎行太常博士章謙撰議曰。門下蘇公。歿逾六十年矣。天子始從其鄉人大宗伯之請。詔禮部奉常同議命諡。謹按諡法。道德博聞曰文。安民大慮曰定。請以是易公名。惟公挺生西蜀。毓秀山川。天材最高。資稟實厚。而又有父文安先生爲之師。有兄文忠公爲之師友。蓋其所學所行。皆本原乎家傳。而文章事業。卓乎可敬而仰也。嗚呼。公爲元祐名臣。行事在國史。聲名在天下。人其誰不知之。宜不待歷數以合文定之諡者。請粗陳其略。觀公少年擢兩科。與其父兄俱以文名世。而公之文汪洋澹泊。深醇溫粹。似其爲人。文忠嘗稱之。以爲實勝己。其所爲詩騷銘頌書記論議。與夫代言之作。率大過人。蓋流傳於人間。散落於夷狄者。不知其幾。而所謂愛重其文。則一也。嘗傳詩春秋。訓釋先儒之未達。又注老子。深窮道德之旨。而發明佛老之相類。其後作古史。所論益廣。以刪補子長雜亂殘闕之失。書成。撫之而歎。自謂得聖賢處身臨事之微意。末復論著歷代。大抵以考古今成敗得失爲要。不務空言。此其道德博聞之淵源者如是。可不謂文乎。本朝至仁皇世。可謂極盛。公對制策。方切切然以海內窮困生民愁苦爲憂。雖賈誼痛哭流涕之書。不過也。青苗八使。擾民之事。其施行甚明。公與王介甫陳陽叔辯爭之尤力。及元祐新政。公居言路。首陳神宗變法。本欲利民。爲社稷長久之計。而民力顧因之以凋弊者。其原皆起於大臣蔽塞聰明之所爲。由是蔡呂之徒。竟皆貶竄。然新政既孚。事勢一定。大臣乃有欲引用熙豐舊臣。爲自全計者。公手疏

千餘言。極論君子小人之不可並處而爭。小人必勝。非朝廷安靜之福。蓋是時公之所爭議。大者唯黃河西邊二事。次則差顧役法也。深知黨臣之撼搖。在位者幸四弊之不去。以藉口而已。故又爲之論奏。願詔大臣正己平心。無生事要功之意。因弊脩法。爲安民靜國之術。民心旣得。異議自消。至論詩賦經義之兼行。未可遽合祭天地之禮。所當復三司利權之不可分。皆反覆精詳。未嘗不以謀國體。便人情爲慮也。此其安民大慮之深遠者如是。可不謂定乎。自後世去古旣邈。好文之士。侈辭相高。連篇累牘。不出風雲月露之狀。而體益以靡。文則文矣。非所謂道德博聞之文也。清談之士。高論性命。視天下利害。怱然不屑以動心。殆若木偶人者。定則定矣。非所謂安民大慮之定也。而公則異於是。信其有功於治道。而有德於生民。文定之懿。今合以諡。公議者又何辭焉。謹議一。請本部郎中覆諡去後。承承議郎行祕書省著作佐郎兼權考功郎官何萬覆諡議曰。是非待諡而後定。諡於往者重也。數十年之後。是非旣定。命諡以寵之。諡之美惡。以助勸沮。諡於來者亦重也。夫位足以經世。要有其學。才足以救時。要有其心。無其學。未發而所到可知已。無其心。禍福利害。皆足以移之。傑然異於是。蓋寡也。思其人。可無以示勸哉。故門下侍郎蘇公轍。闕不作諡。邇臣以爲請。有詔禮部太常。其同定之。重是議也。按諡法。文之義十有八。道德博聞。莫如公。優定之義有九。安民大慮。莫如公。稱乃請諡。文定。上其議考功。豈非謂其有經世之學。有救時之心。於公無愧歟。公索深綜微。得之於天。嚮真茹醇。無待乎外。上窮邃古。下至其時。廢興治亂。得失成敗。之所以然。皆貫穿出入。如身歷目睹。少而對策。有愛君之言。已乃上書。陳治安之說。晚年黜不用。於是傳詩春秋老子。作古史。載之空辭。平生之所欲爲。與老而不得卒其所爲者。可以概見。要其歸在於治國平天下。邇其

學本末可考也。初王荆公之以執政領三司條例也。公爲其屬。不爲屈。歷疏其不便。謝去。元祐初。旣爲諫官。取前日所爲弊與其人。悉奏論之。然司馬溫公爲相。欲盡變顧役法。文潞公繼之。又欲回河流於東。二公清德重望。最知公者。公亦不以爲便。蓋進退得喪。好惡怨德。一不以留胸中。而視百姓有繇。此以重困失職。則怒焉。若無以安也。爲侍從。不粗辨一職。以塞責而止。以爲天子所使。以論思天下事。當無不言。凡冬溫大旱。水潦陰雪。必建言某政有闕失。某事當罷行。有罪而不誅。幾人無功而受賞。又有幾賞責已當。求言以開廣上意。及在政府。日至上前。與宰相爭用人邪正。邊議曲直。與行事當否。退而批語。有不如奏對吏辯詰。雖休謁出。而見所舉或未善。必追論之。未嘗曰事不出于我。非吾咎。不顧也。勢移事異。猶懇懇論治道。至謫逐不悔。此其心。豈擇所趨避。委時於危不救者。是以九年之間。朝廷尊公路關。忠賢相望。貴倖斂跡。邊陲綏靖。百姓休息。君子謂公之力居多焉。信也。自公之貶。紹聖以權臣用事。崇觀以姦臣執柄。皆公昔所累疏數言。不足倚以事者。使公不去。其言用。寧有後日之禍。公之去。天也。然公身雖屑。道愈高。籍雖錮於黨人。天下愈推爲正臣鉅德。渡江之後。旌錄有詔。今距公死。又六十有五年矣。猶詔易名。以褒之。俾爾士大夫。遠實飾虛。貪近忘遠。知苟榮於一日。不顧遺臭於後世者。觀公遭迴困躓。顧不若鄉世好。以爲身圖者之安。然而此等泯泯就盡。餘累汗逮孫子。而公休澤顯聞。乃垂懿無窮。是則名節苟全。爵祿不足驕。公議終在。邪說不能勝。其亦庶幾知勸也。夫文定二名。豐約惟允。請如博士議。謹議。今來本官合出告。伏候指揮。七月十三日。三省同奉聖旨。依。

欒城集目錄

第一卷

詩五十二首

郭綸

初發嘉州

過宜賓見夷中亂山

夜泊牛口

戎州

舟中聽琴

泊南井口期任遵聖

江上早起

江上看山

山胡

白鷗

屈原塔

嚴顏碑

竹枝歌

望夫臺

八陣磧

鬩瀕堆

入峽

巫山廟

巫山廟烏

昭君村

三遊洞

寄題清溪寺

息壤

荆門惠泉

答荆門張都官維見和惠泉

涘陽早發

襄陽古樂府二首野靡來
襄陽樂

雙鳧觀

懷黽池寄子瞻兄

辛丑除日寄子瞻

次韻子瞻減降諸縣囚徒事畢登覽

次韻子瞻太白山下早行題崇壽院

次韻子瞻延生觀後山上小堂

次韻子瞻題仙遊潭中興寺

石鼻城

礮溪石

鄆塢

樓觀

次韻子瞻秋雪見寄二首

次韻子瞻聞不赴商幕三首

次韻子瞻病中大雪

次韻子瞻記歲莫鄉俗三首

記歲首鄉俗寄子瞻二首

踏青
守歲
蠶市

別歲

子瞻寄示岐陽十五碑

第二卷

詩六十九首

畫文殊普賢

聞子瞻重遊南山

子瞻見許驪山澄泥硯

寒食前一日寄子瞻

大人久廢彈琴比借人雷琴以記舊曲十得三四率爾拜呈

聞子瞻習射

種菜

次韻子瞻題薛周逸老亭

次韻子瞻題長安王氏中隱堂五首

和子瞻鳳翔八觀八首

石鼓
摩像

咀楚文
東湖

真興寺閣

道子畫

楊惠之塑維
秦穆公毫

聞子瞻將如終南太平宮谿堂讀書

次韻子瞻麻田青峯寺下院翠麓亭

次韻子瞻宿南山蟠龍寺

賦園中所有十首

和子瞻記夢二首

次韻子瞻題岐山周公廟

次韻子瞻題扶風道中天花寺小亭

次韻子瞻南溪避世堂

和子瞻三遊南山九首

樓觀 五部 仙遊 潭 經臺 大秦寺 五首

和子瞻調水符

次韻子瞻招隱亭

次韻子瞻凌虛臺

次韻子瞻竹飈

次韻子瞻漢陂魚

和子瞻讀道藏

次韻子瞻南溪微雪

和子瞻司竹監燒葦園因獵園下

木山引水二首

興州新開古東池

子瞻喜雨亭北隋仁壽宮中怪石

用林歿韻賦雪

送張唐英監閬州稅

送張師道楊壽棋二同年

送家定國同年赴永康掾

送霸州司理翟曼

送道士楊見素南遊

利路提刑亡伯郎中挽詞二首

亡伯母同安縣君楊氏挽詞

第三卷

詩七十五首

北京送孫曼叔屯田權三司開拆司

和強至太博小飲

和強君瓦亭

中秋夜八絕

次韻王君貺尙書會六同年

王公生日

次韻姚孝孫判官見還岐梁唱和詩集

次韻王臨太博馬上

次韻王君北都偶成三首

次韻沈立少卿白鹿

送陳安期都官出城馬上

登上水關

寒食贈遊壓沙諸君

明日安厚卿強幾聖復召飲醉次前韻

次韻柳子玉郎中見寄

秀州僧本瑩淨照堂

京師送王頤殿丞

石蒼舒醉墨堂

遊淨因院寄璉禪師

送柳子玉

送蘇公佐修撰知梓州

送任師中通判黃州

南窗

次韻楊褒直講攬鏡

送錢婺州純老

次韻柳子玉見贈

次韻任遵聖見寄

次韻劉貢甫學士畫松石圖歌

送頓起及第還蔡州

初到陳州二首

柳湖感物

柳湖久無水悵然成詠

次韻孫戶曹朴柳湖

贈李簡夫司封

次贈李簡夫秋園

題李簡夫葆光亭

次韻李簡夫因病不出

張安道尙書生日

送劉道原學士歸南康

題滑州畫舫齋贈李公擇學士

送王恪郎中知襄州

和張安道讀杜集

送張公安道南都留臺

傅欽之學士濟源草堂

文與可學士墨君堂

故成都尹陸介夫挽詞

次韻柳子玉謫官壽春舟過宛丘見寄二首

次韻子瞻穎州留別二首

陪歐陽少師永叔燕穎州西湖

歐陽公所蓄石屏

次韻子瞻初出穎口見淮山

次韻子瞻壽州城東龍潭

和子瞻渦口遇風

和子瞻濠州七絕塗山 彭祖廟 遺遙堂 觀魚臺

和子瞻泗州僧伽塔虞姬墓 四望亭 浮山洞

次韻子瞻發洪澤遇大風卻還宿

次韻子瞻記十月十六日所見

第四卷

詩七十四首

次韻子瞻廣陵會三同舍各以其字爲韻劉貫甫 孫巨源

和子瞻金山

和子瞻焦山

次韻子瞻遊甘露寺

李簡夫挽詞二首

次韻子瞻初到杭州見寄二絕

和柳子玉地爐

和柳子玉紙帳

次韻子瞻遊孤山訪惠懃惠思

宛丘二詠

贈提刑賈司門

同陳述古舍人觀芍藥

次韻子瞻見寄

趙少師自南都訪歐陽少師於潁州留西湖久之作詩獻歐陽公

次韻子瞻望湖樓上五絕

和柳子玉共城新開御河過所居牆下

歐陽太師挽詞三首

賦黃鶴樓贈李公擇

次韻子瞻餘杭法喜寺綠野亭懷吳興太守孫莘老

和子瞻宿臨安淨土寺

和子瞻自淨土步至公臣寺

次韻子瞻遊徑山

次韻子瞻自徑山回宿湖上

次韻子瞻題孫莘老墨妙亭

熙寧壬子八月於洛陽妙覺寺考試舉人及還道出嵩少之間至許昌共得大小詩二十六首

洛陽試院樓上新晴五絕

和頓主簿起見贈二首

將出洛城過廣愛寺見三學演師觀楊惠之塑寶山朱瑤畫文殊普賢爲賦一首

登封道中三絕緱山祠 環轅道 少林寺 贈頓起

登嵩山十首石徑 法華岩 將軍栢 吳道子 畫四真君 啓母石

過韓許州石淙莊

過登封閻氏園

許州留別頓主簿

次韻子瞻登望海樓五絕

和子瞻監試舉人

和子瞻煎茶

次韻子瞻對月見憶并簡崔度

和子瞻開湯村運鹽河中督役

次韻子瞻雨中督役夜宿水陸寺二首

次韻子瞻將之吳興贈孫莘老

和子瞻畫魚歌

第五卷

詩六十六首

次韻子瞻吳中田婦歎

次韻子瞻遊道場山何山

癸丑二月重到汝陰寄子瞻二首

次韻子瞻二月十日雪

和子瞻題風水洞

次韻子瞻新城道中

次韻子瞻山村五絕

次韻子瞻遊富陽普照寺

次韻子瞻自普照入山獨遊二庵

次韻子瞻與蘇世美同年夜飲

次韻子瞻病中遊虎跑泉僧舍二首

和子瞻東陽水樂亭歌

次韻子瞻有美堂夜歸

次韻子瞻祈雨

次韻子瞻再遊徑山

王仲儀尙書挽詞

次韻范景仁侍郎移竹

寄顯蒲傳正學士閩中藏書閣

自陳適齊戲題

送董揚休比部知真州

送排保甲陳祐甫

送韓祗嚴戶曹得替省親成都

和孔教授武仲濟南四詠

環波亭
鵲山亭

北渚亭
橙泉亭

踏藕

和李誠之待制燕別西湖

送李誠之知瀛州

西湖二詠

觀捕魚
食雞頭

次韻孫推官朴見寄二首

送張正彥法曹

送青州簽判俞退翁致仕還湖州

和青州教授頓起九日見寄

題徐正權秀才城西溪亭

和子瞻喜虎兒生

次韻子瞻病中贈提刑段繹

次韻子瞻賦雪二首

次韻韓宗弼太祝送遊太山

次韻劉敏殿丞送春

次韻趙至節推首夏

次韻李昭敘供備燕別湖亭

送李昭敘移黎陽都監歸洛省親

遊太山四首

初入南山四禪寺
靈岩寺巖下

送王璋長官赴真定孫和甫辟書

寄孫朴

和韓宗弼暴雨

舜泉復發

次韻徐正權謝示閔子廟記及惠紙

張文裕侍郎挽詞

東方書生行

送韓宗弼

送劉長清敏

汝尚將歸吳興齊州記室蘇子由辱詩爲送因逐韻謝之云

第六卷

詩一百首

題張安道樂全堂

和鮮于子駿益昌官舍八詠

桐軒 竹軒 齋 閑 燕亭

栢軒 巽堂 會景亭 寶峯亭

次韻分司南京李誠之待制求酒二首

送施歷城歸常州

施君既去復以事戲贈

和文與丁洋州園亭三十詠

湖橋 橫湖 待月臺 書軒 冰池 灑泉亭 菡萏軒 北園

藥洞 蕪筍谷 寒廬港 野人廬 此君庵 金橙逕 南園

露香亭 涵虛亭 溪光亭 過溪亭 披錦亭 禊亭 藟嶼 筠亭 望雲樓 無言亭

秋浦亭 蓼嶼 霜筠亭 望雲樓 無言亭

次韻吳興李行中秀才見寄并求醉眠亭詩二首

和子瞻玉盤盂二首

寄題密州新作快哉亭二首

寄題密州新作快哉亭二首

贈馬正卿秀才

答文與可十首

次韻李公擇寄子瞻

次韻李公擇以惠泉答章子厚新茶二首

和李公擇赴歷下道中雜詠十二首

泛清河

將至桃園阻淺且風不得進

桃園阻淺將易小舟一夜水大至復乘便風頃刻百里

下邳黃石公廟

宿遷項羽廟

呂梁

梁山泊

梁山泊見荷花憶吳興五絕

次韻李公擇九日見約以疾不赴

喜雪呈李公擇

次韻范郎中仰之詠雪

次韻李公朝著作見贈二首

惠穆呂公挽詞二首

次韻蔣夔寒夜見過

次韻王鞏廷評招飲

雪中會孫洙舍人飲王氏西堂戲成三絕

雪中呈范景仁侍郎

次韻景仁丙辰除夜

次韻景仁招宋溫之職方小飲

次韻景仁飲宋溫之南軒二首

次韻景仁正月十二日訪吳縝寺丞二絕

柳子玉郎中挽詞二首

贈淨因臻長老

次前韻答景仁

遊城西集慶園

遊景仁東園

詩五十六首

次韻子瞻送范景仁遊嵩洛

送蔣夔赴代州教授

次韻宿州教授劉涇見贈

徐州送江少卿

次韻子瞻寄眉守黎希聲

和李邦直學士沂山祈雨有應

陪子瞻遊百步洪

李邦直見邀終日對臥南城亭上二首

次韻邦直見答二首

再次前韻四首

雨中陪子瞻同顏復長官送梁燾學士舟行歸汝上

同子瞻泛汴泗得魚酒二詠

明日復賦

贈吳子野道人

李邦直出巡青州余不久將赴南都比歸不及見矣作詩贈別

司馬君實端明獨樂園

送顏復赴闕

王誥都尉寶繪堂詞

逍遙堂會宿二首

過張天驥山人郊居

魏佛狸歌

雜興二首

贈致仕王景純寺丞

初發彭城有感寄子瞻

次韻子瞻見寄

將至南京寄王鞏

次韻王鞏見贈

送交代劉莘老

次韻王鞏九日同送劉莘老

次韻王鞏欲往徐州見子瞻以事不成行

宣徽使張安道生日

章氏郡君挽詞

聞王鞏還京會客劇飲戲贈

次韻王鞏遊北禪

次韻王鞏懷劉莘老

飲餞王鞏

送王鞏兼簡都尉王詵

呂希道少卿松局圖

寄孔仲武

孔君亮郎中新葺闕里西園棄官而歸

寄濟南守李公擇

雪中會飲李倅鈞東軒三絕

張恕寺丞益齋

除夜會飲南湖懷王鞏

次韻張恕戲王鞏

送韓運判官李公恕還朝

第八卷

詩六十八首

寄范文景上

次韻王鞏上元見寄三首

謝張安道惠馬

次韻子瞻贈梁交左藏

寒食遊南湖二首

觀大閱

送林子中安厚卿二學士奉使高麗二首

送趙屺祕書還錢塘

馬上見賣芍藥戲贈張厚之二絕

答見和

送呂希道少卿知滁州

次韻張烈春莫

次韻傅宏推官義方亭

次梁交之徐州

次韻王鞏見寄

次韻李逵見贈

次韻秦觀秀才攜李公擇書相訪

送龔鼎臣諫議移守青州二首

送余京同年兄通判嵐州

次韻王鞏見寄

河上莫歸過南湖二絕

送提刑孫頤少卿移湖北轉運

次韻劉涇見寄

城南訪張恕

同李倅鈞訪趙嗣恭留飲南園晚衙先歸

次韻轉運使鮮于侁新堂夜月

送梁交供備知莫州

秋祀高禱二絕

過興教贈劉上人

次韻王鞏代書

次韻南湖清飲二首

次韻偶成

中秋見月寄子瞻

次韻王鞏自詠

次韻王鞏同飲王廷老度支家戲詠

送王鞏之徐州

次韻張恕九日寄子瞻

戲次前韻寄王鞏二首

贈杭僧道潛

張安道生日二首

李鈞壽花堂

次韻子瞻題張公詩卷後

次韻廣州陳繹諫議和陳薦宋敏求二圖龍二首

次韻土廷老寄子瞻

次韻頓起考試徐沂舉人見寄二首

送李鈞郎中

送文與可知湖州

次韻王鞏見寄

嘉雪呈鮮于子駿三首

次韻文務光秀才遊南湖

子瞻惠雙刀

留守與賓客會開元龍興寺觀燈余有故不預中夜登南城

第九卷

詩七十首

春日耕者

自柘城還府馬上

次韻子瞻人日獵城西

送鮮于子駿還朝兼簡范景仁

次韻秦觀見寄

次韻道潛見寄

次韻王鞏元日

送將官歐育之徐州

次韻答王鞏

次韻子瞻過淮見寄兼簡孫奕職方三首

次韻王鞏留別

次韻答孔武仲

送傅宏著作歸觀待觀城闕

連雨不出寄張恕

和子瞻自徐移湖將過宋都途中見寄五首

次韻劉貢父登黃樓懷子瞻

再和

陪杜充張恕鴻慶宮避暑

宋城宰韓秉文惠惠鑄茶

次前韻

答孔武仲

送吳思道道人歸吳興二絕

次韻答陳之方祕丞

登南城有感示文務光王適秀才

張公生日

次韻答張耒

次王適韻送張耒赴壽安尉二首

次韻張耒見寄

次韻王適兄弟送文務光還陳

次韻張芻諫議燕集

臘雪五首

次韻王適雪晴復雪二首

送呂由庚推官得替還洛中二首

四十一歲歲莫日歌

次韻子瞻繫御史獄賦獄中榆槐竹栢四首

次韻子瞻贈張愬子

過龜山

放開二首

次韻王適細魚

高郵別秦觀三首

召伯埭上斗野亭

次韻鮮于子駿遊九曲池

楊州五詠九曲池 平山堂
摘星亭 僧伽塔 蜀井

題杜介供奉熙熙堂

遊金山寄揚州鮮于子駿從事邵光

初至金陵

第十卷

詩九十六首

和孔武仲金陵九詠白鷺亭
此君亭 覽輝亭 定林院

鳳凰臺 天慶觀 高齋
八功德泉 見江亭

遊鍾山

郭祥正國博醉吟庵

湖陰曲

舟次大雲倉回寄孔武仲

池州蕭丞相樓二首

過九華山

佛池口遇風雨

舟次磁湖以風浪留二日不得進子瞻以詩見寄作二篇答之前篇自賦後篇次韻

黃州陪子瞻遊武昌西山

將還江州子瞻相送至劉郎洑王生家飲別

赤壁懷古

自黃州還江州

江州五詠

射蛟浦
東湖

琵琶亭
浪井

庾樓

不到東西二林

遊廬山山陽七詠

簡寂觀
萬杉寺

漱玉亭
三峽石橋

開先瀑布
白鶴觀

歸宗寺

南康州風遊東寺

寄題陳憲郎中竹軒

次韻孔武仲到官後見寄

次韻筠守毛維瞻司封觀修城三首

次韻子瞻夜字韻作中秋對月二篇一以贈王郎二以寄子瞻

次韻王適食茅栗

過毛國鎮夜飲

次韻毛國鎮趙景仁唱和三首一贈毛一贈趙一自詠

再和三首

次韻王適州學新修水閣

次韻毛君九日

次韻毛君感事書懷

次韻毛君見督和詩

次韻毛君山房遣興

和胡教授蒙太守策試諸生

和毛君州宅八詠

鳳凰山
李八百洞

被仙亭

煉丹井

方沼亭

磨劍池
翠榭亭
山房

次韻毛君病中菊未開

雨中宿酒務

次韻毛君經旬不用鞭扑

次韻李撫辰屯田修州門

飲酒過量肺疾復作

衢州趙閱道少師濯纓亭

茶花二首

次韻毛君山房卽事十首

再和十首

筠州二詠 牛尾狸 黃雀

第十一卷

詩八十六首

和毛君新葺困庵船齋

寒雨

積雨二首

戲贈李朝散

戲答

臨江蕭氏家寶堂

和蕭剡察推賀族叔司理登科還鄉四首

次韻吳厚秀才見贈三首

次韻毛君燒松花六絕

陪毛君遊黃仙觀

次韻王適梅花

次韻王適春雪二首

毛君惠溫柑荔枝二絕

次韻王適遊真如寺

次韻王適新燕

官居卽事

陪毛君夜遊北園

山橙花口號

次韻馮弋同年

送王適徐州赴舉

遊吳氏園

江州周寺丞泳夷亭

次韻毛君遊陳氏園

江漲

和子瞻鐵拄杖

競渡

登郡譙偶見姜應明司馬醉歸

送姜司馬

寄題趙帆承事戲綵堂

次韻溫守李鈞見寄兼簡毛大夫

次韻洞山克文長老

試院唱酬十一首戲呈試官呂防觀試進士呈試官次前韻賦次韻呂君見贈賦次韻呂君與善

作偶

放榜後毛守見招

送毛榜齋郎

燕貢士

次韻毛君請居探菊

次韻毛君見贈

次韻毛君偶成

孔平仲著作江州官舍小庵

送饒州周沃秀才免解

雪中洞山黃檗二禪師相詩

毛國鎮生日二絕

次韻毛君將歸

送楊騰山人

次韻子瞻與安節夜坐三首

次韻毛君上書求歸未報

次韻毛君絕句

次韻毛君留別

送毛君致仕還鄉

贈景福順長老二首并敘

次贈孔平仲著作見寄四首

陰晴不定簡唐覲祕校并敖吳二君五首

第十二卷

詩八十九首

雨後遊大愚

送高安羅令審禮

送唐覲

次韻唐覲送姜應明謁新昌杜簿

新種芭蕉

次韻姜應明黃檗山中見寄

次韻黃大臨秀才見寄

次韻李朝散遊洞山二首

簡學中諸生

以蜜酒送柳真公

次韻柳見答

披仙亭晚飲

余居高安三年每晨入莫出輒過聖壽訪聽長老謁方子明浴頭笑語移刻而歸歲月既久作一

詩記之

次韻子瞻感舊見寄

次韻和人豐歲

同孔常父作張夫人詩

次煙字韻答黃庭堅

東軒長老二絕

題方子明道人東窗

次前韻

迎寄王適

王度支陶挽詞二首

次韻陳師仲主簿見寄

寄題江渙長老南園茅齋

詠霜二首

次韻吳厚秀才見寄

乾荔枝

次韻王適元日并示曹煥二首

寄梅仙觀楊智遠道士

春雪

贈石臺問長老二絕

并敘

和毛國鎮白雲莊五詠

掬泉軒
濯纓庵

平溪堂
白雲莊偶題
眺遠臺

次韻王適落日江上二首

張秀才見寫陋容

同王適曹煥遊清居院步還所居

次韻王適春雨

和子瞻蜜酒歌

次韻講律李司理憲見贈

次韻王適遊陳氏園

答孔平仲二偈

次韻柳真公閑居春日

次韻王適東軒卽事三首

送李憲司理還新喻

問黃藥長老疾

復次煙字韻答黃大臨庭堅見寄二首

次韻子瞻臨臯新葺南堂五絕

次韻王適大水

贈三局能師二絕

臨川陳憲大夫挽詞二首

次韻知郡賈蕃大夫思歸

久不作詩呈王適

喜王鞏承事北歸

予初到筠卽於酒務庭中種竹四叢杉二本及今三年二物皆茂秋八月洗竹培杉偶賦短篇呈

同官

和王鞏見寄三首

復次韻

孔毅父封君挽詞二首

上高息軒起亭二絕

九月十一日事書

和王適寒夜讀書

和王適新葺小室

病方賈大夫相訪因遊中宮僧舍二首

和王適灸背讀書

同王適賦雪

第十三卷

詩八十六首

除夜

種蘭

上元夜

次韻王適元夜二首

王子立與遲等遊陳家園橋敗幾不成行晚自酒務往見之明日雨作偶爾成詠

幽蘭花二絕

胡長史祠堂

孫賓叟道人

新橋

曾子宣郡太挽詞二首

曾子固舍人挽詞

次韻王適一百五日太平寺看花二絕

又次韻遊小雲居

次韻秦觀梅花

復次前韻答潛師

景福順老夜坐道古人搐鼻語

畫枕屏

次韻王適留別

次韻子瞻特來高安相別先寄遲适遠卻寄邁迨過遯

次韻子瞻端午日與遲迨遠三子出遊

次韻子瞻留別三首

次韻子瞻行至奉新見寄

贈醫僧鑒清二絕

贈醫僧善正

食菱

留滯高安四年有餘忽得信聞當除官真揚間偶成小詩書于屋壁

洪休上人少年讀書以多病出家居泐潭爲馬祖修塔以三絕句來謁答一首

勉子瞻失幹子二首

偶遊大愚見餘杭明雅照師舊識子瞻能言西湖舊遊將行賦詩送之

將移績溪令

約洞山文老夜話

將之績溪夢中賦泊舟野步

謝洞山石臺遠來訪別

贈方子明道人

回寄聖壽聰老

乘小舟出筠江二首

寄題孔氏顏樂亭

徐孺亭

滕王閣

次韻道潛南康見寄

車浮井紋

題都昌清隱禪院

逢章戶掾赴澧州

除夜泊彭蠡湖遇大風雪

正旦夜夢李士寧過我談說神怪久之草草爲具仍以一小詩贈之

舟中風雪五絕

題南康大安宅五老亭

書廬山劉顥宮苑屋壁三絕

再遊廬山三首

汲陽阻風

張嘉祐

效韋蘇州調嘯詞二首

至池州贈陳鼎秀才

次韻遲初入宣河

次韻侯宣州利建招致政汪大夫

次韻侯宣城疊嶂樓雙溪關長篇

初到績溪眎事三日出城南謁二祠遊石照偶成四小詩呈諸同官

梓潼廟石照二首

汪王廟

縣中諸花多交代江君所栽牡丹已過芍藥方盛偶寄小詩

楊主簿日本扇

次韻答人幽蘭

次韻江法曹山間小酌

官舍小池有瀉鵬遺二小雛二首

次韻答人見寄

次韻答人檻竹

第十四卷

詩八十五首

次韻王荐推官見寄

郭尉愿惇夫以琳上人書詩爲示次韻

次韻汪琛監簿見贈

周昉畫美人歌

病中郭尉見訪

病後

復病三首

送琳老還大明山

病退

病後白髮

答琳長老寄幽蘭白朮黃精三本二絕

次韻侯宣城題疊嶂樓

初聞得校書郎示同官三絕

續溪二詠

豁然亭
翠眉亭

辭靈惠廟歸過新興院書其屋壁

郭尉惠古鏡

歙縣歲寒堂

邵武游氏老人三清堂紫芝

神宗皇帝挽詞三首

舟過嚴陵灘將謁祠登臺舟人夜解及明已遠至桐廬望桐君山寺縹眇可愛遂以小舟遊之作
二絕

沂潮二首

贈王復處士

張惕山人卽昔所謂惠思師也余舊識之於京師忽來相訪茫然不復省徐自言其故戲作二小
詩贈之

次韻子瞻送楊傑主客奉詔同高麗僧遊錢塘寄龍井辯才法師三絕

元絳參政挽詞

過王介同年墓

將遊金山寄元長老

元老見訪留坐具而去戲作一絕調之

元老和示小詩自謂非戰之罪復作一絕并坐具還之

子瞻與長老擇師相遇於竹西石塔之間屢以絕句贈之又留書邀轍同作遂以一絕繼之
高郵贈別杜介供奉

答王定國問疾

和子瞻次孫覺諫議韻題邵伯聞上斗野亭見寄

次韻子瞻題泗州監倉東軒二首

答顏復國博

次韻王定民宣德

河冰

復賦河冰四絕

河冰稍解喜呈王適

河冰復結復次前韻

題南都留守妙峯亭

次韻發運路昌衡淮南見山堂

送戴朝議歸蜀中

後省初成直宿呈子瞻二首

次韻子瞻送陳睦龍圖出守潭州

送千之姪西歸

駕幸親賢宅贈隨駕諸公

次韻子瞻飲道者院池上

答孔平仲惠蕉布二絕

次韻朱光庭司諫喜雨

次韻光庭省中書事

送張恕朝奉南京簽判二首

送賈訥朝奉通判眉州

次韻黃庭堅學士狂毛筆

李誠之待制挽詞二首

司馬溫公挽詞四首

送表弟程之元知楚州

送王震給事知蔡州

送王廷老朝散知虢州

送魯有開中大知洺州次子瞻韻

第十五卷

詩八十五首

送陳侗同年知陝府

次韻李曼朝散得郡西歸留別二首

送程建用宣德西歸

次韻子瞻杜介供奉送魚

次韻子瞻招王遽朝請晚飲

子瞻與李公麟宣德共畫翠石古木老僧謂之憩寂圖題其後

王君貺宣徽挽詞三首

送杜介歸揚州

次韻子瞻與鄧聖求承旨同直翰苑懷武昌西山舊遊

送楊孟容朝奉西歸

次韻孔武仲學士見贈

送家定國朝奉西歸

次韻劉貢父省上示同會二首

次韻孔武仲三舍人省上

送顧子敦奉使河朔

席上再送

次韻孔文仲舍人醑醪

送錢承制赴廣東都監

次韻曾子開舍人四月一二日扈從二首

再和二首

次韻張昌言給事省中直宿

次韻貢父子開直宿

去年冬轍以起居郎入侍邇英講不逾時遷中書舍人雖忝冒愈深而瞻望清光與日俱遠追記

當時所見作四絕句呈同省諸公

次韻張問給事喜雨

次韻宋構朝請歸守彭城

次韻劉貢父西掖種竹

次韻劉貢父省中獨直

得告家居次韻貢父見寄

黃幾道郎中同年挽詞二首

和王定國寄劉貢父

故濮陽太守贈光祿大夫王君正路挽詞二首

韓幹三馬

書郭熙橫卷

題王生畫三蠶蜻蜓二首

贈寫真李道士

次韻子瞻題郭熙平遠二絕

次韻錢勰待制秋懷

宿滎陽甯氏園

滎陽唐高祖太宗石刻像并敘

次韻劉貢父從駕

次韻劉貢父和韓康公憶其弟持國二首

聞京東有道人號賀郎中者唐人也其徒有識之者作詩記之

送家安國赴成都教授三絕

送歐陽辯

送韓康公歸許州

三日上辛祈穀除日宿齋戶部右曹元日賦三絕句寄呈子瞻兄

次韻王欽臣祕監集英殿井

集賢殿考試罷二首

問蔡肇求李公麟畫觀音德雲

五月一日同子瞻轉對

次韻劉貢父題文潞公草書

韓康公挽詩三首

送王宗望郎中赴河東漕

送高士敦赴成都兵鈐

盧鴻草堂圖

秦號夫人走馬圖二絕

韓幹二馬

試制舉人呈同舍諸公二首

次韻張去華院中感懷

送周思道朝議歸守漢州三絕

第十六卷

詩一百二十首

程之元表弟奉使江西次前年送赴楚州韻戲別

表弟程之邵奉議知泗州

次韻子瞻書黃庭內景卷後贈蹇道士拱辰

次韻子瞻好赤頭

送葆光蹇師遊廬山

同子瞻次梅聖俞舊韻題鄉舍木山

次韻子瞻送千乘千能

題王詵都尉畫山水橫卷三首

次韻子瞻十一月旦日鎖院賜酒及燭

送周正孺自考功郎中歸守梓潼兼簡呂元鈞三絕

雪中訪王定國感舊

次韻王定國見贈

王子難龍圖挽詞

次韻季豸秀才來別子瞻仍謝惠馬

呂司空挽詞三首

范蜀公挽詞三首

范百嘉百歲昆仲挽詞二首

安厚卿樞密母夫人詞挽二首

題李公麟山莊圖二十六首建德館樓雲室墨禪堂祕全庵華岩堂延華洞雲鄉閣澄元谷癸真塢雨花岩冷洽谷瓔珞

王龍峽觀音岩垂雲泝勝
金岩寶華岩陳彭深鵲源

將使契丹九日對酒懷子瞻兄并示坐中

題王詵都尉設色山卷後

次韻子瞻相送使胡

歐陽文忠夫人挽詞二首

歐陽伯和仲純挽詞二首

奉使契丹二十八首次莫州通判劉涇韻二首贈知雄州王崇極二首贈右番趙君偶以徵

恙乘馳車而行戲贈二絕句呈同事二首絕句出山過楊無敵廟燕水館寄日子瞻
兄四絕木葉山虜帳十日南歸馬上口占呈同事傷足惠州寄內渡日乾

送文太師致仕還洛三首

李公麟陽關圖二絕

學士院端午帖子二十七首皇帝閣六首皇太妃閣五首夫人閣四首皇太后

次韻門下劉侍郎直宿寄蘇左丞

次韻張耒學士病中二首

次韻張君病起二首

賦八首

巫山賦

屈原廟賦

鈇硯賦并敘

祭真興寺樓賦

超然臺賦并敘

服茯苓賦并敘

墨竹賦

黃樓賦并敘

第十八卷

辭五首

御風辭

上清辭

楊樂道龍圖哀辭并敘

劉凝之屯田哀辭并敘

鮮于子駿諫議哀辭并敘

詩二首

太白山祈雨詩

舜泉詩并敘

銘二首

彭城漢祖廟試劍石銘并敘

鳳味石硯銘并敘

頌二首

筠州聰禪師得法頌并序

等軒頌

第十九卷

新論三首 上中下

第二十卷

策問三十五首

殿試武舉策問一首

南省進士策問一首

河南府進士策問三首

私試進士策問二十八首

私試武學策問二首

第二十一卷

書一首

上皇帝書

第二十二卷

書十首

上樞密韓太尉書

上昭文富丞相書

上曾參政書

上兩制諸公書

上劉長安書

答徐州陳師仲書二首

答黃庭堅書

答徐州教授李昭玘書

上洪州孔大夫論徐常侍墳書

第二十三卷

記九首

筠州聖祖殿記

齊州閔子祠堂記

上高縣學記

京西北路轉運使題名記

齊州灤源石橋記

光州開元寺重修大殿記

筠州聖壽院法堂記

廬山棲賢寺新修僧堂記

杭州龍井院訥齋記

第二十四卷

記九首

東軒記

武昌九曲亭記

王氏清虛堂記

吳氏浩然堂記

黃州快哉亭記

黃州師中庵記

南康真節堂記

洛陽李氏園池詩記

太子少保趙公詩石記

第二十五卷

墓表銘四首

伯父墓表

歐陽文忠公夫人薛氏墓志銘

全禪師塔銘

閑禪師碑

傳二首

孟德傳

丐者趙生傳

敘三首

類篇敍

古今家誡敍

洞山文長老語錄敍

第二十六卷

祭文一十七首

祭歐陽少師文

祭文與可學士文

祭永嘉郡夫人馬氏文

祭正統州伯敷文

祭鄧內翰母郡太君文

祭曹演父朝議文

祭范蜀公景仁文

祭忠獻韓公文

祭姪林文

代李公儀諫議祭張文裕侍郎文

代張公安道祭李宥侍郎文

代南京留守祭永嘉郡夫人馬氏文

代張公祭蔡子正資政文

代毛筠州祭王觀文詔文二首

代三省祭司馬丞相文

代三省祭門下韓侍郎曾孫文

祝文一十六首

陳州食日禱諸廟文

陳述古舍人辭廟文二首

齊州祈雨雪文二首

徐州漢高帝廟祈晴文

南京祈禱文七首

績溪謁城隍文

謁孔子廟文

祭靈惠汪公文

青辭三首

齊州祈雨青辭

南京祈晴青辭

筠州祈雨青辭

第二十七卷

西掖告詞六十一首

林希集賢殿修撰知蘇州

楊傑知潤州

陳安期屯田郎中

蔡立知鄂州

盛南仲知衡州

許中正致仕覃恩改朝議大夫

虞肇智鼎州

胡田知誠州邢浩知欽州

王存磨勘改朝散郎

梁惟簡供備庫使

張璟光祿大夫資政殿學士知鄭州

趙君錫大常少卿

劉絢太學博士

鄧義叔主客郎中

林旦侍御史權淮南運副

田待問淮南運判可淮南提刑

陳紘可倉部郎中王古可工部郎中

孫升監察御史可殿中侍御史

李常蔡延慶並轉朝議大夫

徐彥孚澶州通判

章惇知揚州

邢恕知汝州

王令圖可都水使者

王荀龍知澶州李孝純知棗州

郭逵自致仕起知潞州

何正臣知梓州

孫覽河北運副除右司郎官

陶世延弼孫弼死於順州邢選吉子吉死於盜各補三班借職

皇兄令羽磨勘轉遙圖

張輔之入內侍省磨勘轉內殿承制

范鎮可侍讀太一宮使

吳師仁可越州司法充杭州教授尹才虢州司戶田述古襄州司法蘇昞邠州司戶

叔諄敍右千牛衛將軍

潢履磨勘改朝請郎

宋彥圖轉內殿崇班再知歸信容城縣臧定國轉西頭供奉官再任縣尉

張利一自真定總管移知代州

莊公岳成都提刑蘇泌利州運判

內臣馮景降一官

胡宗哲遂州張太寧漢州

李榘知唐州

崔全通判延州

王純臣通判岷州

姚兕磨勘轉東上閣門使

丁隲太常博士

常安民大理寺丞

田子諒湖南運判

鄭佶都水監丞陳安民簿

葉康弼知劍州

謝卿材河北轉運使自陝漕徒

蔡卞磨勘朝奉郎

丁恂少府主簿

張構再知豐州

呂太防中書侍郎中

劉摯右丞

傅堯俞御史中丞

張端答致仕依前朝奉郎

孟永和轉軍器庫副使兼翰林醫官副使

蔡卞知江寧府

王安禮知揚州

林希知宣州

王舜圭除左班殿直

第二十八卷

西掖告詞六十一

郊壇通判永寧軍

叔攷等三十二人並除右班殿直

王宗孟母封壽昌縣太君

胡宗愈吏部侍郎

顧臨給事中

范子奇司農卿

馬默河東運使

岑象求利州運判何琬江西運判

常安民鴻臚丞

李誥自軍頭司除知忻州

郊壇通判睦州

李琬太醫丞充中嶽廟令

王鞏通判揚州

劉奉世起居郎孔文仲起居舍人

胡宗炎將作少監

向宗良知衛州

祁觀除借職

曾肇中書舍人

郝恕知汝州

李周陝西運使

劉淑蘇州胡宗哲宿州

許彥先知隨州

孫諤太學博士

王佺通判荆南

韓玠通判河南

占城國進奉判官蒲霞辛可保順郎將

劉放中書舍人

曹誦遙團知保州

王獻可火山軍李昭敍石州

鄒極江西提刑何琬府界提刑

葉溫叟度支郎中

吳革江西運判

杜常兵部郎中

榮咨道通判鎮戎軍

錢式三班借職

翰林醫官陳易簡等六人比舊各減三官牽復

李括知洋州

張士澄通判定州

彭次雲吏部郎中

章棗吏部馬琬戶部韓宗古司封吳安憲都官黃景職方郎官

盛僑國子司業

黃庭堅著作佐郎

陳侗直祕閣知梓州

晏知止成都運副秦中梓州運副

游酢太學錄

張舜民監察御史

張績祕書省正字

李執柔司農寺丞

陳烈落致仕州教授

龔原國子監丞

仲葩遙刺

吳淵西頭供奉官僉諤左侍禁

袁說知博州

閻木太學博士葉濤正

宋寶除承務郎

韓忠彥樞密直學士知定州

劉敏知辰州

龐希道復翰林醫學

克勅仲嘗並磨勘改正任防禦使

蔡確改知安州

呂公孺知秦州

第二十九卷

西掖告詞六十一首

仲鸞等六人磨勘防禦使

張之諫知德順軍

寇誦覃恩改朝請大夫

郭時亮通判海州

安宗說知利州

范子奇河北轉運使

吳安持司農少卿崔公度將作少監

王兢湖南提刑

錢喚知真州

王漸知階州郭逢知德順軍

蕭世元石州李昭敍忻州李詵隰州

致仕馬充等以登極恩改承奉郎

燕若濟知東明縣

陳向知楚州

士鱣磨勒轉右監門衛大將軍

黃好謙知濮州

張脩駕部郎中

王瑜京西提刑

康識權發遣鄜州今落權發遣

楊叔儀少府少監守本官致仕

融州歸明楊晟該等改右班殿直

曾肇磨勒改朝散郎

蕃官折師武覃恩改西頭供奉官

郭知章知海州江公著通判陳州

黃好謙知潁州

霍唐臣知濠州

晁端彥吏部郎何洵直司勳郎顏復禮部郎

辛懋太常博士韓宗文光祿丞孔平仲太僕丞

元耆寧館閣校勘換校書郎

梁燾轉朝奉大夫

張淳知長垣縣

李清臣資政殿學士知河陽

張整皇城使廣西鈴轄加遙刺再任以交人理會地界之故

醫官亢瑞敍摧易使

交趾使黎鍾吏外副社英輩東頭供奉官

鄧忠臣祕書省正字

成卓降兩官監筠州酒稅

仲浹轉正任防禦使

曹評正任防禦使

熊本降授朝散大夫

張綬湖南提刑

劉當時太僕簿

張審古尙書省都事出職改朝奉大夫

陳遊古知沂州

周純知虢州朱陽縣

宋子儀大理寺丞

秦晉國安仁保祐夫人張氏特封吳楚國安仁賢壽夫人

彭汝礪右史

王陟臣右司郎中

王古吏部員外郎

張詢浙憲

陝西移四通判

蔡潛除司農簿

令疎除右千牛衛將軍

張元方權發遣府界提點

周邠遍判壽春

魏璋敍奉議郎熙河機宜

常安民太常博士

豐稷工部員外郎

沈季長少府少監

林英大理少卿

第三十卷

西掖告詞五十九首

姚勔宗正丞

林希湖州周之純宣州沈季長秀州

李傑梓州提刑陳鵬運判

呂陶京西運副上官均北部員外郎

史宗範知涇州

黃慶基鴻臚丞

張响戶部員外郎錢長卿刑部員外郎

大名府驍武第一指揮都虞候楊政等士人可並左右侍禁

韓維守本官資政殿學士知鄧州

李士京將作丞余中軍器丞

劉務誠三班奉職

王袞知兗州

馮宗道遙郡刺史

胡田知誠州改爲軍除爲知軍

陳安石知襄州

孫懷用知寧化軍郝逢知岢嵐軍

王愈光祿丞

姚勛祕書丞

蒲宗閔知興元府史宗範知廬州

林顏權知泉州

孔平仲太常博士

西蕃首領溫溪心年欽氈二人並除化外州團練

鄭佶知單州

孫之敏知雍丘楊瓌寶知咸平

許懋右司郎中

陳軒主客郎中

豐稷殿中侍御史

陳知晦蔡州簽判

向宗旦司農少卿

侯利建京東漕井亮采河東漕

馬城湖北憲

林積知福州

朱服權發遣泉州

林顏知濠州

今芑以率府率講書授通直郎

張審古知登州

高遵易改知全州

何琬工部郎中

崔公度知潁州

黃禔知賓州錢師孟知橫州

石景略可宣德郎

范純禮發運副使

張汝賢右司郎中

韓宗道太府卿朱光庭太常少卿

李之純寶文閣直學士知成都府

廖正一祕書省正字

劉舜卿加遙郡團練馬軍都虞候

游師雄改奉議郎陝西運判賜緋

廖正古通判滄州

龐元英鴻臚少卿

張琬知秀州

曾孝序通判莫州

劉言可內殿崇班

張岫戶部員外郎改戶部郎中

韓緒等六人各轉一官

蕃官黨令征攬哥趙令景覃恩改官

顧臨再授給事中

孔文仲中書舍人

張頡待制河北都運

第三十一卷

西掖告詞五十一首

太皇太后三代

皇太后三代

皇伯世儔追封奉化郡公

越國賢惠長公主追封大長公主

世繁贈安武軍留後追封信都郡公

唐俛贈梓州錄參

克賢贈奉國軍兩使留後封奉化郡公

士觀贈左領軍衛將軍

安燾三代妻

李清臣三代妻

范純仁三代

中丞劉摯父

第三十二卷

西掖告詞四十九

苗貴妃三代

文臣升朝封父母妻

文臣升朝追封父母妻

范鎮父

鮮于侁父

陳曼父閏以赦封承務郎

錢勰父母

李瑋三代

王堅父

曾布父

蔡確父母

秦晉國安仁保佑夫人張氏祖祖母父母

世采母李氏安康郡太君世智母何氏永昌郡太君

李端愿父母

張方平祖并父

富紹庭母

蔡朦父挺贈開府儀同三司

劉邠母

奉議郎任斯年祖母黃氏封永壽君

張琬父昇追封韓公

安燾知樞密院贈三代

王汝舟祖母胡氏封嘉興縣太君

皇兄令擢等所生母贈縣太君

富弼贈太師

劉沆追封秦國公

盧政贈司空

王存妻胡氏齊安都夫人

楊王第三女封安定郡主

第三十三卷

北門書詔五十四首

麻制一十三首

除苗授保康軍節度知潞州制

除劉昌祚武康軍節度殿前副都指揮使制

明堂呂大防加恩制

皇伯祖宗暉加恩制

皇叔祖宗祐加恩制

皇叔祖宗楚加恩制

皇弟徽宗加恩制

皇弟似加恩制

皇弟偲加恩制

馮京加恩制

劉昌祚加恩制

除文彥博太師河東節度使致仕制

除馮京彰德軍節度使制

詔敕四十一首

尙書左丞韓忠彥免弟嘉彥尙主不許不允詔二首

門下侍郎孫固乞致仕不允仍給寬假詔

韓忠彥乞外任不許不允詔二首

孫固乞致仕不允詔

趙君錫免刑部侍郎不允詔

呂公孺免戶部尙書不允詔

太皇太后明堂禮成罷賀賜門下手詔

太師文彥博乞致仕不許不允詔二首

文彥博致仕再免兩鎮不許不允詔二首

文彥博三免兩鎮不許不免詔二首

文彥博免兩鎮許允詔二首

河東官吏軍民示喻勅書

孫固乞致仕不允詔

韓忠彥免同知樞密院不允詔

蘇頌免尙書左丞不許不允詔二首

蘇頌再免左丞不許不允詔二首

知樞密院孫固乞避親不允詔

周尹進興節龍無量壽佛敕書

范百祿免侍讀不允詔

趙君錫免吏部侍郎不允詔

文彥博免孫男康世章服不允詔

孫固乞致仕不允詔

宰相呂防等爲早乞退不允詔

太皇太后以旱賜門下詔

皇帝以旱賜門下詔

鄧溫伯免翰林承旨不許不允詔二首

呂大防等再爲旱乞退不允詔

彰德軍官吏軍民示喻敕書

馮京免彰德軍節鉞不許不允詔二首

文彥博免致仕合得五人恩澤詔

范百祿免翰學士不允詔

第三十四卷

北門書詔祈祝九十首

批答四十四首

門下侍郎孫固乞致仕不許不允批答二首

劉昌祚免殿前副都指揮使不許不允批答二首

文彥博乞仕不許不允批答二首

呂大防乞明堂恩命不許不允批答四首

皇伯祖宗暉免恩命不許不允批答四首

皇叔祖宗祐宗楚免恩命不許不允批答四首

皇弟佶似偲免恩命不許不允批答四首

劉昌祚免恩命不許不允批答四首

中書侍郎劉摯免恩命不許不允批答二首

尚書右丞許將免恩命不許不允批答二首

文彥博致仕免兩鎮不許不允批答二首

韓忠彥免同知樞密院不許不允批答二首

蘇頌免尚書左丞不許不允批答二首

呂大防等乞御正殿復常膳不許不允批答二首

第二表不許不允批答二首

第三表不許不允批答二首

第四表許允批答二首

書九首

皇帝明堂宿齋第一次問太皇太后聖體答書

皇太后答書

皇太妃答書

第二次太皇太后書

皇太后答書

皇太妃答書

皇帝謝禮畢太皇太后答書

皇太后答書

皇太妃答書

祝文一十二首

北京南開二股河祭瀆星辰祝文

景靈宮安鐵水窗祝文

後苑祈晴祝文

太廟整漏奏告宣祖皇帝祝文

後苑粉壇祈雨祝文

五岳四瀆祈雨祝文

謝雨祝文

鳳翔府太平宮修殿告遷太宗神御祝文

奏告五星祈雨祝文

天地社稷宗廟謝雨祝文

神廟寺觀謝雨祝文

嶽瀆謝雨祝文

青詞一十二

福寧殿開啓明堂預告道場青詞

罷散青詞

北京南開二股河道場青詞

中太一宮祈晴青詞

明堂禮畢福寧殿道場青詞

罷散青詞

景靈宮預告雅飾聖祖青詞

裝飾聖祖御容青詞

雅飾了畢開啓奉安聖祖真容道場青詞

西嶽謝雨青詞

中太一宮祈雨青詞二首

朱表七首

福寧殿罷散明堂預告道場朱表

北京開二股河罷散日道場朱表

明堂禮畢福寧殿罷散道場朱表

景靈宮奏告雅飾聖祖罷散道場朱表

景靈宮奉安聖祖真宗御容罷散道場朱表

西嶽罷散謝雨道場朱表

諸宮觀罷散謝雨道場朱表

表五首

泥飾諸陵神臺奏告表

泥飾永裕陵神臺等奏告表

明堂禮畢內中奏謝諸佛表

露香表

永裕陵添修屋宇奏告表

第三十五卷

論時事狀三首書二表

制署三司條例司論事狀

奏乞外
任狀附

陳州爲張安道論時事書

自齊州回論時事書畫一狀附

第三十六卷

右司諫論時事七首

論臺諫封事留中不行狀

久旱乞放民間積欠狀

論罷免役錢行差役法狀

論蜀茶五害狀

乞更支役錢顧人一年候修完役法狀

乞招河北保甲充軍以消盜賊狀

論差役五事狀

第三十七卷

右司諫論時事一十六首

乞賑救淮南飢民狀

乞廢忻州馬城鹽池狀

再乞放積欠狀

論發運司以糶糴米代諸路上供狀

乞給還京西水櫃所占民田狀

論三省事多留滯狀

言科場事狀

乞招畿縣保甲充軍狀

乞令戶部役法所會議狀

乞禁軍日一教狀

乞差官與黃廉同體量蜀茶狀

乞以發運司米救淮南飢民狀

論明堂神位狀

乞借富平錢買上供及諸州軍糧狀

再乞差官問黃廉體量茶法狀

再言役法劄子

第三十八卷

左司諫論時事一十二首

論青苗狀

三論差役事狀

論蘭州等地狀

再論蘭州等地狀

論京畿保甲冬教等事狀

論西邊警備狀

再論青苗狀

乞放市易欠錢狀

言淮南水潦狀

三乞罷青苗狀

申三省請罷青苗狀

請罷右職縣尉狀

第三十九卷

右司諫論時事五首

論戶部乞收諸路帳狀

言責降官不當帶觀察團練狀

再論京西水櫃狀

乞復選人選限狀

論諸路役法候齊足施行狀

中書舍人論時事一首

申本省論處置川茶未當狀

戶部侍郎論時事二首一云中書舍人時上

因旱乞許羣臣面對言事劄子

論西事狀

第四十卷

戶部侍郎論時事六首

論陰雪劄子

轉對狀

請戶部復三司諸案劄子

論開孫村河劄子

再論回河劄子

三論回河劄子

第四十一卷

戶部侍郎論時事三首

乞裁損浮費劄子

論侯倂少欠酒課以抵當子利充填劄子

再論裁損浮費劄子

翰林學士論時事八首

論黃河必非東決劄子

乞罷修河劄子

北使還論北邊事劄子五

一論北朝所見於朝廷不便事
二論北朝攷事大略
三乞罷人
從內親從官
四乞隨行差常用大車
五乞立差馬及驢日限

爲旱乞罷五月朔朝會劄子

第四十二卷

御史中丞論時事劄子七首

乞舉御史劄子

乞罷熙河修質孤勝如等寨劄子

乞分別邪正劄子

論執政生事劄子

論言事不當乞明行黜降劄子

再論分別邪正劄子

再論熙河邊事劄子

第四十三卷

御史中丞論時事劄子九首

再論舉臺官劄子

三論熙河邊事劄子

三論分別邪正劄子

四論熙河邊事劄子

論吏 不便二事劄子

乞差官權戶部劄子

三論舉臺官劄子

論堂除太寬劄子

論前後處置夏國乖方劄子

第四十四卷

御史中丞論時事劄子五首

論所言不行劄子

論渠陽蠻事劄子

乞令兩制共論納后禮劄子

再言渠陽邊事劄子

論衙前及諸役人不便劄子

第四十五卷

御史中丞論時事劄子一十二首

乞再舉臺官狀

乞改舉臺官法劄子

論用臺諫劄子

乞罷修河司劄子

再乞責降李偉劄子

三論渠陽邊事劄子

乞定差管軍臣僚劄子

乞裁損待高麗事件劄子

論張頴不可用劄子

奏乞禁止高麗下節出入劄子

催行役法劄子

再催行役法劄子

第四十六卷

御史中丞論時事劄子六首

論邊防軍政斷案宜令三省樞密院同進呈劄子

論禁宮酒劄子

論冬溫無冰劄子

論顧河夫不便劄子

論西邊商量地界劄子

論黃河東流劄子

第四十七卷

中書舍人撰兩府請賀謝表狀一十首

請太皇太后受冊表

賀摛鬼章表

謝入伏早出狀二首

謝坤成齋筵狀二首

謝講徹論語賜燕狀二首

賀雪御筵謝狀三首

編神宗御集奏請表狀二首

乞御製集敍狀

進御集表

雜論薦書狀劄子八首

爲兄軾下獄上書

乞牽復英州別駕鄭俠狀

乞擢任劉敞狀

乞推恩故知陳州鮮于侁子孫狀

薦呂陶吳安詩劄子

薦林豫劄子

乞優卹滕元發家劄子

薦王鞏劄子

雜辭免恩命表狀劄子一十六首

辭起居郎狀二首

免修條支賜劄子二首

辭召試中書舍人狀二首

辭戶部侍郎劄子

辭吏部侍郎劄子

辭翰林學士劄子

辭御史中丞劄子

辭尙書右丞劄子四首

免尙書右丞表二首

第四十八卷

雜謝恩命表狀二十一首

謝除中書舍人表二首

謝除戶部侍郎表二首

謝對衣金帶表二首

謝翰林學士宣召狀二首

謝賜對衣金帶鞍馬狀三首

謝敕設狀二首

笏記二首

謝除龍圖閣學士御史中丞表

謝除尙書右丞表二首

生日謝表二首

笏記

第四十九卷

代人上表二十三首

陳州張公安道謝批答表二首

齊州李肅之諫議謝上表

李諫議謝免罪表

南京張公安道免陪祀表

張公謝免陪祀表

張公賀南郊表

南京留守賀南郊表

南京百官賀南郊表

南京謝頌曆表

張公謝南郊加恩表

李誠之待制遺表

龔鼎臣諫議謝青帥表

陳汝義學士南京謝上表

南京留守謝減降德音表

張芻諫議南京謝上表

張公安道乞致仕表三首

張公謝致仕表

歙州賀登極表

滕達道龍圖蘇州謝上表二首

第五十卷

啓事二十二首

賀歐陽副樞啓

北京謝韓丞相啓二首

賀歐陽少師致仕啓

迎陳述古舍人啓

賀致仕曾太傅啓

賀韓相州啓

謝韓許州啓

賀河陽文侍中啓

謝文公啓

賀張宣徽知青州啓

謝改著作佐郎啓

謝張公安道啓

賀孫樞密啓

謝黃察院啓

賀趙少保啓

賀文太師致仕啓

謝兩發運啓

賀范端明啓

除中書舍人謝執政啓

除尙書右丞諸公免書

謝啓

代人啓事八首

子瞻答周郎中啓

張公安道答呂陶屯田啓

陳述古舍人謝兩府啓

又謝兩制啓

張聖民修撰謝二府啓

齊州李諫議問候文侍中啓

李諫議賀郭宣徽知并州啓

李諫議謝二府啓

欒城集卷第一

詩五十一首

郭綸

本河西弓箭手。屢戰有功。不賞。自黎州都監。官滿。貧不能歸。權加州監稅。

郭綸本蕃種騎。鬪雄西戎。流落初無罪。因循遂龍鍾。嘉州已經歲。見我涕無窮。自言將家子。少小學彎弓。長遇西鄙亂。走馬救邊烽。手挑丈八矛。所往如投空。平生事苦戰。數與大寇逢。昔在定川寨。賊來如羣蜂。萬騎擁酋帥。自謂白相公。揮兵取其元。模糊腥血紅。戰勝士氣振。越敵如旋風。蚩蚩旣裘將。不信勇且忠。遙語相勸誘。一矢摧厥胸。短兵接死地。日落沙塵蒙。馳歸不敢息。馬口銜折鋒。誰知八尺軀。脫命萬死中。忽聞南蠻叛。羽檄行忽忽。將兵赴危難。瘴霧不辭衝。行經賀州城。寂寞無人蹤。攀堞莽不見。入據爲築壘。一旦賊兵下。百計燒且攻。三月不能陷。救至遂得通。崎嶇有成績。元帥多異同。有功不見賞。憔悴落巴賚。已矣誰復信。言之氣恟恟。予不識郭綸。問此爲斂容。一夫何足言。竊恐悲羣雄。此非介子推。安肯不計功。郭綸未嘗敗。用之可前鋒。

初發嘉州

放舟沫江濱。往意念荆楚。擊鼓樹兩旗。勢如遠征戍。紛紛上船人。擗急不容語。余生雖江陽。未省至嘉樹。巉巖九頂峯。可愛不可住。飛舟過山足。佛腳見江滸。舟人盡斂容。競欲揖其拇。俄頃已不見。烏牛在中渚。移舟近山陰。壁峭上無路。云有古郭生。嘆此地苦箋注。區區辨蟲魚。爾雅細分縷。洗硯去殘墨。遍水如黑

霧。至今江上魚。頂有遺墨處。覽物悲古人。嗟此空自苦。余今方南行。朝夕事鳴榔。至楚不復留。上馬千里去。誰能居深山。永與禽獸伍。此事誰是非。行行重回顧。

過宜賓見夷中亂山

江流日益深。民語漸已變。岸闕山盡平。連峯遠非漢。慘慘瘴氣青。薄薄寒日煖。峯巒苦崖石。草木條榦短。遙想彼居人。狀類麕鹿竄。何時遂平定。戍卒從此返。

夜泊牛口

行過石壁盡。夜泊牛口渚。野老三四家。寒燈照疎樹。見我各無言。倚石但箕踞。水寒雙脛長。壞袴不蔽股。日莫江上歸。潛魚遠難捕。稻飯不滿盂。飢臥冷徹曙。安知城市歡。守此田野趣。祗應長凍飢。寒暑不能苦。

戎州

江水通三峽。城州控百蠻。沙昏行旅倦。邊靜禁軍閑。漢虜更成市。羅紈靳不還。投氈揀精密。換馬瘦屏顏。兀兀頭垂髻。團團耳帶環。夷聲不可會。爭利苦間關。

舟中聽琴

江流浩浩羣動息。琴聲琅琅中夜鳴。水深天闊音響遠。仰視斗牛皆從橫。昔有至人愛奇曲。學之三歲終無成。一朝隨師過滄海。留置絕島不復迎。終年見怪心自感。海水震掉魚龍驚。翻回蕩瀟有遺韻。琴意忽忽從此生。師來迎笑問所得。撫手無言心已明。世人囂囂好絲竹。撞鍾擊鼓浪謂榮。安知江琴韻超絕。擺耳大笑不肯聽。

泊南井口期任遵聖

期君荒江濱。未至望已極。朔風吹烏裘。隱隱沙上立。愧余後期至。先到犯寒色。既泊問所如。歸去已無及。繫舟重相邀。雨冷塗路溼。

江上早起

晨興孤舟上。盥濯夜氣清。整巾未皇坐。雙榜輒已鳴。日出江霧散。江上山從橫。區區茅舍翁。曉出露氣腥。收筒得大鯉。愛惜不忍烹。持之易斗粟。朝飭厭魚羹。蕭蕭遠風起。泛泛野鴈驚。忽過百餘里。山水互變更。蓬舟問所如。彼此不知名。超超江湖間。殊勝地上行。旦游市井喧。莫宿無人聲。江上誠足樂。無怪陶朱生。

江上看山

朝看江上枯崖山。憔悴荒榛赤如赭。莫行百里一回頭。落日孤雲靄新盡。前山更遠色更深。誰知可愛信如今。唯有巫山最穠秀。依然不負遠來心。

山胡

山胡擁蒼髯。兩耳白茸茸。野樹啼終日。黔山深幾重。啄溪探細石。噪虎上孤峯。被執應多恨。筠籠僅不容。

白鷗

白鷗形似鶴。搖曳尾能長。寂寞懷溪水。低回愛稻梁。田家比雞鶩。野食薦杯觴。肯信朱門裏。徘徊占玉塘。

屈原塔

在忠州

屈原遺宅秭歸山。南賓古者巴子國。山中遺塔知幾年。過者遲疑不能識。浮圖高絕誰所爲。原死豈復待。

汝力臨江慷慨心自明。南訪重華訟孤直。世人不知徒悲傷。強爲築土高岌岌。

嚴顏碑

亦在忠州

古碑殘缺不可讀。遠人愛惜未忍磨。相傳昔者嚴太守。刻石千歲字已訛。嚴顏平生吾不記。獨憶城破節最高。被擒不辱古亦有。吾愛善折張飛豪。軍中生死何足怪。乘勝使氣可若何。斫頭徐死子無怒。我豈畏死如兒曹。匹夫受戮或不避。所重壯氣吞黃河。臨危閑暇有如此。覽碑慷慨思橫戈。

竹枝歌

忠州作

舟行千里不至楚。忽聞竹枝皆楚語。楚言啁晰安可分。江中明月多風露。扁舟日落駐平沙。茅屋竹籬三四家。連春並汲各無語。齊唱竹枝如有嗟。可憐楚人足悲訴。歲樂年豐爾何苦。釣魚長江江水深。耕田種麥畏狼虎。俚人風俗非中原。處子不嫁如等閑。雙鬢垂頂髮已白。負水採薪長苦艱。上山採薪多荆棘。負水入溪波浪黑。天寒斫木手如龜。水重還家足無力。山深瘴暖霜露乾。夜長無衣猶苦寒。平生有似麋與鹿。一旦白髮已百年。江上乘舟何處客。列肆喧譁占平磧。遠來忽去不記州。罷市歸船不相識。去家千里未能歸。忽聽長歌皆慘悽。空船獨宿無與語。月滿長江歸路迷。路迷鄉思渺何極。長怨歌聲苦淒急。不知歌者樂與悲。遠客乍聞皆掩泣。

望夫臺

在忠州十里

江上孤峯石爲骨。望夫不來空獨立。去時江水拍山流。去後江移水成磧。江移岸改安可知。獨與高山化爲石。山高身在心不移。慰爾行人遠行役。

八陣積在夔州

漲江吹八陣。江落陣如故。我來苦寒後。平沙如匹素。乘高望遺迹。磊磊六十四。遙指如布碁。就視不知處。世稱諸葛公。用衆有法度。區區落褒斜。軍旅無闊步。中原竟不到。置陣狹無所。茫茫平沙中。積石排隊伍。獨使後世人。知我非莽鹵。柰何長蛇形。千古竟不悟。惟餘桓元子。久視不能去。

灩澦堆

或云上
有古碑

江中石屏灩澦堆。鼉靈夏禹不能摧。深根百丈無敢近。落日紛紛鳧鴈來。何人磊落不畏死。爲我赤腳登崔嵬。上有古碑刻奇篆。當使盡讀磨蒼苔。此碑若見必有怪。恐至絕頂遭風雷。

入峽

舟行瞿唐口。兩耳風鳴號。渺然長江水。千里投一瓢。峽門石爲戶。鬱怒水力驕。扁舟落中流。浩如一葉飄。呼吸信奔浪。不復由長筵。楫柁破潰旋。畏與亂石遭。兩山感相值。望之不容舠。漸近乃可入。白鹽最雄高。草木皆倒生。哀叫悲玄猿。白雲繚長袖。零落如飛毛。緬懷涪水年。慘蹙病有堯。禹益決岷水。屢與山鬼麇。摧岡轉大石。破地疏洪濤。巉巉當道山。斬截肩尾銷。峭壁下無趾。連峯斷脩腰。破處不生草。上不掛鳥巢。水怪不盡戮。下有龍與鼉。遼哉千萬年。禹死遺迹牢。豈必見河洛。開峽斯已勞。

巫山廟

山中廟堂古神女。楚巫婆娑奏歌舞。空山日落悲風吹。舉手睢盱道神語。神仙潔清非世人。瓦盎傾醪薦麋脯。子知神君竟何自。西方真人古王母。飄然乘風遊九州。揭渡西海薄中土。白雲爲車駕蒼虬。驂乘湘

君宓妃御。天孫織綃素非素。衣裳飄飄薄煙霧。泊然冲虛眇無營。朝飡屑玉嚙瓊乳。下視人世安可據。超江乘山去無所。巫山之下江流清。偶然愛之不能去。湍崖激作相喧豗。白花翻翻龍正怒。堯使大禹導九州。石隕山墜幾拆股。山前恐懼久無措。稽首山下苦求助。丹書玉笈世莫窺。指示文字相爾汝。擘山洩江幸無苦。庚辰虞余實相禹。功成事定世莫知。空山俄頃千萬古。廟中擊鼓吹長簫。探蘭爲殮蕙爲肴。玉缶薦菱香飄蕭。龍勺取酒注白茅。神來享之風飄飄。荒山長江何所有。豈有瓊玉薦次寥。神君聰明無我責。爲我驅獸攘龍蛟。乘船入楚沂巴蜀。潰旋深惡秋水高。歸來無恙無以報。山上麥熟可作醪。神君尊貴豈待我。再拜長跪神所勞。

巫山廟烏

巫廟真人古列仙。高心獨愛玉爐煙。飢烏巧會行人意。來去紛紛噪客船。

昭君村

峽如王嬙繼屈須。入宮曾不愧秦姝。一朝遠逐呼韓去。遙憶江頭捕鯉魚。江上大魚安敢釣。轉拖橫江筋力小。深邊積雪厚埋牛。兩處辛勤何處好。去家離俗慕榮華。富貴終身獨可嗟。不及故鄉山上女。夜從東舍嫁西家。

三遊洞

洞前危逕不容足。洞中明曠坐百人。蒼崖肆几起成柱。亂石散列如驚麕。清溪百丈下無路。水滿沙上如魚鱗。夜深明月出山頂。下照洞口纔及脣。沈沈深黑若大屋。野老構火青如燐。平明欲出迷上下。洞氣飄

亂爲橫雲。深山大澤亦有是。野鳥鳴噪。孤熊蹲。三人一去無復見。至今冠蓋長滿門。

寄題清溪寺

在峽州鬼谷子故居

清溪鬼谷子。雄辨傾六國。視世無足言。自閉長默默。蘇張何爲者。欲竊長短術。學成果無賴。遂爲世所惑。顛倒賣諸侯。傾轉莫可執。後世何不明。疑我不汝及。誰知居深山。玩世可終日。君觀二弟子。死處竟莫得。客齊日披裂。投魏求寄食。悠悠清溪中。石亂流水急。溪魚爲朝飧。老死得安穴。居亂獨無言。其辯吾不測。

息壤

在荆南門外

江上寒沙薄如席。一夕墳起成高丘。江流傾轉力不勝。左齧右吐非自由。南郡城南獨何者。平地生長殊不休。當中屋背不盈尺。深入百丈皆石樓。古人不知下有怪。發破不掩水漲浮。傳言夏絲塞洛水。上帝愛此無敢偷。竊持大舂負長罇。刺取不已帝使流。禹知水怒非塞止。綱捕百怪雜蜃鯀。掘壕入土不計丈。投擲填壓聲嗚啾。一時既定憂後世。恐此竊出壞九州。神人已死無復制。故以此土封其頭。發之輒滿不可既。意使靈物長幽囚。前年大旱千里赤。取土盈掬雨不收。誰言咫尺舊黃壤。中有千歲龍與虬。高山萬仞猶可削。嗟此何獨生如疣。天長地遠莽無極。雖有缺壤誰能賙。我疑天意固有在。患世多事窮鑄鏹。挺陶鼓鑄地力困。久不自補無爲憂。世無女媧空白石。磊磊滿地如浮漚。耕田鑿井自無已。息壤無幾安能酬。

荆門惠泉

泉源何從來。山下長溪發。油然本無榮。誰使自激冽。茫茫九地底。大水浮一葉。使水皆爲泉。地已不勝洩。應是衆水中。獨不容至潔。涓涓自傾瀉。弈弈見清澈。石泓淨無塵。中有三尺雪。下爲百丈溪。冷不受魚鼈。

脫衣浣中流。解我雙足熱。樂哉泉上翁。大旱不知渴。

答荆門張都官維見和惠泉

荒涼荆門西。泉水誰爲洩。發源雖甚微。來意不可折。平鋪清池滿。皎皎自明澈。甘涼最宜茶。羊炙可用雪。炎風五月交。中夜吐明月。大守燕已還。青嶂空嶮嶮。泉上白髮翁。來飲杯饌闕。酌水自獻酬。箕踞無禮節。區區游泉人。常值午日烈。回首憂重城。賞玩安能徹。

涇陽早發

春氣入楚澤。原上草猶枯。北風吹栗林。梅蕊颯已無。我行亦何事。驅馬無疾徐。楚人信稀少。田畝任蓁蕪。空有道路人。擾擾不留車。悲傷彼何懶。歎息此亦愚。今我何爲爾。豈亦愚者徒。行行楚山曉。霜露滿陂湖。

襄陽古樂府二首

野鷹來

野鷹來。雄雉走。蒼茫荒榛下。稻穗大如斗。鷹來蕭蕭風雨寒。壯士臺中一揮肘。臺高百尺臨平川。山中放火秋草乾。雉肥兔飽走不去。野鷹飛下風蕭然。嗟峨呼鷹臺人去。臺已圯。高臺不可見。況復呼鷹子。長歌野鷹來。當年落誰耳。父生已不武。子立又不強。北兵果南下。擾擾如驅羊。鷹來野雉何暇走。束縛籠中安得翔。可憐野雉亦有爪。兩手捽鷹猶可傷。

襄陽樂

誰言襄陽苦。歌者樂襄陽。太守劉公子。千年未可忘。劉公一去歲時改。惟有州南漢水長。漢水南流峴山

碧種稻耕田泥沒尺。里人種麥滿高原。長使越人耕大澤。澤中多水原上乾。越人爲種楚人食。火耕水耨古常然。漢水魚多去滿船。長有行人知此樂。來買槎頭縮頸鱸。

雙鳧觀在葉縣

王喬西飛朝洛陽。飄飄千里雙鳧翔。鳧飛遭網不能去。惟有空履鳧已亡。誰知野鳥不能化。豈必雙履能飛揚。鳧神屢怪當有在。搔首野廟春風長。

懷隄池寄子瞻兄

相攜話別鄭原上。共道長途怕雪泥。歸騎還尋大梁陌。行人已渡古嶠西。曾爲縣吏民知否。轍嘗爲此縣第舊宿僧房壁共題。轍昔與子瞻應舉過宿縣中寺舍。題其老僧奉閑之壁。遙想獨遊佳味少。無言騅馬但鳴嘶。

辛丑除日寄子瞻

一歲不復居。一日安足惜。人心畏增年。對酒語終夕。夜長書室幽。燈燭明照席。盤飧雜梁楚。羊炙錯魚腊。庖人饌雞兔。家味宛如昔。有懷岐山下。展轉不能釋。念同去閭里。此節三已失。初來寄荆渚。魚鴈賤宜客。楚人重歲時。爆竹鳴磔磔。新春始涉五。田凍未生麥。相攜歷唐許。花柳漸牙拆。居梁不耐貧。投杞避糠覈。城南庠齋靜。終歲守墳籍。酒酸未嘗飲。牛美每共炙。謂言從明年。此會可縣射。同爲洛中吏。相去不盈尺。濁醪幸分季。新筍可餉伯。嶢嶢嵩山美。漾漾洛水碧。官閑得相從。春野玩朝日。安知書閣下。羣子並遭讎。偶成一朝榮。遂使千里隔。何年相會歡。逢節勿輕擲。

次韻子瞻減降諸縣囚徒事畢登覽

山川足清曠。闔闔巧拘囚。安得熾阿御。同爲穆滿遊。遙知因渙汗。遠出散幽憂。原隰繁分繡。村墟盡小侯。春深秦樹綠。野闊渭河流。四顧神蕭瑟。前探意漲浮。勝觀殊未已。往足詎能收。下坂如浮舸。登崖劇上樓。強行腰偃僂。困坐氣嘯咻。鳥語林巒靜。花明澗谷幽。濯溪驚野老。伐路駭它州。中散探深去。文淵到處留。聽琴峯下寺。弄石水中洲。溪冷泉冰脚。山高霧遠頭。石潭清照骨。瀑水濺成鈎。仙廟鳴鍾磬。神官秉鉞劉。養生聞帝女。服氣絕彭讎。故宅猶傳尹。先師不喜丘。居人那識道。過客謾停騶。巖谷誠深絕。神仙信有不。雲居無几杖。霞珮棄鐏鈸。豹隱連山霧。龍潛百尺湫。門開誰與叩。桃熟浪傳偷。紉髮清無比。方瞳凜不眸。會須林下見。乞取壽年脩。拔去和雞犬。相隨若旆旒。乘風遺驪屨。長嘯賤笙篳。從騎衣皆羽。前驅鬣盡蚪。安能牽兩足。蹙得快雙眸。自昔辭鄉樹。南行上楚舟。萬江窮地脈。三峽束天溝。雲暗鄴都晚。波吹木樨秋。尋溪緣窈窕。入洞聽颼颼。空寺收黃粟。荒祠畫伏彪。登臨雖永日。行邁肯停輶。菑縮今何事。攀躋昔已悠。魏京饒士女。春服聚蜉蝣。雷動車爭陌。花搖樹繫鞦。遊人紛蕩漾。野鳥自嚶呦。平日曾經洛。閑居願卜緇。空言真比夢。久渴漸成愁。早退嘗相約。辭囂痛自樓。愛山心劫劫。從宦興油油。海宇都無礙。山林盡可投。願爲雲上鶴。莫作盎中鯀。邊性行隨足。謀生富給喉。今遊雖不與。後會豈無由。晝出同穿履。宵眠共覆裘。弟兄真欲爾。朋好定誰儔。試寫長篇調。何人肯見酬。

次韻子瞻太白山下早行題崇壽院

山下晨光晚。林梢露滴昇。峯頭斜見月。野市早明燈。樹暗猶藏鵠。堂開已饌僧。據鞍應夢我。聯騎昔嘗曾。次韻子瞻延生觀後山上小堂

謝公遊意未能厭。踏盡登山屐齒尖。古殿神仙深杳杳。香爐煙翠起纖纖。巖花寂歷飄瓊片。庭檜蕭疎漏玉蟾。帝子莫歸人不見。微風細雨自開簾。唐玉真公主修道於此山。

次韻子瞻題仙遊潭中興寺

潭邊沙水不成泥。潭上孤禽掛嶮啼。繚繞飛橋能試客。蒙茸翠蔓巧藏溪。雲爲絳帳馬融室。石作屏風玉女閨。仙果知君今未足。臨潭腳戰怕長梯。

石鼻城

千山欲盡垂爲鼻。百戰皆空但有城。虎闖穴中秦地恐。龍飛渭上漢江傾。雍人未有章邯怨。魏將猶存仲達精。睥睨陵遲春草滿。白羊無數向風鳴。

磻溪石

呂公年已莫。擇主渭河邊。跪餌留雙膝。臨溪不計年。神專能陷石。心大豈營鱣。不到磻溪上。安知自守堅。

郿塢

董公平昔甚縱橫。晚歲藏金欲避兵。當日英雄智相似。燕南趙北亦爲京。

樓觀

老聃厭世入流沙。飄蕩如雲不可遮。弟子憐師將去國。關門望氣載還家。高臺尙有傳經處。畫壁空留駕犢車。一授遺書無復老。不知何苦服胡麻。此觀尹喜舊宅。神仙傳言尹喜於流沙之西服苴勝實。

次韻子瞻秋雪見寄二首

秋氣蕭騷仍見雪。客愁繞繚動縈心。幽吟北戶窻聲細。歸夢函關馬迹深。疎樹飛花輕蔌蔌。衰荷留柄亂簪簪。遙聞詩酒皆推勝。社客何人近納隄。平時出處常聯袂。文翰叨陪舊服膺。自信老兄憐弱弟。豈關天下少良朋。何時杯酒看浮白。清夜看蔬粗滿登。離思隔年詩不盡。秦梁雖遠速須膺。

次韻子瞻聞不赴商幕三首

怪我辭官免入商。才疎深畏忝周行。學從社稷非源本。近讀詩書識長短。東舍久居如舊宅。春蔬新種似吾鄉。閉門已學龜頭縮。避謗仍兼雉尾藏。維藏不能盡尾。鄉人以爲諺。

南商西洛曾虛署。長吏居民怪不來。妄語自知當見棄。遠人未信本非才。厭從貧李嘲東閣。懶學諛張緩兩腮。知有四翁遺跡在。山中豈信少人哉。

塤動篋鳴只自知。憂輕責少幸官卑。聲名謾作耳中瑱。科第空收領底髭。西鄙猖狂猶將將。中朝閑暇自師師。近成新論無人語。仰羨飛鴻兩翅差。

次韻子瞻病中大雪

吾兄筆鋒雄。詩俊不可和。雪中思清絕。韻惡愈難奈。殷勤賦黃竹。自勸飲白墮。言隨飛花落。意與長風簸。餘力遠見撩。千里寄璀璨。嗟予學久廢。有類轉空磨。研磨久無得。安可待充貨。空記乘峽船。行意被摧剝。溟濛覈洲渚。冷冽光照坐。我唱君實酬。馳騁不遑臥。譬如逐獸盧。豈覺山徑坳。酒肴助喧熱。筆硯盡霑漉。詩詞禁推類。令肅安敢破。亦有同行人。牽挽赴程課。爾來隔秦魏。渴望等飢餓。徒然遇佳雪。有酒誰與賀。

次韻子瞻記歲莫鄉俗三首

餽歲

周公制鄉禮。無有相通佐。鼎肉送子思。烝豚出陽貨。交親隨高低。豈問小與大。自從此禮衰。伏臘有飢臥。鄉人慕古俗。酬酢等四坐。東鄰遺西舍。迭出如蟻磨。寧我不飲食。無爾相咎過。相從慶新春。顏色買愉和。別歲

富貴日月速。貧賤覺歲遲。遲速不須問。俱作不可追。親舊且酣飯。送爾天北涯。歲歲雖無情。從我歷四時。酌爾一杯酒。留我壯且肥。長作今歲歡。勿起異日悲。掉頭不肯顧。曾莫與我辭。酒闌氣方橫。豈信從爾衰。守歲

於菟絕繩去。顧兔追龍蛇。是歲壬寅奔走十二蟲。羅網不及遮。嗟我地上人。豈復柰爾何。未去不自閑。將去乃誼譁。天上驅獸官。爲君肯停過。魯陽揮長戈。日車果再斜。釀酒勸爾醉。期爾蹙蹉跎。偕醉遣爾去。壽考自足誇。

記歲首鄉俗寄子瞻二首

踏青

江上冰消岸草青。三三五五踏青行。浮橋波水不勝耍。野店壓糟無復清。松下寒花初破萼。谷中幽鳥漸嚶鳴。洞門泉脈龍睛動。觀裏舟池鴨舌生。山下鉞罍霑稚孺。峯頭鼓樂聚簪纓。綺錯紅袂臨江影。青蓋驂駟踏石聲。曉去爭先心蕩漾。莫歸誇後醉從橫。最憐人散西軒靜。曖曖斜陽著樹明。

蠶市

枯桑舒牙葉漸青。新蠶可浴日晴明。前年器用隨手敗。今冬衣着及春營。傾困計口賣餘粟。買箔還家待種生。不唯箱篋供婦女。亦有鉏耨資男耕。空巷無人鬪容冶。六親相見爭邀迎。酒肴勸屬坊市滿。鼓笛繁亂倡優聲。蠶叢在時已如此。古人雖沒誰敢更。異方不見古風俗。但向陌上聞吹笙。

子瞻寄示岐陽十五碑

堂上岐陽碑。吾兄所與我。吾兄自善書。所取無不可。歐陽弱而立。商隱瘦且臠。小篆妙詰曲。波字美婀娜。譚藩居顏前。河類學顏頗。魏華自磨淬。峻秀不包裹。九成刻賢俊。磊落雜么麼。英公與襄鄂。戈戟聞自荷。何年學操筆。終歲惟箭筈。書成亦可愛。執業嗟獨夥。余雖繆學文。書字每慵墮。車前駕騏驎。車後繫羸跛。逾年學舉足。漸亦行駢駝。古人有遺迹。筮短不及鑠。願從兄發之。洗硯處兄左。

欒城集卷第二

詩六十九首

畫文殊普賢

誰人畫此二菩薩。趺坐花心乘象狻。弟子先後執盂缶。老僧槎牙森比肩。山林脩道幾世劫。顏貌偉麗如開蓮。重崖宛轉帶林樹。野水荒蕩浮雲天。峨眉高處不可上。下有絕澗錮九泉。朝陽未出白霧起。有光升天如月圓。靈仙居中粗可識。有類白兔依清躔。遊人禮拜千萬萬。迤邐漸遠如飛煙。五臺不到想亦爾。今之畫圖誰所傳。吾兄子瞻苦好異。敗繪破紙收明鮮。自從西行止得此。試與記錄代一觀。

聞子瞻重遊南山

終南重到已春回。山木緣崖綠似苔。谷鳥嗚呼嘲獨往。野人笑語記曾來。定邀道士彈鳴鹿。誰與溪堂共酒杯。應有新詩還寄我。與君和取當遊陪。彈鳴鹿。飲溪堂。皆前游終南時事。

子瞻見許驪山澄泥硯

長安新硯石同堅。不待書來遂許頒。豈必魏人勝近世。強推銅雀沒驪山。寒煤舒卷開雲葉。清露霑流發涕漣。早與封題寄書案。報君湘竹筆身斑。

寒食前一日寄子瞻

寒食明朝一百五。誰家冉冉尙廚煙。桃花開盡葉初綠。燕子飛來體自便。愛客漸能陪痛飲。讀書無思懶

開編秦川雪盡南山出。思共肩輿看麥田。

大人久廢彈琴比。借人雷琴以記舊曲十得三四率爾拜呈

久厭凡桐不復彈。偶然尋繹尙能存。倉庚鳴樹思前歲。春水生波滿舊痕。泉落空巖虛谷應。珮敲清殿百官寒。終宵竊聽不能學。庭樹無風月滿軒。

聞子瞻習射

舊讀兵書氣已振。近傳能射喜征叢。手隨樂節寧論中。箭作鷗聲不害文。力薄僅能勝五斗。才高應自敵三軍。良家六郡傳真法。馬上今誰最出羣。

種菜

久種春蔬旱不生。園中汲水亂瓶罌。菘葵經火未出土。僮僕何朝飽食羹。強有人功趨節令。悵無甘雨困耘耕。家居閑暇厭長日。欲看年華上菜莖。

次韻子瞻題薛周逸老亭

飛鳥不知穴。山鹿不知流。薛子善飲酒。口如吸水虬。吾觀腸胃間。何異族黨州。人滿地已盡。一介不可留。謂子試飲水。一酌不再求。謂子飲醇酒。百醕豈待酬。酒可水不可。其說亦已悠。以我視夫子。胸腹百丈幽。譬如田中人。視彼公與侯。未省破顏飲。何況裸露頭。鴟夷謂大瓠。皆飽安用浮。多少苟自適。豈害爲明遊。

次韻子瞻題長安王氏中隱堂五首

秦中勝三蜀。故國不須歸。甲第春風滿。巴山畫夢非。竹深啼鳥亂。花落晚蜂飛。我欲西還去。敲門慎勿違。

唐朝卿相宅。此外更應無。請看庭前樹。曾攀屋裏姝。流傳漸失實。遺老不禁徂。試問歸登物。林間翠石孤。
或云此即歸登宅。

愛君高堂上。有似蜀江壖。牆外終南近。簷西太白偏。晚梅晴自媚。老竹暗相遷。未到遙聞說。吾廬安得然。
官去空留鶴。山浮不見鼈。竹林迎日淨。槐木擁亭高。鳥噪知人至。蟬鳴覺口勞。誰能飲堂上。解帶不穿袍。
君看原上墓。墳盡但餘碑。誰見生前貴。塵生帶下龜。高堂幸有酒。一飲豈論貲。勉強行樂耳。古人良可悲。

和子瞻鳳翔八觀八首

石鼓

岐山之陽石爲鼓。叩之不鳴懸無虞。以爲無用百無直。以爲有用萬物祖。置身無用有用間。自託周宣誰
敢侮。宣王沒後墳壠平。秦野蒼茫不知處。周人舊物惟存山。文武遺民盡囚虜。鼎鐘無在鑄。戈戟宮殿已
倒生。禾黍厲宣子孫竄四方。昭穆錯亂不存譜。時有過客悲先王。綢繆牖戶徹桑土。思宣不見幸鼓存。由
鼓求宣近爲愈。彼皆有用世所好。天地能生不能主。君看項籍猛如狼。身死未冷割爲脯。馬童楊喜豈不
仁。待汝封侯非怨汝。何況外物固已輕。毛擒翡翠尾執塵。惟有蒼石於此時。獨以無用不見數。形骸偃蹇
任苔蘚。文字皴剝困風雨。遭亂旣以無用全。有用還爲太平取。古人不見見遺物。如見方召與申甫。文非
科斗可窮詰。簡編不載無訓詁。字形漫汗隨石缺。蒼地生角龍折股。亦如老人遭暴橫。頤下髭禿口齒齷。
形雖不具意可知。有云楊柳貫魴鱖。魴鱖豈厭居溪谷。自投網罟入君俎。柳條柔弱長百尺。挽之不斷細
如縷。以柳貫魚魚不傷。貫不傷魚魚樂死。登之廟中鬼神格。錫女豐年多黍稌。宣王用兵征四國。北摧犬

戎南服楚。將帥用命。士卒驩。死生不願闕虢虎。問之何術能使然。撫之如子敬如父。弱柳貫魚魚弗違。仁人在上民不怒。請看石鼓非徒然。長笑太山刻秦語。

咀楚文

詛楚楚如桀。詛秦秦則紂。桀罪使信然。紂語安足受。牲肥酒醪絜。夸誕鬼不祐。鬼非東諸侯。豈信辯士口。碑埋祈年下。意繞章華走。得楚不付孫。但爲劉季取。吾聞秦穆公。與晉實甥舅。盟鄭絕晉歡。結楚將自救。事見呂相絕秦使秦詛楚人。晉亦議秦後。諸侯迭相詛。禍福果誰有。世人不知道。好古無可否。何當投涇流。渾濁蓋鄙醜。

王維吳道子畫

在普門及開元寺

吾觀天地間。萬事同一理。扁也工斲輪。乃知讀文字。我非畫中師。偶亦識畫旨。勇怯不必同。要以各善耳。壯馬脫銜放平陸。步驟風雨百夫靡。美人婉婉守閑獨。不出庭戶修容止。女能嫣然笑傾國。馬能一蹶致千里。優柔自好勇自強。各自勝絕無彼此。誰言王摩詰。乃過吳道子。試謂道子來。置女所挾從軟美。道子掉頭不肯應。剛傑我已足自恃。雄奔不失馳。精妙實無比。老僧寂滅生慮微。侍女閑絜非復婢。丁寧勿相違。幸使二子齒。二子遺迹今豈多。岐陽可貴能獨備。但使古壁常堅完。塵土雖積光豔長不毀。

楊惠之塑維摩像

在天柱寺

金粟如來瘦如臘。坐上文殊秋月圓。法門論極兩相可。言語不復相通傳。至人養心遺四體。瘦不爲病肥非妍。誰人好道塑遺像。鮐皮束骨筋扶咽。兀然隱几心已滅。形如病鶴竦兩肩。骨節支離體疎緩。兩目視

物猶爛然。長嗟靈運不知道。強剪美須插兩顴。彼人視身若枯木。割去右臂非所患。何況塑畫已身外。豈必奪爾庸自全。真人遺意世莫識。時有遊僧施鉢錢。

東湖

不到東湖上。但聞東湖吟。詩詞已清絕。佳境亦可尋。蜿蜒蒼石螭。蟠挈據湖心。倒腹吐流水。奔注爲重深。清風蕩微波。渺渺平無音。有鼈行在沙。有魚躍在潯。鼈圓如新荷。魚細如蠹蟬。梧桐生兩涯。蕭蕭自成林。孫枝復生孫。已中瑟與琴。秋蟲噪蝸蝨。春鳥鳴鳩鴛。有客來無時。濯足蔭清陰。自忘府中官。取酒石上斟。醉倒臥石上。野蟲上其襟。醒來不知莫。湖月翻黃金。油然而上馬。去縱牽不自箴。作詩招路人行。樂宜及今。人生不滿百。一瞬何所任。路人掉頭笑。去馬何駸駸。子有不肖弟。有寇未嘗簪。願身化爲線。使子爲之鍼。子欲烹鯉魚。爲子漑釜鬻。子欲枕山石。爲子求布衾。異鄉雖云樂。不如反故岑。瘦田可鑿耕。桑柘可織紵。東有軒轅泉。隱隱如牛溲。西有管輅宅。尙存青石礎。彭女留膝踝。禮拜意已欽。慈母抱衆子。亂石寒蕭森。朝往莫可還。此豈不足臨。慎勿語他人。此意子獨諶。

真興寺閣

秦川不爲廣。南山不爲高。嵯峨真興閣。傑立陵風颺。危檻俯翔鳥。跳簷落飛猱。上有傲世人。身衣白鶴毛。下視市井喧。奔走何嗷嗷。蕭然倚楹嘯。遺響入雲宵。清風吹其裾。冉冉不可操。不知何所爲。豈卽非虛敖。遊目萬里間。遠山如伏羔。遺語謝世俗。釣魚當釣鼈。

李氏園

李茂正園也。俗謂皇后園。蓋茂正謂其妻也。

有客騎白駒。揚鞭入青草。悠悠無遠近。但擇林亭好。蕭條北城下。園號李家媪。繫馬古車門。隨意無洒掃。鳴禽驚上屋。飛蝶紛入抱。竹林淨如濯。流水清可澡。閑花不著行。香梨獨依島。松枝貫今昔。林影變昏早。草木皆蒼顏。亭宇已新造。臨風置酒樽。庭下取栗棗。今人強歡笑。古人已枯槁。欲求百年事。不見白鬚老。秦中古云樂。文武在豐鎬。置囿通樵蘇。養獸讓麀麀。池魚躍金碧。白鳥飛紵綺。牛羊感仁恕。行葦亦自保。當年歌靈臺。後世詠魚藻。古詩宛猶在。遺處不可考。悲哉李氏末。王霸出奴皂。城中開芳園。城外羅戰堡。擊鼓鳴巨鐘。百姓皆懊惱。及夫聖人出。戰國卷秋潦。園田賦貧民。耕破園前道。高原種菽粟。陂澤滿粳稻。春耕雜壺漿。秋賦輸秸藁。當年王家孫。自庇無尺櫬。空餘百歲木。妄爲天巫禱。遊人足譏罵。百世遭舌討。老翁不願見。垂涕祝襤褸。持用戒滿盈。飲酒無醉到。

秦穆公墓

在藁泉上

泉上秦伯墳。下埋三良士。三良百夫特。豈爲無益死。當年不幸見。迫脅詩人尙。記臨穴惴。豈如田橫海中客。中原皆漢無報所。秦國吞西周。康公穆公子。盡力事康公。穆公不爲負。豈必殺身從之遊。夫子乃以侯嬴所爲疑三子。王澤旣未竭。君子不爲詭。三良殉秦穆。要自不得已。

聞子瞻將如終南太平宮谿堂讀書

爲吏豈厭事。厭事日墮偷。著書雖不急。實與百世謀。問吏所事何。過客及繫囚。客實虛攪人。囚有不自由。辦之何益增。不辦亦足憂。嗟此誰不能。脫去使自收。幽幽南山麓。下有溪水流。溪上亦有堂。其水可濯漱。終日不見人。惟有山鹿呦。是時夏之初。溪冷如孟秋。山樵黃笠展。林筍紫角抽。朝取筍爲美。莫以樵爲羞。

溪魚鯉與魴。山鳥鸞與鳩。食之飽且平。偃仰自佚休。試探篋中書。把卷揖前脩。恍如反故鄉。親朋自相求。蔚如甕中糟。久熟待一藟。爲文若江河。豈復有刻鏤。尙何憶我爲。欲與我同遊。我雖不能往。寄詩以解愁。

次韻子瞻麻田青峯寺下院翠麓亭

走馬紅塵合。開懷野寺存。南山抱村轉。渭水帶沙渾。亭峻朱欄繞。堂虛白佛尊。煩襟喜脩竹。勸馬樂芳蓀。白氈柔隨手。清泉滿照盆。塵顏洗濯淨。腴肉再三捫。饋食青蔬軟。流匙細粟翻。老僧勿施敬。對客說山門。

次韻子瞻宿南山蟠龍寺

谷中夜行不見月。上下不辨山與谷。前呼後應行相從。山頭誰家有遺燭。登登深徑馬蹄響。落落稀星著疎木。行投野寺僧已眠。叩門無人狗出縮。號呼從者久噴罵。老僧下牀揉兩目。問知官吏冒夜來。掃牀延客臥華屋。釜中無羹飢實盡。愧客滿盞惟脫粟。客來已遠睡忘覺。僧起開堂勸晨粥。自嗟奔走閱僧閑。偶然來過何年復。留詩滿壁待重遊。但恐壓埃難再讀。

賦園中所有十首

時在京師

萱草

萱草朝始開。呀然黃鵠觜。仰吸日出光。口中爛如綺。纖纖吐須鬣。冉冉隨風哆。朝陽未上軒。粲粲幽閑女。美女生山谷。不解歌與舞。君看野草花。可以解憂悵。

竹

寒地竹不生。雖生常若病。斲根種幽砌。開葉何已猛。嬋娟冰雪姿。散亂風日影。繁華見孤淡。一箇敵千頃。

令人憶江上。森聳緣崖勁。無風籟自飄。策策鳴荒逕。

蘆

蘆生井欄上。蕭騷大如竹。移來種堂下。何爾短局促。莖青甲未解。枯葉已可束。蘆根愛溪水。餘闕長鮮綠。強移性不遂。灌水惱僮僕。晡日下西山。汲者汗盈掬。

石榴

堂後病石榴。及時亦開花。身病花不齊。火候漸已差。芳心竟未已。新萼綴枯槎。誰言石榴病。乃久占年華。鄰家花最盛。早發豈容遮。殘紅已零落。婀娜子如瓜。

蒲桃

蒲桃不禁冬。屈盤似無氣。春來乘盛陽。覆架青綾被。龍髯亂無數。馬乳垂至地。初如早梅酸。晚作醲酪味。誰能醜爲酒。爲爾架前醉。滿斗不與人。涼州幾時致。

萑草

室幽來客稀。塵土積不掃。鄰翁笑我拙。教我種萑草。經霜研爲簞。不讓秋竹好。始生如一毛。張王忽侵道。鉏耨禁芟斵。愛惜待枯槁。有用皆勿輕。吾師灌園老。

果羸

吾兄客關中。果羸施吾宇。兄雖未得還。我豈如婦女。啣啣感微物。涕泗若零雨。但愛果羸莖。屈曲上牆堵。朝見緣牆頭。莫已過牆去。物生隨年華。還日何足數。

牽牛

牽牛非佳花。走蔓入荒榛。開花荒榛上。不見細蔓身。誰剪薄素紗。浸文青藍盆。水淺浸不盡。下餘一寸銀。嗟爾脆弱草。豈能凌霜晨。物性有稟受。安問秋與春。

雙柏

南園地性惡。雙柏不得長。蓬麻春始生。今已滿一丈。柏生嗟幾年。失意自悽愴。有子壓枝低。已老非少壯。尤柏柏也冤。尤地亦恐妄。兩旣無所尤。高枝幾時放。

葵花

葵花开已闌。結子壓枝重。長條困風雨。倒臥枕丘壟。憶初始放花。岌岌旌節聳。得時能幾時。狼籍成荒冗。浮根不任雪。採剝取遺種。未忍焚枯莖。積疊牆角擁。

和子瞻記夢二首

兄從南山來。夢我南山下。探懷出詩卷。卷卷盈君把。詩詞古人似。弟則吾弟也。相與千里隔。安得千里馬。携手上南山。不知今乃夜。晨雞隔牆唱。欹枕窗月亞。百語記一詞。秋菊悲蛩吒。此語鮑謝流。平日我不暇。我本無此詩。嗟此誰所借。

蟋蟀感秋氣。夜吟抱菊根。霜降菊叢折。守根安可存。耿耿荒苗下。唧唧空自論。不敢學蝴蝶。菊盡兩翅翻。蟲凍不絕口。菊死不絕芬。志士豈棄友。烈女無兩婚。

次韻子瞻題岐山周公廟

周人尙記有周公。禾黍離離下有宮。破豆烝豚非以報。野巫長跪若爲通。山圍棟宇泉流近。廟后有德潤泉。世亂則竭。鳳去梧桐落葉濛。有客賦詩題屋壁。二南猶自有遺風。

次韻子瞻題扶風道中天花寺小亭

客車來不息。輟迹自成溝。莫怪慵登寺。猶宜常舉頭。獨遊知憶弟。望遠勝登樓。處處題詩遍。篇篇誰爲收。

次韻子瞻南溪避世堂

拄杖行窮徑。圍堂尙有林。飛禽不驚處。萬竹正當心。虎嘯風吹籟。霜多蟬病瘖。獸驕從不避。人到記由今。未暇終身住。聊爲半日吟。青松可絕食。黃葉不須衾。偶到初迷路。將還始覺深。堂中有幽士。插髻尙餘簪。

和子瞻三遊南山九首

樓觀次韻

神仙避世守關門。一世沈埋百世尊。舊宅居人無姓尹。深山道士卽爲孫。天寒遊客常逢雪。日暮歸鴉自識村。君欲留身託幽寂。直將山外比羌渾。

五郡次韻

蜀人不信秦川好。食蔗從梢未及甘。當道沙塵類河北。依山水竹似江南。觀形隨阜飲溪鹿。雲氣侵山食葉蠶。猶有道人迎客笑。白鬚黃袖豈非聾。

傳經臺

輪扁不能令子巧。老聃雖智若爲傳。遺經尙在臺如故。弟子今無似喜賢。

大秦寺

大秦遙可說。高處見秦川。草木埋深谷。牛羊散晚田。山平堪種麥。僧魯不求禪。北望長安市。高城遠似煙。

仙遊潭五首

潭

潭深不可涉。潭小不通船。路斷遊人止。龍藏白沫旋。剪藤量水短。插石置橋堅。橋外居民少。躬耕不用錢。

南寺

澄潭下無底。將渡又安能。慣上橫空木。輕生此寺僧。曉魚開考考。石塔見層層。不到殊非惡。它年記未曾。

北寺

君看潭北寺。何用減潭南。不到還能止。重來獨未厭。荒涼增客思。貧病覺僧慙。飲水寒難忍。誰言柏子甘。

馬融石室

扶風貴公子。早歲伴山家。吹笛墮秋葉。讀書隨曉鴉。業成心自叛。學若我長嗟。石室非人住。窮山雪似沙。

玉女洞

洞門蒼蘚合。偈仄不容身。傳有虛明處。中藏窈窕人。吹笙橋上月。拾翠洞南春。往往來山下。蕭然雨洒塵。

和子瞻調水符

多防出多欲。欲少防自簡。君看山中人。老死竟誰謾。渴飲吾井泉。飢食甑中飴。何用費卒徒。取水負瓢罐。

置符未免欺。反覆慮多變。授苦無憂符。階下泉可嚙。

次韻子瞻招隱亭

隱居吾未暇。何暇勸夫人。試飲此亭酒。自慙纓上塵。林深開翠帟。岸斷峻嚴闌。送雪村醅釀。迎陽鳥嘒新。竹風吹斷籟。湖月轉車輪。霜葉飛投坐。山梅重壓巾。欲居常有待。已失歎無因。古語君看取。聲名本實賓。

次韻子瞻凌虛臺

棄我謂我遠。求我謂我還。我一爾則二。視此臺上山。山高上干天。獨不照我顏。無乃我自蔽。誰謂山則慳。遠望不見趾。近視不得鬢。山實未始變。任子自擇刪。北風吹南崖。山上秋葉斑。道遠又寒苦。皴裂辭難攀。晴空卷朝雲。照夜霜月彎。強爾登此臺。免爾超閭闔。扶風太守宅舊不見南山。唯此臺上見之。故云。

次韻子瞻竹飴

野食不穿困。谿飲不盜盎。嗟飴獨何罪。膏血自爲罔。陰陽造百物。偏此愚不爽。肥癯與瘦黠。稟受不相髣。王孫處深谷。小若兒在襁。超騰避彈射。將中還復往。一朝受羈縲。冠帶相賓饗。愚死智亦擒。臨食抵吾掌。

次韻子瞻漢陂魚

漢陂霜落魚可掩。枯茨破盤蒲折劍。巨斧敲冰已暗知。長叉刺浪那容閃。鯨孫蛟子誰復惜。朱鬣金鱗漫如染。邂逅相遭已失津。偶然一掉猶思塹。嗟君遊宦久羊炙。有似遠行安野店。得魚未熟口流涎。豈有哀矜自欺僭。人生飽足百事已。美味那令一朝欠。少年勿笑貪匕筯。老病行看費鍼砭。羊生懸骨空自飢。伯夷食菜有不贍。清名驚世不益身。何異飲醯徒醢醢。

和子瞻讀道藏

道書世多有。吾讀老與莊。老莊已云多。何況其駢傍。所讀嗟甚少。所得半已強。有言至無言。既得旋自忘。譬如飲醇酒。已醉安用漿。昔者惠子死。莊子哭自傷。微言不復知。言之使誰聽。哭已輒復笑。不如斂此藏。脂牛雜肥粃。烹熟有不嘗。安得西飛鴻。送弟以與兄。

次韻子瞻南溪微雪

南溪夜雪曉來霽。有客晨遊酒未消。風泛餘花來逐馬。光浮斷澗不知橋。山寒凍合行人息。醉熟賓歡舞意囂。歸騎相將踏瑤玉。嗅林間認早梅條。

和子瞻司竹監燒葦園因獵園下

駿馬七尺行馮馮。曉出射獸霜爲冰。荻園斫盡有枯枿。束茅吹火初如燈。乍分乍合勢開展。蒼煙被野風騰騰。黃狐驚顧嘯儔侶。飛鳥先起如蒼蠅。須臾立旆布行伍。似有脩蟒橫岡陵。蒼蠅猛犬出前後。缺處已掛黃麻罾。回風忽作火力怒。平地一卷無疆塍。商辛不出抱寶死。曹瞞逸去燹其肱。投身誤喜脫灰燼。闔首旋已遭侵凌。何人上馬氣吞虎。狐帽壓耳皮蒙膺。開弓徐射疊雙兔。擁馬驢叫驚未曾。舉鞭一麾百夫進。擊鼓再發箭啓棚。去如飛虻中如電。獲若兩獸膏流蠅。肉分麾下飽壯士。皮與公子留縑繒。縱橫分裂惠村塢。尙有磊落載後乘。吾兄善射久無敵。是日斂手稱不能。憑鞍縱馬聊自適。酒後醉語誰能磨。健兒擊搏信可樂。主將雄猛今誰勝。胸中森列萬貔虎。嗟世但以文儒稱。安得強弓傳長箭。使射蔽日垂天鵬。

木山引水二首

引水穿牆接竹梢。谷藏峯底大容瓢。將流旋滴廬山瀑。已盡還來海上潮。亂點落池驚睡覺。半含山潤沃

心焦瓦盆一斛何勝滿。溢去猶能浸菊苗。
簷下枯槎拂荻梢。山州迤邐費公瓢。幽泉細細流巖鼻。盆水瀰瀰漲海潮。但愛堅如湖上石。誰憐收自竈中焦。蒼崖寒溜須佳蔭。尙少青冬石鱸苗。

興州新開古東池

山遶興州萬疊青。池開近郭百泉并。昔年種柳人安在。累歲開花藕自生。波暖跳魚樂聞喜。人來野鴨望船鳴。西還過此須終日。爲問使君行未行。

子瞻喜雨亭北隋仁壽宮中怪石

仁壽宮中穠穀生。太湖蒼石草間橫。興衰換世身猶在。南北從人事已輕。累石作臺秋蘚上。鑿汧通水細渠清。三年此亦非公有。空使他年記姓名。

用林妣韻賦雪

密雪來何晚。窮冬候欲差。投空落細米。布地淨平沙。繚繞飛相着。重仍積暗加。雨微花破碎。風細腳傾斜。次第來如摻。冥濛墮不譁。燭鵝吹勁韉。秀葦拂輕枷。畫字飄還沒。團毬暖旋窩。出鹽東海若。鍊石古皇媧。翻簸騰歸騎。紛飄集晚鴉。庭梅辨紅萼。壠麥覆黃芽。撥砌求新藥。尋蹤射伏廳。埋樓平盡脊。集樹短留槎。亂下曾何擇。平鋪欲盡遮。欺貧寒入褐。惱客重添車。積素聊成燭。烹甘強試茶。病僧添曉鉢。老令放晨衙。融液曾何有。鮮明竟不奢。積多還避井。化早發從畬。溜滴簷垂著。行觀逕轉蛇。誰能相就醉。都市酒容賒。

送張唐英監閬州稅

閩中雖近蜀。監稅本閑官。豈足淹賢俊。聊應長羽翰。讀書心健否。答策意何闌。未可厭畋獵。田中有走貆。
送張師道楊壽棋二同年

故國多賢俊。登科並弟兄。重來舊游處。兩見近題名。冉冉須堪把。駸駸歲可驚。孤轅已南向。馬疋復西征。
入峽猿應苦。還荆鴈已鳴。喜從元帥幕。官職漸崢嶸。

送家定國同年赴永康掾

清慎岷山掾。登科已七年。迎親就魚稻。爲吏擇林泉。去騎關中熱。歸心沫水鮮。官閑幸可樂。記買鷓鴣煎。
永康多鷓鴣

送霸州司理翟曼

大梁能賦客。邊郡繫囚曹。官職不相稱。聲名終自高。試觀爲吏苦。應過讀書勞。努力事初宦。尺絲無厭縲。
送道士楊見素南遊

黃河春漲入隋溝。往意隨波日夜流。萬里尋山如野鶴。一身浮水似輕鷗。湖風送客那論驛。岳寺留人暗
度秋。遲子北歸來見我。攜琴委曲記深幽。

利路提刑亡伯郎中挽詞二首

好學先鄉黨。登科復妙年。誰爲耆舊傳。最處縉紳先。淪謝今亡矣。風流孰繼焉。魂歸食里社。世世仰仁賢。
晚歲官仍困。終身恥自言。廉明漢循吏。仁愛鄭公孫。赤縣朝稱理。衡山德共尊。遠人應罷市。處處有遺恩。
亡伯母同安縣君楊氏挽詞

樂城集 卷第二

德盛諸楊族。賢宜伯父家。周姜職蘋藻。歎母事蠶麻。大邑移封近。陰堂去日賒。空餘鏡奩在。時出舊笄珈。

欒城集卷第三

詩七十五首

北京送孫曼叔屯田權三司開圻司

人生不願才。才士困奔走。君爲大農屬。求暇更能否。自我遊魏博。相識恨未久。誰言但傾蓋。信有勝白首。清晨坐風觀。落日說涼牖。棋精動如律。弓健不論斗。旁觀我不能。晤語君見受。秋風起沙漠。淒雨溼征袖。送行欲汲汲。富貴恐君後。將去聊遲遲。已遠悲朋友。

和強至太博小飲

誰能飲酒如傾水。醉倒坐中扶不起。形骸外物已如遺。升斗任君無復避。霜梨冰脆寒侵齒。未盡一杯先已醉。強將文字笑紅裙。冷淡爲歡何足貴。

和強君瓦亭

君爲魏博三年客。日有江湖萬里心。整得野亭留馬足。強循踈柳步堤陰。無人攜手共吳語。得意搖頭時越吟。何日東郊過微雨。並騎鞍馬去同尋。

中秋夜八絕

得月明星稀
烏鵲南飛韻

長空開積雨。清夜流明月。看盡上樓人。油然就西沒。誰遣常時月。偏從此夜明。暗添珠百倍。潛感免多生。

欲見初容燭。將升尙有星。漸高圍漸小。雲外轉亭亭。
明入庭陰白。寒侵酒氣微。夜深看更好。樓上漸人稀。
浮光看不定。重露試還無。影翻狂舞客。明誤已棲烏。
巧轉上人衣。徐行度樓角。河漢冷無雲。冥冥獨飛鶴。
猿狖號枯木。魚龍泣夜潭。行人已天北。思婦隔江南。
看久須扶立。行貪遂失歸。誰能終不睡。爛醉羽觴飛。

次韻王君旣尙書會六同年

有美佳賓賢主人。布衣曾共脫京塵。歡來未覺歲華晚。
醉後能令秋氣春。發譽早同初宦日。收功終籍老
成身。它年此會應圖畫。傳入誰家屏幃新。

王君旣生日

純陰十月晚。勁氣肅羣驕。惟有喬松在。長看積雪消。
生賢稟真性。特立冠當朝。早歲初成賦。羣雄已失標。
治才精破竹。廷論壯生鱗。博士皆推賈。宣皇重試蕭。
周旋窮政體。出入解心焦。九列高稱冠。三台豈足超。
論功歸穎霸。舉相待虞姚。驥騁經新隊。弓強發矢弨。
百年時節在。四海衆心翹。當見飛中使。齋金賜此朝。
二府生日。
例賜金帛。

次韻姚孝孫判官見還岐梁唱和詩集

伯氏文章豈敢知。岐梁偶有往還詩。自憐兄力能兼弟。
誰肯墳終不聽篋。西號春游池百頃。南溪秋入竹

千枝恨君曾是關中吏。屬和追陪失此時。

次韻王臨太博馬上

冬晚霜露重。城遙鞍馬勞。徒知事奔走。曾未補毫毛。水旱嗟頹蹙。瘡痍費抑搔。莫歸何暇食。堆按簿書高。

次韻王君北都偶成三首

河轉金隄近。天高魏闕新。千夫奉儒將。百獸伏麒麟。校獵沙場莫。談兵玉帳春。關南知不遠。誰試問番隣。天寶亂已定。河堧兵更多。故城埋白骨。遺俗喜長戈。臥獸常思肉。奔鯨不受羅。縱橫竟安在。誰見冢嵯峨。禁籞封金殿。清河貫石門。時平餘古木。兵散有空屯。形勝山圍闕。蕃宣海內尊。川原不論頃。雲夢可勝吞。

次韻沈立少卿白鹿

白鹿何年養。驚猜未肯馴。軒除非本性。飲食強依人。烈影冰浮水。飛毛雪洒塵。獨游應已倦。忽見乍凝神。野色明幽步。煙蕪薦臥身。異姿人共愛。清意爾誰親。日暖山苗熟。風微澗草春。何緣解韁繫。奔放任天真。

送陳安期都官出城馬上

城中二月不知春。唯有東風滿面塵。歸意已隨行客去。流年驚見柳條新。簿書填委休何日。學問榛蕪愧古人。一頃稻田三畝竹。故園何負不收身。

登上水閣

淇水沄沄入禁城。城樓中斷過深清。空郊南數牛羊下。落日迴瞻觀闕明。歲月逼人行老大。江湖發興感平生。畫船早晚籠新屋。慰意來看水面平。

寒食贈遊壓沙諸君

城南壓沙古河淤。沙上種梨千萬株。隆冬十月我獨往。風吹葉盡枝條疎。老僧屈指數春候。卻後百日花當蘇。微風細雨膏潤足。枝頭萬萬排明珠。齊開競發不知數。照曜冰雪明村墟。此時官閑得遊賞。長堤平穩宜驂駒。寺門古木芽葉動。倉庚布穀相和呼。及時行樂不可緩。歲長春短花須臾。僧言我意兩相值。欲往屢已脂吾車。今朝寒食燈火斲。薄雲蔽日風沙除。此花久已待我至。況有朋友相攜扶。來邀反覆不能往。豈獨負君花已辜。諸君高邁足才思。佐酒況得萬玉奴。坐中未醉慎無起。倒載當山公使如。

明日厚安卿強幾聖復召飲醉次前韻

芳樽酌水清無淤。梨園著雪迷根株。鄴宮士女喜行樂。坐上酌客誰親踈。倦遊不知歲月過。痛飲漸覺筋骸蘇。風吹落片亂鶉毳。雨結細實駢明珠。雲屯冰積動論頃。誰信城郭涵村墟。坐觀明媚低照席。行看繁鬧橫遮駒。我貧不辨供酒炙。側耳日聽交朋呼。無端人事巧拘束。曾不見置閑須臾。長鯨渴水求入海。老驥伏櫪思就車。清明未過春未老。寒食豈必節與除。二君爲我重置酒。席上醉倒交相扶。觀娛安用苦酬酢。叫嘯不畏相罪辜。昏然已覺萬物小。下視吏役眞婢奴。請君數具牛酒費。此外百事何能如。

次韻柳子玉郎中見寄

新年始是識君初。顧我塵埃正滿裾。談辨本容朝夕聽。情親空愧往還書。久聞筆陣無前敵。更擬詩壇託後車。待得入城應少暇。相從有約定何如。

秀州僧本瑩淨照堂

有僧訪我攜詩卷。自說初成淨照堂。求得篇章書壁素。不論塵土漬衣黃。故山別後成新歲。歸夢春來遶舊房。看取盈編定何益。客來無語但循牆。

京師送王頤殿丞

憶遊長安城。皆飲母卿宅。身雖坐上賓。心是道路客。笑言安能久。車馬就奔迫。城南南山近。勝絕聞自昔。徘徊竟莫往。指點煩鞭策。道傍古龍池。深透河渭澤。山行吾不能。愧此纔咫尺。壯哉誰開鑿。千頃如一席。參差山麓近。滉蕩波光射。君時在池上。俗事厭紛劇。望門不敢叩。恐笑塵土迹。自從旅京城。所向愈無適。君來曾未幾。已復向南國。扁舟出淮汴。唯見江海碧。野人處城市。長願有羽翮。脫身相從遊。未果聊自責。

石蒼舒醉墨堂

石君得書法。弄筆歲月久。經營妙在心。舒卷功隨手。惟茲逸羣氣。扶駕須斗酒。作堂名醉墨。揮灑動牆牖。安得濁酒池。淋漓着濡首。取但繼張君。莫顧顛名醜。

遊淨因院寄璉禪師

歲月潛消日裏冰。依然來見佛堂燈。此身已自非前我。問法何妨似舊僧。灑面飛泉時點點。壓池蒼石尙層層。遙知近愛金山好。江水煎茶日幾升。

送柳子玉

柳侯白首郎。風格終近古。舊遊日零落。新輩誰與伍。人情逐時好。變化無定主。試看近時人。相教蹈規矩。行身劇孔孟。稱道皆禹舜。但求免譏訐。豈顧愁肺腑。坐令不羈士。舉足遭網罟。緬懷我生初。遺俗尙目睹。

中庸雖已亡。比近則猶愈。老成慎趨好。後生守淳魯。宜效相謾欺。銜牛沾馬脯。過惡酒色間。可罪非可惡。譬如嵇與阮。心迹豈深蠹。京師逢柳侯。往事能歷數。歡息子美賢。相與實舊故。至今存篇章。醉墨龍蛇舞。斯人今苟在。亦恐終囚虜。惜哉時論隘。安置失處所。一麾寄河壩。垂老幸有土。世俗安足論。且盡杯中醕。

送蘇公佐修撰知梓州

乘軺舊西蜀。出鎮復東川。父老知遺愛。壺漿定滿前。江山昔年路。旄節異邦權。望重朝中舊。疆分劍外天。歲登無猛政。蠻服罷防邊。去國身雖樂。憂時論獨堅。孤誠抱松直。彙進比茅連。我亦相從逝。踈狂且自全。

送任師中通判黃州

一別都門今五年。劇談精壯故依然。厭居巴蜀千山底。決住荆河十頃田。老去功名無意取。身閑詩筆更能專。黃州無事聊須飲。世俗方今自足賢。

南窗

京師三日雪。雪盡泥方深。閉門謝還往。不聞車馬音。西齋書帙亂。南窗初日升。展轉守床榻。欲起復不能。開戶失瓊玉。滿塔松竹陰。客從遠方來。疑我何苦心。踈拙自當爾。有酒聊共斟。

次韻楊褒直講攬鏡

鬢髮年來日向衰。相寬不用強裁詩。壯心付與東流去。霜蟹何妨左手持。苑發黃鸝巧言語。池開楊柳鬪腰肢。勸君行樂還聽否。卽是南風苦熱時。

送錢婺州純老

桃花汴水半河流。已作南行第一舟。倦報朝中言嘖亂。喜聞淮上榜咿啾。平時答策詞無枉。此去爲邦學更優。自古東陽足賢守。請君重賦沈公樓。

次韻柳子玉見贈

壯心哀盡愧當年。刻意爲文日幾千。老去讀書聊度歲。春來多睡苦便氈。夢歸似鴈長飛去。才短如蠶只自纏。唯有聞詩尙思和。可能時寄最高篇。

次韻任遵聖見寄

故國老成誰復先。壯心空記話當年。灌夫失意貧無友。梅福辭官晚作仙。詩句清新非世俗。退居安穩卜江天。它年我亦從君隱。多買黃魚煮復煎。

次韻劉貢甫學士畫松石圖歌

長松大石生長見。竭遊塵土嗟空羨。寒翠關心失舊交。榮華過眼驚流電。破繒買得古畫圖。遺墨參差隨斷線。蟠枝倒掛風自舞。直幹孤生看面面。故山白物遠莫致。愛此隨人共流轉。物生真傍竟何有。邊意一時寧復辨。少年所好老成癖。傍人指笑嗟矜銜。京城宅舍松石希。買費百金猶恐賤。

送頓起及第還蔡州

詔書京鋪起沈淪。歲貢仍居第一人。不愧得官名暫屈。自誇對策語深淳。讀書飽足終無厭。從宦奔馳自此新。我去淮陽今不久。鄰邦時得問音塵。

初到陳州二首

謀拙身無向。歸田久未成。來陳爲懶計。傳道愧虛名。俎豆終難合。詩書強欲明。斯文吾已試。深恐誤諸生。久愛閑居樂。茲行恐遂不上官。容碌碌。飽食更悠悠。枕畔書成僻。湖邊柳散愁。踈慵愧韓子。文字化潮州。

柳湖感物

柳湖萬柳作雲屯。種時亂插不須根。根如臥虵身合抱。仰視不見蜩蟬喧。開花三月亂飛雪。過牆度水無復還。窮高極遠風力盡。棄墜泥土顏色昏。偶然直墮湖中水。化爲浮萍輕且繁。隨波上下去無定。物性不改天使然。南山老松長百尺。根入石底蛟龍蟠。秋深葉上露如雨。傾流入上明珠圓。乘春發生葉短短。根大如指長而堅。神農嘗藥最上品。氣力直壓鍾乳溫。物生稟受久已異。世俗何始分愚賢。瞥見野人言柳花入水爲浮萍。松上露墮地爲仙茅。陰乾服之益人。右方云十斤鐘乳不如一斤仙茅。

柳湖久無水悵然成詠

平湖水盡起黃埃。惟有長堤萬萬栽。病鶴摧頽沙上舞。遊人寂寞岸邊回。秋風草木初搖落。日莫樵蘇自往來。更識明年春絮起。共看飛雪亂成堆。

次韻孫戶曹朴柳湖

踈慵非敢獨違時。野性顛狂不受羈。猶有曲湖容笑傲。誰言與物苦參差。水乾生草曾非惡。鶴舞因風忽自怡。最愛柳陰遲日暖。幅巾輕屨肯相隨。

贈李簡夫司封

平生談笑接諸公。歸老身心着苦空。往事少能陪晤語。新詩時喜挹清風。形骸摩結羸偏健。筆札西臺晚

更工笑我壯年常苦病。異時何以作衰翁。

次贈李簡夫春園

秋色豈相負。小園仍有花。透欄吟落日。拾徑得殫葩。菊細初藏蝶。桐疎不庇鴉。遊觀須作意。霜雪僅留槎。

題李簡夫葆光亭

逕草侵芒屨。庭花墮石臺。小庭幽事足。野色向人來。坐上烏皮几。墻間大瓠壺。老成無不可。談笑得徘徊。

次韻李簡夫因病不出

十五年來一味閑。近來推病更安眠。鶴形自瘦非關老。僧定端居不計年。坐上要須長滿客。杖頭何用出攜錢。未嫌語笑妨清靜。閑暇陪公几杖前。

張安道尙書生日

出入三朝望愈尊。淮陽退臥避喧煩。崇高歷遍知皆妄。風俗頻遷氣獨存。世事直須勞舊德。歸心那復厭名藩。赤松作伴功雖切。白髮憂時義所敦。仁比高山年自倍。秋逢生日喜盈門。知公知命身無禱。聊爲生靈舉壽樽。

送劉道原學士歸南康

大川傾流萬物俱。根旋腳脫爭奔徂。流萍斷梗誰復數。長林巨石曾須臾。軒昂顛倒唯恐後。嗟予何獨強根株。三年一語未嘗屈。擬學文舉驚當塗。心知勢力非汝敵。獨恐清議無遺餘。扁舟歲晚告歸覲。家膳欲及羞蕒鱸。隱居高節世所尙。掛冠早歲還州閩。紛紜世事不着耳。得失豈復分鎔銖。投身固已陷泥滓。獨

立未免遭霑濡。君歸左右誰高趣。牛毛細數分賢愚。

題滑洲畫舫齋贈李公擇學士

牕戶重重向日明。船居氣味此中生。汀州出沒叢花短。波浪澄虛兩岸平。竄逐南來身未隱。安閑感物意猶驚。前賢事迹君今似。不愧當年畫舫名。歐陽公南還佐是邦而爲此齋公擇之謫亦從南來故云。

送王恪郎中知襄州

魏公德業冠當年。汝守威名踈漢邊。將相傳家俱未遠。子孫到處各推賢。風流最喜君真似。符竹連分政得專。峴首重尋碑墮淚。習池還指客橫鞭。逃亡已覺依劉表。寒俊應須禮浩然。當有郡人知古意。欄街齊唱接離篇。

和張安道讀杜集用其韻

我公才不世。晚歲道尤高。與物都無著。看書未覺勞。微言精老易。奇韻喜莊騷。杜叟詩篇在。唐人喜力豪。近時無沈宋。前輩蔑劉曹。天驥精神穩。層臺結構牢。龍騰非有迹。鯨轉自生濤。浩蕩來何極。雍容去若遨。壇高真命將。毳亂始知髦。白也空無敵。微之豈少褒。論文開錦繡。賦命委蓬蒿。初試中書日。旋聞廊時逃。妻孥隔豺虎。關輔暗旌旄。入蜀營三徑。浮江寄一艘。投人慙下舍。愛酒類東臯。漂泊終浮梗。迂踈濁釣鰲。誤身空有賦。揜脛惜無袍。卷軸今何益。零丁昔未遭。相如元並世。惠子謾臨濠。得失將誰怨。憑公付濁醪。

送張公安道南都留臺

識公歲已深。從公非一日。仰公如重雲。庇我貧賤迹。公歸無留意。我處念平昔。少年喜文字。東行始觀國。

成都多遊士。投謁密如櫛。紛然衆人中。顧我好顏色。猖狂感一遇。邂逅登仕籍。爾來十六年。髮髮就衰白。謀身日已謬。處世復何益。從來學俎豆。漸老信典冊。自知百不堪。偶未三見黜。譬如溝中斷。誰復強收拾。高懷絕塵土。舊好等金石。庠齋幸無事。樽俎奉清適。居然遠憂患。況復取衿式。汪洋際海深。淡泊朱弦直。狗時非所安。歸去亦何失。道存尙可卷。功成古難必。還尋赤松子。獨就丹砂術。恨無二頃田。伴公老蓬華。

傅欽之學士濟源草堂

聞有高居直百金。西山南麓北山陰。園通濟水池塘好。花近洛川顏色深。人去節旄分重鎮。客來猿鶴感幽吟。溪溪雨過西湖漲。歸興蕭然定不任。欽之時在許州。

文與可學士墨君堂

虛堂竹叢間。那復厭竹遠。風庭響交戛。月牖散凌亂。尙恐晝掩關。嬋娟不長見。中堂開素壁。蕭颯起霜幹。隨宜賦生意。落筆皆葱蒨。根莖雜土石。枝葉互長短。依依露下綠。冉冉風中展。開門視叢薄。與此終何辨。

故成都尹陸介夫挽詞

擁節西來未一年。淒涼道路泣東轅。蜀都富樂真當惜。民事艱難誰復論。白馬何人趨遠日。青芻盈束更無言。異時歸去逢遺老。空聽咨嗟述舊思。

次韻柳子玉謫官壽春舟過宛丘見寄二首

局冷曾非簿頗迷。幽居渾似未官時。忽聞客至驚還喜。出見泥深笑不知。謀拙未能憂歲計。身閑聊可飽晨炊。行舟借問何忽草。淮口無潮月正虧。

獻酬不用辭升斗。曲直何勞問尺尋。要路風波無恨惡。謫居情味最能深。交從錦水初無間。鄰卜共山已有心。草聖詩豪並神速。數因南鴈惠佳音。

次韻子瞻穎州留別二首

託身遊宦鄉。終老羨箕穎。隱居亦何樂。親愛形隨影。念兄適吳越。霜降水初冷。翩然事舟楫。棄此室廬靜。平明知當發。中夜抱虛警。永懷江上宅。歸計失不猛。人生狗所役。有若魚墮井。遠行豈易還。劇飲終難醒。不如早自乞。閑日庶猶永。世事非所憂。多憂亦誰省。放舟清淮上。蕩滌洗心胸。所遇日轉勝。恨我不得同。江淮忽中斷。陂隄何重重。紫蟹三寸筐。白鳧五尺童。赤鯉寒在汕。紅粳滿霜風。西成百物賤。加飡慰貧窮。胡爲復相念。未肯安南東。人生免飢寒。不受外物攻。不見田野人。四壁編茅蓬。有食輒自樂。誰知富家翁。

陪歐陽少師永叔燕穎州西湖

西湖草木公所種。仁人實使甘棠重。歸來築室傍湖東。勝遊還與邦人共。公年未老髮先衰。對酒清歡似昔時。功成業就了無事。令名付與他人知。平生著書今絕筆。閉門燕居未嘗出。忽來湖上尋舊遊。坐令湖水生顏色。酒行樂作遊人多。爭觀竊語誰能呵。十年思穎今在穎。不飲耐此遊人何。

歐陽公所蓄石屏

石中枯木雙扶踈。粲然脈理通飢膚。剖開左右兩相屬。細看不見豪髮珠。老樗剝落但存骨。病松樵悴空留鬚。丘陵迤邐山麓近。雲煙澹霽風雨餘。我驚造物巧如此。刻畫瑣細供人須。公家此類尙非一。客至不

識空嗟吁。案頭紫雲抱明月。牀上寒木翻飢鳥。賦形簡易神自足。鄙弄筆墨嗟勤劬。天工此意與人競。雜山變怪驚羣愚。世門淺拙無與敵。比擬懶有公新書。月石硯屏及石上寒林樓鳥皆公詩所賦

次韻子瞻初出潁口見淮山

清淮此日見滄浪。始覺南來道路長。牕轉山光時隱見。船知水力故軒昂。白魚受釣收寒玉。紅稻堆場列遠岡。波浪連天東近海。乘桴直恐漸茫茫。

次韻子瞻壽州城東龍潭

東行取次閱三州。擊鼓清晨復解舟。車騎紛紜追過客。歌鍾淒咽動潛蚪。宦遊底處非巢燕。歸計何嫌涸沐猴。賴有故人憐遠適。慇懃屢勸酒行周。

和子瞻渦口遇風

長淮暮生風。來自渦河口。新舟雖云固。波浪亦難受。詩來話艱厄。驚恐及兒婦。憶同泝荆峽。終夜愁石首。餘飈入幃幄。跳沫濺窗牖。平生未省見。驚顧欲狂走。爾來涉憂患。漸覺成老醜。遙喜波浪中。時能飲醇酒。

和子瞻濠州七絕

塗山

娶婦山中不肯留。會朝山下萬諸侯。古人辛苦今誰信。只見清淮入海流。

彭祖廟

長說先師似老彭。共疑好學古書生。不知亦解滄雲母。白日登天萬事輕。山有雲母云彭祖所採服

逍遙臺莊子墓上祠堂也。

猖狂戰國古神仙。曳尾泥塗老更安。厭世乘雲人不見。空墳聊復葬衣冠。

觀魚臺

莊子談空惠子聽。郢人斤斧埃忘形。莫嗟質喪無知者。對石何妨自說經。

虞姬墓

布叛增亡國已空。摧殘羽翮自令窮。艱難獨與虞姬共。誰使西來敵沛公。

四望亭

太和中郡守劉嗣之立李紳爲之記今亭廢矣。
唐史不聞劉嗣之。空傳短李舊歌詩。高亭毀盡唯存記。猶有區區父老知。

浮山洞

洞在淮上夏潦不能及而冬不加高故人疑其浮也。
洞府元依水面開。秋潮每到洞門回。幽人燕坐門前石。長看長淮船去來。

和子瞻泗州僧伽塔

清淮濁汴爭強雄。龜山下闕支祁宮。高秋水來無遠近。蕩滅洲渚乘城墉。千艘銜尾誰復惜。萬人雨泣哀將窮。城中古塔高百尺。下有蛻骨黃金容。蛟龍百怪不敢近。迴風倒浪歸無蹤。越商胡賈豈知道。脫身獻寶酬元功。至人已立萬物表。劫火僅置毛孔中。區區淮汴亦何有一挹可注滄溟東。胡爲尙與水族較。時出變慳驚愚聾。於呼此意不可詰。仰觀飛拱凌晴空。

次韻子瞻發洪澤遇大風卻還宿

昨夜宿鴻澤。再來遂如歸。卻行雖云拙。乘險諒亦非。誰言淮陰近。阻此駭浪飛。長風徑千里。蛟蜃相因依。眇然恃一葉。此勢安可違。冒涉彼何人。勇決生慮微。欲速有不達。魚服豈足肥。風帆尙可轉。野廟誰能祈。但當擁衾睡。慎閉牕與扉。夜聞聲尙惡。起視聊披衣。

次韻子瞻記十月十六日所見

君不見天高后土黃。變化出入唯陰陽。旋凝細霧作飛雹。復遣震雷追日光。可憐萬物甚微細。坐聽百變隨顛僵。深根固蒂無計遯。條來忽返安能防。平生未見實驚耳。稍遠不知如隔牆。君看歌舞醉華屋。下有纍纍排兩廊。眼前苦樂尙懸絕。空中造化知有亡。我居宛丘厭凝沍。雪翻海水填陂塘。但知膏澤利牟麥。恣食麩餌真嘉祥。山陽所記亦何事。有酒胡不盡一觴。

此
页
空
白

欒城集卷第四

詩七十四首

次韻子瞻廣陵會三同舍各以其字爲韻

劉貢甫

貢甫少多才。交遊一何衆。談詞坐傾倒。玉麈日揮弄。逡巡不爲虐。巧捷有微中。羣情忌超邁。微過出嘲諷。南遷時已久。未見肯力貢。舌在終自奇。髀滿安足痛。人生百年內。僅比一朝夢。駸駸就消涸。斗水傾漏甕。江淮未可嫌。遲晚聊自送。試觀終日閑。何似兩耳闕。

孫巨源

巨源學從橫。世事夙討論。著書十萬字。辯如白波翻。諫垣適多事。憂心生病根。立談信無補。閉口出國門。棄置臥江海。閱嘿寧復言。朝行共長歎。逐客繼二孫。謂莘老巨源南方固鄉黨。謫宦侶鶴猿。風俗未寧靜。朋黨爭排根。引去良自得。獨清在澄源。往者未可招。冠蓋方駿奔。

劉莘老

莘老奮徒步。首與觀國寶。儼然自約束。被服鞅與紳。黽勉丞相府。接迹輿臺臣。顧嫌任安躁。未忍裂坐茵。推置冠獬豸。謂言我比鄰。三晉固多士。骯髒存斯人。竄責不敢辭。狂言見天真。南方異風俗。強食魚尾莘。應同賈太傅。抱屈恥自陳。猶有痛哭書。受釐定何辰。

和子瞻金山

長江欲盡闊無邊。金山當中唯一石。潮平風靜日浮海。縹緲樓臺轉金碧。瓜洲初見石頭城。城下波濤與海平。中流轉柁疑無岸。泊舟未定僧先迎。山中岑寂恐未足。復將江水遶山麓。四無鄰家羣動息。鍾聲鏗鏗答山谷。鳥鳶力薄墮中路。惟有胡鷹石上宿。誰知江海多行舟。遊人上下奪巖幽。老僧心定身不定。送往迎來何時竟。朝遊未厭夜未歸。愛山如此如公稀。不待遊人盡歸去。恐公未識山中趣。

和子瞻焦山

金山遊遍入焦山。舟輕帆急須臾間。涉江已遠風浪闊。遊人到此皆爭還。山頭冉冉萬竿竹。樓閣不見門長關。金山共此一江水。只有勝絕無此閑。野僧終日飽一鉢。與世相視如髦鬢。門無舟楫斷還往。說法教化龜蠃頑。偶然客至話鄉國。西望落日低銅鑲。岷峨正在日入處。想象積雪堆青鬢。稻田一頃良自給。仕宦不返知誰扳。久安祿廩農事廢。強弓一弛無由彎。行逢佳處輒歎息。想見茅屋藏榛菅。我知此地便堪隱。稻苗旆旆魚斑斑。焦山長老蜀僧也。

次韻子瞻遊甘露寺

去國日已遠。涉江歲將闌。東南富山水。跬步留清歡。遷延廢行邁。忽忘身在官。清晨陟甘露。乘高棄征鞍。超然脫闌闔。穿雲撫朱欄。下視萬物微。惟覺滄海寬。潮來聲洶洶。望極空漫漫。一一渡海舶。冉冉移檣竿。水怪時出沒。羣嬉類緞源。幽陰自生火。青燐復誰鑽。石頭古天險。憑恃分權瞞。疑城曜遠目。來騎驚新觀。聚散定王業。成毀猶月團。金山百圍石。岌岌隨濤瀾。猶疑漢宮廷。屹立承露盤。狂波恣吞噬。萬古嗟獨完。

凝眸厭滉漾。邊屋行盤跚。此寺歷今古。遺迹皆龍鸞。孔明所坐石。牂獮非人刊。經霜衆草短。積雨青苔寒。蕭翁嗜佛法。大福將力干。坡陁故鑊在。甲錯蒼龍蟠。衛公秉節制。佛骨埋金棺。長松看百尺。畫像留三歎。新詩語何麗。傳讀紙遂剗。嗟我本漁釣。江湖心所安。方爲籠中閉。仰羨天際搏。遊觀惜不與。賦詠嗟獨難。俸祿藉升斗。齏鹽嗜鹹酸。何時扁舟去。不俟官長彈。

李簡夫挽詞二首

老成渾欲盡。吊客一漻然。遺事人人記。清詩句句傳。掛冠踈傳早。樂世白公賢。歎息風流在。埋文得細鐫。

又

歸隱淮陽市。遨遊十六年。養生能淡泊。愛客故留連。傾蓋知心晚。論詩臥病前。葆光塵滿榻。無復聽談禪。

次韻子瞻初到杭州見寄二絕

吏治區區豈不任。吳中已自富才能。還應占位書名姓。學取藍田崔縣丞。試盡風波萬里身。到官山水卻宜人。君知晏子恩仍厚。還與從來舊卜鄰。

和柳子玉地爐

繫地泥床不費功。山深炭賤火長紅。擁衾熟睡朝衙後。抱膝微吟莫雪中。寵辱兩忘轉世味。冰霜不到傲天工。遙知麻步無人客。寒夜清樽誰與同。

和柳子玉紙帳

夫子清貧不耐冬。書齋還費紙重重。聰明曉日從教入。帳厚霜飈定不容。京兆牛衣聊可藉。公孫布被旋

須縫。吳綾蜀錦非嫌汝。簡淡爲生要易供。

次韻子瞻遊孤山訪惠勲惠思

鳥依山魚依湖。但有所有無。所無輕舟沿汜窮。遠近肩輿上下更傳呼。翩然獨往不攜孥。兼擅魚鳥兩所誤。困依巖石坐巉絕。行牽翠蔓隨纏紆。道逢勲思訪其廬。誦詩清切秋蟬孤。隱居羞踏陌上土。何人起愛輪下蒲。水南巷中羅百夫。雞鳴朝謁至日晡。人生變化安可料。憐汝久遁終無圖。鳧鷖不足鶴有餘。一俯一仰戚與遽。嗟我久欲從逃遁。方圓不敢左右摹。

宛丘二詠并序

宛丘城西柳湖。累歲無水。開元寺殿下山茶一株。枝葉甚茂。亦數年不開。輟頃從子瞻遊此。每以二物爲恨。去秋雨雪相仍。湖中春水忽生數尺。至二月中山茶復開千餘朵。因作二詩奉寄。

旱湖堤上柳空多。倚岸輕舟奈汝何。秋雨連渠添積潤。春風吹凍忽生波。蟲魚便爾來無數。鳧鴈猶疑未肯過。持詫錢塘應笑我。坳中浮芥兩么麼。

古殿山花叢百圍。故園曾見色依依。凌寒強比松筠秀。吐豔空驚歲月非。冰雪紛紜真性在。根株大老衆園希。山中草木雖攜種。潦倒塵埃不復歸。

贈提刑賈司門青

前年乘舟護南河。宛丘官舍酣且歌。去年持節憂狂獄。驅車道路日不足。今年春風塵土黃。遠赴三州議繇役。天子憂民法令新。整齊百事無閑人。苗耘髮櫛何時已。回首昔遊如夢寐。區區學舍曾未知。春晚日

長唯有睡才智有餘安得閑。踈慵顧我自當然。喜君未忘太平事。獨稱赦書旌孝子。項城有孝子。墳。賈移文陳州。請用。赦書存。卹之。

同陳述古舍人觀芍藥

藹藹堂西十畝園。晚涼迎步綠陰繁。共驚春去已多日。爭看花開最後番。未許狂風催爛熳。故將青幄強安存。請公作意勤歡賞。趁取殘紅照酒樽。

次韻子瞻見寄

我將西歸老故丘。長江欲濟無行舟。宦游已如馬受輓。衰病擬學龜藏頭。三年學舍百不與。糜費廩粟常慙羞。矯時自信力不足。從政敢謂學已優。閉門卻掃誰與語。晝夢時作鈞天遊。自從四方多法律。深山更深逃無術。衆人奔走我獨閑。何異端居割蜂蜜。懷安已久心自知。彈劾未至理先屈。餘杭軍府百事勞。經年未見持千旄。賈生作傳無封事。屈平憂世多離騷。煩刑弊法非公恥。怒馬奔事忌鞭箠。藐藐何自聽諄諄。諤諤未必賢唯唯。求田問舍古所非。荒畦弊宅今餘幾。出從王事當有程。去須臠肉嫌無名。掃除百憂唯有酒。未退聊取身心輕。

趙少師自南都訪歐陽少師於潁州留西湖久之作詩獻歐陽公

公居潁水上。德與潁水清。身閑道轉勝。內足無復營。平昔富交遊。開門坐常盈。退居萬事樂。獨恨無友生。汝潁亦多士。後來非老成。趙公平生舊。情好均弟兄。少年結意氣。晚歲齊功名。攜手踐廊廟。躡足辭鈞衡。徜徉里閭間。脫略世俗縈。興來忽命駕。一往千里輕。白髮儼相映。元勳各崢嶸。人生會面難。此會有餘情。

遨遊西湖中。仲夏草木榮。壺觴列四坐。歌舞羅前楹。畫舫極泝沂。肩輿並逢迎。棹進鳧鴨亂。樂作蟲魚驚。近寺駢履迹。高臺吹笑聲。往事語京洛。餘歡發吟賡。拳拳主人厚。款款來客誠。此樂有時盡。此好何由傾。

次韻子瞻望湖樓上五絕

欲看西湖兩岸山。臥乘湖上木蘭船。湖山已自隨船改。更值陰晴欲雨天。眼看西湖不整來。簿書無筭撥還開。三年屈指渾將盡。記取從今得幾回。湖山欲買恨無錢。且盡芳樽對玉盤。菱角雞頭應已厭。蟹螯馬頰更勤漚。終日清漪弄短橈。久忘車乘走翹翹。秋風且食鱸魚美。洛下諸生未可招。滯留朝市常嫌鬧。放棄江湖也未閑。孤舫粗窮千頃浪。肩輿未盡百重山。

和柳子玉共城新開御河過所居牆下

卜築共山功欲成。新河入縣巧相縈。誰將畚鍤千夫力。添上園林一倍清。生長魚蝦供晚饌。浮沈鵝鴨放春聲。爲鄰有意非今日。丐我餘波伴濯纓。

歐陽太師挽詞三首

雄文元命世。直氣早成風。受任衰遲後。安邦反側中。迴天深有力。扈聖恥言功。事已身隨去。驚嗟柱石空。

又

唐弊文初喪。書成法至今。雍容趨聖處。深切可人心。氣力知難繼。風流喜不淫。懸知公欲謝。異說勇交侵。

又

推轂誠多士。登龍盛一時。西門行有慟。東閣見無期。念昔先君子。嘗蒙國士知。舊恩終未報。感歎不勝悲。

賦黃鶴樓贈李公擇

公擇時知鄂州

前年見君河之浦。東風吹河沙如霧。北潭楊柳強知春。樽酒相攜終日語。君家東南風氣清。謫官河壩不稱情。一麾夏口亦何有。高樓黃鶴慰平生。荆江洞庭春浪起。漢沔初來入江水。岸頭南北不相知。惟見風濤湧天地。巫峽瀟湘萬里船。中流鼓楫四茫然。高城枕山望如帶。華衰照日光流淵。樓上騷人多古意。坐忘朝市無窮事。誰道武昌岸下魚。不如建業城邊水。

次韻子瞻餘杭法喜寺綠野亭懷吳興太守孫莘老

信美非吾土。三吳一水中。亭高望已極。舟入去無窮。朝市知安在。湖山信有功。遨遊逐鳧鴨。飲食數魚蟲。波浪喧朝夕。梅蒸變綠紅。逢人問京洛。去國長兒童。同舍情相接。鄰邦信屢通。相邀欲相過。道里訊溪翁。

和子瞻宿臨安淨土寺

四方清淨居。多被僧所占。既無世俗營。百事得豐贍。家居每紛薄。奉養世寒欠。昔年旅東都。局促吁已厭。城西近精廬。長老時一覘。每來獲所求。食飽山茶釅。塵埃就湯沐。垢膩脫巾轄。不知禪味深。但取飢腸饜。京城苦煩溷。物景費治染。吳都況清華。觀刹吐光豔。石矸度空闊。泉溜瀉深塹。經過未足多。終老應長歎。

和子瞻自淨土步至功臣寺

山平村塢連。野寺鐘相答。晚陰故林莽。落日猶在塔。行招兩社僧。共步青山月。送客渡石橋。迎客出林樾。幽尋本真性。往事聽徐說。錢王方壯年。此邦事輕俠。鄉人鄙貧賤。異類識英傑。立石象興王。遺迹今岌嶮。

功勳三吳定。富貴四海甲。歸來父老藏。崇高畏摧壓。詩人巧譏病。牛領恣挑挾。流傳後世人。談笑資口舌。是非亦已矣。興廢何倉卒。持歸問禪翁。笑指浮漚沒。

次韻子瞻遊徑山

去年渡江愛吳山。忽忘蜀道輕秦川。錢塘後到山最勝。下枕湖水相縈旋。坐疑吳會無復有。扁舟屢出凌濤淵。今秋復入徑山寺。勢壓衆嶺皆摧顛。連峯杳嶂不知數。重重相抱如青蓮。散爲雲霧翳星斗。聚作潭井藏蜿蜒。欽翁未到人迹絕。千里受記來安禪。荒榛野草置茅屋。坐令海賈輸金錢。至今傳法破煩惱。飽食過客容安眠。解裝投錫不復去。紛紛四合來烏鳶。或言此處猶未好。海上人少無煩煎。天台鴈蕩最深秀。水驚石瘦尤清便。青山獨往無不可。論說好醜徒紛然。終當直去無遠近。藤鞋竹杖聊窮年。

次韻子瞻自徑山回宿湖上

朝從徑山來。泱莽徑山色。莫從湖上歸。滉漾湖光碧。借問泛湖舟。何似登山屐。高懷厭朝市。遠去忘憂慄。日向幽人青。顏從濁醪赤。塵埃解羅網。宇宙爲安宅。油然了無營。此意誰能詰。嗟予別離久。欲往徒反側。留滯亦可爲。空驚突深黑。

次韻子瞻題孫莘老墨妙亭

高岸爲谷谷爲陵。一時豪傑空飛騰。身隨造化不復返。忽若野雀逢蒼鷹。當年碑刻最深固。風吹土蝕消無稜。遺文漫滅雨中迹。翠石斷裂春後冰。古墳欲毀野廟廢。行人不去征鞍憑。書生就翫立風雪。飢驢厭苦疲奴憎。愛之欲取恨無力。旋揉翠墨濡黃縑。不如好事孫太守。牛車徒置華堂登。邊牆羅列耀珪璧。能

燕起讀留賓朋。卻思遺迹本安在。原隰處處荒榛藤。田夫野老誰復顧。鬼火夜照來寒燈。廢興聚散一如此。反使涕泗沾人膺。

熙寧壬子八月於洛陽妙覺寺考試舉人及還道出嵩少之間至許昌共得大小詩二十六首洛陽試院樓上新晴五絕。

縹緲危譙面面山。朝來雲作雨潺潺。忽然風卷歸何處。百里陰時反掌間。
嵩少猶藏薄霧中。前山迤邐夕陽紅。高樓一閉三十日。遙憶巖頭種藥翁。
伊闕遙臨鳳闕前。龍門女几氣蒼然。唐朝御路依稀在。猶想東巡塵暗天。
天壇王屋北侵河。高比嵩丘一倍多。小有清靈今上在。俗緣深重柰成魔。
前朝宮闕倚芒山。殿閣層層半嶺間。猶恐北來岡阜淺。大行東抱故孱顏。

和頓主簿起見贈二首

聲病消磨只古文。諸儒經術鬪紛紜。不知舊學都無用。猶把新書強欲分。老病心情愁見敵。少年詞氣動干雲。搜賢報國吾何敢。欲補空疎但有勤。
一鎖樓中暗度秋。微官黽勉未能休。笑談容我聊紓放。文字憑君便去留。杯酒淋漓已非敵。清詩窈眇更難酬。東歸猶得聯征騎。同上嵩高望九州。

將出洛城過廣愛寺見三學演師引觀楊惠之塑寶山朱瑤畫文殊普賢爲賦三首
寺古依喬木。僧閑正暮年。爲生何寂寞。愛客向留連。虛牖羅脩竹。空廚響細泉。坐聽談舊事。遍識洛中賢。

又

虛室無尋丈。青山有百層。迴峯看不足。危石恐將崩。聽法來天女。依巖老梵僧。須彌傳納芥。觀此信還曾。

又

壁毀丹青在。移來殿廡深。賦形驚變態。觀佛覺無心。旌旆翻空色。笙竽含妙音。風流出吳樣。遺法到如今。

登封道中三絕

緜山洞

飛仙不返周王子。重阜相連少室孫。夜靜笙聲兼鶴下。迴看惟有故山存。

轅轅道

青山欲上疑無路。澗道相縈九十盤。東望嵩高分草木。回瞻原隰湧波瀾。

少林寺贈頓起

一徑喬林下黃葉。三山翠壁遶禪居。共君將住還歸去。欲問安心知已疎。少林東接少室北倚石城南臨鳳凰山鳳凰山上有初祖庵二

祖問法於此

登嵩山十首

石徑

蒼壁上參天。微徑隨流水。聲牙石齒亂。紛薄黃葉委。牽攀不得上。顛仆幾將止。勉強終此行。更老知難至。

玉女窗

巖竇有虛明。曠曠發晴曉。真人無儔匹。牕下晨粧早。門開秋雨入。室靜長風掃。絕跡杳難尋。朱顏未嘗老。

擣衣石
玉女雲爲衣。飄搖不須擣。空傳巖下石。夜杵知誰抱。清泉供澣濯。素月鋪繒縞。人世迫秋寒。處處砧聲早。

醒心泉
上山苦飢渴。中道得寒泉。舉瓢石竇響。入口頰痾痊。泝流去不見。落澗聲鏗然。莫歸復相值。相從下平川。

峯頂寺
重重山前峯。上上終非頂。行登衆嶺徹。始得山門迥。高風慘多寒。落日側先暝。卻視向所經。眇如在深井。

登封壇
登封事已遙。大碑摧風雨。靈壇久銷禿。古木中梁柱。峯巒至此盡。蒼石無寸土。俯視萬仞高。悲辛但狂顧。

法華巖

飛橋走巖居。茅屋今已破。何年避世僧。此地常獨臥。秋風高鳥入。夜月寒猿過。自非心已灰。靜極生悲墜。

將軍柏

在天封觀觀
即唐避暑宮

肅肅避暑宮。石殿秋日冷。凜然中庭柏。氣壓千夫整。風聲答萬壑。雲色通諸嶺。材大難爲工。甘與蓬蒿屏。

吳道子畫四真君

在精思觀

浮埃古壁上。蕭然四真人。矯如雲中鶴。猶若畏四鄰。坐令世俗士。自慙汗濁身。勿謂今所無。嵩少多隱淪。

啓母石

神父化黃熊。神母化白石。嬰兒剖還父。涕泣何暇卹。爾來三千歲。往事誰復識。惟有少姨存。相望居二室。

過韓許州石淙莊

水中有石曰淙。唐天后朝。常燕羣臣於此。石刻尚在。

飛泉來無窮。發自嵩嶺背。奔馳兩山間。偶與亂石會。傾流勢摧毀。泥土久崩潰。堅姿未消釋。截薛儼相對。居然受噴潑。雷轉諸壑內。初喧墮深谷。稍放脫重隘。跳沫濺霏微。餘潤洶澎湃。宸游昔事遠。絕壁遺刻在。人迹久寂寥。物理依興廢。相君厭紛華。築室俯湍瀨。灌纓離塵垢。洗耳聽天籟。將追赤松遊。自置青雲外。道人亦何者。預此事歸計。猶恐山未深。更種萬株檜。

過登封閻氏園

秋暑尙煩襟。林泉淨客心。菊殘知節過。荷盡覺池深。踈柳搖山色。青苔遍竹陰。猶嫌近官道。慳輓聽車音。

許州留別頓主簿

洛寺相從不出門。遠城空復記名園。程文堆案晨興早。竹簟連牀夜語喧。歸路逢僧整容與。登山無力強板援。遙知別後都如夢。賴有君詩一一存。

次韻子瞻登望海樓五絕

山色潮聲四面來。城中金碧爛成堆。不愁門外嚴局鎖。終日憑欄未擬迴。湖色蒼蒼日向斜。煙波萬狀不容誇。畫船人去浮紅葉。石徑僧歸躡白蛇。樓觀爭高不計層。噶噶過鴈自相鷹。錢王舊業依稀在。歲久無人話廢興。荷葉初乾稻穗香。驚雷急雨送微涼。晚晴相放秋山色。洗卻濃粧作淡粧。

白酒傾漿膾斫紅。晝遊未厭月明中。樓高只辨聽歌鼓。不見遊人轉似蓬。

和子瞻監試舉人

登科歲云徂。舊學日將落。外遭飢寒侵。內苦憂患鑠。傳家足墳史。遺說本精約。羣言久紛蕩。開卷每驚聳。居官忝庠序。授業止千籥。朝廷發新令。長短棄前轡。緣飾小學家。睥睨前王作。聲形一分解。道義因附託。安行厭衢路。強挽就縲縛。縱橫施口鼻。爛漫塗丹堊。強辯忽橫流。漂蕩終安泊。憶惟法初傳。欲講而先怍。新科勸多士。從者盡高爵。徘徊始未信。銜誘終難卻。嗟哉守愚鈍。幾不被譏謔。獨醒慙餽糟。未信恥輕諾。敢言折鋒鏑。但自保城郭。有司顧未知。選試謬西洛。羣儒誰號令。新語競投削。雖云心所安。恐異時量度。詭遇便巧射。晚嫁由拙妁。誰能力春耕。忍飢待秋穫。聞兄職在監。考較筆仍開。縮手看傍人。此意殊未惡。

和子瞻煎茶

年來病懶百不堪。未廢飲食求芳甘。煎茶舊法出西蜀。水聲火候猶能諳。相傳煎茶只煎水。茶性仍存偏有味。君不見閩中茶品天下高。傾身事茶不知勞。又不見北方俚人茗飲無不有。鹽酪椒薑誇滿口。我今倦遊思故鄉。不學南方與北方。銅鑪得火蚯蚓叫。匙腳旋轉秋螢光。何時茅簷歸去炙背讀文字。遣兒折取枯竹女煎湯。

次韻子瞻對月見憶并簡崔度

先師客陳未嘗飽。弟子于今敢言巧。敗牆破屋秋雨多。夜視陰精過畢昴。齋鹽冷落空盃盤。且依道士修還丹。丹田發火五臟暖。未補漫漫長夜寒。我生疲鴛戀莖豆。崔翁遊邊指北斗。唯有王江亦未歸。閉門無

客邀沽酒

宛丘道人王江好飲酒
去冬游沉丘遂不歸

和子瞻開湯村連鹽河中督役

興事常苦易成事常苦難不督雨中役安知民力殫年來上功勳智者爭雕攢山河不自保䟽鑿非一端譏訶西門豹仁智未得完以方勇自許未卹衆口歎天心閔劬勞雨涕爲汎瀾不知泥滓中更益手足寒誰謂邑中黔鞭箠亦不寬王事未可回后土何由乾

次韻子瞻雨中督役夜宿水陸寺二首

雲氣連山雨瀉盆莫投僧舍欲關門暫時洒掃寬行役終夕崎嶇入夢魂煩熱暗消秋簟冷烝濡未解夜燈昏二年游宦多勞苦何日相從得細論

野寺蕭條厭客喧雨披脩竹亂紛紛已因無食聊從仕深悟勞生不問禪未至莫憂明日事偷閑且就此宵眠天明歸去茫難滑雖有藤輿懶上肩

次韻子瞻將之吳興贈孫莘老

宦遊莫向長城窟冬冰折膠弦亦絕吳中臘月百事便蟹煮黃金鱸繪雪京城舊友一分散近憶吳興須滿頰世事反覆如翻飛今日共緜前益垂畏人但恐去不遠適意未覺歸來遲借問校讎天祿閣何如江海同遊嬉

和子瞻畫魚歌

吳人以長釘加杖頭以
杖畫水取魚謂之畫魚

潛魚在淵安可及垂餌投竿易如拾橫江設網雖不仁一瞬未移收百十畫魚何者漫區區終日辛勤手

拮据已嫌長網不能遍。肯信一竿良有餘。鯤鯢駭散蛟龍泣。獲少驚多亦何益。願從網罟登君庖。首屠鱗非所惜。

此页空白

欒城集卷第五

詩六十六首

次韻子瞻吳中田婦歎

久雨得晴唯恐遲。既晴求雨來何時。今年舟楫委平地。去年蓑笠爲裳衣。不知天公誰怨怒。棄置下土塵與泥。丈夫強健四方走。婦女齷齪將安歸。榻然四壁倚機杼。收拾遺粒吹糠粃。東鄰十日營一炊。西鄰誰使救汝饑。海邊唯有鹽不旱。賣鹽連坐收嬰兒。傳聞四方同此苦。不關東海誅孝婦。

次韻子瞻遊道場山何山

兩山相負爲峯麓。流水重重注溪谷。遊人上尋流水源。未覺崎嶇病雙足。山深下視雲漫漫。徑垂石底千屈盤。松林陰森白日靜。忽驚人世如奔湍。客行不避苦寒出。僧定端居不下席。人生嗟與草木同。置身所在山初植。堂中白佛青髻鬢。氣象冲淡非人間。坐令遠客厭奔走。徑欲築室依空山。木魚根根夜將旦。星斗欹斜掛山半。行役有程未可留。將出山門復長歎。

癸丑二月重到汝陰寄子瞻二首

憶赴錢塘九月秋。同來穎尾一扁舟。退居尙有三師在。好事須爲十日留。傾瀉向人懷抱盡。忠誠爲國始終憂。重來東閣皆塵土。淚滴春風自不收。

百頃西湖十里源。近依城郭帶川原。古臺駮駝先臨水。野寺參差半掩門。遠泛便成終日醉。幽尋不盡數

家園錢塘未到能先說。更看青山兩岸屯。

次韻子瞻二月十日雪

春雪漫天密又稀。勾芒失據走靈威。故欺貧窶冬裘盡。巧助遨遊酒盞飛。林下細花添百草。堦前輕素剪新機。老農先解憂桑柘。九月家人當授衣。

和子瞻題風水洞

風送江湖滿洞天。洞門可聽入無緣。土囊鬱怒聲初散。石齒聳牙勢未前。樂奏洞庭真跌宕。歌傳帝所亦清便。何人隱几觀遺韻。重使顏成問嗒然。

次韻子瞻新城道中

春深溪路少人行。時聽田間耒耜聲。飢就野農分餉黍。迎嫌尉卒鬧金鉦。閑花開盡香仍在。白酒沾來壓未清。此味暫時猶覺勝。問兄何日便歸耕。

次韻子瞻山村五絕

山行喜遇酒旗斜。無限桃花續杏花。與世浮沈真避世。將家漂蕩似無家。塍間白水細照聲。日暖泥融草不生。似恐田家忘帝力。多差使者出催耕。旋舂紅稻始經鎌。新煮黃雞取次甜。無慕無營人自樂。莫將西子愧無鹽。升平事業苦忽忽。未信浮名到底空。何用囊馳朝塞外。試聽碌軸語場中。貧賤終身未要羞。山林難處便堪愁。近來南海波尤惡。未許乘桴自在遊。

次韻子瞻遊富陽普照寺

塵埃日已遠。斗數更無餘。寺到逢門入。詩成信手書。山深僧自樂。路遠客終踈。訪盡前朝景。它年一告予。

次韻子瞻自普照入山獨遊二庵

披榛入山山路細。鐘聲出寺門將閉。石苔冉冉上芒鞋。草露溥溥著衣袂。野人茅茨苦竹屋。終身局促無生計。天公未省長困人。春田米盡秋田繼。老妻稚子亦自樂。野草山花還插髻。長笑人間醉未醒。終老辛勤漫欺世。

次韻子瞻與蘇世美同年夜飲

晚歲事遊宦。相從未嘗足。羨君四海皆兄弟。棧中直木不容曲。臨安老令況同科。相逢豈厭樽中醪。潦倒誰憐澗底松。歲寒尙有霜前竹。聞道渠家八丈夫。它日歸耕免幽獨。

次韻子瞻病中遊虎跑泉僧舍二首

掃地開門松檜香。僧家長夏亦清涼。公庭多事久來厭。靜處安眠計甚長。脩竹填窗藤篔簹。白蓮當戶石盆方。香廚晚餽紅粳熟。忽憶烹雞田舍嘗。

澗谷新晴草木香。野情消散自生涼。雨添山色翠將溜。日轉松陰晚更長。病客獨來唯有睡。遊僧相見亦它方。還家煩熱都消盡。不信醫王與藥嘗。

和子瞻東陽水樂亭歌

君不見武安前堂立曲旃。官高利厚多憂患。又不見夏侯好妓貧無力。簾箔爲衣人莫識。兩人操行雖不

同。辛苦經營實如一。不如君家激水石中流。聽之有聲百無憂。笙竽窈窕度溪谷。琴筑淒咽穿林丘。高人處世心淡泊。衆聲過耳皆爲樂。退食委蛇石上眠。幽音繼續牀前作。正如古人樂易多歡娛。積土爲鼓塊爲桴。但能復作太古意。君家水樂真有餘。

次韻子瞻有美堂夜歸

飲闌鐘虛欲移軒。香霧猶殘金博山。明月飛來松嶺外。遊人散落馬蹄間。城嚴畫鼓初傳角。路暗山花自落鬢。清境暫時都不見。夜深人靜始來還。

次韻子瞻祈雨

世故紛紛誰復閑。蛟龍不雨獨安眠。人間已厭三秋旱。澗底猶慳一掬泉。廟令酒殺時醉飽。田家糠粃久安便。憂心未已誰知卹。更把爐香試一燃。

次韻子瞻再遊徑山

我兄東南遊。我亦夢中去。徑山聞已熟。往意穿雲霧。夢經山前溪。足冷忽先渡。舉頭雲峯合。到寺霜日暮。香廚饌巖簌。野徑踏藤屨。平生共遊處。蹇足躡高步。崎嶇每生胝。眩晃屢回顧。何年棄微官。攜手衆山路。
得此詩後夢與兄同游山中故爲此篇

王仲儀尙書挽詞

謝公德業久彌新。幼度英奇也絕倫。父子俱賢真不朽。功名自致豈相因。邊兵屢動思良將。廷論蕭條憶諍臣。青史世家他日事。新芊宿草倍沾巾。

次韻范景仁侍郎移竹

雙檜生南戶。叢筠種北墻。交陰奉君子。爲伴老中堂。露洗秋塔綠。風含夏簾涼。栽花知己誤。新上一番霜。

寄題蒲傳正學士閩中藏書閣

朱欄碧瓦照山隈。竹簡牙籤次第開。讀破文章隨意得。學成富貴逼身來。詩書教子真田宅。金玉傳家定糞灰。更把遺編觀得失。君家舊物豈須猜。

自陳適齊戲題

庠齋三歲最無功。羞愧宣王祿萬鍾。猶欲談經誰復信。相招執籥使須從。陳風清淨眠真足。齊俗疆梁懶不容。久爾安閑長自怪。此行磨折信天工。

送董揚休比部知眞州

奏課西南最。分符江海衝。往來觀惠術。蟠錯試餘鋒。文字從堆案。尊壘疆解容。金山只隔水。時復聽晨鐘。

送排保甲陳祐甫

我生本西南。爲學慕齊魯。從事東諸侯。結綬濟南府。誰言到官舍。旱氣裂后土。飢饉費困倉。剽奪驚桴鼓。緬焉禮義邦。憂作流亡聚。君來正此時。王事最勤苦。驅馳黃塵中。勸說野田父。穰穰百萬家。一一連什伍。政令當及期。田閭貴安堵。歸乘忽言西。劬勞共誰語。

送韓祇嚴戶曹得替省親成都

宦遊東土暫相依。政役頻煩會合稀。每恃詳明容老病。不堪羈旅送將歸。思親道路寧論遠。入蜀山河漸

覺非我有舊廬江水上。因君聊復夢魂飛。

和孔教授武仲濟南四韻

環波亭

南山迤邐入南塘。北渚岿嶢枕北墻。過盡綠荷橋斷處。忽逢朱檻水中央。鳧鷖聚散湖光淨。魚鼈浮沉瓦影涼。清境不知三伏熱。病身唯要一藤牀。

北渚亭

西湖已過百花汀。未厭相攜上古城。雲放連山瞻嶽麓。雪消平野看春耕。臨風舉酒千鍾盡。步月吹笳十里聲。猶恨雨中人不到。風雲飄蕩恐神驚。

鵲山亭

築臺臨水巧安排。萬象軒昂發瘞埋。南嶺崩騰來不盡。北山斷續意尤佳。平時戰伐皆荒草。永日登臨慰病懷。更欲留詩題素壁。坐中誰與少陵偕。

檻泉亭

連山帶郭走平川。伏澗潛流發湧泉。洶洶秋聲明月夜。蓬蓬曉氣欲晴天。誰家鵝鴨橫波去。日暮牛羊飲道邊。滓穢未能妨潔淨。孤高每到一依然。

踏藕

春湖柳色黃。宿藕凍猶僵。翻沼龍蛇動。撐船牙角長。清泉浴泥滓。粲齒碎冰霜。莫使新梢盡。炎風翠蓋涼。

和李誠之待制燕別西湖并敘

熙寧六年九月。天章閣待制李公。自登州來守此邦。愛其山川泉石之勝。怡然有久留之意。此邦之人。安公之惠。亦欲公之久於此也。然自其始至。而民知其方將復用。懼其不能久矣。明年二月。詔書移牧河間。邦之父兄。皆惜其去。雖公亦將留焉。而不可得也。於是數與其僚燕於湖上。曰。北方幸安。余將復老於此。酒酣。賦詩以別。從而作者三人。公平生喜爲詩。所至成編。及來此邦。而未嘗有所爲。故尤貴之。遂相與刻於石。以慰邦人之思焉。

東來亦何恃。夫子此分符。談笑萬事畢。樽罍衆客俱。高情生遠岫。清興發平湖。坐使羈遊士。能忘歲月徂。縱歡真樂易。恨別不須臾。廟幄新謀帥。河間最近胡。安邊本餘事。清賞信良圖。應念茲園好。流泉海內無。

送李誠之知瀛洲

少年學詩書。晚歲探至道。豈伊封疆臣。乃是廊廟寶。苦恨富貴遲。聲名得空早。憶惟西羌桀。始建元戎纛。恩威炳朝日。號令靡秋草。功勳不容究。孤高易摧倒。歸來易三邦。但養胸中顯。寧知北邊將。還須用耆老。春風吹旌旆。先聲遍城堡。往事安足懲。遺黎待公保。

西湖二詠

捕觀漁

西湖不放長竿入。羣魚空作淘河食。漁人攘臂下前汀。蕩漾清波浮兩腋。藕梢菱蔓不容網。箔作長圍徒手得。逡巡小舟十斛重。踴躍長魚一夫力。柳條穿頰洗黃金。鱸縷堆盤雪花積。燒薤香橙巧相與。白鮓青

蔬甘莫逆。食罷相攜堤上步。將散重煎葉家白。人生此事最便身。金印垂腰定何益。

食雞頭

芡葉初生縐如縠。南風吹開輪脫殼。紫苞青刺攢蝟毛。水面放花波底熟。森然赤手初莫近。誰料明珠藏滿腹。剖開膏液尙模糊。大盞磨聲風雨速。清泉活火曾未久。滿堂坐客分升掬。紛然咀噍惟恐遲。勢若羣雛方脫粟。東都每憶會靈沼。南國陂塘種尤足。東遊塵土未應嫌。此物秋來日嘗食。

次韻孫推官朴見寄二首

家慍未能憂悄悄。得閑時復醉昏昏。知君亦學無言語。豈悟維摩不二門。病懶近來全廢學。宦遊唯是苦思鄉。粗知會計猶堪仕。貪就功名有底忙。懷舊暗聽秋鴈過。夢歸偏愛曉更長。故人知我今何念。擬向東山賦首章。

送張正彥法曹

憶見君兄弟。相攜謁侍郎。通經誇早歲。落筆盡成章。試劇何風發。當官便激昂。三年知力竭。大府覺才長。知已未如格。歸貲纔滿囊。舊書還讀否。師說近淒涼。君以三傳及第今廢此科。

送青州簽判俞退翁致仕還湖州

不作清時言事官。海邦那久復盤桓。早依蓮社塵緣少。新就草堂歸計安。富貴暫持朝露過。江山故國水精寒。宦遊從此知多事。收取楞伽靜處看。

和青州教授頓起九日見寄

歲月飄然風際煙。紫萸黃菊又霜天。莫思太室杉松外。且醉青州歌舞前。昔年與頓君同登嵩頂時正重九。杯酒追歡真一夢。天涯回望正三年。近來又欲東觀海。聽說毛詩雅頌篇。君善講詩。

題徐正權秀才城西溪亭

竹林分徑水通渠。真與幽人作隱居。溪上路窮惟畫舫。城中客至有罾魚。東來只爲林泉好。野外從教簿領疎。不識徂徠石夫子。兼因女壻覓遺書。徐生石介女壻也。

和子瞻喜虎兒生

生男如狼猶恐尪。寅年生虎慰爺孃。汝家家世事文史。門戶豈有空剛強。識看猛虎在山谷。斧牙鉤爪旗尾揚。徐行當道擇牛羊。狐狸驚走熊豬忙。我今老病思退藏。生子安得尙激昂。不見伯父擅文章。逡巡議論前無當。

次韻子瞻病中贈提刑段繹

京東分東西。中割齊魯半。兄來本相從。路絕人長嘆。前朝使者還。手把新詩玩。憐我久別離。卷帙爲舒散。誰言窮陋邦。得此唱酬伴。相逢傾蓋間。晤語何旦旦。宦遊少娛樂。纏縛苦文案。能於王事餘。時作楚詞亂。臂如近膏油。未肯忘濯盥。賢豪真勉強。功業畏遼緩。伊余獨何爲。舊籍西南貫。竊祿未遑歸。自笑嗟已懦。方當四海寒。戀此一寸炭。主勸客欲留。逡巡要奪館。奈何獨見收。軟語強溫煖。此意定難酬。還子授子粲。

次韻子瞻賦雪二首

麥苗出土正纖纖。春早寒官令尙嚴。雲覆南山初半嶺。風乾東海盡成鹽。來時瞬息平吞野。積久欷危欲

敗簷強付酒樽判醉熟更尋詩句鬪新尖。

點綴偏工亂鵲鴉。淹留亦解惱船車。乘春已覺矜餘力。騁巧時能作細花。僵鴈墮鷗誰得罪。敗墻破屋若

爲家。天公愛物遙憐汝。應是門前守夜叉。是歲京師雪尤甚。烏鳶凍死如積。

次韻韓宗弼太祝送遊太山

羨君官局最優游。笑我區區學問囚。今日登臨成獨往。終年勤苦粗相酬。春深綠野初開繡。雲解青山半脫裘。回首紅塵讀書處。煮茶留客小亭幽。

次韻劉敏殿丞送春

春去堂堂不復追。空餘草木弄晴暉。交遊歸鴈行將盡。蹤跡鳴鳩懶不飛。老大未須驚節物。醉狂兼得避危機。東風雖有經旬在。芳意從今日日非。四月十一日立夏。

次韻趙至節推首夏

首夏尋芳也未遲。遶園紅紫尙菲菲。無心與物真皆可。有酒逢人勸莫違。夢逐楊花無限思。身慙啼鳥不如歸。官居寂寞如僧舍。海燕憐貧故入扉。

次韻李昭敘供備燕別湖亭

池亭雨過一番涼。雲鬢羅裙客兩旁。不覺行人離恨遠。貪看積水照筵光。滿堂樽俎歡方劇。極目江湖意自長。歸去伊川瀟灑地。不須遺念屬清湘。

送李昭敘移黎陽都監歸洛省親

與君非舊識。傾蓋便相親。共事林泉郡。忘歸南北人。煮茶流水曲。載酒後湖濱。未覺遊從厭。空驚別恨新。瀕河今重地。知已舊元臣。洛下聞雞犬。家書不浹旬。西還倚門罷。北渡羽書頻。忠孝傳家事。風流待一振。

遊太山四首

初入南山

自我來濟南。經年未嘗出。不知西城外。有路通石壁。初行澗谷淺。漸遠峰巒積。翠屏互舒卷。耕耨隨欹側。雲木散山阿。逆旅時百室。茲人謂川路。此意屬行客。久遊自多念。忽誤向所歷。嘉陵萬壑底。棧道百迴屈。崖巘遞崢嶸。征夫時出沒。行李雖云艱。幽邃亦已劇。坐緣斗升米。被此塵土厄。何年道褒斜。長嘯理輕策。

四禪寺

山蹊容車箱。深入遂有得。古寺依巖根。連峯轉相揖。樵蘇草木盡。佛事亦蕭瑟。居僧麋鹿人。對客但羞澁。雙碑立風雨。八分存法則。云昔義靖師。萬里窮西域。華嚴貝多紙。歸來手親譯。蛻骨儼未移。至今存石室。遺文盡法界。廣大包萬億。變化浩難名。丹青畫京邑。粲然共一理。眩晃莫能識。末法漸衰微。徒使真人泣。

靈巖寺

青山何重重。行盡上囊底。嚴高日氣薄。秀色如新洗。入門塵慮息。盥漱得清泚。高堂見真人。不覺首自稽。祖師古禪伯。荆棘昔親啓。人跡尚蕭條。豺狼夜相舐。白鶴導青泉。甘芳勝醇醴。聲鳴青龍口。光照白室陛。尚可滿畦塍。豈惟濯蔬米。居僧三百人。飲食安四體。一念但清涼。四方盡兄弟。何言庇華屋。食苦當如薺。

嶽下

東來亦何求。聊欲觀海岱。海西尚千里。將行勇還退。岱陰卽齊疆。南往曾歷塊。春深草木長。山暖冰雪潰。中巷無居人。南畝釋耕耒。車徒八方至。塵坳百里內。牛馬汗淋漓。綺紈聲絳纒。喧闐六師合。洶湧衆流匯。無復問誰何。但自舍耽愛。龍鸞畫車服。貝玉飾冠佩。騁駟蹴騰騫。幡旆飛掩曖。腥膻及魚鼈。瑣細或蒲菜。遊墮愧無齋。技巧窮殊態。縱觀矐未已。精意殫一酌。出門青山屯。遶廊遺迹昧。登封尙壇壝。古觀寫旗隊。戈矛認毫末。舒卷分向背。雍容太平業。磊落豐碑在。往事半蓬蒿。遺氓但悲慨。回瞻最高峯。遠謝徂徠對。欲將有限力。一放目所迨。天門四十里。預恐雙足廢。三宿遂徘徊。歸來欲誰懟。前年道轅轅。直上嵩嶺背。中休強飲食。莫宿時盟類。稍知天宇寬。不覺人寰穢。歲時未云久。筋骸老難再。山林無不容。疲茶坐自礙。自知俗緣深。畢老守闔閭。何當御清風。不用車馬載。

送王璋長官赴真定孫和甫辟書

昔年旅南服。始識王荊州。威動千里肅。恩寬行客留。從容見少子。風采傾凡儔。溫然吐詞氣。已覺清且脩。不見十五年。相逢話百憂。青衫走塵土。白髮各滿頭。新棄東海邑。願從北諸侯。北鄙事方夥。飢饉連戈矛。盟好未可輕。念當事懷柔。主將今老成。勉盡良計籌。

寄孫朴

憶昔補官太皞墟。泮宮蕭條人事疎。日高鼾睡聲噓噓。往還廢絕門無車。君爲戶曹畏簡書。放懷踈懶亦似余。相逢語笑夜躊躇。烹飧梨栗羞殺蔬。官居一去真蘧盧。東來失計悔厥初。夜聞桴鼓驚閭閻。事如牛毛費耘鋤。違失真性從史胥。目視紵臂邀徐徐。美君不出心自如。北潭秋水多芙蓉。青荷包飴蒲爲菹。條

然獨往深淵魚。人生如此樂有餘。胡爲自投檻中徂。

和韓宗弼暴雨

執熱臥北窗。淋漓汗流注。蛟龍遁水府。誰起叩天戶。偶然終日風。振擾北山霧。崩騰轉相軋。變化不容睹。雷聲運車轂。雨點傾豆黍。逡巡溜河漢。指顧纔笑語。破屋少乾牀。茅苦固難禦。出門泥沒足。此厄比鄰溷。苟令終歲熟。敢有今日怒。晚照上東軒。清風襲虛廡。微生免荷鋤。但喜脫煩暑。農父更事多。缺塘已增土。

舜泉復發

變變清波舊。遶城早來泉。眼亦塵生。連霄暑雨涼初接。發地春雷夜有聲。復理溝渠通屈曲。重開池沼放澄清。通衢細灑浮埃淨。車馬歸來似晚晴。

次韻徐正權謝示閔子廟記及惠紙

西溪秋思日盈牋。幕府拘愁學久騫。記廟終慙無好句。酌墳猶喜有前篇。先生作祭閔子文屏除筆硯真良計。寫寄交遊畏妄傳。吳紙贈君君莫怪。耕耘廢罷有閑田。

張文裕侍郎挽詞

持節西南二十年。華堂遺像已蒼然。歸來侍從三朝舊。老去雍容平地仙。落筆縱橫題壁處。誦詩清壯舉杯前。東遊邂逅迎歸旆。淚落城南下馬阡。

東方書生行

東方書生多愚魯。閉門誦書口生土。窗中白首抱遺編。自信此書傳父祖。辟雍新說從上公。冊除僕射酬

元功太常子弟不知數。日夜吟諷如寒蟲。四方窺覘不能得。一卷百金猶復惜。康成穎達棄塵灰。老聃瞿曇更出入。舊書句句傳先師。中途欲棄還自疑。東鄰小兒識機會。半年外舍無不知。乘輕策肥正年少。齒踈唇腐真堪笑。是非得失付它年。眼前且買先騰蹕。

送韓宗弼

大野將凍河水微。慨然臨流送將歸。登舟上帆手一揮。脫棄朋友如弊衣。我來三見芳草腓。來時同寮今已非。念昔相從未嘗違。西湖幽遠人事稀。青蓮紫芡傾珠璣。白魚掉尾黃鼈肥。客醉將起命闔扉。方橋月出風露霏。星河下照搖清輝。喧呼笑語相嘲譏。歲月一逝空長歎。交遊去盡將誰依。君家漢代平與韋。藹然令德傳餘徽。鳴鳩著地鴻高飛。安得久此同熱鞮。

送劉長清敏

汝州太守臥病年。疊疊猶復能清言。平生雄辯嗟不見。風流尙有曹州存。歷下東遊少相識。歡喜聞君在西邑。舊知兄弟無凡儔。相逢一笑開顏色。三年政令如牛毛。思歸南畝皆蓬蒿。羨君飲酒動論斗。引觥向口收狂潮。醉後胸中百無有。偃然嘯傲傾朋曹。中朝卿士足官府。君歸何處狂譎謠。劉原甫自長安病歸余始識之

汝尙將歸吳興齊州記室蘇子由辱詩爲送因逐韻謝之云

釋屣從軍蚤濫官。已衰能復尙盤桓。爾來齒髮羞相問。乞有衡茅覓自安。使我襟懷遺內熱。誦君詩句襲人寒。知誰便是知音者。且作巖溪雪景看。

高祖卽中頃蒙以御史召力辭不允解組而歸先生作詩以送之高祖溪堂集中亦嘗賡和淳熙

丁未激假守筠陽謹刊篇末。

樂城集 卷第五

七七

此
页
空
白

欒城集卷第六

詩一百首

題張安道樂全堂

天命無不全。人事每自傷。譬如摩泥珠。宛轉有餘光。藻飾不能加。塵垢豈有亡。世人未嘗識。姑射手自將。我公體自然。率性非勉強。驅馳四十年。不入憂患場。晚歲事蒙養。斂退就此堂。小儒豈知道。宿昔窺門牆。申屠師無人。無足亦自忘。如逢鄭執政。一笑先生傍。

和鮮于子駿益昌官舍八詠

桐軒

桐身青琅玕。桐葉蒲葵扇。落落出軒墀。亭亭奉閒燕。夜聲疎雨滴。午影微風轉。秋飈一凌亂。淅瀝驚葱蒨。朝日失繁陰。青苔覆遺片。空使坐中人。慨然嗟物變。

竹軒

幽軒離紛華。惟有一叢竹。纖梢起餘寒。紫箛散輕馥。擢幹春雨餘。挺節秋霜足。不知歲時改。守此娟娟綠。上有吟風蟬。空腹未嘗食。剪伐非所辭。不受塵土辱。

柏軒

室築城市間。移柏南澗底。山林夙所尚。封植聊自寄。崎嶇脫巖石。擁塞出棼翳。上承清露滋。下受寒泉惠。

秋來采霜葉。咀嚼有餘味。苦澁未須嫌。愈久甘如齋。

巽堂

山前三秦道。車馬不遑息。日出紅塵生。不見青山色。峯巒未嘗改。往意自奔迫。誰言幽堂居。近在使者宅。俯聽辨江聲。卻立睨石壁。藤蘿自太古。松竹列新植。暑簟臥清風。寒樽對佳客。試問東行人。誰能同此適。

山齋

平地厭喧囂。虛齋上山足。蕭條遠城市。坡陁富林麓。簡書日填委。杖屨每幽獨。豈無山中士。高臥白茅屋。逢人默無語。長嘯響巖谷。此室庶可招。夜月相從宿。

閑燕亭

登山稍已高。曠望良亦遠。危亭在山腹。物景行自變。諸峰宿霧收。草木朝陽絢。盎盎雲出山。溜溜泉垂坂。徐行得佳處。永日遂忘返。此樂只自知。傍人任嫌懶。

會景亭

亭高衆山下。勝勢不自收。岡巒向眼盡。風籟與耳謀。鳶飛半嶺息。雲起當空遊。視身如乘風。超然忘百憂。暮歸室中居。唯見窗戶幽。視聽隨物變。恍誰識其由。

寶峯亭

昔過益昌城。莫登君子堂。駕言念長道。未假升崇岡。今聞寶峰上。縹緲陵朝陽。三休引蘿蔓。一覽窮蒼茫。微雲靄雙劍。落日明故鄉。奔馳迹未安。山藪意自長。漂搖萬里外。手把新詩章。宦遊不忘歸。何異鳥欲翔。

塵土汗顏面。年華侵鬢霜。何時首歸路。所至聊徬徨。樽俎逢故人。亭榭凝清光。爲我具斗酒。宿恨猶可償。

次韻分司南京李誠之待制求酒二首

世上升沈都夢裏。春來疆健鬪樽前。公田種秫全拋卻。坐客無氈誰與錢。春深風雨半相和。節物令人意緒多。中酒何須問賢聖。和詩今尙許羊何。

送施歷城辯歸常州

高人不受塵土侵。三年浙江藏何深。久閑物理有相復。歷城官事森成林。乘時斂散逐十二。鞭撻逋負徒哀矜。一杯相屬未嘗得。百畝歸去將安能。潛逃雖出知者後。黽勉尙見仁人心。歸期忽告三月尾。強留不顧千黃金。河豚雖過鱸鱖在。粳稻正插風雨淫。酒肴勞苦罄隣里。期會迫隘思僚朋。山川吳越我所愛。扁舟佗日要追尋。滯留未用使相說。半年歲月行駸駸。

施君旣去復以事還戲贈

令尹西行去又迴。西湖重把舊樽罍。吏民再見雞棲乘。猶道吾公挽不來。

和文與可洋州園亭三十詠

湖橋

湖南堂宇深。湖北林亭遠。不作過湖橋。兩處那相見。

橫湖

湖裏種荷花。湖邊種楊柳。何處渡橋人。問是人間否。

書軒

綠竹覆清渠。塵心日日疎。使君遺癖在。苦要讀文書。

水池

水深冰亦厚。滉蕩鋪寒玉。好在水中魚。何愁池上鷺。

竹塢

空陂放脩竹。肅肅復冥冥。莫除塢外筍。從使入園生。

荻浦

離披寒露下。蕭索微風觸。摧折有餘青。從橫未須束。

蓼嶼

風高蓮欲衰。霜重蓼初發。會使此池中。秋芳未嘗歇。

望雲樓

雲生如涌泉。雲散如翻水。百變一凭欄。悠悠定誰使。

天漢臺

臺高天漢近。匹練掛林端。秋深霜露重。誰見落西山。

待月臺

夜色何蒼蒼。月明久未上。不上倚城臺。無奈東南嶂。

二樂榭

動靜惟所遇。仁智亦偶然。誰見二物外。猶有天地全。

灑泉亭

泉來草木滋。泉去池塘滿。委曲到庭除。清冷備晨盥。

吏隱亭

隱居亦非難。欲少求易遂。有意未成歸。聊就茅簷試。

霜筠亭

林高日氣薄。竹色淨如水。寂歷斷人聲。時有鳴禽起。

無言亭

處世欲無言。事至或未可。如有此亭空。燕坐聊從我。

露香亭

重露覆千花。繁香凝畦圃。不忍日將晡。散逐微風去。

涵虛亭

虛亭面踈篁。窈窕衆景聚。更與坐中人。行尋望來處。

溪光亭

溪亭新雨餘。秋色明滉漾。鳥渡夕陽中。魚行白石上。

過溪亭

溪淺復通橋。過者猶恨懶。賴有沙上鷗。常爲獨遊伴。

披錦亭

春晚百花齊。絲絲巧如織。細雨洗還明。輕風卷無迹。

禊亭

觴流無定處。客醉醒還酌。毋令仲御歌。空使人驚愕。

菡萏軒

開花濁水中。抱性一何絜。朱檻月明時。清香爲誰發。

茶糜洞

猗猗翠蔓長。藹藹繁香足。綺席墮殘英。芳樽漬餘馥。

篔簹谷

誰言使君貧。已用谷量竹。盈谷萬萬竿。何曾一竿曲。

寒蘆港

蘆深可藏人。下有扁舟泊。正似洞庭風。日暮孤帆落。

野人廬

野人三四家。桑麻足生意。試與叩柴荆。言辭應有味。

此君庵

風梢遠簷。匠霜榦當窗淨。遙知素壁上。醉墨森相映。與可墨竹冠絕今世

金橙逕

葉如石楠堅。實比霜柑大。穿逕得新苞。令公憶鱸鱠。

南園

官是勸農官。種桑亦其所。安得陌上人。隔葉攀條語。

北園

使君美且仁。遍地種桃李。豈獨放春花。行看食秋子。

次韻吳興李行中秀才見寄并求醉眠亭詩二首

才堪簿領更無餘。贏得十年閑讀書。寵辱何須身自試。窮愁不待酒驅除。故人歸去無消息。佳句新來屢卷舒。前日使君今在此。不妨時復置雙魚。李公擇吳興移齊南

右和見寄

是非一醉了無餘。唯有胸中萬卷書。已把人生比蘧傳。更將江浦作階除。欲眠賓客從教去。倒臥氍毹豈暇舒。京洛舊遊真夢裏。秋風無復憶鱸魚。

右醉眠亭

和子瞻玉盤盂二首

東武蘇葛公家園中千葉白芍藥子瞻新爲此名

千葉團團一尺餘。揚州絕品舊應無。賞傳莒國遷鍾虞。移憶胡僧置鉢盂。叢底留連傾鑿落。餅中捧擁照浮屠。強將絳蠟封紅萼。憔悴無言損玉膚。故相林亭父老知。出羣草木尙何疑。無多產業殘花藥。幾許功名舊鼎彝。豐艷不知人世別。佳名新換使君詩。明年會看花尤好。剝盡浮苞養一枝。

寄題密州新作快哉亭二首

車騎崩騰送客來。奔河斷岸首頻回。鑿成戶牖功無幾。放出江湖眼一開。景物爲公爭目致。登臨約我共追陪。自矜新作超然賦。更擬蘭臺誦快哉。檻前澗水去沄沄。洲渚蒼茫煙柳勻。萬里忽驚非故國。一樽聊復對行人。謝安未厭頻攜妓。汲黯猶須臥理民。試問沙囊無處所。于今信怯定非真。

贈馬正卿秀才

男兒生可憐。赤手空腹無一錢。死喪三世委平地。骨肉不得歸黃泉。徒行乞丐買墳墓。冠幘破敗衣履穿。矯然未肯妄求取。恥以不義藏其先。辛勤直使行路泣。六親不信相尤愆。問人何罪窮至此。人不敢尤其怨天。孝慈未省鬼神惡。兄弟寧有木石頑。善人自古有不遇。力行不廢良謂賢。

答文與可十首

遠遊旣爲東魯。遷居又愛南山。齒髮自知將老。心懷且欲偷安。舜井溢流陌上。歷山近在城頭。羈旅三年忘去。故園何日歸休。

野步西湖綠縵晴。登北渚煙綿。蒲蓮自可供腹。魚蟹何嘗要錢。
飲酒方橋夜月。鈎魚畫舫秋風。冉冉荷香不斷。悠悠水面無窮。
雨過山光欲溜。寒來水氣如蒸。勝處何須吳越。隨方亦有遊朋。
揚雄執戟雖久。陶令歸田未能。眼看雲山無奈。神傷簿領相仍。
終歲常親鞭朴。此生知負詩書。欲尋舊學無處。時有故人起予。
故人遠在江漢。萬里時寄聲音。聞道禪心寂寞。未廢詩人苦吟。
佳句近參風雅。微詞間發離騷。竊欲比君庾信。莫年詩賦尤高。
相思欲見無路。滿秩西歸有時。及君鈴閣少事。飲我松醪滿卮。

次韻李公擇寄子瞻

青蒲一下復東來。擁扇西風滿面埃。擊柝自營何擇地。鋪糟同醉未須回。
孤高振鷺瞻初下。淡泊嬰兒及未孩。我亦漂流家萬里。年來羞上望鄉臺。

次韻李公擇以惠泉答章子厚新茶二首

無錫銅瓶手自持。新芽顧渚近相思。故人贈答無千里。好事安排巧一時。
蟹眼煎成聲未老。兔毛傾看色尤宜。槍旗攜到齊西境。更試城南金線奇。

金線泉在齊州城南。

新詩態度靄春雲。肯把篇章妄與人。性似好茶常自養。交如泉水久彌親。
睡濃正想羅聲發。食飽尤便粥面勻。底處翰林長外補。明年誰送霽溪春。

和李公擇赴歷下道中雜詠十二首

泛清河

南北無多水。崎嶇未捨船。何時好霖雨。是處有通川。墳壠看書卷。興亡指道邊。蒼茫半秋草。猶復較愁賢。將至桃園阻淺且風不得進

卷帆倚棹淺河津。憶泛長江步步新。未免生涯寄風浪。不堪舟楫委埃塵。往來欲就沙囊堰。深淺時看舉策頻。一望雲霓百憂集。應思平地隱居人。

桃園阻淺將易小舟一夜水大至復乘使風頃刻百里

此生與物妄相仇。欲往長嫌苦見留。淺瀨何知向人惡。漲溪豈復爲公流。雨痕忽到工催客。風信初來轉打頭。舉目汀洲都未改。忽添清興滿行舟。

下邳黃石公廟

圯下相逢南北人。三邀不勸識天真。十年卻見穀城下。寂寞同收一夢身。

宿遷項羽廟

尺箠西來壠畝中。驅馳力盡衆兵衝。舊封獨守君臣義。故國長修俎豆容。平日軍聲同破竹。少年心事喜摧鋒。綿衣眷戀多鄉思。肯顧田家社酒濃。

呂梁

出沒懸流雖有道。憑陵險地本無心。未能與物都無礙。咫尺清泉亦自深。

梁山泊次韻

近通沂泗麻鹽熟。遠控江淮粳稻秋。粗免塵泥汙車脚。莫嫌菱蔓繞船頭。謀夫欲就桑田變。客意終便畫舫遊。愁思錦江千萬里。漁蓑空向夢中求。時議者將乾此泊以種菽麥。

梁山泊見荷花憶吳興五絕

南國家家漾綵艫。芙蓉遠近日微明。梁山泊裏逢花發。忽憶吳興十里行。終日舟行花尚多。清香無奈着人何。更須月出波光淨。臥聽漁家蕩槳歌。行到平湖意自寬。繁花仍得就船看。回頭卻向吳儂說。從此遠遊心未闌。花開南北一般紅。路過江淮萬里通。飛蓋靚粧迎客笑。鮮魚白酒醉船中。菰蒲出沒風波際。鴈鴨飛鳴霧雨中。應爲高人愛吳越。故於齊魯作南風。

次韻李公擇九日見約以疾不赴

它年逢九日。杯酒逐英豪。漸老經秋病。獨醒何處高。牀頭添藥裏。坐上減牛毛。寂寞知誰問。煩公置濁醪。

喜雪呈李公擇

秋來早已久。雪至亦不薄。沈沈夜未眠。簌簌聲初落。霏微入疎戶。眩晃先朱閣。披衣視羣動。照屋始驚愕。晨起犯清寒。繁陰看溟漠。喬林凍相倚。隙瓦乾猶爍。孤村掩圭竇。深逕沒芒屨。平野恣汗漫。四山增壅坳。晚色漏斜陽。林光粲相錯。氛埃一清蕩。疫癘解纏縛。寒蔬養春芽。宿麥布冬腳。官居亦何賴。歲事信所託。逋逃幸一飽。剽盜止羣惡。無事樂自多。有酒庶可酌。我行今不久。公到時方昨。豐穰識天意。暇豫可前約。

齋廚雖無餘。賓客甚易諾。行須酒壺倒。莫待陰雲剝。

次韻范郎中仰之詠雪

倉廩未應空。長天霰雪濛。瓊瑤布地淨。組練出師雄。雲闊諸峯遍。花繁百草同。農謠麥壟外。客興酒杯中。聚散占風力。消融驗藥功。歷城西北陽起石。山其上不留雪。遠遊聊自喜。三見歲時豐。

次韻李公朝著作見贈二首

遠客徒爲爾。江邊有故丘。汀洲信廣大。鳧鴈任漂浮。好事時攜酒。歸心久倦遊。還鄉定衰老。朋友肯相收。

又

稽古終何力。扶衰謾有方。故人憐困躓。佳句贈輝光。未暇抽身去。安能插翅翔。空存踈懶性。高臥笑羲皇。惠穆呂公挽詞二首

又

全齊開故國。清廟饗元功。德業真無忝。勳名但未充。邊防推信惠。社稷倚勤忠。不作司徒貴。何慙鄭武公。風俗非平昔。賢豪棄此時。新阡長宿草。行路拜豐碑。惠術遐方記。嘉猷信史知。悲涼哭墳客。不爲受恩私。次韻蔣夔寒夜見過

都城廣大漫如天。旅人騷屑誰與歡。北風號怒屋無瓦。夜氣凝冽冰生槃。雪聲旋下白玉片。燈花暗結丹砂丸。叩門剝啄驚客至。吹火倉卒憐君寒。明時未省有遺棄。高論自笑終汗漫。識君太學嗟歲久。至今客舍猶泥蟠。正如憔悴入籠鶴。坐見摧落凌風翰。明朝尙肯過吾飲。有酒不盡行將酸。

次韻王鞏廷評招飲

病憶故鄉同越鳥。性安田野似禪謎。都城歲晚不歸去。客舍夜寒猶獨吟。樽酒憐君偏好客。詩篇寄我認知音。會須雪裏相從飲。履迹旋平無處尋。

雪中會孫洙舍人飲王氏西堂戲成三絕

新歲逼人無一日。殘冬飛雪已三迴。百分琥珀從君勸。十里瓊瑤走馬來。南國高人真巨源。華堂邂逅接清樽。十年一見都如夢。莫怪終宵語笑喧。傾盡香醪雪亦晴。東齋醉臥已三更。佳人不慣生疎客。未盡清歌宛轉聲。

雪中呈范景仁侍郎

羈遊亦何樂。幸此賢主人。東齋暖且深。高眠不知晨。開門驚照曜。舞雪方繽紛。繁雲覆庭廡。落勢一何勻。霏霰本無着。積疊巧相因。萬類忽同色。九衢淨無塵。園林開組練。觀闕堆瓊珉。蟲書散鳥足。縞帶翻車輪。遠遊浩千里。欲出迷四隣。誰言助春農。亦善欺客貧。賴我古君子。高談吐陽春。當方庇華屋。豈憂無束薪。

次韻景仁丙辰除夜

數舉除夜酒。稍消少年豪。浮光寄流水。妙理付濁醪。微陽未出土。大雪飛鵝毛。試問冰霜勁。春來能久牢。

次韻景仁招宋溫之職方小飲

高人兩無事。相見輒傾懷。時以酒相命。何妨心自齋。燈期飛雪亂。春候苦寒乖。不就頽然醉。難堪風且霾。次韻景仁飲宋溫之南軒二首

白髮迎新歲。皤然國老更。感時能細說。對酒任徐行。畫軸高分品。詩詞妙入評。踈狂先醉倒。應許恃鄉情。

又

飲闌餅已罄。話久僕須更。高會良難得。危言豈易行。歸休便老計。得失任臺評。猶有青編在。它年不世情。

次韻景仁正月十二日訪吳纘寺丞二絕

夜雪滿庭雞失晨。瓊田早出不驚塵。急須卷凍鋪黃道。飲看燈山萬萬人。
濁醪時飲十分杯。萬帶溟濛曉氣皑。醉倒盞輿夜歸去。金吾寧復識誰哉。

柳子玉郎中挽詞二首

晚歲抽身塵土中。灣山仍乞古仙宮。羞時白髮隨馮叟。欲就丹砂繼葛洪。龍虎未能留物化。芭蕉久已悟身空。騷人欲作招魂賦。蟬蛻疑非世俗同。
新詩錦繡爛成編。醉墨龍蛇灑未乾。共首卜居空舊約。宛丘攜手憶餘歡。風流可見身如在。鄉國全歸意所安。行到都門送君處。長河清淚兩洑瀾。

贈淨因臻長老

十方老僧十年舊。燕坐繩牀看奔走。遠遊新自濟南來。滿身自覺多塵垢。煖湯百斛勸我浴。驪山袞袞泉傾竇。明窗因臥百緣絕。此身瑩淨初何有。清泉自清身自潔。塵垢無生亦無滅。振衣卻起就華堂。老僧相對無言說。南山采菌軟未乾。西園搗菜寒方茁。與君飽食更何求。一杯茗粥傾銅葉。

次前韻答景仁

儒林談道亦云舊。遠自太史牛馬走。區區分別意何爲。擾擾祗添心上垢。道大如天不可測。異出同歸各穿竇。浩然一水散千漚。卻觀彼我曾無有。我丈中心冰玉絜。世上浮雲盡灰滅。終年行道自不知。笑指空門名異說。此心未信道不行。石上下種何由茁。道在起居飲食中。安問胡僧分五葉。

遊城西集慶園

送客城西客已遠。歸路北池接南苑。冰澌片斷水光浮。柳線和柔風力軟。繚牆朱戶誰家園。流水平畦春日淺。禁河分溜一池足。洛圃移花百金賤。飛甍斤斧聲未絕。翠柏栽培影初遍。傍人笑指高臺處。前年適見荒榛滿。金錢力奪天地功。歲月未多風物換。人生富貴無不成。都門坐置山林觀。暖風遲日時一到。早出莫歸應未晚。主人最貴稀出城。長使憧憧路人看。

遊景仁東園

新春甫驚蟄。草木猶未知。高人靜無事。頗怪春來遲。肩輿出東郊。輕裘試朝曦。百草抱生意。喬松解寒姿。尺書招友生。冠蓋溢通達。人生瞬息間。幸此休暇時。濁酒淪浮蟻。嘉蔬薦柔荑。春來莫嫌早。春去恐莫追。公卿多王事。田野遂我私。松筠自擁蔽。里巷得遊嬉。隣家並侯伯。朱門掩芳菲。畦花被錦繡。庭檜森旌旗。華堂絢金碧。疊觀凝煙霏。髣髴象宮禁。蕭條遠喧卑。徐行日一至。何異已有之。都城閉門早。衆客紛將歸。垂楊返照下。歸騎紅塵飛。但卜永日歡。未與清夜期。人散衆踴絕。庭空星斗垂。安眠萬物外。高世良在茲。

此
页
空
白

欒城集卷第七

詩五十六首

次韻子瞻送范景仁遊嵩洛

尋山非事役。行路不應難。洛浦花初滿。嵩高雪尙寒。平林抽凍筍。奇豔變山丹。節物朝朝好。肩輿步步安。醪醑釀臘酒。苜蓿薦朝盤。得意忘春晚。逢人語夜闌。歸休三黜柳。賦詠五噫鸞。鶴老身仍健。鴻飛世共看。雲移忽千里。世路脫重灘。西望應思蜀。東還定過韓。平川清涉潁。絕頂上封壇。出處看公意。令人欲棄官。

送蔣夔赴代州教授

憶遊太學十年初。猶見胡公豈弟餘。遍閱諸生非有道。最憐能賦似相如。青衫共笑方持板。白髮相看各滿梳。暫免百憂趨長吏。勉調三寸事新書。

次韻宿州教授劉涇見贈

此身雖復類潛夫。衰老無心強着書。道路不知奔走賤。交遊空怪往還疎。弦歌更就三年學。簿領唯添一味愚。它日相逢定何處。莫將文采笑空疎。

徐州送江少卿

夜雨泗河深。曉日輕舟發。帆開送客遠。城轉高臺沒。居人永瞻望。歸意何倉卒。公來初無事。豐歲多年麥。鈴閣度清風。芳罇對佳客。登臨未云厭。談笑方自適。朝廷念鰲老。府寺虛清劇。何以寄風流。江山遶官宅。

次韻子瞻寄眉守黎希聲

眼看狂瀾倒百川。孤根漂蕩水無邊。思家松菊荒三逕。回首謳歌沸二天。簿領沈迷催我老。春秋廢格累公賢。隣居屈指今誰在。一念傷心十五年。轍昔侍先人於京師與希聲隣居太學前是時公之亡兄之二亡妹皆在今十五年而在者唯公與僕二人言與流涕

和李邦直學士沂山祈雨有應

宿雪雖盈尺。不救春夏旱。吁嗟遍野天不聞。歌舞通宵龍一戰。旋開雲霧布旌旗。復遣雷霆助舒卷。雨聲一夜洗塵埃。流入溝河朝不見。但見青青黍與禾。老農起舞行人歌。汗邪滿車尚可許。供輸到骨期無它。水行天地有常數。歲歲出入均無頗。半年分已厭枯槁。及秋更恐憂滂沱。誰能且共蛟龍語。時布甘澤無庸多。

陪子瞻遊百步洪

城東泗水平如席。城頭遠山銜落日。輕舟鳴榔自生風。渺渺江湖動顏色。中洲過盡石縱橫。南去清波頭盡白。岸邊怪石如牛馬。銜尾舳艫誰敢下。沒人出沒須臾閒。卻立沙頭手足乾。客舟一葉久未上。吳牛回首良閒關。風波蕩瀟未可觸。歸來何事嘗艱難。樓中吹角莫煙起。出城騎火催君還。

李邦直見邀終日對臥南城亭上二首

一徑坡陁草木間。孤亭勝絕俯川原。青天圖畫四山合。白晝雷霆百步喧。煙柳蕭條漁市遠。汀洲蒼莽白鷗翻。客舟何事來忽草。逆上波濤吐復吞。

東來無事得遨遊。奉使清閑亦自由。撥棄簿書成一飽。留連語笑失千憂。舊書半卷都如夢。清簟橫眠似

欲秋聞說歸朝今不久。塵埃還有此亭不。

次韻邦直見答二首

眞能一醉逃煩暑。定勝三杯禦臘寒。自有詩書供永日。莫將絲竹亂風灘。舞雩何處歸春莫。叩角誰人怨夜漫。聞道丹砂近有術。鎔銖稱火共君看。五斗塵勞尙足留。閉門聊欲治幽憂。羞爲毛遂囊中穎。未許朱雲地下遊。無事會須成好飲。思歸時亦賦登樓。羨君幕府如僧舍。日向城隅看浴鷗。

再次前四首韻

城頭棟宇恰三間。楚望淒涼弔屈原。雨洗山川百里淨。風吹語笑一城喧。鄉書莫問經時絕。歲事初驚片葉翻。南近清淮鱸鱖好。釣筒時問有潛吞。謬將疎野託交遊。平日論心亦有由。科第聯翩叨舊契。利名疎闊少新憂。清談已覺忘朱夏。濁酒先防虐素秋。多病無聊唯有睡。頻頻詩句未嫌不。野鶴應疑鳧鴈苦。夏蟲未慣雪霜寒。隱居顏氏終安巷。垂釣嚴生自有灘。破宅不歸塵可掃。下田初種水應漫。退耕尙作悠悠語。拙宦猶須步步看。欲作彭城數月留。溪山勸我暫忘憂。城頭準擬中秋望。臺上遷延九日遊。嵐氣雨餘侵近郭。江聲風送隱危樓。汀洲聚散知誰怪。且學漂浮水上鷗。

雨中陪子瞻同顏復長官送梁憲學士舟行歸汶上

客從南方來。信宿北方去。手棹木蘭舟。不顧長江雨。江昏氣陰黑。雨落無朝暮。肅肅赴波濤。濛濛暗洲渚。微涼入窗闔。斜吹溼蕉苧。漂灑正紛紜。談笑方容與。不知江路長。但覺青山驚。客去浩難追。落日平西浦。東遊本無事。愛此山河右。周旋樽俎歡。邂逅英豪聚。茲遊有遺趣。此樂恐宜屢。賤仕迫程期。遷延防譴怒。秋風日已至。輕舸行當具。陰森古城曲。蒼莽交流處。懸知別時念。將行重回顧。非緣一寸祿。應作二年住。

同子瞻泛汴泗得漁酒二詠

江湖性終在。平地難久居。淥水雨新漲。扁舟意自如。河身縈正素。洪口轉千車。願言棄城市。長竿夜獨漁。

又

懶思久廢詩。病腸不堪酒。強顏水石間。濫蹟賓主後。不知白浪翻。但怪青山走。莫隨使車塵。豈畏嚴城斗。

明日復賦

放舟城西南。卻向東南泊。朝來雨新霽。白水浸城腳。古汴多流苴。清泗亦浮沫。平吞百澗暴。滅盡三洪惡。遊人不勝喜。水族知當樂。舟行野鳧亂。網盡脩鱗躍。香醪溜白蟻。鱸縷填花萼。人生適意少。一醉皆應諾。同遊非偶然。後會未前約。簡書尙見寬。行日爲公卻。

贈吳子野道人

食無酒肉腹亦飽。室無妻妾身自好。世間深重未肯回。達士清虛輒先了。眼看鴻鵠薄雲漢。長笑鴛鴦駘安棧。阜腹中夜氣何郁郁。海底朝陽常杲杲。一廩不顧舊出深。萬里來看故人老。空車獨載王陽囊。遠遊屢食安期棗。東州相逢真邂逅。南國思歸又驚矯。道成若見王方平。背搔莫念麻姑爪。

李邦直出巡青州余不久將赴南都比歸不及見矣作詩贈別

東道初來託故人。南樓頻上泗河濱。江山尙有留人意。樽俎寧當厭客貧。顧我及秋行不久。問君觸熱去何因。西歸涼冷霜風後。濁酒清詩誰與親。

司馬君實端明獨樂園

子嗟丘中親藝麻。邵平東陵親種瓜。公今歸去事農圃。亦種洛陽千本花。脩篁遶屋韻寒玉。平泉入畦紆臥蛇。錦屏奇種斲巖竇。嵩高靈藥移萌芽。城中二月花事起。肩輿遍入公侯家。淺紅深紫相媚好。重樓多葉爭矜誇。一枝盈尺不論價。十千斗酒那容賒。歸來曳履苔逕滑。醉倒閉門春日斜。車輪班班走金轂。印綬若若趨朝衙。世人不顧病楊綰。弟子獨有窮侯芭。終年著書未曾厭。一身獨樂誰復加。宦遊嗟我久塵土。流轉海角如浮槎。歸心每欲自投劾。孺子漸長能扶車。過門有意奉談笑。幅巾懷刺無袍鞮。

送顏復赴闕

箚瓢未改安貧性。鳧繹猶傳直道餘。不見失官愁感感。但聞高臥起徐徐。居中舊厭軍容講。補外仍遭城旦書。此去將身置何許。秋風未免憶鱸魚。

王詵都尉寶繪堂詞

侯家玉食繡羅裳。彈絲吹竹喧洞房。哀歌妙舞奉清觴。白日一醉萬事忘。百年將種存慨慷。西取庸蜀踐戎羌。戰袍賜錦盤鵬章。寶刀玉玦餘風霜。天孫渡河夜未央。功臣子孫白且長。朱門甲第臨康莊。生長介冑產膏粱。四方賓客坐華堂。何用爲樂非笙簧。錦囊犀軸堆象牀。竿叉連幅翻雲光。手披橫素風飛揚。長

林巨石插雕梁。清江白浪吹粉牆。異花沒骨朝露香。徐熙畫花落筆縱橫其子嗣變格以五色染獸舌鵝張騰踏騷褭聯驢驢噴振風雨馳平岡前數顧陸後吳王老成雖喪存典常坐客不識視茫洋騏驎飛煙郁芬芳卷舒終日未用忙遊意淡泊心清涼屬目俊麗神激昂君不見伯孫孟孫俱猖狂干時與事神弗臧。

逍遙堂會宿二首并引

轍幼從子瞻讀書未嘗一日相舍既壯將遊宦四方讀韋蘇州詩至安知風雨夜復此對牀眠惻然感之乃相約早退爲閑居之樂故子瞻始爲鳳翔幕府留詩爲別曰夜雨何時聽蕭瑟其後子瞻通守餘杭復移守膠西而轍滯留於淮陽濟南不見者七年熙寧十年二月始復會於澶濮之間相從來徐留百餘日時宿於逍遙堂追感前約爲二小詩記之

逍遙堂後千尋木長送中霄風雨聲誤喜對牀尋舊約不知漂泊在彭城秋來東閣涼如水客去山公醉似泥困臥北窗呼不起風吹松竹雨淒淒

過張天驥山人郊居

南山莫將歸下訪張夫子黍稷滿秋風篷麻翳隣里君年三十八三十有歸意躬耕奉慈親未覺鉏耰鄙讀書北窗竹釀酒南園水松菊半成陰日有幽居喜客來時借問問子何年起新求西溪石更築茆堂址但令三歲熟此計行亦遂堂成不出門清名滿朝市

魏佛狸歌

魏佛狸飲泗水黃金甲身鐵馬箠。睥睨山川俯畫地。畫作西方佛名字。卷舒三軍如使指。奔馳萬夫鑿山
背。雲中孤月妙無比。青蓮湛然俛下視。擊鉦卷旆抽行營。北徐府中軍吏喜。度僧築室依雲煙。俯窺城郭
衆山底。興亡一瞬五百年。細草荒榛沒孤壘。

雜興二首

陋巷丈夫病且貧。懸鶉百結聊庇身。蠕蠕大蟲長孫子。敗繒弊絮開陽春。故襦寬博裹肩腔。出沒逡巡初
莫畏。一朝換酒入隣家。顧視腰間猶犢鼻。入縫循腰還自足。肌膚轉近尤爲福。咋皮吮血無已時。應待渠
家具湯沐。

朱輪華蓋事遠遊。廐無良馬乘疲牛。青絲玉勒金絡頭。任重道遠旁人憂。奔馳往來歷山丘。騰阮投淖擗
轅轉。已壓復起行未休。青芻黃梁爲君羞。長路漫漫經九州。場有白駒胡不收。飢食玉山飲河流。朝秣幽
冀莫炎陬。奔雲掣電不少留。僕夫顧之心懷愁。王良不生誰與謀。哀哉駿骨千金酬。

贈致仕王景純寺丞

灑山隱君七十四。紺瞳綠髮初謝事。腹中靈液變丹砂。江上幽居連福地。彭城爲我住三日。明月滿船同
一醉。丹書細字口傳訣。顧我沈迷真棄耳。年來四十髮蒼蒼。始欲求方救憔悴。它年若訪灑山居。慎勿逃
人改名字。

初發彭城有感寄子瞻

秋晴卷流潦。古汴日向乾。扁舟久不解。畏此行路難。此行亦不遠。世故方如山。我特一寸刃。巉絕何由刊。

念昔各年少。松筠闕南軒。閉門書史叢。開口治亂根。文章風雲起。胸膽渤海寬。不知身安危。俛仰道所存。橫渡一傾潰。萬類爭崩奔。孔融漢儒者。本自輕曹瞞。誓將貧賤身。一悟世俗昏。豈意十年內。日夜增濤瀾。生民竟顛顛。遊宦豈復安。水深火益熱。人知蹈憂患。甄豐且自叛。劉歆苟盤桓。而況我與兄。飽食顧依然。上願天地仁。止此禍亂源。歲月一徂逝。尙能反丘園。

次韻子瞻見寄

袞袞河渭濁。皎皎江漢清。源流既自異。美惡終未明。嗟我頑鈍質。乃與公並生。出處每自託。謳吟輒嘗賡。譬如病足馬。共此千里程。勝負坐已決。豈待終一秤。憶公年少時。濯濯吐新萌。堅姿映松柏。直節凌榛荆。學成志益厲。秋霜落春榮。澹然養浩氣。脫屣遺齊卿。百鍊竟不變。三年終未鳴。區區兩郡守。籍籍四海聲。年來效瘖默。世事慵譏評。不見室家好。恍如揖重城。別離長塵垢。歲月何崢嶸。彭門偶會合。白髮互相驚。受教恐不足。吐論那復爭。疾雷發聾聵。清月照昏盲。篤愛未忍棄。浪云舊齊名。更請問郭許。題品要當精。子瞻杭州見寄詩云。先生別駕舊齊名。

將至南京寄王鞏

河牽一線流。不斷雨散千絲卷。卻來煙際橫橋村十里。船中倦客酒三盃。老年轉覺脾嫌溼。世路早令心似灰。賴有故人憐寂寞。繫舟待我久徘徊。

次韻王鞏見贈

南都逢故人。共此一樽綠。初來柳吹絮。再見風脫木。我老歎意微。頭垂腰背曲。羨子方少年。健馬走平陸。

狂歌手自拊。醉倒頭相觸。人生比一瞬。世網張方目。但取食場糝。豈掛雲飛鶴。彭城久相遲。官舍虛東屋。重陽試新釀。謂子當不速。胡爲聽婦言。婉孌自相逐。我舟得愁霖。牽挽脫坑谷。風霜作初寒。病體欲生粟。解子腰下龜。換酒不須贖。照碧凝清光。相將飲萸菊。

送交代劉莘老

建元一二間。多士四方至。翩翩下鴻鵠。一一抱經緯。功名更唯諾。爵祿相饋遺。縱橫聖賢業。磊落君臣意。慷慨魯諸生。雍容古君子。扶搖雲漢上。睥睨千萬里。入臺霜凜然。不肯下詞氣。失足青冥中。投命江湖裏。區區留都客。矯矯當世士。空使往來人。歎息更相指。我生本羈孤。無食強爲吏。褰裳避塗泥。十載守顛顛。逝將老茅屋。何幸繼前軌。念君今尙然。顧我真當爾。百年同一夢。窮達浪憂喜。有酒慰離愁。貧賤非君恥。

次韻王鞏九日同送劉莘老

頭上黃花記別時。樽中綠酒慰清悲。畫船牽挽故不發。紅粉留連未遽離。小雨無端添別淚。遙山有意助顰眉。十分酒盞從教勸。堆案文書自此辭。

次韻王鞏欲往徐州見子瞻以事不成行

河水南來遶郡城。銀刀空復銜衙兵。交情舊許雞爲具。客信那知鵠妄鳴。爲婦遲留應未怪。還家倉卒定何營。不關秦女箏聲怨。自趁招賢浚上旌。

宣徽使張安道生日

從公淮陽今幾年。憶持壽斝當公前。祝公齒髮老復少。歲歲不改冰霜顏。掃除四海一清淨。整頓萬物俱

安至。今年見公商丘側。奉祠太一真仙官。身安氣定色如玉。脫遺世俗心浩然。幽居屢過赤松子。長夜親種丹砂田。此中自有不變地。歲閱生日如等閑。門前賀客任填委。世上多故須陶甄。秋風坐見蒲柳盡。歲晏惟有松柏堅。斯人未安公未用。使公難老應由天。

章氏郡君挽祠子厚母

馮唐垂老郎潛後。李白風流罷直餘。解組同歸榮故國。剖符仍得奉安輿。家聲未替三公舊。葬客應傾數郡車。德映閨門人莫見。埋文字細列幽墟。

聞王鞏還京會客劇飲戲贈

聞君歸去便招呼。笑語不知清夜徂。結束佳人試銀甲。留連狂客惱金吾。燭花零落玉山倒。詩筆欹斜翠袖扶。暫醉何年依錦瑟。東齋還復臥氍毹。

次韻王鞏遊北禪

蕭蕭黃葉下城頭。頓作野田風日秋。粗有樽罍隨處好。整無敲扑便能幽。人稀野鳥應同樂。水澗遊魚似欲愁。客去知君歡未已。遶城攜手更遲留。

次韻王鞏懷劉莘老

兩都來往太頻頻。真是人間自在人。十載讀書同白屋。千金爲客買朱唇。結交京邑傾心肺。寓思禪宗離垢塵。爲問西歸天祿客。何時同看洛川神。

飲錢王鞏

送君不辦沾斗酒。撥醅浮蟻知君有。問君取酒持勸君。未知客主定何人。府中杯棬強我富。案上苜蓿知君真。空廚赤腳不敢出。大堤花豔聊相親。愛君年少心樂易。到處逢人便成醉。醉書大軸作歌詩。頃刻揮毫千萬字。老夫識君年最深。年來多病苦侵凌。賦詩飲酒皆非敵。危坐看君浮大白。

送王鞏兼簡都尉王誥

可憐杜老貧無食。杖藜曉入春泥溼。諸家厭客頻惱人。往往閉門不得入。我今貧與此老同。交遊冷落誰相容。幸君在此足遊衍。終日騎馬西復東。送君仍令君置酒。如此貧交世安有。君歸速語王武子。因君回船置十斗。

呂希道少卿松局圖

溪回山石間。蒼松立四五。水深不可涉。上有橫橋渡。溪外無居人。磐石平可住。縱橫遠山出。隱見雲日莫。下有四老人。對局不回顧。石泉雜風松。入耳如暴雨。不聞人世喧。自得山中趣。何人昔相遇。圖畫入紈素。塵埃依古壁。永日奉樽俎。隱居畏人知。好事竟相誤。我來再三嘆。空有飛鴻慕。逝將從之遊。不惜爛樵斧。

寄孔武仲

濟南舊遊中。好學惟君耳。君居面南麓。洶湧岡巒起。我來輒解帶。簷下灸背睡。煎茶食梨栗。看君誦書史。君歸苦倉卒。窗戶日摧毀。遷居就清曠。改築富前址。開畦得遺植。遶壁見題字。雲山顧依然。簿領輒隨至。思君猶未忘。滿秩行自棄。爾來鉅野溢。流潦壓城壘。池塘漫不知。亭榭日傾弛。官吏困堤障。麻鞋汗泥滓。別來能幾何。陵谷既遷徙。它日重相逢。衰顏應不記。

孔君亮郎中新葺闕里西園棄官而歸

宦情牢落苦思歸，君側無人留子思。手種松筠須灌溉，親修寢廟憶烝祠。定應此去添桃李，還使舊塋無棘茨。他日東遊訪遺烈，因公導我謁先師。

寄濟南守李公擇

岱陰皆平田，濟南附山麓。山窮水泉見，發越遍溪谷。分流遶塗巷，暖氣蒸草木。下田滿粳稻，秋成比禾菽。池塘浸餘潤，菱芡亦云足。辭家四千里，恃此慰窮獨。公從吳興來，茗鬻猶在目。應恐齊魯間，長被塵土辱。不知西垣下，滉漾千畝淥。仰見鷗鷺翻，俯視龜魚浴。初來厭浮鼓，稍久捐鞭扑。清詩調嘉賓，夜話繼華燭。飛花暮雪深，浮蟻糟床熟。相對各忘歸，西來自嫌速。人生每多故，樂事難再卜。鉅野一汗漫，河濟相騰蹙。流沙翳桑土，蛟蜃處人屋。農畝分沈埋，城門遭板築。傷心念漂蕩，引手救顛覆。勞苦空自知，吁嗟欲誰告。遙知舊遊處，落落空遺躅。平生讀書史，物理粗能矚。歸耕久不遂，終作羝羊觸。賦詩心自驚，請公再三讀。

雪中會飲李倅鈞東軒三絕

衆客喧譁發酒狂，逡巡密雪自飛揚。莫嫌作賦無枚叟，且喜延賓有孝王。雪花如掌墮塔除，劇飲時看臥酒壺。半夜瓊瑤深沒膝，欲歸迷路肯留無。竹裏茅庵雪覆簷，爐香藹藹著蒲簾。欲求初祖安心法，笑我醺然已半酣。

張恕寺丞益齋

人生不讀書，空洞一無有。羨君常齋居，散帙滿前後。開編試尋繹，閱歲行自富。從橫畫圖中，次第宮商奏。

汪洋畜江河。眇莽包林藪。興亡數千歲。絡繹皆在口。顧念今所知。頗覺前日陋。我家亦多書。早歲嘗竊叩。晨耕掛牛角。夜燭借鄰牖。經年謝賓客。飢坐失昏晝。堆胸稍蟠屈。落筆逢左右。樂如聽鈞天。醉劇飲醇酎。自從厭蓬華。誤逐功名誘。初心一漂蕩。舊學皆榛莠。失足難遽回。撫卷長自詬。幸君無事年。謂可終身守。春耕不厭深。秋穰當自受。金玉或爲災。詩書豈相負。

除夜會飲南湖懷王鞏

歲晚城東故相家。夜聽簾外落瓊花。醉眠東閣銀釭暗。起視中庭風竹斜。魯酒近來無柰薄。秦箏別後苦聞誇。思君勸對空陂飲。歸去紛如日暮鴉。

次韻張恕戲王鞏

二君豪俊並侯家。歌舞爭妍不受誇。聞道肌膚如素練。更堪鬢髮似飛鴉。

送轉運判官李公恕還朝

我行未厭山東遠。昔遊歷下今梁苑。官如雞肋浪奔馳。政似牛毛常黽勉。幸公四年持使節。按行千里長相見。鷹掣秋田伏兔驚。驥馳平野疲牛勸。似憐多病與時違。未怪兩州從事懶。除書奪去一何速。歸袖翩然不容挽。黃河東注竭崑崙。鉅野橫流入州縣。民事蕭條委濁流。扁舟出入隨奔電。回首應懷微禹憂。歸朝且喜寧親便。公知齊楚卽爲魚。勸築宣防不宜緩。

此页空白

欒城集卷第八

詩六十八首

寄范文景仁

京城冠蓋如雲屯。日中奔走爭市門。弊裘瘦馬不知路。獨向城西尋隱君。隱君白髮養浩氣。高論驚世門無賓。欣然爲我解東閣。明窗淨几舒華茵。春天雪花大如手。九衢斷絕愁四隣。平明熟睡呼不覺。清詩淥酒時相親。我兄東來自東武。走馬出見黃河濱。及門卻遣不得入。回顧欲去行無人。東園桃李正欲發。開門借與停車輪。青天露坐列觴豆。落花飛絮飄衣巾。留連四月聽鶻鳩。扁舟一去浮奔渾。人生聚散未可料。世路險惡終勞神。交遊畏避恐坐累。言詞欲吐聊復吞。安得如公百無忌。百間廣廈安貧身。

次韻王鞏上元見寄三首

棄擲良宵君謂何。清天流月鑑初磨。莫辭病眼羞紅燭。且試春衫剪薄羅。蓮豔參差明繡戶。舞腰輕瘦颯驚鼉。少年微服天街闊。何處相逢解佩珂。繁燈厭倦作閑遊。行到僧居院院留。月影隨人深有意。車音爭陌去如流。酒消鑿落寧論斗。魚照琉璃定幾頭。過眼繁華真一夢。終宵寂寞未應愁。燈火熏天處處同。暗遊應避柏臺驄。高情自放喧闐外。勝事偏多淡泊中。平日交遊徒夢想。留都歌吹憶年豐。知君未有南來意。歸去相從光與鴻。

謝張安道惠馬

從事年來鬢似蓬。破車倦僕衆人中。作詩僅比窮張籍。得馬還從老晉公。夜起趨朝非所事。曉騎行樂定誰同。慣乘款段遊田里。怯聽駸駸兩耳風。張水部渠有謝裴晉公惠馬詩。

次韻子瞻贈梁交左藏

彭城欲往臺無檄。初喜東西合爲一。將軍走馬隨春風。精銳千人森尺籍。口占嘉句驚衆坐。手練強兵試鳴鏑。酒酣起舞花滿地。醉倒不聽人扶出。歸來相對如夢寐。虎踞能經苦岑寂。黃樓方就可同遊。飲盡官廚三百石。

寒食遊南湖三首

春睡午方覺。隔牆聞樂聲。肩輿試扶病。畫舫聽徐行。適性逢樽酒。開懷挹友生。遊人定相笑。白髮近從橫。遶郭春水滿。被堤新柳黃。官池無禁約。野艇得飛揚。浪泛歌聲遠。花浮酒氣香。晚風歸棹急。細雨溼紅粧。攜手臨池路。時逢賣酒壚。柳斜低繫纜。草綠薦傾壺。波蕩春心起。風吹酒力無。冠裳強包裹。半醉遣誰扶。
觀大閱

承平郡國減兵屯。唯有留都一萬人。票姚將軍思出塞。從橫幕府諱和親。旌旗不動風將轉。曲部無聲馬亦馴。八陣且留遺法在。未須親試革車塵。

送林子中安厚卿二學士奉使高麗二首

東夷從古慕中華。萬里梯航今一家。夜靜雙星先渡海。風高八月自還槎。魚龍定亦知忠信。象譯何勞較

齒牙屈指歸來應自笑。手持玉帛賜天涯。
官是蓬萊海上仙。此行聊復看桑田。鯤移鵬徙秋帆健。潮闊天低曉日鮮。平地誰言無嶮阻。仁人何處不
安全。但將美酒盈船去。多作新詩異域傳。

送趙帆祕書還錢塘

世人何局促。奔走鬢蒼蒼。聞道餘杭守。獨遊何有鄉。禪心朝吐月。元氣夜生光。清靜安罷瘵。寬仁服暴強。
聲名高一世。風采見諸郎。謁帝朱爲紱。還家綵作裳。經過留畫舫。談笑接清觴。問訊顏依舊。崢嶸歲自長。
人生真幾許。世味不堪嘗。歸去聞詩罷。求余卻老方。

馬上見賣芍藥戲贈張厚之二絕

春風欲盡無尋處。盡向南園芍藥中。過盡此花真盡也。此生應與此花同。
春來便有南園約。過盡春風約尙賒。綠葉成陰花結子。便須攜客到君家。

答見和二絕

花柳蕭條行已老。聖賢希闊未嘗中。眼看芍藥紛紛盡。賴有櫻桃顆顆同。
塵編何用朝朝看。新釀還須處處賒。好事若能頻載酒。不送時復到楊家。

送呂希道少卿知滁州

長怪名卿亦坐曹。忽乘五馬列旌旄。才多莫厭官無事。郡小不妨名自高。庶子定應牽賦詠。醉翁聊復繼
遊遨。試尋苦戰清流下。要識經綸帝業勞。

次韻張恕春莫

祇言城市無佳處。亦有南湖幾度遊。好雨晴時三月盡。啼鶯到後百花休。老猿好飲常連臂。野馬依人自絡頭。不肯低回池上醉。試看生滅水中漚。

次韻傅宏推官義方亭

居近古城心自幽。簞瓢足用更何求。鸞飛旋趁春風出。龍臥終聞暮雨搜。科第聯翩收甲乙。鄉閭驚怪問因由。隱君淡泊無人識。長夏一衫冬一裘。

次梁交之徐州

湖水清且深。新荷半猶卷。未見紅粧窈窕娘。先排翠羽參差扇。水面風生人未知。欹傾俯仰長先見。岸上遊人莫不歸。清香入袖涼吹面。投壺擊鞠綠楊陰。共盡清樽滄白飯。坐中飛將忽先起。輕衫出試彭門遠。百步洪西白浪翻。戲馬臺南雲岫滿。江山雄麗信宜人。風流孰似梁王苑。

次韻王鞏寄見三首

日永官閑自在慵。門前客到未曾通。憐君避世都門裏。勸我忘憂酒盞中。城下柳陰新過雨。湖邊荷葉自翻風。早須命駕追清賞。大字新詩事手工。

觸事如棋一一低。昏然一睡更何知。賈生流落南遷後。陶令衰遲歸去時。去住由人真水母。簞瓢粗足亦山雌。年來未省談堯舜。一映簷疎豈足吹。

池上輕冰暖卻開。迎春送臘仰銜杯。君家有酒能無事。客醉連宵遣不迴。詩就滴消盤上蠟。信來飄盡嶺

頭梅。商丘冷坐君知否。餅罄應須有恥。曷。

次韻李達見贈

大學羣遊經最明。青衫顛顛竟何成。蠶鹽仍作當年味。名譽飛蠅過耳聲。

次韻秦觀秀才攜李公擇書相訪

濟南三歲吾何求。史君後到消人憂。君言有客輕公侯。扁舟相從古揚州。致之匹馬恨無力。千里相望同異域。誦詩空使四坐驚。隱居未易凡人測。史君南歸無限情。鴻飛攜書墮我庭。此書兼置昔年客。袖中秀句淮山青。老夫強顏依府縣。堆案文書本非願。清談亶亶解人頤。安得坐右長相見。狂客吾非賀季真。醉吟君似謫仙人。未契長遭少年笑。白髮應慙傾蓋新。都城酒貴誰當換。塵埃汗面非良筭。歸來泗上苦思君。莫待黃花秋爛漫。秦君與象兄子瞻約秋後再遊彭城。

送龔鼎臣諫議移守青州二首

稷下諸公今幾人。三爲祭酒髮如銀。梁王宮殿歸留鑰。尙父山河屬老臣。沂水弦歌重曾點。菑川故舊識平津。過家定有金錢費。千里爭看衣錦身。

面山負海古諸侯。信美東方第一州。勝勢未容秦地嶮。奇花僅比雒城優。新絲出盎冬裘具。貢棗登場歲事休。鈴閣虛閑官釀熟。應容將佐得遨遊。

送余京同年兄通判嵐州

矯矯吳越士。遠爲井代行。寒暄雖云異。慷慨慰平生。我昔在濟南。君時事淄青。連年食羊豕。便欲忘蓴羹。

問君棄鄉國。何似弊屣輕。丈夫事所志。歸去無田耕。閑官少愧恥。教子終餘齡。定心養浩氣。閉目收元精。此志我亦然。偶與長者并。會合不可期。未易夸者評。

河上莫歸過南湖二絕

西來白水滿南池。走馬池邊日落時。橋底荷花無限思。清香乞與路人知。
淤田水淺客來遲。解舫都門問幾時。誰道兩京雞犬接。差除屈指未曾知。

送提刑孫願少卿移湖北轉運

持節憂邦刑。職業已自簡。下車攝留都。談笑事亦辦。開軒揖佳客。退食事書卷。爲政曾幾何。清風自無限。官居歲月迫。歸念湖湘遠。依依東軒竹。凜凜故人面。詔書遂公私。使節許新換。舊治行營經。家山企可見。官遊得鄉國。勞苦願猶願。歸旆正滂洋。行轡豈容緩。

次韻劉涇見寄

天之蒼蒼亦何有。亦有雲漢爲之章。人生混沌一氣耳。嘿嘿何用知肺腸。孔公孟子巧言語。剖瓢插竹吹笙簧。含宮吐角千萬變。坐令隱伏皆形相。我生稟賦本微薄。氤氳方寸不自藏。譬如蘭根在黃土。春風驅迫生繁香。口占手寫豈得已。此亦未免物所將。方將寂寞自收斂。不受世俗斗尺量。既知仍作未能止。紛紜竟亦類彼莊。煎烹心脾擢胃腎。自令鬢髮驚秋霜。嗟子獨未知此病。從橫自恃鬚爪剛。少年一見非俗物。鏘然脩竹鳴孤凰。近來直欲扛九鼎。令我畏見筆力強。提攜童子從冠者。揣摩五帝論三皇。詩書近日貴新說。掃除舊學漫無光。竊攘瞿曇剽李耳。牽挽性命推陰陽。狂流袞袞去不返。長夜漫漫未遽央。詞鋒

俊發魯連子。慚愧田巴稱老蒼。是非得失子自了。一醉早醒余所望。

城南訪張恕

事似棼絲撥不開。秋隨脫華暗相催。城南綠野宜幽步。水北紅塵漫作堆。赤棗青瓜報豐熟。黃雞白酒勸徘徊。此中真有醇風在。一畝何年斲草萊。

同李倅鈞訪趙嗣恭留飲南園晚衙先歸

城南高樓出喬木。下有方塘秋水足。新霜未變草木鮮。晚日旋催梨棗熟。雨荒松菊半榛莽。風老菰蒲初瑟縮。門前大路多塵土。日中過客無留轂。開門卻掃如有待。下馬升堂真不速。勸我一振衣上黃。臨風共倒樽中綠。肴蔬草草意不盡。絲竹泠泠暗相屬。琳宮仙伯自閑暇。幕府龔官苦煩促。晚衙簿領當及期。後堂車轆要須漉。令人更愧東宮師。眷戀溪山棄華屋。

次韻轉運使鮮于侁新堂月夜

長愛陶先生。閑居棄官後。床上臥看書。門前自栽柳。低徊顧微祿。畢竟誰挽袖。索莫秋後蜂。青燐曉天宿。惟將不繫舟。託此春江溜。尺書慰窮獨。秀句驚枯朽。遙知新堂夜。明月入杯酒。千里共清光。照我茅簷漏。

送梁交供備知莫州

猛士當令守四方。中原諸將近相望。一樽度日空閑暇。千騎臨邊自激昂。談笑定先降虜使。詩書仍得靖戎行。君看宿將何承矩。安用摧鋒百戰場。

秋祀高禩二絕

蕩蕩巍巍堯舜前。一丘惟見柏森然。後來秦漢何堪數。跋扈飛揚得幾年。乾德年中初一新。頽垣破瓦委荆榛。興亡舉墜干戈際。閑暇方知國有人。

過興教贈劉上人

四十年間此院留。臨河看盡往還舟。同來並是三年客。聽說行藏各自羞。

次韻王鞏代書

去年河上送君時。我醉看君倒接籬。一笑便成經歲隔。扁舟重到滿城知。舊傳北海偏憐客。新怪東方苦
慙飢。應笑長安居不易。空吟原上草離離。

南湖清飲二首

翠箔紅窗映大堤。遠來清飲歎參差。盈盈積水東西隔。脈脈幽懷彼此知。淥酒謾傳工破悶。主人何敢怪
顰眉。明朝看月雲開未。試與詹家一問龜。
坐客經年半已非。喜君重到暫相依。不嫌愛酒樽頻倒。只怕題詩紙屢飛。耿耿幽懷誰與懃。徐徐細酌未
應違。從今更肯相過否。幾誤風吹白版扉。

次韻偶成

交情淡泊久彌新。吏役縈纏日益紛。香火社中真避世。簿書叢裏強論文。樽罍正及明蟾夜。舟楫來隨早
鴈羣。世俗如君今有幾。真將富貴等浮雲。

中秋見月寄子瞻

西風吹暑天益高。明月耿耿分秋毫。彭城閉門青嶂合。臥聽百步鳴飛濤。使君攜客登燕子。月色着人冷如水。筵前不設鼓與鐘。處處笛聲相應起。浮雲卷盡流金丸。戲馬臺西山鬱蟠。杯中淥酒一時盡。衣上白露三更寒。扁舟明日浮古汴。回首逡巡陵谷變。河吞巨野入長淮。城沒黃流只三版。明年築城似山。伐木爲堤堤更堅。黃樓未成河已退。空有遺蹟令人看。城頭見月應更好。河流深處今生草。子孫幸免魚鼈食。歌舞聊寬使君老。南都從事老更貧。羞見青天月照人。飛鶴投籠不能出。曾是彭城坐中客。

次韻王鞏自詠

平生未省爲人忙。貧賤安閑氣味長。粗免趨時頭似葆。稍能忍事腹如囊。簡書見迫身今老。樽酒聞呼首一昂。欲挽天河聊自洗。塵埃滿面鬢眉黃。

次韻王鞏同飲玉廷老度支家戲詠

白魚紫蟹早霜前。有酒何須問聖賢。上客遠來工緩頰。雙鬢爲出小垂肩。新傳大曲皆精絕。忽發狂言亦可憐。莫怪貧家少還往。自須先辦買花錢。

送王鞏之徐州

遨遊公卿間。結交非不足。高秋遠行邁。黃泥沒馬腹。問君胡爲爾。笑指籬間菊。故人彭城守。久作中朝逐。詩書自娛戲。樽俎當誰屬。相望鶴頸引。欲往龜頭縮。前期失不遂。浪語頻遭督。黃樓適已就。白酒行亦熟。登高暢遠情。戲馬有前躅。篇章雜笑語。行草爛盈幅。歸來貯篋笥。把玩比金玉。吾兄別我久。憂患欲誰告。孤告多風霆。彈射畏顛覆。白頭日益新。歲寒喜君獨。紛紛衆草中。冉冉凌霜竹。恨我閉籠樊。無由託君轂。

次韻張恕九日寄子瞻

無限黃花簇短籬。濁醪霜蟹正堪持。坐曹漫爾誇勤瘁。割肉何妨誚詆欺。世外罇罍終日放。俗間簿領莫相縻。茱萸插遍知人少。談笑須公一解頤。王摩詰詩云。遙知兄弟登高處。插遍茱萸少一人。

戲次前韻寄王鞏二首

白馬貂裘錦幕籬。離觴漱灑手親持。頭風欲待歌詞愈。肺病甘從酒力欺。不分歸心太忽草。更憐人事苦縈縻。相逢借問空長歎。便捨靈龜看朵頤。細竹寒花出短籬。故山耕耒手曾持。官遊暫比鳧鷖集。歸計長遭句偻欺。歌舞夢回空歷記。交朋飛去自難縻。悠悠後會須經歲。冉冉霜髭漸滿頤。

贈杭僧道潛

月中依松鶴。露下抱葉蟬。賦形已孤潔。發響仍清圓。潛師本江海。浪迹遊市廛。髭長不能翦。衲壞聊復穿。瘦骨見圖畫。禪心離攀緣。出言可人意。一一皆自然。問師藏何深。不與世俗傳。舊識髯學士。復從堽耆年。塵埃既脫落。文彩自精鮮。落落社中人。如我亦有旃。柰何一相見。撫卷坐長歎。歸去勿復言。山林信多賢。

張安道生日二首

椿年七十二迴新。蓬矢桑弧記此晨。養就丹砂無上藥。已超諸數自由身。中年道路趨真境。外物功名委世人。今夜空庭香火罷。定應星斗識天真。十載從公鬢似蓬。羨公英氣老猶充。生時別得星辰力。晚歲仍加鼎竈功。世事不堪開眼看。勞生漸恐轉

頭空問公試覓刀圭藥。歲歲稱觴此日中。

李鈞壽花堂

尙書郎晉陵李公。秉性直而和。少從道士得養生法。未五十。去嗜欲。老而不衰。爲南都通守。其西堂北牖。下池生菖蒲。開花三四。芬馥可愛。以書占之曰。此壽考之祥也。因名其堂曰壽花。而余爲作詩記之。石上菖蒲十二節。仙人服之好顏色。根如蟠龍不可得。葉中開花誰復識。夫子自少讀道書。年未五十嗜欲除。河流通天非轆轤。下入金鼎融爲珠。一醉斗酒心自如。鬼物窺覘驚睚眦。菖蒲花開壽之符。白髮變黑顏如朱。它年三茆訪君廬。拍手笑我言不虛。

次韻子瞻題張公詩卷後

世俗甘枉尺。所願求直尋。不知一律訛。大樂無完音。見利心自搖。慮害安得深。至人不妄言。淡如朱絲琴。悲傷感舊俗。不類騷人淫。又非避世翁。閔嘿遯陽瘖。嚶嚶晨雞鳴。豈問晴與陰。世人積寸木。坐使高樓岑。晚歲臥草廬。誰聽梁甫吟。它年楚倚相。儻能記惜愔。

次韻廣州陳繹諫議和陳薦宋敏求二龍圖二首

曾送飛龍白日翔。未應中路許還鄉。鶴歸仍有當年伴。松老知經幾度霜。城下寶坊聊寄榻。朝中振鷺舊成行。相逢出處何須問。五嶺清平十月涼。

右和彥升
寓定力

琳宮清淨思悠哉。頗似山林未肯迴。五日趨朝眞自適。一樽無事得頻開。董狐執筆何時易。馬援征蠻未遽來。奔走安閑誰是定。都門攜手一徘徊。

右和彥升
赴上醴泉

次韻王廷老寄子瞻

歌吹新成百尺臺。青山臨水巧崔嵬。佳人解作回文語。狂客能鳴摯鼓雷。擷菊傳杯醒復醉。採菱盪漿去仍回。新年聞欲相從飲。春酒還須剩作醅。

次韻頓起考試徐沂舉人見寄二首

齊楚諸生儼鞞紳。人人願得出君門。銜枚勇銳驚初合。棄甲須臾訝許奔。細讀未辭燈損目。久留終厭棘爲藩。定應親刈翹中楚。把卷喧呼半夜言。

老年從事忝南京。海內交遊尙記名。怯見廣場心力破。厭看細字眼花生。新科未暇通三尺。舊曲惟知有六莖。空憶倚樓秋雨霽。與君看遍洛陽城。前舉與頓同試西京舉人。

送李鈞郎中

君家毗陵本江南。雖爲浙西終未甘。風流秀發自不減。氣質渾樸猶中含。敲榜滿前但長嘯。簿書堆案常清談。湖中往往載畫舫。竹下小小開茅庵。歌吟髣髴類騷雅。導引委曲師彭聃。新茶潑乳睡方覺。潦酒傾水醒復酣。一朝揮手去不顧。使我把袂心難堪。扁舟水涸費牽挽。瘦馬雪凍憂朝參。一官來往似秋鷺。薄俸包裹如春蠶。東南乞麾尙可得。白首誰念家無甌。

送文與可知湖州

連持梁洋印。久作溪山主。深知爲郡樂。但畏買茶苦。來歸天祿閣。坐守登聞鼓。九重未明入。百辟盈庭舞。城南獨歸臥。心事誰當語。舊聞吳興勝。試問天公取。家貧囊裝盡。歲莫輕帆舉。苕溪淨多石。棄領瘦無土。

湖藕雪冰絲。山茶潑牛乳。香粳飯玉粒。鮮鯽鱸紅縷。宮開水精潔。人寄畫屏住。俗吏自難堪。詩翁正當與。從來思清絕。況乃病新愈。團團肘後丹。曷曷胸中素。高臥鎮夸俗。清談靜煩訴。應笑杜紫微。湖亭但狂顧。嘉雪呈鮮于子駿三首

發函寬大一封書。臥閣雍容三日餘。旋見雪花投夜落。未應天意與人疎。瓦乾浙浙初鳴霰。畦潤漸漸想沒鉏。高會梁園遺勝在。早知詞賦似相如。春秋無麥自當書。況復秋田水潦餘。一雪端來救焦槁。千箱乞與等親疎。消殘溫癘曾非藥。蝕遍陳根不用鉏。猶恐遠村霑未足。試呼農圃問何如。蠶紙鋪庭幾誤書。楊花糝逕未春餘。積隨平野分高下。舞信微風作密疎。解使遊人似姑射。仍令飛鳥變春鉏。共驚天巧無能學。造物無心本亦如。

次韻文務光秀才遊南湖

料峭東風助臘寒。汀溼白酒借衰顏。滿牀書卷何曾讀。數步湖光自不閑。夢想綠楊垂後浦。眼看紅杏照前山。新春漸好君歸速。不見遊人暮不還。湖前小山曰杏山

子瞻惠雙刀

彭城一雙刀。黃金錯刀鑲。脊如雙引繩。色如青琅玕。開匣飛電落。入手清霜寒。引之置膝上。凜然愁肺肝。我衰氣力微。覽鏡毛髮斑。誓將斬鯨鯢。靜此滄海瀾。又欲戮犀兕。永息行路難。有志竟不從。撫刀但長歎。投刀淚如霰。北斗空闌干。歸來刈蓬蒿。鉏田植芳蘭。惜刀不忍用。用亦非所便。棄置塵土中。坐使鋒刃剗。

牀頭夜生光。知有蛟龍蟠。慚君贈我意。時取一磨看。

留守與賓客會開元龍興寺觀燈余有故不預中夜登南城而望

燈引雙旌萬點紅。傾城車馬在城東。便君行樂人人共。勸客安眠夜夜同。夢想笑談傾滿坐。臥聞歌筦逐春風。三更試上南樓看。無限繁星十里中。

欒城集卷第九

詩七十首

春日耕者

陽氣先從土脈知。老農夜起飼牛飢。雨深一尺春耕利。日出三竿曉餉遲。婦子同來相嫵媚。烏鳶飛下巧追隨。紛紜政令曾何補。要取終年風雨時。

自柘城還府馬上

春色無人見。茲行偶衆先。柳黃新過雨。麥綠稍鋪田。河潤兼冰散。禽聲向日圓。城池高受霧。灑渙暖生煙。送客情初惡。還家意稍便。旋聞夫事起。已過佛燈然。簿領何時畢。塵埃空自憐。南湖漸可到。早治木蘭船。

次韻子瞻人日獵城西

將賢士氣振。令肅軍聲悄。晨登戲馬臺。一試胡騾屐。城空巷無人。里社轉相曉。吾公庶無疾。但恐園囿小。荆榛一焚蕩。雉兔皆驚矯。翩翩白馬將。手把青絲挑。少小事邊徼。斬刈輕茶蓼。殿前賜鞍勒。珂月明皎皎。自言得所事。強暴無不了。廟筭本詩書。下策禁焚燎。當令百鍊剛。甘就一指繞。低回未嘗試。坐被世人少。秋霜一朝下。凌厲見鷲鳥。爲君整驕惰。重立穰苴表。

送鮮于子駿還朝兼簡范景仁

蜀中耆舊今無幾。相逢握手堪流涕。遊勸潦倒不還家。舊俗陵遲真委地。錢荒粟帛賤如土。權峻茶鹽不

成市詩書鄉校變古法。節行故人安近利。欲歸長恐歸不得。歸去相歡定誰是。低徊有似羊觸藩。眷戀僅同雞擇米。中山先生昔所愛。南都攝尹私相喜。窮冬夜長一事無。燈火相從夜深睡。讀書萬卷老不廢。感寓百篇深有意。俗吏惟知畏簡書。窮途豈意逢君子。春風歸騎忽西顧。平日高談應且止。朝騎疋馬事朝謁。莫就一牀尋夢寐。猶有城西范蜀公。買地城東種桃李。花絮飛揚酒滿壺。談笑從容詩百紙。紅塵暗天獨不知。白首相看兩無愧。古人避世金馬門。何必柴車返田里。

次韻秦觀見寄

東家有賢人。西家苦相忽。幽蘭委冰霜。掩靄特未發。春風吹芳蕤。爛熳安可沒。東南信多士。人物世不闕。考槃溪山間。自獻恥干謁。誰憐幽閑女。豔色比南越。垂耳困鹽車。捐金空買骨。讀書謝世事。閉門動論月。予生亦羈旅。處世常卒卒。誰令釣竿手。強復此持笏。惟餘七尺軀。空洞中無物。時蒙好事過。解榻聊一拂。野情樂江海。夢想扁舟几。隱居便醉睡。世路多顛蹶。榮華一朝事。毀舉百年歇。相勸沐成池。陽阿晞汝髮。

次韻道潛見寄

蕭蕭華髮映衰容。慚愧高僧歎不逢。遊宦終身空處處。塵埃何日退重重。已甘憔悴羣雞鶴。猶勝劬勞旱歲龍。回首不堪膏火熱。試求甘露洒青松。

次韻王鞏元日

庭鵲營巢初一枝。餘寒未便袂羅衣。春風娜娜還吹霰。歲事駸駸已發機。上國遨遊誰信老。中年情味祇思歸。和詩應覺添新懶。過盡長空鴈北飛。

送將官歐育之徐州

輕衫駿馬走春風。未識彭城氣象雄。青山只在白門外。明月盡屬黃樓中。五斗濁醪消永日。一雙鳴鏑戲晴空。歸來笑殺幕府客。閉戶看書滴滴窮。

次韻答王鞏

君家當盛時。畫戟擁朱戶。中書十八年。清明日方午。形容畫雲閣。功業載盟府。中庭三槐在。遺迹百世睹。子孫盡豪俊。豈類世寒窶。胡爲久遛厄。黽俛受侵侮。往來兩都簡。奔走未安土。願言解纓紱。歸去事農圃。嘉禾根未拔。且忍俟甘雨。拂衣走東臯。此說吾不取。聊復放襟懷。清談對僧塵。躬耕未可言。知田願乃父。

次韻子瞻過淮見寄兼簡孫奕職方三首

出處平生共。江淮恨不來。宦遊良誤我。老病賦懷哉。徇物終今世。量書盡幾堆。歸耕少憂患。惟有仰春雷。蜀中謂田無水利者爲雷鳴田。

龜山昔同到。松竹故依然。紅印封鹹鼓。黃罌分井泉。青天攜杖處。晚日落帆偏。無限相思意。新詩句句傳。又

行役饒新喜。臨川逢故人。相看對泉石。憐我在埃塵。會合終多故。分張類有神。南遊得如願。夢想畫溪春。
次韻王鞏留別

決策歸田豈世情。網羅從此脫餘生。請君速治雞黍具。待我同爲沮溺耕。秋社相從釀錢飲。日高時作叩門聲。茅廬但恐非君處。籍籍朝中望已傾。

次韻答孔武仲

白髮青衫不記年。相逢一笑整欣然。誦詩疊疊鋸木屑。展卷駸駸下水缸。未肯尺尋分枉直。自然鑿柄有方圓。閑官更似揚州學。猶得昏昏晝日眠。

送傅宏著作歸覲待觀城闕

膠西前輩鄭康成。千載遺風及後生。舊學詩書儒術富。兼通法律吏能精。還家綵服頻爲壽。得邑河壩喜有兵。民事近來多迫促。弦歌聊試武城聲。律有鄭氏章句

連雨不出寄張恕

麥熟蠶繅熱似烝。雨傾三尺未爲淫。洗清溝澮蚊虻靜。沒盡蒲蓮沼沚深。遺秉滿田驚朽腐。移牀避漏畏侵尋。高閑祗有張公子。臥聽蕭蕭打葉音。

和子瞻自徐移湖將過宋都途中見寄五首

東武厭塵土。彭門富溪山。從兄百日留。退食同躋攀。輕帆過百步。船底驚雷翻。肩輿上南麓。眼界涵川原。愛此忽忘歸。願見且三年。我去已忽忽。兄來亦崩奔。永懷置酒地。遠國多雲煙。

我昔去彭城。明日河流至。不見五斗泥。但見二竿水。驚風鬱怒。跳沫高睥睨。激灑三月餘。浮沈一朝事。分將食魚鼈。何暇顧隣里。悲傷念遺黎。指顧出完壘。綠堞對連山。黃樓麗清泗。功成始逾歲。脫去如一屣。空使西楚氓。欲語先垂涕。

千金築黃樓。落成費百金。誰言史君侈。聊慰楚人心。高秋吐明月。白壁懸青岑。晃蕩河漢高。恍恨窗戶深。

邀我三日飲。不去如籠禽。史君今吳越。雖往將誰尋。

又

欲買爾家田。歸種三頃稻。因營山前宅。遂作泗濱老。奇窮少成事。飽煖未應早。願輸囊中裝。田家近無報。平生百不遂。今又一笑倒。它年數畝宮。懸知迫枯槁。

又

梁園久蕪沒。何以奉君遊。故城已耕稼。臺觀皆荒丘。池塘塵漠漠。鴈鷺空遲留。俗衰賓容盡。不見枚與鄒。輕舟舍我南。吳越多清流。

次韻劉貢父登黃樓懷子瞻二首

青山開四面。白水遶三島。野闊時聞籟。人閑舊據梧。畫船留上客。遺迹問田夫。事少日常飲。才疎世未須。決河初薦至。勝事偶相俱。燕子卑無取。滕王遠可撫。飛濤隱睥睨。落日麗浮圖。同舍新持節。專城敢遽呼。未迎行部駕。已放下淮臚。試問登消暑。如何楚與吳。吳興有消暑樓。

再和

藹藹才名世。駸駸日轉禺。一時同接浙。平昔共棲梧。攬轡真壯士。擁旄良丈夫。塵埃脫縉綬。水石慰霜須。勝地來相失。清樽未暇俱。射餘空見帖。鑄罷祇觀樞。貴訃何當決。徂年貴早圖。檻中終爲食。韉上恥聞呼。願我千羊毳。平生一釣鱸。微官不須滿。也復試遊吳。

陪杜充張恕鴻慶宮避暑

至後雨如瀉。晴來熱更多。簿書霑汗垢。巖石思藤蘿。賴有祠宮靜。時容俗客過。老郎無不可。公子亦能和。道勝還相接。禪迷屢見訶。清涼生絕念。煩暑散沈疴。古木便張幄。鳴禽巧當歌。桃香呈絳頰。瓜熟裹青羅。飯細經脣滑。茶新到腹邁。劇談時自笑。飯食更無它。適意未應厭。後遊真若何。官居鄰曲沼。田畎助清波。晚照明疎柳。微風響衆荷。輕舟尚可載。小雨試漁蓑。

宋城宰韓秉文惠日鑄茶

君家日鑄山前住。冬後茶芽麥粒蘆。磨轉春雷飛白雪。甌傾錫水散凝酥。谿山去眼塵生面。簿領埋頭汗匝膚。一啜更能分幕府。定應知我俗人無。

次前韻

龍鬻僅比閩團釀。鹽酪應嫌北俗蠶。探愧吳僧身似臘。點須越女手如酥。舌根遺味輕浮齒。腋下清風稍襲膚。七盃未容留客試。瓶中數問有餘無。

答孔武仲

飛霜委中林。不廢長松綠。驚風振川野。未省勁草伏。我貧客去盡。君來常不速。愧君贈桃李。永願報瓊玉。我性本山林。苦學筆空秃。驂騑塞康莊。病足顧難逐。錦文銜華藻。弊褐非所續。家有五車書。恨不十年讀。濟南昔相遇。我齒三十六。談諧傾蓋間。還往白首熟。從君飲濁酒。過我飯脫粟。西湖多蒺藜。白晝下鴻鵠。城西野人居。柴門擁脩竹。後車載鷓夷。下馬瀉醯醢。醉眼臥荒草。空洞笑便腹。疎狂一如此。豈望世收錄。別來今幾何。歸期已屢卜。西南有薄田。茅舍清溪曲。耕耘三男子。伏臘當自足。君能遠相尋。布衣巾一幅。

送吳思道道人歸吳興二絕

一去吳興十五年。東歸父老幾人存。惠山唯有錢夫子。一寸閒田曉日曛。
遨遊海上冀逢人。宴坐山中長閉門。去住只今誰定是。相逢一笑各無言。

次韻答陳之方祕丞

南山李將軍。正馬獨行獵。田中射虎豹。後騎不容躡。丈夫貴自遂。老大饒驚懾。飄搖天地間。自視如一葉。
故人多東南。願作扁舟涉。忽蒙長篇贈。幸此傾蓋接。時世尙新奇。詩書存舊業。南風吹清汴。西去無停楫。
恨不留君談。一使衆坐厭。新詩苦清壯。欲和再三怯。東君多名卿。投刺日盈笈。一言苟合意。富貴出旬浹。
行看文石階。高談曳長袂。辱贈但茫然。知君念疲薾。

登南城有感示文務光王遜秀才

幽憂隨秋至。秋去憂未已。南城試登望。百草枯且死。落葉投人懷。驚鴻四面起。所思不可見。欲往將安至。
斯人定誰識。顧有二三子。清風皎冰玉。滄浪自湔洗。竊脂未嘗穀。南箕儻微似。網羅一張設。投足遂無寄。
田深狡兔肥。霜降鱸魚美。造形悼前失。式微慙往士。憧憧畝丘道。歲晚嗟未止。西山有茅屋。鋤耰本吾事。

張公生日

是歲己未
初致仕

少年談王霸。英氣干斗牛。中年事軒冕。徇世仍多憂。晚歲探至道。眷眷懷林丘。今年乞身歸。始與夙昔酬。
高秋過生日。真氣茲一周。觀心比孤月。視世皆浮漚。表裏一融明。萬物不能留。願謂憧憧人。斯樂頗曾不。
嗟我本俗士。從公十年遊。謬聞出世語。俛作籠中囚。俯仰迫憂患。欲去安自由。問公昔年樂。孰與今日優。

山中許道士。非復長史儔。腹中生梨棗。結實從今秋。

次韻答張耒

客舟逝將西。日夜西北風。維舟罷行役。坐令鬢如蓬。偶從二三子。步上百尺臺。雲煙遍原隰。敞悅令人哀。山中難久居。浮沉在城郭。欲學楊子雲。避世天祿閣。浮木寄流水。行止非所期。何須自爲計。水當爲我移。外物不可必。惟此方寸心。心中有樂事。手付瑟與琴。夜吟感秋詩。惜此芳物零。幽人亦多思。起坐再三聽。白駒在空林。鉗罄有恥壘。盡我一杯酒。愁思如雲頽。

次王適送張耒赴壽安尉二首

綠髮驚秋半欲黃。官居無處覓林塘。浮生已是塵勞侶。病眼猶便錦繡章。羞見故人梁苑廢。夢尋歸路蜀山長。憐君顧我情依舊。竹性蕭疎未受霜。魏紅深淺配姚黃。洛水家家自作塘。遊客賈生多感慨。閑官白傅足篇章。山分少石雲煙老。宮廢連昌草木長。路出嵩高應少駐。孱顏新過一番霜。

次韻張耒見寄

相逢十年驚我老。雙鬢蕭蕭似秋草。壺漿未洗兩腳泥。南轅已向淮陽道。我家初無負郭田。茅廬半破蜀江邊。生計長隨五斗米。飄搖不定風中煙。茹蔬飯糗不願餘。茫茫海內無安居。此身長似伏轅馬。何日還爲縱壑魚。憐君與我同一手。微官骯髒差牛後。請看插版趨府門。何以曲肱眠甕牖。中流千金買一壺。檀中美玉不須沽。洛陽榷酒味如水。百錢一角空滿盃。縣前女兒翠欲滴。吏稀人少無晨集。到官惟有懶相

宜臥看南山春雨溼。

次韻王適兄弟送文務光還陳

三君皆親非復客。執手河梁我心惻。倚門耿耿夜不眠。挽袖匆匆有難色。君歸使我勞魂夢。落葉鳴塔自相擁。君家西歸在新歲。此行未遠心先恐。故山萬里知何許。我欲因君亦歸去。清江髣髴釣魚船。脩竹平生讀書處。青衫白髮我當歸。咀嚙式微慙古詩。少年勿作老人調。被服榮名慰所思。

次韻張芻諫議燕集

淮陽臥閣生清風。梁園坐嘯囿空。不知何術解醜髀。但覺羈客忘樊籠。樽罍灑落談笑地。塵埃脫去文書叢。清心漸欲無一事。少年空記揮千鐘。近傳移鎮股肱郡。復恐入覲明光宮。人生聚散不可料。一杯相屬時方冬。浮陽似欲作飛霰。想見觀闕瓊花中。孝王會集猶可繼。莫嫌賦作無枚翁。聖民昔知陳州。余嘗從之遊矣。

臘雪五首

長恐冬無雪。今朝忽暗空。細聲聞簌簌。遠勢望濛濛。溼潤猶兼雨。傾斜半雜風。豐登解多事。歡喜助三農。

又

驕陽不能久。密雪自相催。急霰初鳴瓦。飛花旋集臺。着人消瘴疫。覆麥長根荄。欲試樽中物。門前問客來。

又

久有歸耕意。西山百畝田。雪來殊不惡。酒熟日相便。一被簪裳裹。長遭羅網牽。飛霰迫殘臘。愁思渡今年。

又

憂愁不可緩。風雪故相撩。試問五斗米。能勝一束樵。耕耘終亦飽。哺啜定誰邀。寒暑不須避。傾危且自遙。

又

雪霜何與我。憂思自傷神。忠信亦何罪。才名空誤身。歸來聊且止。老去莫逢嗔。樽酒他年事。相看醉此晨。

次韻王適雪晴復雪二首

驕陽得一雪。躡尺應更好。晨興視窗隙。驚見晴霞杲。九衢無停迹。狼藉須一掃。空餘浩然氣。凜凜接清昊。餘寒薄虛室。一靜解羣燥。晨炊晚未供。客饋慚草草。試脫身上衣。行問酒家保。孤吟擊槁木。大笑稱有道。人生但如此。富樂何用禱。所思獨未見。耿耿屬懷抱。

又

同雲自成幄。飛雪來無根。一爲清風卷。坐見東方暎。重陰偶復合。飛霰滿南軒。油然青春意。已見出土萱。老病一不堪。惟恃濁酒溫。開戶理松菊。掃蕩無遺痕。卷舒朝夕間。誰識造化元。乾坤本何施。中有神怪奔。萬物極毫末。顛倒何足掀。老農但知種。荷鋤理南園。

送呂由庚推官得替還洛中二首

君家相國舊元勳。凜凜中丞繼後塵。談笑二年同幕府。風流一倍愈它人。南都去後少佳客。西洛歸來多老臣。我亦宦遊無久意。他年松竹許相鄰。

洛水留人一向乾。雪泥溢路十分寒。送行我豈無樽酒。多難君知久鮮歡。回首祗應憐老病。凌風爭看試

輕翰。到家定見嵩陽老。問我衰遲未解官。司馬君實提舉嵩山崇福宮

四十一歲歲莫日歌

小兒不知老人意。賀我明年四十二。人生三十百事衰。四十已過良可知。少年讀書不曉事。坐談王霸了不疑。脂車秣馬試長道。一日百里先自期。不知中途有陷穽。山高日莫多棘茨。長裾大袖足鉤挽。卻行欲返筋力疲。蝮蛇尙前猛虎後。脫身且免充朝飢。歸來掩卷淚如雨。平生讀書空自誤。山中故人一長笑。布衣脫粟何所苦。古人知非不嫌晚。朝來聞道行當返。四十一歲不可言。四十二歲聊自還。

次韻子瞻繫御史獄獄中榆槐竹柏

秋風一何厲。吹盡山中綠。可憐凌雲條。化爲樵夫束。凜然造物意。豈復私一木。置身有得地。不問直與曲。青松未必貴。枯榆還自足。紛然落葉下。蕭條愧華屋。

盛衰日相尋。循環何曾歇。攀條擘柔荑。回首驚脫葉。綠槐陰最厚。零落今存莢。千林一枯槁。平地三尺雪。草木何足道。盈虛視新月。微陽起泉下。生意未應絕。槐

故園今何有。猶有百竿竹。春雷起新萌。不放牛羊觸。雖無朱欄擁。不見紅塵辱。清風時一過。交戛響鳴玉。淵明避紛亂。歸嗅東籬菊。嗟我獨何爲。棄此北窗綠。竹

曲如山下藤。脆若溪上葦。春風一張王。秋霜死則已。胡爲南澗中。辛勤種柏子。上枝撓雲霓。下根絞石齒。伐之爲梁棟。歲月良晚矣。白首閱時人。君看柱下史。柏

次韻子瞻贈張愬子

得罪南來正坐言。道人閉口意深全。天遊本自有真樂。羿穀誰知定不賢。構火噉噉初吐日。飛流袞袞旋

成川此心此去如灰冷。肯更逢人問復然。

過龜山

再涉長淮水。驚呼十四年。龜山老僧在。相見一茫然。僧老不自知。我老私自憐。驅馳定何獲。少壯空已捐。掉頭不見答。笑指岸下船。人生何足云。陵谷自變遷。當年此山下。莫測千仞淵。淵中械神物。自昔堯禹傳。帆檣避石壁。風雨隨香煙。爾來放冬汴。冷沙漲成田。袈裟六月渡。中流一帶牽。俯首見砂礫。羣漁捕魴鱸。父老但驚歎。此理未易原。何況七尺軀。不爲物所旋。衆形要同盡。獨有無生全。百年爭奪中。擾擾誰相賢。

放閘二首

畫舫連檣住。清流汎閘平。忽看銀漢落。仍聽夏雷驚。正拖遲迴久。開頭取次輕。滯留初一快。奔駛忽如傾。不識風濤恐。聊同枕席行。行逢賤魚稻。飽食慰平生。

又

閘空非有礙。水靜爲誰興。開閉偶然異。喧豕自不勝。淵停初鏡淨。勢轉忽雲崩。脫隘尙容與。投深益沸騰。玉山紛破碎。陣馬急侵陵。挾版千鈞重。浮舟萬斛升。岸搖將落木。魚困或投罾。洶湧曾誰止。蕭條遠欲疑。力爭知必折。少待亦何能。一發臨流笑。微言早服膺。

次韻王適細魚

羣魚一何微。僅比毛髮大。嬉遊極草草。鬚鬣自箇箇。造物賦羣形。偶然如一唾。吞舟雖云巨。其樂不相過。若言無性靈。還知避船柂。

高郵別秦觀三首

濛濛春雨溼邗溝。蓬底安眠晝擁裘。知有故人家在此。速將詩卷洗閑愁。
筆端大字鴉棲壁。袖裏清詩句琢冰。送我扁舟六十里。不嫌罪垢汙交朋。
高安此去風濤惡。猶有廬山得縱遊。便欲攜君解船去。念君無罪去何求。

召伯埭上斗野亭

細雨添春色。微風淨縹流。徂年半今世。生計一扁舟。飲食隨魚蟹。封疆八斗牛。江波方在眼。轉覺此生浮。

次韻鮮于子駿遊九曲池

天高山近海。春盡草生池。禾黍多新恨。川原自昔時。花存故苑麗。樵出舊城隳。莫望瓜州渡。曾經駐佛狸。

揚州五詠

九曲池

嵇老清彈怨廣陵。隋家水調繼哀音。可憐九曲遺聲盡。惟有一池春水深。鳳闕蕭條荒草外。龍舟想像綠楊陰。都人似有興亡恨。每到殘春一度尋。

平山堂

歐陽水叔所建

堂上平看江上山。晴光千里對憑欄。海門僅可一二數。雲夢猶吞八九寬。簷外小棠陰蔽芾。壁間遺墨涕洟瀾。人亡坐使風流盡。遺構仍須子細觀。

蜀井

在大明寺

信脚東遊十二年。甘泉香稻憶歸田。行逢蜀井恍如夢。試煮山茶意自便。短綆不收容盥濯。紅泥遠置亦清鮮。早知鄉味勝爲客。遊宦何須更着鞭。

摘星亭迷樓舊址

闕角孤高特地迷。迷藏渾忘日東西。江流入海情無限。莫雨連山醉似泥。夢裏興亡應未覺。後來愁思獨難齊。只堪留作遊觀地。看遍峯巒處處低。

僧伽塔

山頭孤塔闕真人。云是僧伽第二身。處處金錢追晚供。家家蠶麥保新春。欲求世外無心地。一掃胸中累劫塵。方丈近聞延老宿。清朝留客語逡巡。

題杜介供奉熙熙堂

門前籍籍草生徑。堂上熙熙氣吐春。遮眼圖書聊度日。放情絲竹最關身。年來頻脫烏皮几。客去時乾漉酒巾。卜築城中移榜就。休心便作廣陵人。

遊金山寄揚州鮮于子駿從事邵光

揚州望金山。隱隱大如幙。榻來長江上。孤高二千尺。僧居厭山小。面面貼蒼石。虛樓三百間。正壓江潮白。清風斂霧霧。曉日曜金碧。直侵魚龍居。似得鬼神役。我行有程度。欲去空自惜。風吹渡江水。山僧午方食。波瀾洗我心。筍蕨飽我腹。平生足遊衍。壯觀此云極。鐵甕本誰安。海門復誰植。東南遞隱見。遙與此山匹。茲遊幾不遂。深愧幕府客。歸時日已莫。正直江月黑。顧視天水并。坐恐星斗溼。使君何時罷。登覽不可失。

初至金陵

山川過雨曉光浮。初看江南第一州。路繞匡廬更南去。懸知是處可忘憂。

此
页
空
白

欒城集卷第十

詩九十六首

和孔武仲金陵九詠

白鷺亭

白鷺洲前水奔騰。亂馬牛亭高疑欲動。船去似無憂。洶湧山方壤。澄清練不收。中秋誰在此。明月滿城頭。

覽輝亭

城裏最高處。坡陁見一城。山多來有緒。江遠靜無聲。歌吹風前度。樓臺雨後明。風光同楚蜀。聊此慰生平。

鳳凰臺

鳳鳥久不至。斯臺空復高。何年種梧竹。特地翦蓬蒿。白水來無際。青山轉幾遭。南遊且未返。江海共滔滔。

天慶觀

興廢不可必。冶城今靜祠。松聲聞道路。竹色淨軒墀。江近風雲改。亭深草木滋。孤墳弔遺直。狂闢閔元規。

卞壺墓
在觀側

高齋

金陵佳處自無窮。使宅幽深卽故宮。樓殿六朝遺燼後。江山百里舊城中。雨餘尙有金鈿落。月出長窺粉堞空。看盡一城懷古地。茲遊恨不與君同。

此君亭在華藏寺

綠竹不可數。孤亭一倍幽。色分巖石潤。梢出澗松修。雪節寒方見。春萌旱不抽。故山多此物。長恨未歸休。

見江亭在蔣山

江水信浩渺。連山巧蔽虧。端能上嶮絕。故自識津涯。滅沒橋竿度。飄搖鷺羽遲。何人倚舟望。亦愛此峯危。

定林院

定林兩山間。崖木生欲合。茅屋倚巖隈。重重蔭清樾。晨齋取旁寺。生事信幽絕。吾人定何爲。常欲依暖熟。

八功德泉

君言山上泉。定有何功德。熱盡自清涼。苦除卽甘滑。頗遭遊人病。時取破匏挹。煩惱雖云清。凜然終在臆。

遊鍾山

江南四月如三伏。北望鍾山萬松碧。杖藜試上寶公龕。衆壑秋聲起相襲。青峯回抱石城小。白練前橫大江直。石梯南下俯城闌。松徑東蟠轉山谷。喬林無風聲如雨。時見遊僧石上息。行窮碧澗一庵巖。坐弄清泉八功德。歸尋晚飯衆山底。困臥定林依石壁。朝遊不知澗谷遠。莫歸但覺穿雙屐。老僧一身泉上住。十年掃盡人間迹。客到唯燒柏子香。晨飢坐待山前粥。丈夫濟時誠妄語。白首居山本良策。茹蔬飯糗何足道。純灰洗心聊自滌。失身處世足衍尤。愧爾山僧少憂責。

郭祥正國博醉吟庵

姑熟溪頭醉吟客。歸作茅庵劣容席。團團鵝卵中自明。窗前月出夜更清。醉吟自作溪上語。不學擁鼻維

陽生詩成付與坐中讀。知有清溪可終日。作詩飲酒聊復同。誰來共枕溪中石。圓天方地千萬里。中與此問大相似。囂然一息不自停。水火雷風相滅起。直須只作此庵看。歌罷曲肱還醉眠。不用騎鯨學太白。東入滄海觀桑田。

湖陰曲

老虎穴中臥。獵夫不敢窺。驂服箱驂盜驪。巡城三匝漫不知。帳中晝夢日邊壁。驚起知是黃須兒。馬鞭七寶留道左。猛士徘徊不能過。遺矢如去冰已遙。明日神兵下赤霄。荒城至今人不住。狐兔驚走風蕭蕭。

舟次大雲倉回寄孔武仲

一風失前期。十日不相見。君帆一何駛。去若乘風箭。我舟一何遲。出沒蔽葭亂。甕中有白糟。牀上有黃卷。妻孥不足共。思子但長嘆。池陽重相遇。撫手成一粲。先行復草草。回首空眷眷。人生類如此。遲速亦何筭。一見誠偶然。四海良獨遠。相期廬山陰。把臂上雲巘。

池州蕭丞相樓二首

遶郭青峯睥睨屯。入城流水縠文翻。樓成始覺江山勝。人去方知德業尊。坐久浮雲羃後嶺。酒醒飛雪變前村。我來邂逅公歸國。猶喜登臨共一樽。池守滕元發時將解去丞相風流直至今。朱欄仍對舊山林。奔馳軒冕身何有。跌宕圖書意最深。松遶城頭風瑟縮。江浮山外氣陰森。三年不起南遷想。應有前人識此心。

過九華山

南遷私自喜。看盡江南山。孤舟少僮僕。此志還復難。局促守破窗。聯翩過重巒。忽驚九華峯。高拱立我前。蕭然九仙人。縹渺凌雲煙。碧霞爲裳衣。首冠青琅玕。揮手謝世人。可望不可攀。我行竟草草。安能拍其肩。但聞有高士。臥聽松風眠。松根得茯苓。狀若千歲龜。養食一朝盡。終身棄腥膻。腹背生綠毛。輕舉如翔鸞。相逢欲借問。已在長松端。何年脫罪罟。出處良自便。芒鞋挂藤杖。逢山卽盤桓。斯人未可求。巖室儻復存。

佛池口遇風雨

長江五月多風暴。欲行先看風日好。北風忽作東南來。陰雲如湧撥不開。驚雷往還轉車轂。狂波低昂起坑谷。中流一葉那復持。卷舒已付天公知。解帆轉柂不容語。佛池口中幸可住。須臾急雨變昏霾。施師喜賀風已回。澄谿不動縈白練。老木蒼崖蔚葱蒨。繫舟茅屋得青蔬。試問釣船還有魚。開樽引滿向妻子。明日復行未須悽。陰陽開闔良等閑。扁舟誰令乘嶮艱。

舟次磁湖以風浪留二日不得進子瞻以詩見寄作二篇答之前篇自賦後篇次韻

慚愧江淮東北風。扁舟千里得相從。黃州不到六十里。白浪俄生百萬重。自笑一生渾類世。可憐萬事不由儂。夜深魂夢先飛去。風雨對牀聞曉鍾。西歸猶未有菟裘。擬就南遷買一丘。舟楫自能通蜀道。林泉真欲老黃州。魚多釣戶應容貫。酒熟鄰翁便可留。從此莫言身外事。功名畢竟不如休。

黃州陪子瞻遊武昌西山

千里到齊安。三夜語不足。勸我勿重陳。起遊西山麓。西山隔江水。輕舟亂鳧鷖。連峯多回溪。盛夏富草木。

杖策看萬松。流汗升九曲。蒼茫大江湧。浩蕩衆山蹙。上方寄雲端。中寺倚巖腹。清泉類牛乳。煩熱須一掬。縣令知客來。行庖映脩竹。黃鵝特新煮。白酒近亦熟。山行得一飽。看盡千山綠。幽懷苦不遂。滯念每煩促。歸舟浪花暝。落日金盤浴。妻孥寄九江。此會難再卜。君看孫討虜。百戰不搖目。猶憐江上臺。高會飲千斛。巾冠墮臺下。坐使張公哭。異時君再來。攜被山中宿。

將還江州子瞻相送至劉郎洑王生家飲別

相從恨不多。送我三十里。車湖風雨交。晉車武子故居。其水曰車湖。松竹相披靡。繫舟枯木根。會面兩王子。嘉眉雖異

郡。雞犬固猶邇。相逢勿空過。一醉不須起。風濤未可涉。隔竹見奔駛。渡江買羔豚。收網得魴鯉。朝畦甘瓠熟。冬盎香醪美。烏菱不論價。白藕如泥耳。誰言百口活。仰給一湖水。奪官正無賴。生事應且爾。卜居請連屋。扣戶容屣履。人生定何爲。食足真已矣。愆尤未見雪。世俗多相鄙。買田信良計。蔬食期沒齒。手持一竿竹。分子長湖尾。

赤壁懷古

新破荊州得水軍。鼓行夏口氣如雲。千艘已共長江險。百勝安知赤壁焚。背距方強要一鬪。君臣已定勢三分。古來伐國須觀釁。意突成功所未聞。

自黃州還江州

身浮一葉返湓城。凌犯風濤日夜行。把酒獨斟從睡重。還家漸近覺身輕。岸回樊口依稀見。日出廬山紫翠橫。家在庾公樓下泊。舟人遙指岸如頰。江州城下土赤如頰。

江州五詠

射蛟浦

萬騎巡遊遍。千帆破浪輕。射蛟江水赤。教戰越人驚。山轉樓船影。岸催連弩聲。祈招無爲賦。酣寢盡平生。

浦上積水相傳漢武教樓船於此

浪井

江波浮陣雲。岸壁立青鐵。胡爲井中泉。湧浪時驚發。水性本無定。得止自澄澈。誰爲女媧手。補此天地裂。

庾樓

元規情不薄。上客有殷生。夜半酒將罷。公來坐不驚。舞翻江月迥。談落塵毛輕。塵世風流盡。高樓空此名。

東湖

讀書廬山中。作郡廬山下。平湖浸山脚。雲峯對虛榭。紅葉紛欲落。白鳥時來下。猶思隱居勝。亂石驚湍瀉。

李勃隱居廬山泉石奇勝今棲賢寺其故居也及爲九江太守始營東湖風物可愛

琵琶亭

湓江暮雨晴。孤舟暝將發。夜聞胡琴語。展轉不成別。尊堂寄東林。雅意存北闕。濟然涕泗下。安用無生說。

不到東西二林

山北東西寺。高人永遠師。來遊亦前定。回首獨移時。社散白蓮盡。山空玄鶴悲。何年陶靖節。溪上送行遲。

遊廬山山陽七詠

開先瀑布

山上流泉自作溪。行逢石缺瀉虹霓。定知雲外波瀾闕。飛到峯前本未齊。入海明河驚照曜。倚天長劍失提攜。誰來臥枕莓苔石。一洗塵心萬斛泥。

漱玉亭

山回不見落銀潢。餘溜喧豨響石塘。目亂珠璣濺空谷。足寒雷電繞飛梁。入瓶銅鼎春茶白。接竹齋廚午飯香。從此出山都不棄。滿田秔稻插新秧。

簡寂觀

山行但覺鳥聲殊。漸近神仙簡寂居。門外長溪淨客足。山腰苦筍助盤蔬。喬松定有藏丹處。大石仍前拜斗餘。弟子蒼髯年八十。養生世世授遺書。

歸宗寺

求聽歸宗早晚鐘。疲勞懶上紫霄峯。墨池漫疊溪中石。白塔微分嶺上松。佛宇爭惟一山甲。僧廚坐待十方供。欲遊山北東西寺。巖谷相連更幾重。此寺王逸少所置。云有墨池在焉。

萬杉寺

萬本青杉一手栽。滿堂白佛九天來。仁宗初年。有僧手種萬杉。特爲建此寺。仍以禁中佛賜之。涓涓石溜供廚足。轟轟山屏遶寺開。半榻松陰秋簟冷。一杯香飯午鐘催。安眠飽食平生事。不待山僧喚始迴。

三峽石橋

三峽波濤飽。泝沿過橋雷。電記當年江。聲髣髴瞿唐口。石角參差灑瀕前。應有夜猿啼古木。已將秋葉作歸船。老僧未省遊巴蜀。松下相逢問信然。

白鶴觀

五老相攜欲上天。玄猿白鶴盡疑仙。浮雲有意藏山頂。流水無聲入稻田。古木微風時起籟。諸峯落日盡生煙。歸鞭草草還城市。慚愧幽人正醉眠。

南康阻風遊東寺

欲涉彭蠡湖。南風未相許。扁舟厭搖蕩。古寺慰行旅。重湖面南軒。驚浪卷前浦。霏微雪陣散。顛倒玉山舞。一風輒九日。未悉土囊怒。百里斷行舟。仰看飛鴻度。故人念征役。一飯語平素。竹色淨飛濤。松聲亂和雨。我生足憂患。十載不安處。南北已兼忘。遲速何須數。

寄題陳憲郎中竹軒

家有脩篁綠滿軒。趨庭詩禮舊忘言。凌霜自得良朋友。過雨時添好子孫。試翦輕筠扶野步。旋收涼葉煮清樽。風流共道勝桑梓。鄰里何妨種百根。

次韻孔武仲到官後見寄

舉楫同千里。繫舟時一言。共嗟蓬作屋。願就席爲門。行後身先困。征商思益昏。僅同登龍斷。何止服車轅。次韻筠守毛維瞻司封觀修城三首

北垣荆棘舊成堆。留待公來次第開。車馬已通城下路。榛蕪盡付冶家灰。異時碧瓦千門合。應記紅旌百

度來。自笑禪。便曠野。肩輿飛蓋許追陪。
撥棄案頭文字堆。曉晴山色四門開。究懷民事老雖壯。俛首山城心已灰。荆棘燒殘桑柘出。狐狸去盡犬
雞來。規模先遣通蹊隧。後乘應容衆客陪。
山脚侵城起阜堆。遠城微道斬新開。闔闔半壞驚潮信。隍壑初深見劫灰。蟻聚千夫曾幾日。鱗差萬瓦看
將來。史君才力輕山郡。朝論行聞急召陪。

次子瞻夜字韻作中秋對月二篇一以贈正郎二以寄子瞻

平明坐曹黃昏歸。終歲得閑惟有夜。已邀明月出牆東。更遣清風掃庭下。城上青鬃四山合。門前白練長
江瀉。誰家高會吹參差。鄰婦悲歌春罷亞。二年憂患今已過。一夜清光天所借。西京詩句出蘇李。南國風
流數王謝。已隨孤棹去中原。肯顧新科求上舍。讀書本自比嵇鍛。學劍要須問曹蔗。清觴灑灑君莫違。佳
句駸駸予已怕。狂夫猖狂終累人。不返行遭親黨罵。

又

十年秋月照相思。相從祗有彭門夜。露侵笳鼓思城闕。寒迫魚龍舞潭下。厭厭夜飲歡自足。落落襟懷向
人瀉。秋深河來巨野溢。水乾樓起滕王亞。北海孔公雖好客。河內寇君那得借。是非朝野忽紛紜。得喪芳
菲一開謝。明月多情還入門。流水何知空澆舍。晨餐江市富鱸魴。夜宿山村足梨蔗。坐隅鵬鳥不須問。牆
外蝮蛇猶足怕。婁公見唾行自乾。馮老尙多誰定罵。

次韻王適食茅栗

相從萬里試南餐。對案長思苜蓿盤。山栗滿籃兼白黑。村醪入口半甜酸。久聞牛尾何曾識。竊比雞頭意未安。故國霜蓬如盤大。夜來彈劍似馮驩。

過毛國鎮夜飲

風格照人華省郎。江山遼郭古仙鄉。漫傳鉛鼎八百歲。未比金釵十二行。不動歌聲人已醉。旋聞詩句夜初長。簿書撥盡知餘力。道院清虛頃未嘗。

次韻毛國鎮趙景仁唱和三首一贈毛一贈趙一自詠

治劇從容緩策筇。鈴軒無事日清談。隼旗畫戟明千里。紙帳繩牀自一庵。金奏屢陳容客和。玉山不動看賓酣。我來邂逅逢寬政。忘卻漂流身在南。一紙新詩過鴈銜。醒然何異接君談。奉親魚蟹兼臨海。退食琴書定有庵。一別經年真似夢。多憂不飲亦如酣。共君交契非今日。蔽芾棠陰自劍南。遠謫江湖舳尾銜。到來辛苦向誰談。畏人野鶴長依嶺。厭事山僧祇住庵。黃雀頓來成一飽。白醪新熟喜初酣。疎頑近日尤堪笑。坐任飄風去自南。

再和三首

穴鼠何須窺藪銜。蠶官不用苦高談。夜傾綠蟻風吹竹。晝擁黃紬雪覆庵。每作微詞還自笑。偶漸餘潤亦成酣。公詩精絕非倫擬。自古騷人盡在南。燕窠泥土一春銜。慚愧封侯止立談。舊隱尙聞存竹徑。歸休但要葺茅庵。釣船夢想沿溪泛。酒盞遙思向

日酣強欲遲留。依幕府。吳公行恐召河南。
天教窮困欲誰銜。生事那須一一談。自笑豐年塵滿甌。不堪雨後菌生庵。士師憔悴經三黜。陶令幽憂付一酣。它日歸耕若相憶。尺書頻寄北山南。

次韻王適州學新修水閣

黃鐘巨挺兩春容。何幸幽居近學宮。坐對江山增浩氣。力追齊魯欲同風。頗詩聞道求何武。家法行看試左雄。欲伴少年遊矍相。奔軍慚愧恐詞窮。

次韻毛君九日

山腳侵城盡是臺。登高處處喜崔嵬。手拈霜菊香無奈。面拂江風酒自開。幕府樽罍雲裏集。民家歌吹靜中來。定知勝卻陶彭澤。悵望籬邊白日頹。

次韻毛君感事書懷

種棠經歲便成科。秋雨調勻氣漸和。才力有餘嫌事少。風情無限覺詩多。長松更老仍添節。古井雖深自不波。宴坐山房人豈識。一樽聊且慰蹉跎。

次韻毛君見督和詩

新詩落紙一城傳。顧我疎蕪豈足編。它日杜陵詩集裏。韋迢略見兩三篇。

次韻毛君山房遣興

欲就陽崖暖。新開石磴斜。誰言太守宅。自是野人家。燕坐收心鑑。冥觀閱界沙。退公長寂寞。外物自喧譁。

缺逕移松補。斜陽種竹遮。白雲生後礎。孤鶩伴殘霞。破悶時尋鶴。呼眠亦任鴉。喜聞糟出甕。屢問菊開花。古井元依斗。丹砂舊養芽。蚍蜉頻上案。猿狖巧分樵。客到扁舟遠。年侵兩鬢華。心搖掛風旆。眼暗隔輕紗。強撥橫肱睡。來從插版衙。隱居慙棄擲。勝地每咨嗟。頑鈍終何取。彫磨豈復加。焦先夙所尙。園舍恰如蠅。和胡教授蒙太守策試諸生

著籍初同闕里多。采芹先致魯風和。欲將大策觀胸膽。盡召中堂列鴈鵠。終日正言何忌諱。幾人餘力尙委蛇。豈惟太守知爲政。仍見先生善設科。

和毛君州宅八詠

鳳凰山

山川蟠踞偶成形。威鳳低回久未行。更種梧桐真可致。高飛性似伯夷清。

披仙亭

仙翁舊住蜀江邊。千歲歸來一鶴翩。城郭已非人事改。淒涼遺迹但披仙。

方沼亭

池上茅簷覆水低。早來秋雨尙虹霓。敗荷折葦飛鴻下。正憶漁舟泊故溪。

翠樾亭

一夜飛霜點綠苔。曉庭黃葉掃成堆。簷間翠樾彫疎盡。卻放牆東好月來。

李八百洞

洞府山川百里賒。洞門藤蔓鎖煙霞。神仙不與人間異。弟妹還應共一家。

煉丹片

鑿井燒丹八百年。塵緣消盡果初圓。石床薜荔人安在。淥水圓團一片天。

磨劍他

神仙鑄劍本無礪。岸石斑斑尙鐵銹。天上少年仍狡獪。不須還爾對方平。

山房

岸幘攜筇夜夜來。蒲團紙帳竹香臺。直須覓取僧爲伴。更爲開庵斲草萊。

次韻毛君病中菊未開

病肺秋深霧雨傷。舊繒故絮喜清涼。菊花金粟未曾吐。桂酒鵝兒空自黃。草木亦知年有閏。風霜漸近月

方陽。

十月爲陽月。

得詩聞道維摩病。欲到毗耶言已忘。

雨中宿酒務

微官終日守糟缸。風雨淒淒夜渡江。早歲認知儒術貴。安眠近喜壯心降。夜深唧唧醅鳴甕。睡起蕭蕭葉打窗。阮籍作官都爲酒。不須分別恨南邦。

次韻毛君經旬不用鞭扑

共喜秋深酒味醇。官曹休暇不須旬。政寬境內棠陰合。訟去庭中草色新。不惜牛刀時一割。已因驂鼠發千鈞。歲終誰爲公書考。豈止江西第一人。

次韻李撫辰屯田修州門

六月江濤壁壘頽。蒼崖翠壁就新臺。咄嗟雙闕還依舊。咫尺羣山信有材。畫戟風生兩衙退。飛橋日出萬人來。不因毀圮催興築。誰見雍容治劇才。

飲酒過量肺疾復作

朝蒙麴塵居。夜傍糟牀臥。鼻香黍麥熟。眼亂瓶罌過。囊中衣已空。口角涎虛墮。啜嘗未去足。盜釀恐深坐。史君信寬仁。高會慰寒餓。西樓適新成。明月猶半破。擁簷青山橫。拂檻流水播。雕盤貯霜實。銀盃薦秋糯。共言文字歡。豈待紅裙佐。惟知醜醜滑。不悟頗羅大。夜歸肺增漲。晨起脾失磨。情懷忽牢落。藥餌費調和。衰年足奇窮。一醉仍坎壈。清樽自不惡。多病欲何奈。聞公話少年。舉白不論箇。歌吟雜嘲謔。笑語爭掀簸。平明起相視。銳氣曾未挫。達人遺形骸。驚馬懷豆莖。不知逃世網。但解憂歲課。不見獨醒人。終費招魂些。

衢州趙閱道少師濯纓亭

掛冠纓上已無塵。猶愛溪光碧照人。點檢舊遊黃石在。掃除諸念白鷗親。一樽父老囊金盡。三逕松筠生事貧。它日南公數人物。丹青添入縣圖新。

茶花二首

黃蘗春芽大麥籩。傾山倒谷採無餘。只疑殘枿陽和盡。尙有幽花霰雪初。耿耿清香崖菊淡。依依秀色嶺梅如。經冬結子猶堪種。一畝荒園試爲鉏。

細嚼花鬚味亦長。新芽一粟葉間藏。稍經臘雪侵肌瘦。旋得春雷發地狂。開落空山誰比數。烹烹來歲最

先嘗。枝枯葉硬天真在。踏遍牛羊未改香。

次韻毛君山房卽事十首

案牘希疎意自開。夜闌幽夢曉方回。青苔紅葉騷人事。時見詩筒去又來。
東晉仙人借舊山。定應天意許公閑。郡人欲問史君處。笑指峯巒紫翠間。
蛩知秋候時鳴壁。香礙蒲簾不出門。隱几無言心有待。南窗晴日暖侵軒。
溪山付與醉中仙。美酒何曾斗十千。就得江邊賤魚稻。閑官未用苦相憐。
忘身先要解忘名。分別須臾起不平。請看早朝霜入履。何如臥聽打衙聲。
禽哢秋來不復圓。桐陰霜後亦成穿。黃花強欲招酣飲。白髮偏工報老年。
邂逅清歡屢不期。病來無奈羽觴飛。醉乘籃輿江邊去。長伴漁舟月下歸。
醉裏題詩偏韻惡。秋來勸酒益盃深。不才多病俱非敵。綠綺緣何得報金。
庵中獨宿雨垂垂。永夜無人款竹扉。灰冷銅爐香欲滅。牀頭一點臘燈微。
觸事隨緣不用多。華堂玉食奈憂何。美人未厭山阿陋。薜荔爲裳帶女蘿。

再和十首

澗草巖花日日開。江南秋盡似春回。旋開還落無人顧。惟有山蜂暖尙來。
江上孤城面面山。居人也自不曾閑。蜂遊蟻聚知何事。日夜長橋南北間。
城郭村墟共水雲。槿籬竹屋映柴門。隱居亦有高人在。岸幘無言倚釣軒。

一官疎散自疑仙。三考應成醉日千。早病固須閑地著。多憂長被達人憐。

牢山陳道士璞近過此。叩

養生尤復要功圓。

溜滴南溪石自穿。

近見牢山陳道士。微言約我更三年。

竟無所云。約三年當再見。

張公詩社見公名。

公昔與張伯達爲唱和之友。

白首山城嘆不平。坐客要聞新樂府。應須溢口琵琶聲。

高情日與故山期。鴻鵠誰言也倦飛。且聽漁人強哺啜。坐中羈客畏公歸。

天爲多才故欲禁。府門摧落漲江深。鼎新翠壁排精鐵。湧出飛樓直百金。

樓上青山透四垂。畫橋百步引朱扉。落成當與公同上。一看長江白練微。

歌舞留賓意自多。華燈數問夜如何。白頭病客無才思。慣臥茅庵長薜蘿。

筠州二詠

牛尾狸

首如狸。尾如牛。攀條捷嶮如猿猴。橘柚爲漿栗爲餽。筋肉不足惟膏油。深居簡出善自謀。尋蹤發窟并執囚。蓄租分散身爲羞。松薪瓦甑烝浮浮。壓入糟盎肥欲流。熊肪羊酪真比儔。引筯將舉訊何尤。無功竊食人所仇。

黃雀

秋風下。黃雀飛。禾田熟。黃雀肥。羣飛蔽空日色薄。逡巡百頃朱爲稀。翾翻巧捷多且微。精丸繳妙舉輒違。乘時席勢不可揮。一朝風雨寒霏霏。肉多翅重天時非。農夫舉網驚合圍。懸頸系足膚無衣。百箇同缶仍相依。頭顱萬里行不歸。北方人居厭羔豨。咀噍聊發一笑歎。

樂城集卷第十一

詩八十六首

和毛君新葺困庵船齋

厭居華屋住東庵。真味全勝食薺甘。多病維摩長隱几。無心彌勒便同龕。誤遊田舍空成笑。謬入僧房即欲參。風霽不知吹有萬。月明聊共影成三。齋如小舫才容住。室類空囷定不貪。擁褐放衙人寂寂。脫巾漉酒鬢鬢。畫囊書帙惟窗案。藥裹瓢樽掛壁籃。簷竹風霜曾不到。盆花蜂蝶未全諳。公餘野鷗驚初睡。賓醉佳人笑劇談。勸客巨觥那得避。和詩難韻不容探。曉來霖霧連江氣。冬後溫風帶嶺嵐。去國屢成還蜀夢。忘憂惟有對公酣。終身徇祿知何益。投檄歸耕貧未堪。借我此庵泥藥竈。古書鴻寶試淮南。

寒雨

江南殊氣候。冬雨作春寒。冰雪期方遠。蕉絺意始闌。未妨溪草綠。先恐嶺梅殘。忽發中原念。貂裘據錦鞍。

積雨二首

山雨無時歇。江波上岸流。泥深未免出。橋斷更堪憂。房淺鄰糟甕。宵寒攬絮裘。朝來勢未已。歸路恐操舟。

又

微陽力尚淺。未解破重陰。雲氣山川滿。江流日夜深。凍牙生滯穗。餘潤及重衾。泥濘沈車轂。農輸絕苦心。

戲贈李朝散

江霧霏霏作雪天。樽前醉倒不知寒。後堂桃李春猶晚。試覓酥花子細看。

戲答

銀餅瀉酒正霜天。玉塵生風夜更寒。下客不辭投轄飲。好花猶恐隔簾看。

臨江蕭氏家寶堂

高人不解作生涯。唯有中堂書五車。竹簡多於孔氏壁。牙籤新似鄴侯家。田園豈是子孫計。青紫今爲里巷誇。富貴早知皆有命。君應未厭十年賒。

和蕭觀察推賀族叔司理登科還鄉四首

家聲籍籍大江西。臨老揮毫捧御題。得意何殊少年樂。還家不惜醉如泥。

讀盡家藏萬卷書。蕭然華髮宦遊初。區區獄掾何須愧。聊把春秋試緒餘。漢儒以春秋決獄

作官未減讀書勤。簿領從今日日新。汗簡章編誰付子。傳家應有下帷人。

巷南諸子足才賢。邂逅相逢秀句傳。強作知章同寄與。異時見我一依然。

次韻吳厚秀才見贈三首

騷人思苦骨巖巖。百里攜詩相就談。故作微詞挑遷客。不嫌春雨溼歸衫。少年舊喜登高賦。老病今成見敵慚。問我近來誰復可。對君聊擬誦周南。

久欲歸田計未成。羨君負郭足爲生。躬耕不下千鍾祿。高臥誰知萬里征。已覺安閑真樂事。可憐辛苦盡浮名。隱居便作江南計。爲覓佳山早寄聲。

一卷新詩錦一端。掉頭吟諷識芳酸。哀歌永夜悲牛角。朗詠扁舟笑杏壇。間發笙簧獨可擬。棄捐斤斧定知難。繼君高韻君應笑。咀嚼歸途久據鞍。

次韻毛君燒松花六絕

茅庵紙帳學僧眠。爐爇松花取易然。惟有未能忘酒石。手傾金盞鬪垂連。
餅雜松黃二月天。盤敲松子早霜寒。山家一物都無棄。狼藉乾花最後般。蜀人以松黃爲餅甚美
松老香多氣自嚴。餘煙勃鬱透疎簾。須臾過盡惟灰在。借問誰收一番炎。
美人懶甚插開扉。金作松花插鬢羅。幾度低頭疑墮落。青煙已斷未消時。
枯萼鱗皴不復豎。重重正似半開蓮。曾今樵舍塲爐見。未許邦君畫閣然。
黃蠟供炊自一家。錙銖貧富遞矜誇。都城爭賈方薪貴。卻顧松花已自奢。

陪毛君遊黃仙觀

李叟仙居仍近市。黃公道院亦依城。定應昔日山林地。未有今時雞犬聲。白鶴翻飛終不返。黃冠憔悴只躬耕。試從車騎尋遺跡。恐有居人解養生。

次韻王適梅花

江梅似欲競新年。照水窺林能愈妍。霜重清香渾欲滴。月明素質自生煙。未成細實酸猶薄。半落南枝意可憐。誰寫江西風物樣。徐家舊有數枝傳。

次韻王適春雪二首

江南春後寒猶劇。細雨風吹作雪花。中夜窗扉初晃漾。平明草木半低斜。潤催江柳排金線。光雜山茶點絳葩。老病不堪乘曉出。紛紛能使髮增華。

春雪飄搖旋不成。依稀履跡散空庭。山藏複閣猶殘白。日照南峯已半青。

毛君惠溫柑荔支二絕

楚山黃橘彈丸小。永識洞庭三寸柑。不有風流吳越客。誰令千里送江南。
荔子生紅無奈遠。陳家曬白到猶難。雖無驛騎紅塵起。尙得佳人一笑歡。

次韻王適遊真如寺

江上春雨過。城中春草深。擾擾市井塵。悠悠溪谷心。東郊大愚山。自古簷蔔林。微言久不聞。墜緒誰當尋。道俗數百人。請聞海潮音。齋罷車馬散。方籟俱消沈。新亭面南山。積霧開重陰。蕭然偶有得。懷抱方愔愔。我生米鹽間。日被塵垢侵。不知山中趣。強作山中吟。

韻次王適新鷺

好雨纖纖潤客衣。新來雙鷺力猶微。似嫌春早無人見。故待簾開掠地飛。南國花期知不遠。中原寒劇不應歸。養雛不怕巢成早。記取朝朝爲啓扉。

官居卽事

官局紛紜簿領迷。生緣瑣細老農齊。偷安旋種十年木。肉食還須五母雞。對酒不嘗憐酤榷。釣魚無術漫臨溪。此身已分長貧賤。執爨縫裳愧老妻。

陪毛君夜遊北園

池塘草生春尚淺。桃李飛花初片片。一樽花下夜忘歸。燈火尋春畏春晚。春風暗度人不知。滿園紅白已離披。江南春雨少晴日。露坐青天能幾時。折花只恐傷花意。攜客就花花定喜。落葉飄香翠袖中。交柯接葉燈光裏。雨練風柔雪不如。精神炫轉影扶踈。夜香飛鷲勝朝日。月暗還須明月珠。美人勸我殊非惡。明日雨來無此樂。醉歸不用怕山公。馬上按羅先倒著。

山橙花口號

故鄉寒食茶蘼發。百和香濃村蔓深。漂泊江南春欲盡。山橙髣髴慰人心。

次韻馮弋同年

細雨濛濛江霧昏。坐曹聊且免泥奔。賈鹽酤酒知同病。一笑何勞賦北門。

送王適徐州赴舉

送別江南春雨淫。北方誰是子知音。性如白玉燒猶冷。文似朱弦叩愈深。萬里同舟寬老病。一杯分袂發悲吟。明年榜上看名姓。楊柳春風正似今。

遊吳氏園

細雨作寒晴便暖。好風吹袂意初佳。清池解洗春心熱。紅豔能添醉眼花。紫竹暗生岷岫笋。山丹強比洛人家。伶渠巧與閑官便。申退來遊未覺賒。

江州周寺丞夷詠亭

行過廬山不得上。溢江城邊一惆悵。羨君山下有夷亭。千巖萬壑長相向。山中李生好讀書。出山作郡山前居。手開平湖浸山腳。未肯卽與廬山踈。道州一去應嫌遠。千里思山夢中見。青山長見恐君嫌。要須罷郡歸來看。

次韻毛君遊陳氏園

增築園亭木草新。損花風雨怨頻頻。篔簹似欲迎初暑。芍藥猶堪送晚春。薄莫出城仍有伴。移壺籍草更無巡。歸軒有喜知誰見。道上從橫滿醉人。

江漲

山中三日雨。江水一丈高。崩騰沒洲渚。淫溢侵蓬蒿。凌晨我有適。出門舟自操。中廩已易肆。下道先容舠。雞犬萃墳冢。牛羊逾圈牢。廚薪散流枿。困米爲浮糟。臥席不遑卷。剝蠶仍未繅。老弱但坐視。閭里將安逃。徙居共擾擾。來勢方滔滔。嗟余偶同病。哀爾爲生勞。晴日慰人願。寒風送驚濤。藩籬出舊趾。羸蚌遺平臯。流竄非擇地。艱難理宜遭。胡爲苦戚戚。一夕生二毛。

和子瞻鐵柱杖

截竹爲杖瘦且輕。石墜竹破誤汝行。削木爲杖輕且好。道遠木折恐不到。閩君鐵杖七尺長。色如黑虵氣如霜。提攜但恐汝無力。撞墜過險安能傷。柳公雖老尙強健。閉門卻掃不復將。知公足力無嶮阻。憐公未有登山侶。回生四海惟一身。袖中長劍爲兩人。洞庭漫天不覺過。半酣起舞驚鬼神。願公此杖亦如此。適意遨遊日千里。歸來倚壁示時人。海外蒼茫空自記。

競渡

史君欲聽榜人謳。一夜江波拍岸流。父老不知招屈恨。少年爭作弄潮游。長鯨破浪聊堪比。小旆迎風殊未收。角勝爭先非老事。凭欄寓目思悠悠。

登郡譙偶見姜應明司馬醉歸

蒼然莫色映樓臺。江市遊人夜未迴。何處酒仙無一事。肩輿鼾睡過橋來。

送姜司馬

七歲立談明主前。江湖晚節弄漁船。鬪雞誰識城東老。喪馬方知塞上賢。生計未成歸去詠。草書時發醉中顛。當年不解看齊物。氣跡如山誰見憐。

寄題趙帆承事戲綵堂

春晚安輿遍浙東。永嘉別乘喜無窮。橐裝已笑分諸子。吏道何勞問薛公。堂上壽樽諸椽集。室中禪論衲僧通。興闌卻返林泉去。幕府長留孝弟風。

次韻溫守李鈞見寄兼簡毛大夫

梁苑相從簿領中。清風相逐畫船東。婆娑江海凌雲鶴。飲啄籠樊失渚鴻。別後丹砂迷舊訣。愁來白髮變衰翁。此間詩老仍勍敵。正憶高吟酒盞空。

次韻洞山克文長老

無地容錐卓。年來轉覺貧。偶知珠在手。一任甑生塵。竄逐非關性。顛狂卻甚真。此心誰復識。試語洞山人。

試院唱酬十一首

戲呈試官呂防

新秋風月正涼天。空館相看學坐禪。滿榻詩書愁病眼。隔牆砧杵思高眠。霜飛一葉凋瓊玉。風遶雙松奏管絃。聞道熊羆歸夢數。侵天闌棘慢森然。

次韻呂君豐城寶氣亭

紫氣飛空不自謀。誰憐黽勉匣中留。西山猛獸橫行甚。北海長鯨何日收。星斗不堪供醉舞。蛟龍會看反重湫。功成變化無蹤迹。望斷中原百尺樓。

次韻呂君見贈

偶然傾蓋接清言。不覺門前晝漏傳。老病低摧方伏櫪。壯心堅銳正當年。莫嫌客舍一杯酒。試論灑山三祖禪。明日程文堆几案。只應衰懶得安眠。呂前官舒州問禪灑山。

次韻呂君興善寺靜軒

自恨尋山計苦遲。年過四十始知非。小軒迎客如招隱。野鳥窺人自識機。窗外竹深孤鶴下。塔前菊秀晚蜂飛。老僧戰勝長幽寂。瘦骨緣何未肯肥。

觀試進士呈試官

松庭散朝日。棘戶啓秋風。鵠鷺紛來下。旌旗儼未攻。馳詞看倚馬。餘送力征鴻。逸足誰先到。孤標想暗空。晶瑩雙鏡並。高下片言公。老病方耽睡。飛沈一夢中。

次前韻

南國號多士。幾人洙泗風。英材自入彀。壞陣不勞攻。文縟山藏豹。飛高弋慕鴻。蚩妍歸品藻。得失付虛空。考行先推本。登賢旋奏公。期君緩歸轡。一醉鹿鳴中。

戲呈試官

只隔牆東便是家。悄悄還似在天涯。客心不耐聽松雨。歸信猶堪飲菊花。翦燭看書良寂寞。披沙見玉忽喧譁。自慙空館難留客。試問姮娥稍駐車。

次前韻三首

老去在家同出家。楞伽四卷卽生涯。龔詩怪我心猶壯。細字憐君眼未花。霜落初驚衾簟冷。酒酣猶喜笑言譁。歸心知有三秋恨。莫學忽忽下坂車。

門前溪水似漁家。流浪江湖歸未涯。邂逅高人來說法。支離枯木旋開花。諸生試罷書如積。劇縣歸時訟正譁。安得騎鯨從李白。試看牛女轉雲車。

濁醪能使客忘家。屈指歸期已有涯。魚化昨宵驚細雨。鹿鳴它日飲寒花。已諳江上看蔬薄。莫笑衙前鼓笛譁。太守況兼鄉曲舊。會須投轄止行車。

試罷後偶作

重門閉不開。烏鳥相呼樂。是暉轉簾影。微風響松未。喧譁適已定。寂歷方有覺。人生竟何事。外物巧相縛。當時不自悟。已過空成作。耕耘亦何苦。遊官殊自惡。棄彼旣已誤。就此良應錯。誰能卽兩忘。隨緣更無作。

放榜後次韻毛守見招

飽食安眠愧不材。踈簾翠帟幸相陪。深居正厭銀袍亂。失喜初聞鐵鎖開。佳句徑蒙探古錦。小槽仍報滴新醅。諸人欲見風流伯。不用招呼亦自來。

送毛滂齋郎

先志承顏善養親。束裝騎馬試爲臣。酒腸大與渾無敵。詩律家傳便出人。擁鼻高吟方自得。折腰奔走漸勞神。歸來一笑須勤取。花發陳吳二月春。

燕貢士

泮水生芹藻。干旄在俊城。桑鷄同變響。苹鹿共和鳴。秋晚槐先墮。霜多桂向榮。清樽助勸駕。急管發驩聲。勇銳青衿士。淹通白髮生。芬芳離蘭菊。變化等鵝鯨。去日衣冠盛。歸時里巷驚。坐中詞賦客。愧爾一經明。

次韻毛君清居探菊

眼前黃葉畏秋霜。耳畔啼蛩恐夜長。佳節欣聞近萸菊。清商試爲秦伊涼。踈狂久笑謀生拙。貧病應憐爲口忙。今日共公判一醉。從教人道亦高陽。

次韻毛君見贈

江國騷人不耐秋。夜吟清句曉相投。鋒藏豈願囊中脫。尾斷終非俎上羞。擇地何年真得意。舖糟是處可同遊。南遷尙有公知我。人事何須更預謀。

次韻毛君偶成

年來衰病正相兼。薄宦奔馳尙未厭。詩句空多渾漫與。俗緣已重不須添。聲牙向物知難合。踈懶憐公獨未嫌。時聽淵明詠歸去。猶應爲我故遲淹。

孔平仲著作江州官舍小庵

近山不作看山計。引水新成照水庵。閉口忘言中自飽。安心度日更誰參。簡編圍遶穿書蠹。窗戶低回作蠶蠶。我亦一軒容膝住。弊裘蠶飯有餘甘。

送饒州周沃秀才免解

少年工作賦。中歲復窮經。驥老終知道。劍埋新發硎。束裝鄰里助。答策友朋聽。還似臨淄賁。隨風起北冥。雪中洞山黃檗二禪師相訪

江南氣暖冬未回。北風吹雪真快哉。雪中訪我二大士。試問此雪從何來。君不見六月赤日起冰雹。又不見臘月幽谷寒花開。紛然變化一彈指。不妨明鏡無纖埃。

毛國鎮生日二絕

生日元同小趙公。里閭相接往還通。怪公日夜歸心切。欲寄此生丹竈中。世謂叔平大趙參政閱道小趙參政趙公善養生故有丹竈之句

聞公歸橐尙空虛。近送楞嚴十卷書。心地本無生滅處。定逢生日亦如如。

次韻毛君將歸

踈傳思歸不待時。孟軻出晝苦行遲。新詩尙許留章句。故事誰從問典彝。金馬尙應堪避世。石泉未信可

忘飢不才似我真當去。零落衡茅隔雍岐。

送揚騰山人

胸中萬卷書。不如一囊錢。不見楊夫子。歲晚走道邊。夜歸空牀臥。兩手摩涌泉。窗前雪花落。真火中自然。渙然發微潤。飛上崑崙巔。霏霏雨甘露。稍稍流丹田。閉目內自視。色如黃金妍。至陽不獨凝。當與純陰堅。一窮百不遂。此事終無緣。君看抱朴子。共推古神仙。無錢買丹砂。遺恨盈塵編。歸去守茅屋。道成要有年。

次韻子瞻與安節夜坐三首

前山積雪暮崢嶸。燕坐微聞落瓦聲。共對一樽通夜語。相看萬里故鄉情。信歸嶺上寒梅遠。恨極江南春草生。明日青銅添白髮。且須醉睡倒燈檠。少年高論苦崢嶸。老學寒蟬不復聲。目斷家山空記路。手披禪冊漸忘情。功名久已知前錯。婚嫁猶須畢此生。家世讀書難便廢。漫留案上鐵燈檠。謫官似我無歸計。落第憐渠有屈聲。握手天涯同一笑。倚門歲晚不勝情。黃岡俯仰成陳迹。白首蹉跎畏後生。歸去且安南巷樂。莫看歌舞醉長檠。

次韻毛君上書求歸未報

白髮憂民帶減圍。頻聞慷慨賦將歸。近傳道士連三嘯。久悟禪門第一機。夜永庵中詩自得。日高門外客來稀。此心素定誰能勸。祇有丁寧詔莫違。

次韻毛君絕句

中池有士閉重關。夜發天光走玉環。白日對人人不識。幅巾破褐任塵漫。

次韻毛君留別

問天乞得不訾身。屈指人間今幾人。魚縱江潭真窟宅。鶴飛松嶺倍精神。清風吹雨停歸騎。舊圃留花送晚春。自號白雲知有意。便從丹竈拂埃塵。

送毛君致仕還鄉

古人避世事。豈問家有無。但言鴻鵠性。不受樊籠拘。公家昔盛時。阡陌連三衢。倉廩濟寒餓。婚嫁營羈孤。千金赴高義。脫手曾須臾。晚爲二千石。得不償所逋。撫掌不復言。但以文字娛。我恨見公遲。冉冉垂霜鬢。高吟看落筆。劇飲驚倒壺。負罪不自知。適意忘憂虞。忽聞叩天關。言旋故山廬。朋友不及謀。親戚亦驚呼。人生各有意。何暇問俗徒。嗟我好奇節。嘆公真丈夫。天高片帆遠。目斷清風徂。惟應東宮保。迎笑相攜扶。

贈景福順長老二首并敘

轍幼侍先君。聞嘗遊廬山。過圓通。見訥禪師。留連久之。元豐五年。以譴居高安。景福順公不遠百里。惠然來訪。自言昔從訥於圓通。逮與先君遊。歲月遷謝。今三十六年矣。二公皆吾里人。訥之化去。已十一年。而順公年七十四。神完氣定。聰明了達。對之悵懷想疇昔。作二篇贈之。

又

屈指江西老。多言劍外人。身心已無著。鄉黨漫相親。竄逐知何取。周旋意甚真。仍將大雷雨。一洗百生塵。念昔先君子。南遊四十年。相看順老在。想見訥師賢。歲歷風輪轉。禪心海月圓。常情計延促。無語對澗然。

次贈孔平仲著作見寄四首

昔在京城南。成均對茅屋。清晨屣履過。不顧車擊轂。時有江南生。能使多士伏。同儕畏鋒銳。兄弟更馳逐。文成劇翻水。賦罷有餘燭。連收領底髡。未耗脾中肉。飛騰困中路。黽勉啄場粟。歸來九江上。家有十畝竹。一官粗包裹。萬卷中自足。還如白司馬。日聽杜鵑哭。我來萬里外。命與江波觸。罪重慙故人。囊空仰微祿。已爲達士笑。尙謂愚者福。米鹽日草草。奔走長碌碌。尺書慰貧病。佳句爛珪玉。多難畏人知。胡爲強題目。徂年慕桑梓。歸念寄鴻鵠。但願洗餘愆。躬耕江一曲。

又

共居天地中。大類一間屋。惟排出高下。何異車轉轂。死生本晝夜。禍福固倚伏。誰令塵垢昏。浪與紛華逐。譬如薪中火。外照不自燭。感君探至道。勸我減粢肉。虛心有遺味。實腹不須粟。芬敷謝桃杏。清勁比松竹。息微知氣定。睡少驗神足。胡爲嗜一飽。坐使百神哭。要知丹砂異。不受腥腐觸。可憐山林姿。自縛斗升祿。君看出世士。肯屑世間福。寧從市井游。與衆同碌碌。不願束冠裳。腰金佩鳴玉。斯人今何在。未易識凡目。恐在廬山中。飛翔逐黃鵠。試用物色尋。應歌紫芝曲。

又

百病侵形骸。漸老同破屋。中有一寸空。能用輻與轂。忽如丹砂走。不受凡火伏。前瞻意不遠。後躡愈難逐。將炊甑中飯。未悟窗下燭。聰明役聲形。口腹嗜魚肉。塵泥翳泉井。荆棘敗禾粟。未知按妙指。漫欲理絲竹。廬山多名縉。過客禮白足。達觀等存亡。世俗強歌哭。確然金石心。不畏蚊蚋觸。順忍爲裳衣。供施謝榮祿。

真人我自。有渡海笑徐福。衆皆指庸庸。自顧非碌碌。愧君詩意厚。桃李報瓊玉。舉網羅衆禽。有獲非一日。喧啾定無用。要自取黃鵠。君看大方家。慎勿留一曲。

又

治生非所長。兒女驚滿屋。作官又迂踈。不望載朱轂。因緣罣罪罟。未許卽潛伏。空餘讀書病。日與古人逐。老妻憐眼昏。入夜屏燈燭。上官念貧窶。時節饋醪肉。乘年類蒲柳。世事劇麻粟。數日望歸田。寄語先栽竹。文章亦細事。勸苦定何足。君詩四相攻。欲看守陴哭。愧無卽墨功。不解火牛觸。自非太學生。彫琢事干祿。安心已近道。閉口豈非福。胡爲調狂詞。玉石相落碌。腹中抱丹砂。舌下漱白玉。作詩雖云好。未免亂心目。弈秋教二人。不取志鴻鵠。摩詰非不言。遺韻寄終曲。

陰晴不定簡唐覲。校并敖吳二君五首

積雨春連夏。新晴忽復陰。江痕漲猶在。梅氣潤相侵。蕉紵還須脫。圖書漸不禁。江南舊風俗。愁絕北來心。

又

蠶眠初上簇。麥熟正磨鎌。雲氣重重合。江流夜夜添。薦飢人甚困。多病我仍兼。欲就橋南宿。單衣莫雨露。

又

漲江方斲渡。小棹信輕生。貧賤誰憐汝。漂浮空自驚。一官終竊食。何計早歸耕。忽發騷人恨。淒涼久未平。

又

西隣豫章客。病骨瘦纒纒。清夜眠孤枕。終朝飽一簞。雨多愁不出。講罷未應餐。約我晴相過。門前泥欲乾。

二子薪中楚。相攜泮上游。齏鹽聊度日。交象久忘憂。寂寞君何病。驅馳我自羞。何時采芹處。求日看鳧鷗。

樂城集卷第十二

詩八十九首

雨後遊大愚

風光四月尚春餘。淫雨初乾積潦除。古寺蕭條仍負郭。閑官踈散亦肩輿。摘茶戶外蒸黃葉。掘荇林中間綠蔬。一飽人生真易足。試營茅屋傍僧居。

送高安羅令審禮

一邑憂勞水旱中。牛刀閑暇似無功。政成仍喜新蠶熟。歸去還將舊橐空。清白久聞誇父老。沈埋誰爲愬諸公。謫居長恨交游少。悵望肩輿又欲東。

送唐覲

溪上幽居少四鄰。西家幸有著書人。經年食菜誰憐瘦。終日題詩自不貧。身在江湖釣竿地。心馳蘭會戰車塵。此行便有飛騰處。笑殺年來老病身。唐君常欲爲陝西官。慨然有功名之志。

次韻唐覲送姜應明謁新唱杜簿

夫子雖窮氣浩然。輕篋短笠傲江天。薄遊到處唯耽酒。歸去無心苦問田。泮上講官殊不俗。山中老簿亦疑仙。相從未足還辭去。欲向曹溪更問禪。姜如晦方作嶺之行。

新種芭蕉

芭蕉移種未多時。濯濯芳莖已數圍。畢竟空心何所有。欵傾大葉不勝肥。蕭騷莫雨鳴山樂。狼藉秋霜脫弊衣。堂上幽人觀幻久。逢人指示此身非。

次韻姜應明黃檗山中見寄

垂老閑居味更深。此身隨世任浮沈。北窗未厭曲肱臥。西洛能傳擁鼻吟。疋馬徬徨猶寄食。弊裘安樂信無心。我今漂泊還相似。同愧高僧支道林。

次韻黃大臨秀才見寄

故人聚散霜前葉。往事眇茫風際煙。遊宦一生非有已。隱居萬事不由天。崎嶇檻穽力謀食。嘯傲山林肯計年。賴已將心問盧老。相逢它日笑風顛。

次韻李朝散遊洞山二首

古寺依山占幾峯。精廬髣髴類天宮。三年欲到官爲礙。百里相望意自通。無事佛僧何處著。入羣鳥獸不妨同。眼前簿領何時脫。一笑相看丈室中。

又

僧老經時不出山。法堂延客未曾關。心開寶月嬋娟處。身寄浮雲出沒間。休夏巾緝誰與共。迎秋水石不勝閑。近來寄我金剛頌。欲指胸中無所遷。

簡學中諸生

泮水秋生藻荇涼。莫窗燈火亂螢光。圖書粗足惟須讀。菽粟才供且自強。羽籥暗催新節物。弦歌不廢近

詩章腐儒最喜南遷後。仍見西離白鷺行。

以蜜酒送柳真公

牀頭釀酒一年餘。氣味全非卓氏壚。送與幽人試嘗看。不應知是百花鬚。

次韻柳見答

桂酒無人寄豫章。

江西官釀惟豫章最佳

羈愁牢落遣誰當。烹煎厓蜜真牽強。慙愧山蜂久蓄藏。江上鱸膾正熟。

山頭吹帽菊初香。漂流異日俱陳迹。笑說過從想未忘。

披仙亭晚飲

落日欲沒多雲煙。南山暝鴉歸北山。樓臺城上半明滅。燈火橋頭初往還。江西八月熱猶在。坐中遷客頭欲班。何時解網聽歸去。黃花白酒疎籬間。

余居高安三年每晨入莫出輒過聖壽訪聽長老謁方子明浴頭笑語移刻而歸歲月既久作一詩

記之

朝來賣酒江南市。日莫歸爲江北人。禪老未嫌參請數。漁舟空怪往來頻。每慙菜飯分齋鉢。時乞香泉洗病身。世味漸消婚嫁了。幅巾緇褐許相親。

次韻子瞻感舊見寄

少年耽世味。徘徊不能去。老來悟前非。尙愧昔遊處。君才最高峙。鶴行雞羣中。我雖非君對。願以兄弟同。結髮皆讀書。明月入我牖。縱橫萬餘卷。臨紙但揮手。學成竟無用。掩卷空自疑。卻尋故山友。重赴幽居期。

秋風送餘熱。冉冉如人老。衣裘當及時。田廬亦須早。種竹竹生筍。種稻稻亦成。浩歌歸來曲。曲終有遺聲。

次韻和人豐歲

風雨迎寒欲勞農。今年真不負元豐。蓋藏共荷官無擾。眠食安知帝有功。草笠黃冠將蜡祀。羔羊朋酒亦
幽風。請君早具躋堂飫。退食委蛇正自公。

同孔常父作張夫人詩

女子勿言弱。男兒何必強。君看張夫人。身舉十五喪。頭上脫笄珥。篋中斥襦裳。築墳連丘山。松柏鬱蒼蒼。親戚不爲助。涕泣感道傍。昔有王氏老。身爲尙書郎。親死棄不葬。簪裾日翱翔。白骨委廬陵。官遊在岐陽。一旦有丈夫。軒軒類佯狂。相面識心腹。開口言災祥。嗟汝平生事。不了令誰當。汝身暖絲綿。汝口甘稻粱。衣食未嘗廢。此事乃可忘。一言中肝心。投身拜其牀。傍人漫不知。相視空茫茫。終言汝不悛。物理久必償。兒女病手足。相隨就淪亡。鄙夫本愚悍。過耳風吹牆。明年及前期。長子憂軒瘍。一麾守巴峽。雙柩還故鄉。弱息雖僅存。蹒跚亦非良。誰言天地寬。網目固自張。古事遠不信。近事世所詳。企張非求福。禍敗當懲王。
嘉祐末年。李士寧言王君事於右扶風。其報甚速。張夫人南都人。孔推官常甫作詩言其賢。邀余同作并言李生事。或足以警世云。

次煙字韻答黃庭堅

病臥江干鬚帶雪。老捻書卷眼生煙。貧如陶令仍耽酒。窮似湘纍不問天。令弟近應憐廢學。大兄昔許叩
延年。比聞蔬茹隨僧供。相見能容醉後顛。
魯直兄歸於齊。州以養生見教。

東軒長老二絕并敘

始余於官舍營東軒。彭城曹君煥子文。自浮光訪余於高安。道過黃岡。家兄子瞻以詩送之。曰：君到高安幾日迴。一時抖擻舊塵埃。贈君一籠牢收取。盛取東軒長老來。君過廬山。見圓通知慎禪師。出詩示之。師嘗與余通書。見之欣然。明日謂君：昨見黃州詩。通夕不寐。以一偈繼之。曰：東軒長老未相逢。卻見黃州一信通。何用揚眉資目擊。欲知千里事同風。吾野人不能數爲書。君爲我誦之而已。君旣至。未暇及此。客有自廬山至者。曰：慎師送客出門。還入丈室。燕坐而寂。君乃具道其事。余感之。作二絕。其一以答子瞻。其二以答慎也。

東軒正似虛空樣。何處人家籠解盛。縱使盛來無著處。雪堂自有老師兄。子瞻新築東坡雪堂。

檐頭挑得黃州籠。行過圓通一笑開。卻到山前人已寂。亦無一物可擔迴。

題方子明道人東窗

紙窗雲葉淨。香篆細煙青。客到催茶磨。泉聲響石餅。禪關敲每應。肝訣問無經。贈我刀圭藥。年來髮變星。

次前韻

閉門何所事。毛髮日青青。齒折登山屐。塵生貫酒餅。調心開具葉。救病讀難經。定起無人見。寒燈一點星。

迎寄王適

投竄千山恨不深。扁舟夏涉氣如蒸。重來疋馬君何事。歸去飛鴻我未能。養氣經年惟脫粟。讀書終夜有寒燈。安心且作衰慵伴。海底鯤魚會化鵬。

王度支陶挽詞二首

風蹟殊不昧。聲名豈偶然。長途催駉驥。爽氣激鷹鷂。意苴成遺恨。松楸卜遠年。淒涼故吏盡。誰泣蠶封前。

又

京塵昔傾蓋。江國見佳城。零落舊冠劍。艱難孝弟兄。存亡看世俗。意氣憶平生。曉鐸知人恨。幽音亦未平。

次韻陳師仲主簿見寄

朽株難刻畫。枯葉任凋零。舊友頻相問。村醪獨未醒。山牙收細茗。江實得流萍。頗似申屠子。都忘足被刑。

寄題江渙長官南園茅齋

白髮辛勤困小邦。塵勞坐使將心降。河陽罷後成南圃。彭澤歸來臥北窗。畦畔草生親荷鍤。牀頭酒熟自傾缸。因君遣我添歸興。舊有茅茨濯錦江。

詠霜二首

江南雪不到。霜露滿山村。紙被欺氈厚。茅簷笑瓦溫。何曾疑去淥。有意隔朝暾。底日身無事。高眠不出門。

又

清霜欺客病。乘夜逼窗扉。坐睡依爐暖。細聲聞葉飛。蕉絲空滿篋。砧杵旋催衣。起看庭前草。松筠未覺非。

次韻吳厚秀見寄

壯心摧折漸無餘。早歲爲文老不如。登木求魚知我拙。循窠覓兔笑君踈。清樽獨酌夜方半。白髮潛生歲欲除。久恐交親還往絕。牀頭猶喜數行書。

乾荔支

含露迎風惜不嘗。故將赤日損容光。紅消白瘦香猶在。想見當年十八娘。

次韻王適元日并示曹煥二首

井底屠酥浸舊方。牀頭冬釀壓瓊漿。舊來喜與門前客。終日同爲酒後狂。老大心情今已盡。塵埃鬚髮亦無光。江南留滯歸何日。萬里逢春思故鄉。

又

放逐三年未遣回。復驚爆竹起春雷。祈年粗有樽中桂。寄遠仍持嶺上梅。莫笑牛狸抵羊酪。漫將崖蜜代官醅。二君未肯嫌貧病。猶得衰顏一笑開。

寄梅仙觀楊智遠道士

道師近在真人峯。欲往見之路無從。去年許我入城市。塵埃暗天待不至。莫往莫來勞我心。道書寄我千黃金。鹽衣肉食思慮短。文字滿前看不見。口傳指授要有時。脫去羅網當見之。梅翁漢朝南昌尉。手摩龍鱗言世事。一朝拂衣去不還。身騎白麟翳紅鸞。我今雖復墮塵土。道師何不與我語。它年策足投名山。相逢拍手一破顏。

春雪

溫風吹破臘。留雪惱新春。信逐殘梅到。花從半夜勻。旋消微覆瓦。狂下亦欺人。壓竹時聞落。塊萱久未伸。山川濛不解。樓觀洗成新。擁褐僧方睡。開門客屢嚙。纍煙和歲稔。履迹笑吾貧。畦凍初生韭。泥融正賣薪。寒魚爭就汕。濁酒頗無巡。預喜田宜麥。繁飧餅餌頻。

贈石臺問長老二絕并敘

石臺長老問公本成都吳氏子。棄俗出家。手書法華經。字細如黑蟻。前後若一。將誦之萬遍。雖老而精。進不倦。脅不至席者。二十有三年。余來高安。以鄉人相好。蓋余懶而好睡。見之惕然自警。因贈之二小詩云。

法達曾經見老盧。半生勤苦一朝虛。心通口誦方無礙。笑把吳鸞細字書。蜀中藏經。往往有古仙人吳采鸞細書經卷。精妙可愛。

蒲團布衲一繩牀。心地虛明睡自亡。長伴空中月。天子東方行道到西方。

和毛國鎮白雲莊五詠

掬泉軒

卜築高深已有山。起居清潤可無泉。穿牆白練秋聲細。照屋清銅曉色鮮。已放魚鰕嫌跳擲。更除蘋藻任漪漣。只應明月中宵下。長共禪心相向圓。

平溪堂

清溪似與隱君謀。故入堂前漫不收。盥手從今休汲井。浮觴取意便臨流。花漂澗谷來應遠。石激琴箏久未休。莫把朱欄強圍遶。山家事。事要清幽。

眺遠臺

山似高人長遠人。不登高處見無因。築臺土石無多子。照眼峯巒得許新。陣馬奔騰時絕遠。風濤舒卷忽無垠。白雲自是逃名處。猶恐此中藏隱淪。

濯纓庵

臨池濯足惜泉清。纓上無塵且強名。橫木爲橋便獨往。結茅依鳧類天成。往還漸少人誰識。寢食無爲身轉輕。有似三吳朱處士。釣魚誰與話西征。

白雲莊偶題

歸去攜家住白雲。雲中猿鶴許同羣。陶公酒後詩偏好。踈傅金餘客屢醺。芒屨潛行逐漁釣。壺漿時出勞耕耘。卻看人世應微笑。未熟黃粱晝夢紛。

次韻王適落日江上二首

寒煙冪清江。漁唱扁舟上。江轉少人家。自此知安往。維舟倚叢薄。明月獨相向。欲曉醉應醒。還逐輕鷗颺。

又

稍息南市喧。初上東山月。潛魚忽驚踴。飢鴈時斷絕。落葉誤投籤。繁霜疑積雪。苦寒良難久。愛此元氣潔。

張秀才見寫陋容

潦倒形骸山上樗。每經風雨輒凋踈。勞君爲寫支離狀。異日長看老病初。落筆縱橫中自喜。賦形深穩妙無餘。偶然掛壁低頭笑。俱幻何妨彼亦如。

同王適曹煥遊清居院步還所居

身爲江城吏。心似野田叟。尋僧忽忘歸。飽食莫攜手。畏人久成性。路邊古城後。茅茨遠相望。誰犬亦時有。人還市井罷。日落狐兔走。迴風吹橫煙。燒火卷林藪。草深徑漸惡。荆棘時掛肘。褰裳涉沮洳。斜絕汗池口。

投荒分岑寂。欹側吾自取。二君獨何爲。經歲坐相守。遊從乏車騎。飲食厭葢韭。周旋未忍棄。辛苦亦何負。歸來倚南窗。試挹樽中酒。笑問黃泥行。此味還同否。子瞻謫居齊安。自臨臯亭遊東坡路過黃泥坂作黃泥坂詞。二君皆新自齊安來。故云。

次韻王適春雨

久遭客禁往還稀。風雨蕭條只自知。春色有情猶入眼。客愁無賴巧侵眉。山僧寄語收茶日。野老留人供社時。久住不須嫌寂寞。此間偏與拙相宜。

和子瞻蜜酒歌

蜂王舉家千萬口。黃蠟爲糧蜜爲酒。口銜澗水拾花鬚。沮洳滿房何不有。山中醉飽誰得知。割脾分蜜曾無遺。調和知與酒同法。試投麩蘖真相宜。城中禁酒如禁盜。三百青銅愁杜老。先生年來無俸錢。一斗徑須囊一倒。舖糟不聽漁父言。煉蜜深愧仙人傳。掉頭不問辟穀藥。忍飢不如長醉眠。

次韻講律李司理憲見贈

強將羔鴈聘黃晞。破褐疎巾倚夕暉。禮律縱橫開卷盡。蠶鹽冷落待賢非。日高几案弦歌罷。夜永窗扉燈火微。猶喜江邊莫春近。舞雩風雨得同歸。

次韻王適遊陳氏園

宿雨晴來春已晚。衆花飄盡野猶香。舞雩便可同沂上。飲禊何奏似洛陽。新圃近聞穿沼闢。漲江初喜放舟長。年來簿領縈人甚。何計相隨入醉鄉。

答孔平仲二偈

熟睡將經作枕頭。君家事業太悠悠。要須睡著元非睡。未可昏昏便爾休。
龜毛兔角號空虛。既被無收豈是無。自有真無遍諸有。燈光何礙也嫌渠。

次韻柳真公閑居春日

春寒漸欲減衣綿。雨勢冥冥水拍天。一局無言消日永。新詩得意許人傳。
惜花田地應慵掃。護筍藩籬可細編。好事報君知我喜。同官欲到得閑眠。

次韻王適東軒卽事三首

新竹依墻未出尋。墻東桃李卻成林。池塘草長初饒夢。村落鷺啼恰稱心。
江滿船頭朝欲轉。泥融屐齒莫尤深。閉門憐子成書癖。試買村醪相伴斟。

眼看東隣五畝花。茅簷竹戶野人家。過墻每欲隨飛蝶。歸舍誰憐已暮鴉。
幽客偶來成晚飯。野僧何日寄新茶。三年氣味長如此。歸計遲遲也自嘉。

北園春草徑微微。未用頻教翦棘茨。蜂陣紛紛初養蜜。鷺巢淺淺欲生兒。
客情流水兼山遠。歸夢遊絲向日遲。懶病相將渾欲慣。賴君索我強裁詩。

送李憲司理還新喻

采芹芹已老。浴沂沂尙寒。蒯緱長嘆息。首肯正闌干。黃卷忘憂易。青衫行路難。
歸耕未有計。且復調閑官。

問黃蘗長老疾

四大俱非五蘊空。身心河岳盡消鎔。病根何處容他住。日夜還將藥石攻。

復次煙字韻答黃大臨庭堅見寄二首

水竹遮藏自一川。日高茅屋始炊煙。犬牙舂米新秋後。麥粒蒸茶欲社天。冠蓋只今成棄物。衫松它日記栽年。定應笑我勞生在。卯睡聞呼衣爲顛。十載懷思寤寐間。新詩態度比雲煙。清風吹我無千里。明月隨人共一天。歸去林泉應避暑。北征道路恐經年。與君共愧知時鶴。養子先依黑柏顛。

次韻子瞻臨臯新葺南堂五絕

江聲六月撼長堤。雪嶺千重過屋西。一葉軒昂方斷渡。南堂蕭散夢寒溪。旅食三年已是家。堂成非陋亦非華。何方道士知人意。授與爐中一粒砂。北牖清風正滿床。東坡野菜漫充腸。華池自有醍醐味。丈室仍聞簷蔔香。隣人漸熟容賒酒。故客親留爲種蔬。住穩不論歸有日。船通何患出無車。客去知公醉欲眠。酒醒寒月墮江煙。床頭復有三升蜜。貧困相資恐是天。

次韻王適大水

高安昔到歲方閏。大水初去城如墟。危譙墮地瓦破裂。長橋斷纜船逃逋。漂浮隙穴亂羣蟻。奔走沙礫摧嘉蔬。里閭破散兵火後。飲食弊陋魚鰕餘。投荒豈復有便地。遇災祗復傷羸軀。人言西有蛟蜃穴。閏年每與風雷俱。漫溝溢壑恣游蕩。傾崖拔木曾須臾。雞豚浪走不復保。老稚裸泣空長吁。滯留再與茲水會。淪胥未哂斯民愚。人生所遇偶然耳。得失何用分錙銖。

贈三局能師二絕

得失從來似偶然。因師聊復問行年。此生竟墮陰陽數。方信修行力未全。
旅食江干秋復春。歸耕未遂不勝貧。憑師細考何年月。可買山田養病身。

臨川陳憲大夫挽詞二首

一時冠蓋盛臨川。直亮推公益友先。淡泊朱絲初少味。蕭疎翠竹久彌鮮。
崎嶇處世曾何病。奔走成功亦偶然。天理踈更終不失。雍雍今見子孫賢。

五月扁舟憶過門。哀憐逐客爲招魂。開樽不惜清泉絮。揮汗相看白雨翻。
病起清言驚苦瘦。歸休尺牘尙相存。秋風灑涕松楸外。談笑猶疑對竹軒。

公家有竹軒。輒嘗賦詩。

次韻知郡賈蕃大夫思歸

江城漂泊最多時。邂逅誰令長者期。得坎浮槎應有命。投林驚鵲且安枝。
何年笑語還留客。終日勤勞數問兒。鈴閣清虛非此比。秋風歸興恐非宜。

久不作詩呈王適

憐君多病仍經暑。笑我微官長坐曹。落日東軒談不足。秋風北棹意空勞。
懶將詞賦占鶚臆。頻夢江湖把蟹螯。筆硯生塵空度日。他年何用繼離騷。

喜王鞏承事北歸

同罪南遷驚最遠。乘流北下喜先歸。謂言一笑秋風後。卻顧千山驛路非。
嶺外雲煙隨夢遠。江邊魚蟹爲

人肥。還家嫁女都無事。臥讀詩書晝掩扉。

予初到筠卽於酒務庭中種竹四叢。杉二本。及今三年。二物皆茂。秋八月洗竹。培杉。偶賦短篇呈同官。

種竹叢。杉出簷。三年慰我病厭厭。翦除亂葉風初好。封植孤根筍自添。高節不知塵土辱。堅姿試待雪霜霑。屬君留取障斜日。仍記當年此滯淹。

和王鞏見寄三首

南還春及秋。江湖未云半。逮此歸路長。始悟行日遠。幽憂脫沈痼。清夢驚婉婉。行行逢故人。笑語雜悲泣。

又

江秋北風多。歸帆未應駛。天寒鴈南向。家書空滿紙。契闊幸安平。婚嫁須纓珥。交遊何爲者。空復念君至。

又

折葉每安心。連環非所計。感君扁舟返。念我一廛廢。懷思樂全老。疇昔忘言契。丹砂儻已成。白首願終惠。

復次韻

滕王閣在誰攜手。徐孺湖寬可放情。楚客解書南國恨。秦箏助發上林鶯。繫匏獨負杯中物。擁鼻知逢洛下生。問得長鬚添夢想。蓬窗燈火達天明。近遣僕至鍾陵。還言定國與黃君魯直會於舟中。燈火終夜而去。

孔毅父封君挽詞二首

交契良人厚。家封季婦賢。詩書中有助。蘋藻歲無愆。象服期它日。恩封屬此年。神傷自不覺。弔客問濟然。

又

別日笑言重。歸來藥餌憂。鐘歌掩不試。其葉亂誰收。恨極囊封在。情多壠水稠。埋文應自作。一一記微猷。

上高息軒起亭二絕

山下清谿谿上市。谿光山色映人煙。幽亭正在人聲裏。長與谿山共寂然。

溪父起收罾下鯉。山翁起賣焙中茶。長官亦與人俱起。笑擁黃紬放早衙。

九月十一日書事

東墻瘦菊早開花。九日金鈿已自嘉。黍麥候遲初響鑿。米鹽法細未還家。潑醅昨夜驚泉涌。洗盞今晨聽婦誇。歸採茱萸重一醉。不須怪問日時差。

和王適寒夜讀書

久從市井役。百事廢不理。感君讀書篇。惜此寒夜晷。殷勤附燈燭。黽勉就圖史。逡巡揖虞夏。汗漫馳劉李。斯文家舊物。早歲夙從事。一從慕羶腥。中棄如弊屣。今夕亦何夕。忽如舊遊至。終篇再三歎。推枕不成寐。人生無百年。所欲知有幾。懸知未必得。奔走若趨市。微言寄翰墨。開卷入心耳。胡爲棄不收。所逐在難覩。

和王適新葺小室

向日堂東一室存。竹爲窗壁席爲門。心如白月光長照。氣結丹砂體自溫。飯軟莫嫌紅米賤。酒香故取潑醅渾。它年一笑同誰說。伴我三年江上村。

病中賈大夫相訪因遊中宮僧舍二首

江城寒氣入肌膚。得告歸來強自扶。五馬獨能尋杜老。一床深愧致文殊。體虛正覺身如幻。談劇能令病自無。明日出門還擾擾。年來真畏酒家壺。

東隣脩竹野僧家。亂柳枯桑一徑斜。逐客慣曾迂短策。使君何事駐高牙。蕭條已似連村塢。邂逅應容設晚茶。慙愧病夫無氣力。隔牆空聽吏兵譁。

和王適炙背讀書

少年讀書處。寒夜令無火。老來百事慵。炙背但空坐。眼昏愁細書。把卷惟恐臥。寒衣補故褐。家釀熟新糯。微微窗影斜。曖曖雲陰過。昏然偶成寐。鼻息已無奈。兒童更笑呼。書冊正前墮。衰懶今自由。不復問冬課。

同王適賦雪

北風吹雨雨不斷。遍滿虛空作飛霰。紙窗獨臥不成眠。茅屋無聲時一泣。烏鳥錯莫寒未起。庭戶空明夜驚旦。重樓複閣爛生光。絕澗連山漫不見。夾砌雙杉洗更碧。滿田百草埋應爛。城中閉戶無履迹。市上孤堙數晨纓。細排玉籍短垂簷。暗結輕冰時入研。撥灰有客顧樽俎。迹兔何人試鷹犬。未容行役掃車轂。應有老農歌麥飯。一來江城若俄頃。四見白花飛面旋。坐看酒甕誰敢嘗。歸踏冰泥屢成濺。年來橋板斷不屬。莫出肩輿足憂患。到家昏黑空自笑。憇婦勤勞每長歎。牀頭有酒未用沽。囊裏無錢不勞算。更令雪片大如手。終勝溪瘴長熏眼。謁告猶能不出門。典衣共子成高讖。

欒城集卷第十三

詩八十六首

除夜

老去不自覺。歲除空一驚。深知無得喪。久已罷經營。黃卷譏前失。清樽借後生。何年遂踈懶。伏臘任躬耕。

種蘭

蘭年幽谷無人識。客種東軒遺我香。知有清芬能解穢。更憐細葉巧凌霜。根便密石秋芳早。叢倚脩筠午蔭涼。欲遣蘼蕪共堂下。眼前長見楚詞章。

上元夜

新春收積雨。明月澹微雲。照水踈燈出。因風遠樂聞。天涯仍有節。人事竟何分。賣酒真拘束。何時一醉醺。

次韻王適元夜二首

燈光欲凝不驚風。月色初晴若發蒙。羈客不眠詩未就。遊人半醉夜方中。荒城熠燿相明滅。野水芙蓉亂白紅。知欲訪僧同寂寂。應憐病懶畏熅熅。

宿雨初乾試火城。端居無計半遊行。厭看門外繁星動。想見僧窗一點明。老罷逢春無樂事。夢回孤枕有鄉情。重因佳句思樊口。一紙家書百鎰輕。

王子立與遲等遊陳家園橋敗幾不成行晚酒務往見之明日雨作偶爾成詠

桃李城東近不遙。偶聞花發喜相邀。斷橋似欲妨佳思。好雨猶能借此朝。隨分開樽依綠草。偶然信馬及餘瓢。重來莫道無閑暇。紫燕黃鸝日漸嬌。

幽蘭花二絕

李徑桃蹊次第開。穠香百和襲人來。春風欲擅秋風巧。催出幽蘭繼落梅。珍重幽蘭開一枝。清香耿耿聽猶疑。定應欲較香高下。故取羣芳競發時。

胡長史祠堂

白首青衫仍隱居。晚拋環堵就安輿。生芻忽改蒸嘗地。函丈空悲講解餘。弟子瑛璠相照耀。兒孫松桂共扶疎。我來恨不瞻遺老。空怪鄉鄰盡讀書。

孫賓叟道人

萬里飄然不繫舟。酒壚一笑便相投。千金不換金丹訣。何事惟須一布裘。

新橋

六月長橋斷不收。朱欄初喜映春流。虹腰宛轉三百尺。鯨背參差十五舟。入市樵蘇看絡繹。歸家鹽酪免遲留。病夫最與民同喜。卯酉忽忽無復憂。

曾子宣郡太挽詞二首

族大徽音遠。年高福祚多。生兒盡龍虎。封國裂山河。象服驚初揜。理文信不磨。送車江郭滿。咽絕聽哀歌。

又

安輿遍西北。丹旄歷江湖。存沒終無憾。哀榮兩得俱。新封馬鬣。餘福薦浮圖。家法蘋蘩在。空堂始一虞。
曾子固舍人挽詞

少年漂泊馬光祿。末路騫騰朱會稽。儒術遠追齊稷下。文詞近比漢京西。平生碑版無容繼。此日銘詩誰
爲題。試數廬陵門下士。十年零落曉星低。

次韻王適一百五日太平寺看花二絕

遍入僧房花照眼。細尋芳徑蝶隨行。歸時不怕江波晚。新有橋虹水上橫。
小檻明窗曾不住。閑花芳草遣誰栽。但須匹馬尋幽勝。攜取清樽到處開。

又次韻遊小雲居

溪上浮花片片輕。泝流登岸得山行。僧房幽絕雲居小。春日陰晴野色明。永遠林棲真有道。溷沮耕養亦
忘情。此身此意何年遂。空使常談笑老生。

次韻秦觀梅花

病夫毛骨日凋槁。愁見米鹽惟醉倒。忽傳騷客賦寒梅。感物傷春同懊惱。江邊不識朔風勁。牆頭亦有南
枝早。未開素質夜先明。半落清香春更好。鄰家小婦學閑媚。靚粧惟有長眉掃。孤芳已與飛霰競。結子仍
先百花老。苦遭橫笛亂飛英。不見遊人醉芳草。可憐物性空自知。羞作繁華助芒昊。

復次前韻答潛師

憐君古木依巖槁。江西飲盡須彌倒。野花幽草亦何爲。嶮韻高篇空自惱。萬點浮溪輒長歎。一枝過嶺仍

誇早拾香不忍遊塵汗。嚼蘂更憐真味好。道人遇物心有得。尾竹相敲緣自掃。誰知真妄了不妨。令我至今思璉老。妙明精覺昔未識。但向閉窗看詩草。浮雲時起烏四飛。畢竟安能亂清昊。

景福順老夜坐道古人搐鼻語

中年聞道覺前非。邂逅仍逢老順師。搐鼻徑參真面目。掉頭不受別鉗槌。枯藤破衲公何事。白酒青鹽我是誰。慚愧東軒殘月上。一盃甘露滑如飴。

盡枕屏

繩床竹簟曲屏風。野水遙山霧雨濛。長有灘頭釣魚叟。伴人閑臥寂寥中。

次韻王適留別

遠謫勞君兩度行。復將文字試平衡。干時豈爲斗升祿。聞道應忘寵辱驚。未了新書誰與讀。重留佳句不勝情。決科事畢知君喜。俗學消磨意自清。

次韻子瞻特來高安相別先寄遲适遠卻寄邁迨過遯

老兄騎驟日百里。據鞍作詩若飜水。忽吟春草思惠連。因之亦夢添丁子。羣兒盡長堪一笑。老馬臥餐何日起。聞兄盡室皆舊人。見面未曾惟遜耳。遲年最長二十六。已能幹父窮愁裏。豫兒揚眉稍剛勁。黨子溫純無慍喜。我兄憔悴我亦窮。門戶久長真待爾。但令戢戢見頭角。飢倒囊空定何恥。家藏萬卷須盡讀。此外一簪無所恃。船中未用廢詩書。閉窗莫看江山美。

次韻子瞻端午日與遲适遠三子出遊

人生逾四十。朝日已過午。一違少壯樂。日迫老病苦。丹心變爲灰。白髮粲可數。惟當理鋤耰。教子藝稷黍。誰令觸網羅。展轉在荆楚。平生手足親。但作十日語。朝游隔提攜。夜臥困烝煮。未歌唐棣詩。已治芻靈祖。亡生際風雲。富貴若騎虎。奈何貧賤中。所欲空齟齬。

●次韻子瞻留別三首

公來十日坐東軒。手自披雲出朝日。山川滿目竟何有。波浪翻天同一溼。諸門迭出驚異狀。間道懷歸終舊壁。此行千里隔江河。何人更問維摩疾。

野人性似修行僧。長願幽居近林麓。南遷無計脫絳組。西歸誰爲栽松竹。頭上白雲卽飛蓋。耳畔清泉當鳴玉。洛川猶是冠蓋林。更願高飛逐黃鵠。

東西南北無住身。竭末封胡四男子。彫鏤不遺治章句。爛漫先令飽文字。踈慵嗟我厲之人。生子夜中唯恐似。傳家粗足不願餘。同駕柴車還我里。

次韻子瞻行至奉新見寄

四年候公書。長視飛鴻背。十日留公談。欲作白蓮會。筠州無可語者。往還惟一二僧耳。匏瓜一遭繁。賣酒長不在。夜歸步江澗。明月照清瀨。心開忽自得。語異竟非背。音倍一樽談笑間。萬事寂寥外。欲同千里行。奈此一官礙。何年真耦耕。舉世無此大。

贈醫僧鑒清二絕

肘後醫方老吏精。鬚眉白盡氣彌清。只應救病能無病。豈是平生學養生。

門人久作開堂老。庭檜看成合抱圍。它日浴堂歸洗背。回頭還解放光輝。

贈醫僧善正

老怯江邊瘴癘鄉。城東時喜到公房。歷言五藏如經眼。欲去三彭自有方。身厭遠遊安靖默。術因多病更深長。時時爲我談尊宿。曾入南公古道場。

食菱

野沼漲清泉。烏菱不直錢。蟹肥螯正滿。石破髓初堅。節物秋風早。樽罍夜月偏。令人思淮上。小舫藕如椽。留滯高安四年有餘。忽得信聞。當除官真揚間。偶成小詩書于屋壁。

數間茅屋久蹉跎。四見秋風入薜蘿。北棹偶然追鴈羽。南公誰復伴漁簑。三年賈傅驚吾老。九歲劉郎愧爾多。此去仍家江海上。不妨一葉弄清波。

洪休上人少年讀書以多病出家居泐潭爲馬祖脩塔以三絕句來謁答一首
早除卽將少年狂。祖塔結緣歸故鄉。習氣未消餘業在。逢人依舊琢詩章。

勉子瞻失幹子二首

人生本無有。衆幼妄聚耳。手足非吾親。何況妻與子。偶來似可樂。強作室家喜。忽去未免悲。欣成要矜毀。君家兩歲兒。畢竟何自始。變化違初心。涕泗劇翻水。吾儕近始悟。造物聊復試。道力竟未完。聰明信難恃。

又

破甑不復顧。彼無愛甑心。棄璧負赤子。始驗愛子深。誠知均非我。胡爲有不能。一從三界遊。久被百物侵。

朝與喜怒交。莫與寵辱臨。四物皆不勝。生死獨未曾。不經大火燒。熟爲真黃金。棄置父子思。長住旃檀林。偶遊大愚見餘杭。明雅照師舊識。子瞻能言西湖舊遊。將行賦詩送之。

五年賣鹽酒。勝事不復知。城東古道場。蕭瑟寒松姿。出遊誠偶爾。相逢亦不期。西軒吳越僧。弛擔未多時。言住西湖中。巖谷涵清漪。卻背閭井喧。曲盡水石奇。昔年蘇夫子。杖屨無不之。三百六十寺。處處題清詩。麋鹿盡相識。況乃比丘師。辯淨二老人。精明吐琉璃。笑言每忘去。蒲褐相依隨。門人几杖立。往往聞談詞。風雲一解散。變化何不爲。辯入三昧火。卯塔長松欹。淨老不復出。塵尾清風施。蘇公得罪去。布衣拂霜髭。空存壁間字。鬱屈蟠蛟螭。知我卽兄弟。微官此棲遲。問何久自苦。五斗寧免飢。俯首笑不答。且爾聊敖嬉。我兄次公狂。我復長康癡。反復自爲計。定知山中宜。但欲畢昏娶。每爲故人疑。君歸漫洒掃。野鶴非長羈。

將移績溪令

坐看酒壚今五年。恩移巖邑稍西還。它年貧富隨天與。何日身心聽我閑。山栗似奉應自飽。蜂糖如土不須慳。仲卿意向桐鄉好。身後丞嘗亦此間。

約洞山文老夜話

山中十月定多寒。纔過開爐便出山。堂衆久參緣自熟。郡人迎請怪忙還。問公勝法須時見。要我清談有夜閑。今夕客房應不睡。欲隨明月到林間。

將之績溪夢中賦泊舟野步

扁舟逢野岸。試出步崇岡。山轉得幽谷。人家餘夕陽。被畦多綠茹。堆屋剩黃粱。深羨安居樂。誰今志四方。

謝洞山石臺遠來訪別

竄逐深山無友朋。往還但有兩三僧。共遊渤海無邊處。扶出須彌最上層。未盡俗緣終引去。稍暗真際自虛澄。坐令顛老時奔走。竊比韓公愧未能。

贈方子明道人

水銀成銀利十倍。丹砂爲金世無對。此人斬術不肯傳。闔戶泥墻畏天戒。今子何爲與我言。人生貧富寧非天。鉗鎚橐籥枉心力。蘸鹽布褐隨因緣。我來江西晚聞道。一言契我心所好。廓然正大若虛空。平生伎倆都除掃。子言舊事淨慈師。未斷有爲非淨慈。此術要將救飢耳。人人有命何憂飢。

回寄聖壽聽老

五年依止白蓮社。百度追尋丈室遊。睡待磨茶長展轉。病蒙煎藥久遲留。贊公夜宿詩仍作。巽老堂成記許求。回首萬緣俱一夢。故應此物未沈浮。

乘小舟出筠江二首

短舫漂浮真似葉。小蓬低淺僅如巢。幽吟但覺山川走。因睡不知風雨交。紅飯白醪供醉飽。青蓑黃菊可纏包。一竿鶴髮它年事。萬斛龍驤任見嘲。官遊欲學林間鷓。每到新年旋疊巢。蓬弱龍船聊似屋。漁樵把筆便成交。不妨袖裏攜詩卷。尙可床頭置藥包。古史欲成身愈困。客來未免答譏嘲。

寄題孔氏顏樂亭

顏巷久已空。顏井固不遷。荆榛翳蔓草。中有百尺泉。誰復飲此水。裹飯耕廢田。有賢孔氏孫。芟夷發清源。廢床見硬刻。古甃昏苔痕。引瓶注瓢樽。千歲忽復然。嗟哉古君子。至此良獨難。口腹不擇味。四體不擇安。遇物一皆可。孰爲我憂患。阮生未忘酒。嵇生未忘鍛。欲忘富貴樂。託物僅自完。無託中自得。嗟哉彼誠賢。

徐孺亭

徐君鬱鬱澗底松。陳君落落堂上棟。澗深松茂不遭伐。堂毀棟折傷其躬。二人出處勢不合。譬如日月行西東。朝爲賓主兩相好。一榻挂壁吹清風。人生偶合何必同。一朝利盡更相攻。先號後笑不須怪。外物未可凝心胸。比干諫死微子去。自古不辨汗與隆。我來故國空歎息。城東舊宅生茅蓬。平湖十頃照清廟。獨畫徐子遺陳公。二人皆合配社稷。胡不相對祠堂中。

滕王閣

客從筠溪來。欵仄困一葉。忽聞章貢餘。滉蕩天水接。風霜出州渚。草木見毫末。勢奔西山浮。聲動古城巖。樓觀卻相倚。山川互開闔。心驚魚龍會。目送鳧雁滅。遙瞻客帆久。更悟江流闊。使君東魯儒。府有徐孺榻。高談對賓旅。確論精到骨。餘思屬湖山。登臨寄遺堞。驕王應笑滕。狂客亦憐勃。萬錢罄一飯。千金賣豐碣。豪風相凌蕩。俳語終倉猝。歐陽文忠公嘗云王勃記文似俳而唐人貴之如此何也事往空長江。人來逐飛楫。短篇竟蕪陋。絕景費彈壓。但當倒罌瓶。一醉付江月。

次韻道潛南康見寄

一葉追隨魚與龍。紅粳白酒幸年豐。也知山色遙相待。苦畏君詩欲見攻。乘興風帆終日去。尋幽蠟屐及

春同請君先入開先寺待濯清溪看玉虹。

車浮井敘

結木如巢承之以簣。沈之水中以浮。識其處。方舟載兩輪。挽而出之。漁人謂之車浮。此詩所謂汕也。與遲适同作車浮詩。

寒魚得汕便爲家。兩兩方舟載小車。謀食旋遭芳餌誤。求安仍值積薪遮。情存未免人先得。欲盡要令物莫加。身似虛舟任千里。世間何處有罾罟。

題都昌清隱禪院

北風江上落潮痕。恨不乘舟便到門。樓觀飛翔山斷際。松筠陰翳水來源。升堂猿鳥晨窺坐。乞食帆檣莫遶村。誰道谿巖許深處。一番行草認元昆。長老惟湜曾識子瞻。兄於淨因有簡刻石。

送章戶掾赴澧州

江船不厭窄。船窄始宜行。風裏長先過。灘頭一倍輕。迎親無惡處。祿養勝躬耕。澧上春蘭早。猶堪弔屈生。除夜泊彭蠡湖遇大風雪

莫發鄴陽市。曉榜彭蠡口。微風吹人衣。霧遶廬山首。舟人釋篙笑。此是風伯侯。杙舟未及深。飛沙忽狂走。晴空轉車轂。淥水起岡阜。衆帆落高張。斷纜已不救。我舟舊如山。此日亦何有。老心畏波瀾。歸臥塞牕牖。土囊一已從。萬竅無不奏。初疑丘山裂。復恐蛟蜃鬪。鼓鍾相轟戾。戈甲互磨叩。雲霓黑旗展。林木萬弩發。曳柴眩人心。振旅擁軍後。或爲羈雌吟。或作倉兕吼。衆音雜呼吸。異出殊圈臼。中霄變凝冽。飛霰集飛糝。

蕭。蟻。蓬。響。乾。晃。蕩。牕。光。透。堅。凝。忽。成。積。澎。湃。殊。未。究。紵。縞。鋪。前。洲。瓊。瑰。琢。遙。岫。山。川。莽。同。色。高。下。齊。一。覆。
淵。深。竄。魚。鼈。野。曠。絕。鳴。雉。孤。舟。四。鄰。斷。餘。食。數。升。糗。寒。蠶。僅。盈。盎。臘。肉。不。滿。豆。弊。裘。擁。衾。眠。微。火。拾。薪。構。
可。憐。道。路。窮。坐。使。妻。子。詬。幽。奇。雖。云。極。岑。寂。頃。未。覩。一。年。行。將。除。茲。歲。真。浪。受。朝。來。陰。雲。剝。林。表。紅。日。漏。
風。稜。恬。已。收。江。練。平。不。縐。兩。槳。舞。夷。猶。連。峯。吐。奇。秀。同。行。賀。安。穩。所。識。問。羸。瘦。驚。餘。空。自。憐。夢。覺。定。真。否。
春。陽。著。城。邑。屋。瓦。凍。初。溜。艱。難。當。有。償。爛。熯。醉。醇。酎。

正。旦。夜。夢。李。士。寧。過。我。談。說。神。怪。久。之。草。草。爲。具。仍。以。一。小。詩。贈。之。
先。生。惠。然。肯。見。客。旋。買。雞。豚。旋。烹。炙。人。間。飲。食。未。須。嫌。歸。去。蓬。壺。卻。無。喫。

舟中風雪五絕

北。風。吹。雪。密。還。稀。雪。勢。漸。多。風。力。微。孤。棹。獨。依。銀。色。界。山。川。絕。路。欲。安。歸。
曉。風。起。浪。作。銀。山。夜。雪。爭。妍。布。玉。田。風。力。漸。衰。波。更。惡。通。宵。憾。我。正。安。眠。
擁。纜。埋。蓬。不。見。船。船。窗。一。點。莫。燈。然。幽。人。永。夜。歌。黃。竹。賴。有。丹。砂。煖。寸。田。
濁。醪。餽。飯。不。成。歡。白。浪。飛。花。雪。作。團。窗。外。時。來。一。雙。鴨。沈。浮。笑。我。不。禁。寒。
江。面。澄。清。雪。未。融。扁。舟。蕩。漾。水。無。蹤。篙。師。不。用。匆。匆。去。遍。看。盧。山。羣。玉。峯。

題南康太守宅五老亭

五。老。高。閑。不。入。城。開。軒。肯。就。使。君。迎。坐。中。莫。著。閑。賓。客。物。外。新。成。六。弟。兄。雲。氣。飄。浮。衣。袂。舉。泉。流。灑。落。佩。
環。聲。岌。然。終。日。俱。無。語。靜。壽。相。看。意。自。明。

書廬山劉顥宮苑屋壁三絕

山西舊將本書生。歸老巖間未厭兵。臥聞布水中宵起。錯認邊風萬馬聲。
雕弓掛壁恥言勳。出入樵漁便作羣。五馬親來看射虎。不愁醉尉惱將軍。
肩輿已棄躡風騅。舊物仍存楊柳枝。一曲清歌尤近好。五陵故態未全衰。

再遊廬山三首

當年五月訪廬山。山翠溪聲寢食間。藤杖復隨春色到。寒泉頓與客心閑。
巖頭懸布煎茶足。峽口驚雷泛葉慳。待得前村新雨遍。扁舟應復好風還。

憶自栖賢夜入城。道邊蘭若一僧迎。偶然不到終遺恨。特地來遊慰昔情。
海外聲聞安至此。堂中天鼓爲誰鳴。匆匆復向深山去。一盞醍醐飽粟豐。
羅漢院有新羅羅漢堂中法鼓特大

此山巖谷不知重。赤眼浮圖自一峯。芒屨隨僧踐黃葉。曉光消雪墮長松。
石泉試飲先師錫。午飯歸尋下寺鐘。勝處轉多渾恐忘。出山惟見白雲濃。

汲陽阻風

鍾陵距池陽。相望千里內。江神欺我貧。屢作風雨礙。欲投皖公宿。三日逢一噫。
孤蓬面空山。朝食淡無菜。白醪幸餘瀝。黃卷漫相對。飢吟非吾病。疾走老所戒。焦先近不遠。
蝸舍聞尙在。區區問養生。借我一帆快。

張嘉祐

道人何爲者。陽狂時放言。寶塔昔所構。鐵券今尙存。
此張所言其漫浪難究悉。孰知彼根源。草庵劣容膝。

俯仰拳肩跟。無食輒行乞。一飽常閉門。爾來二十年。未嘗變寒溫。嗟哉豈徒然。此意未易言。偶來一笑喜。但恐笑我昏。

效韋蘇州調嘯詞二首

漁父漁父。水上微風細雨。青篲黃蓑裳衣。紅酒白魚莫歸。莫歸莫歸。莫歸。長笛一聲何處。歸鴈歸鴈。飲啄江南南岸。將飛卻下盤柏。塞北春來苦寒。苦寒苦寒。苦寒。藻荇欲生且住。

至池州贈陳鼎秀才

淮陽學舍舊相依。常誦曹溪第一機。卻到江西心有悟。回看過去事皆非。孤舟遠適身如寄。二頃躬耕道自肥。欲看齊山君去否。閑中徒侶近來稀。

次韻遲初入宣河

遠客安長道。低蓬稱小溪。雲添溼帆雨。舟滯沒篙泥。草綠耕牛健。村深候鳥啼。陶翁方作令。歸去未成題。

次韻侯宣州利建招致政汪大夫

社甕壺漿接四鄰。肩輿拄杖試紅塵。慣眠林下三竿日。來看城中萬井春。世上升沈無限事。樽前強健不費身。經過已足知公政。長見車中有老人。

次韻侯宣城疊嶂樓雙溪閣長篇

作官如負擔。一負當且弛。不知息肩處。妄問道遠邇。我乘章江流。卻入宛溪水。捨舟陟崔嵬。行路極旬已。名都便欲道。佳處賴公指。仰攀疊嶂高。俯閱雙溪美。不悟身乘空。但覺風吹耳。雲煙變遙壑。歌吹聞近市。

倦遊得清曠。行役有新喜。公言頃榛穢。斬伐從我始。堰水種蒲蓮。開山蒔梅李。擁本待成陰。養花要食子。遺風楫桓謝。及老邀黃綺。邦人魚依蒲。食客我在沚。春陰迫寒食。謂我姑且止。嗟余去鄉國。屢把刀環視。感公鵠鷺情。憐我鳧鴨庫。異邦逢故人。寧復固辭理。高談雲漢上。爛醉笙歌裏。落日盡公歎。推挽未應起。

初到績溪眎事三日出城南謁二祠遊石照偶成四小詩呈諸同官

一首謁梓潼廟二首謁汪王廟三首四首游石照

行年五十治丘民。初學催科愧廟神。無恨青山不容隱。卻看黃卷自憐貧。雨餘嶺上雲披絮。石淺溪頭水蹙鱗。指點縣城如手大。門前五柳正搖春。

石門南出衆山巔。沃壤清溪自一川。老令舊諳田事樂。春耕正及雨晴天。可憐鞭撻終無補。早向叢祠乞有年。歸告仇梅省文字。麥苗含穗欲蠶眠。

行盡清溪到碧峯。陰崖翠壁盡杉松。故留石照邀行客。上徹青山最後重。雨開石照正新磨。鳥度猿攀野老過。忽見塵容應笑我。年來底事白鬚多。

縣中諸花多交代江君所栽牡丹已過芍藥方盛偶寄小詩

偶來山邑便成家。慚愧潘生滿縣花。想見清樽檻邊飲。尙留佳句壁間誇。根株未老年年好。艷色方穠日日加。聞道北遊無意味。春深河上足風沙。

楊主簿日本扇

扇從日本來。風非日本風。風非扇中出。問風本何從。風亦不自知。當復問大空。空若是風穴。既自與物同。同物起空性。是物非風宗。但執日本扇。風來自無窮。

次韻答人幽蘭

幽花耿耿意羞春。紉佩何人香滿身。一寸芳心須自保。長松百尺有爲薪。

次韻江法曹山間小酌

高情不奈簿書圍。行揖青山肯見隨。綠野逢花將盡日。清樽迨我正閑時。簷閒雙鷺欲生子。葉底新梅初滿枝。笑殺華陽窮縣令。床頭酒盡只嘔眉。

官舍小池有鸚鵡遺二小雛二首

半畝清池藻荇香。一雙鸚鵡競悠揚。來從碧澗巢安在。飛過重城母自將。野鳥似非官舍物。宰君昔是釣魚郎。直言愧比奇章者。得縣無心更激昂。

清池定誰主。鸚鵡自來馴。知我無傷意。憐渠解託身。橋陰棲息穩。島外往來頻。勿食遊魚子。從交長細鱗。

次韻答人見寄

對案青山雲氣騰。天將隙地養無能。牕扉迎暑梅將溜。虛市無人冷欲冰。寂默忘言慚社鷺。搔癢困睡比春鷹。深知大府容衰病。復值年來蠶麥登。

次韻答人檻竹

猗猗元自直。落落不須扶。密節風催展。清陰月共鋪。叢長傲霜雪。根瘦恥泥塗。更種愁無地。應須翦碧蘆。

此
页
空
白

欒城集卷第十四

詩八十五首

次韻王荅推官見寄

可憐衰病孰爲媒。私喜鄰邦得儁才。玉案愧無酬錦繡。木瓜卻用報瓊瑰。風流似欲傳諸謝。格律猶應學老梅。始信山川出才士。扁舟新自宛溪來。荅宜人也。

郭尉願惇夫以琳上人書詩爲示次韻

勉強冠裳四十餘。同官早歲亦山居。朝來過我三竿日。袖有幽僧數紙書。家住一廛何計反。官供五斛未應無。聞渠秋後來相訪。脫粟藜羹只自如。

次韻汪琛監簿見贈

連宵暑雨氣如秋。過客不來誰與遊。賴有澹臺肯相顧。坐令彭澤未能休。琴疎不辨彈新曲。學廢誰令致束脩。慚愧邑人憐病懶。共成清淨勸遲留。

周昉畫美人歌

深宮美人百不知。飲酒食肉事遊嬉。彈絲吹竹舞羅衣。曲終對鏡理髮眉。岌然高髻玉釵垂。雙鬢窈窕葉微。宛轉躑躅從嬰兒。倚楹俯檻皆有姿。擁扇執拂知從誰。瘦者飛燕肥玉妃。俯仰向背樂且悲。九重深遠安得窺。周生執筆心坐馳。流傳人間眩心脾。飛瓊小玉雲霧幃。長風吹開忽見之。夢魂清夜那復追。老

人衰朽百事非。展卷一笑亦胡爲。特付少年良所宜。

病中郭尉見訪

偶成三日寒兼熱。知是多聞力未全。卻問藥王求妙劑。慙非摩詰已虛圓。勞公強說脩行漸。顧我方爲病垢纏。應是床頭有新酒。欲邀佳客故留連。

病後

一經寒熱攻骸骨。正似兵戎過室廬。柱木支撐終未穩。筋皮收拾久猶踈。芭蕉張王要須朽。雲氣浮游畢竟虛。賴有衣中珠尚在。病中點檢亦如如。

復病三首

其一

病作日短至。病消秋氣初。山深足氛瘴。俗儉少肴蔬。藥亂曾何補。心安當自除。朝廷閱流落。已是脫遷居。

其二

寒作埋冰雪。熱攻投火湯。今生那有此。宿業未應亡。委順一無損。力爭徒自傷。頽然付一榻。是處得清涼。

其三

一病五十日。復爾當解官。不才歸亦樂。無食去猶難。黽勉人應笑。低徊已意闌。舊師摩詰老。把卷靜中看。

送琳長老還大明山

身老與世踈。但有世外緣。五年客江西。掃軌謝往還。依依二三老。示我馬祖禪。身心忽明曠。不受垢污纏。

偶成江東游。欲別空悽然。緣散衆亦去。飄若風中煙。高安三長老去之甚熟。別後文老去洞山。聰老與聖壽全老化去。華陽本荒邑。緇素明星懸。偶然得老尉。舊依育王山。璉公善知識。不見十九年。我昔未聞道。問以所入門。告我從信入。授我普眼篇。冉冉百尺松。起自一寸根。南歸髮盡白。尺書今始傳。不知鄰邑中。乃有門人賢。百里走相訪。觸熱汗雨翻。懷中出詩卷。清絕如斷蟬。我適病寒熱。氣力才緜緜。空齋默相向。欲語不能宣。永暇答佳意。歸錫鏘金環。空有維摩病。愧無維摩言。

病退

冷枕單衣小竹床。臥聞秋雨滴心涼。此間本淨何須洗。是病皆空豈有方。示疾維摩元自在。放身南嶽離思量。病根欲去真源在。昨夜夢遊何有鄉。

病後白髮

枯木自少葉。不堪經曉霜。病添衰髮白。梳落細絲長。筋力從凋朽。肝心罷激昂。勢如秋後雨。一度一淒涼。答琳長老寄幽蘭白朮黃精三本二絕

其一

谷深不見蘭生處。追逐微風偶得之。解脫清香本無染。更因一嗅識真知。

其二

老僧似識衆生病。久在山中養藥苗。白朮黃精遠相寄。知非象馬費柔調。

次韻侯宣城題疊嶂樓

小邑來時路。宣城最近隣。樓臺百年舊。花竹一番新。登覽春深日。凝思病後身。何時對樽酒。重爲洗埃塵。初聞得校書郎。示同官三絕。

其一

讀書猶記少年狂。萬卷縱橫曬腹囊。奔走半生頭欲白。今年始得校書郎。

其二

百家小邑萬重山。慙愧斯民愛長官。粳稻如雲梨棗熟。暫留聊復爲加飡。

其三

病後濁醪都少味。老來歡意苦無多。臨行寂寞空相對。不作新詩柰客何。

續溪二詠

豁然亭

南看城市北看山。每到令人意豁然。碧瓦千家新過雨。青松萬壑正生煙。經秋臥病聞斤響。此日登臨負酒舟。徑請諸君作佳句。壁間題我此詩先。

翠眉亭

誰安雙嶺曲彎彎。眉勢低臨戶牖間。斜擁千畦鋪灤水。稍分八字放遙山。愁霏宿雨峯巒溼。笑卷晴雲草木閑。忽憶故鄉銀色界。舉頭千里見蒼顏。

辭靈惠廟歸過新興院書其屋壁

來時稻葉針鋒細。去日黃花黍粒簞。久病終慙多廢政。豐年猶喜慰耕夫。青山片片添紅葉。淥水星星照白鬚。東觀校讎非老事。眼昏那復競鉛朱。

郭尉惠古鏡

凜如秋月照虛空。遇水留形處處同。一瞬自成千億月。精神依舊滿胸中。俗言以鏡予人。損己精神。故解之云。

歙縣歲寒堂

檻外甘棠錦繡屏。長松何者擅亭名。浮花過眼無多日。勁節凌寒盡此生。暗長茯苓根自大。旋收金粉氣尤清。長官不用求琴譜。但聽風聲作弄聲。

邵武游氏老人三清堂紫芝

黑龜赤鳳早逢師。白髮蒼顏老不衰。丹鼎一凡深自祕。紫芝三葉卻先知。煙薰晴日雲容薄。色凝秋霜玉性奇。何日刀圭救羸病。盡芟荆棘種交梨。

神宗皇帝挽詞三首

其一

稽古堯無作。勤邦禹有攻。政新天地力。事改漢唐風。禮樂寰中盛。梯航海外通。華封徒有誦。龍御忽乘空。

其二

承平終不處。付託重艱難。統接神孫正。人依聖母安。橋山封劍佩。原廟見衣冠。萬國纏哀處。高陽檜柏寒。

其三

取士忘踈賤。量書廢寢興。芻言本何益。玉殿最先登。日角依稀想。堯言涕泗稱。龍髯遠莫及。零淚凍成冰。舟過嚴陵灘。將謁祠登臺。舟人夜解及。明已遠至桐廬。望桐君山寺漂渺可愛。遂以小舟遊之作二

絕

其一

扁舟忽草出山來。慚愧嚴公舊釣臺。舟子未應知此恨。夢中飛楫定誰催。

其二

嚴公釣瀨不容看。猶喜桐君有故山。多病未須尋藥錄。從今學取衲僧閑。

沂潮二首

其一

潮來海若一長呼。潮去蕭條一吸餘。初見千艘委泥土。忽浮萬斛泝空虛。映山少避曾非久。借勢前行卻自如。天地尙遭人意料。乘時使氣定驚踈。

其二

正練縈回出海門。黃泥先變碧波渾。初來似欲傾滄海。正滿真能倒百源。流枻飛騰竟何在。扁舟睥睨久仍存。自慚不作山林計。來往終隨萬物奔。

贈王復處士

候潮門外王居士。平昔交遊遍海涯。本種杉松爲老計。晚將亭榭付隣家。爲生有道終安隱。好事來遊空

嘆嗟猶有東牟舊詩卷。忻然對客展龍蛇。王君舊有園亭。子瞻兄名之曰種德。其亭頃以貧故鬻之矣。

張惕山人卽昔所謂惠思師也。余舊識之於京師。忽來相訪。茫然不復省。徐自言其故。戲作二小詩。

贈之

昔日高僧今白衣。人生變化定難知。故人相見不相識。空怪解吟無本詩。
聽誦長江近章句。喜逢澄觀已冠巾。醉吟揮弄清湖水。誰信從前戒律人。

次韻子瞻送楊傑主客奉詔同高麗僧遊錢塘

人言長安遠如日。三韓住處朝日赤。飛帆走馬入齊梁。卻渡吳江食吳橘。玉門萬里唯言九。行人淚墮陽關酒。佛法西來到此閒。遍滿曾如屈伸手。出家王子身心虛。飄然渡海如過渠。遠來欲見傾盆雨。屬國眞逢戴角魚。至人無心亦無法。一物不見誰爲敵。東海東邊定有無。拍手笑作中朝客。

寄龍井辯才法師三絕并敘

轍自績溪蒙恩召還。將自宣城沿大江以歸。家兄子瞻以書告曰。不如道歛溪。過錢塘。一觀老兄遺迹。轍用其言。旣至吳中。迫於水涸。不能久留。十月八日。遊上天竺。子瞻昔與辯才師相好。今隔南山不得見。乃作一小詩以寄之。

我兄教我過東吳。遺墨山間無處無。忽報冬潮催出堰。俗緣深重道心蠹。
山色青冥葉未紅。湖光凝碧曉無風。行窮上下兩天竺。望斷南山龍井龍。
井水中藏東海魚。側盆翻雨洗凡夫。隔山欲共公相見。莫道從來一滴無。

元絳參政挽詞

吳越朝天功在民。當年卿相亦仁人。曾孫終與元豐政。故老猶知異代因。吏治清明開白日。文詞俊發吐青春。鄴都從_前堂中客。涕灑高原柏子新。

過王介同年墓

平生使氣坐生風。徐扣方知學有功。應奉讀書無復忘。虞翻忤物自甘窮。埋根射策久彌奮。投老爲邦悍莫攻。墳木未須驚已拱。少年我亦作衰翁。昔與中甫同登制科。僕年最少。今已老矣。

將遊金山寄元長老

龕砂施佛欣欣受。怪石供僧僧不嫌。空手遠來還要否。更無一物可增添。

元老見訪留坐具而去戲作一絕調之

石霜舊奪裴休笏。坐具只今君自留。留放書房還會否。受降曾不費戈矛。

元老和示小詩自謂非戰之罪復作一絕并坐具還之

請君卻領彌天具。不欲終收陷虎名。莫道昏沈非戰罪。何如不戰屈人兵。

子瞻與長老擇師相遇於竹西石塔之間屢以絕句贈之又留書邀轍同作遂以一絕繼之

遠老陶翁好弟兄。虎溪廬阜久逢迎。何須更要經平子。清議從來貴士衡。

高郵贈別杜介供奉

淮南魚米年年賤。直便歸休無俸錢。錦背圖書何益事。塵生弦筦正參禪。逢人未廢一樽酒。送客長隨千

里船。世上得如君自在。不須開府事開邊。歲先去年送家兄子瞻至高郵今年復留此相別。

答王定國問疾

五年竄南荒。頑質不伏病。吸清吐濁穢。氣練骨隨勁。澹然久忘歸。寂寂就遐屏。國恩念流落。牽挽昇隣境。葉舟泝長江。藤鞋過重嶺。峽深薦蘿惡。山峻崖石橫。恢台夏初發。氛霧秋愈盛。菘菹食有時。豚羔詎曾省。門開訟氓入。日晏鴛舌競。肝脾得寒熱。冰炭迫晨暝。俚醫固空踈。蠻覲刺蠶猛。老妻但坐哭。遺語未肯聽。長子亦在床。一臥昏不醒。思歸未可得。卽死付前定。如如性終在。冉冉歲將冷。筋骸稍輕安。冠服強披整。餘方厭苓朮。日食禁醪茗。髮衰亂隨櫛。骨瘦空看影。簿書勉復親。環玦非所請。馬老固伏櫪。槎流舊安井。凌兢就輕車。邂逅出脩綆。此生誠夢幻。俛仰成弔慶。故人枉新詩。萬里慰孤耿。賞音我非曠。斲鼻君真郢。南遷昔所同。臥疾今亦並。遠行信由天。未死庸非命。歸舟正飄兀。齋舍念清淨。作書附鴻翼。去路瞻斗柄。聞水漸安流。吳音未全正。一樽對清言。及此冬夜永。

和子瞻次孫覺諫韻題邵伯間上斗野亭見寄

扁舟未遽解。坐待兩閘平。濁水汙人思。野寺爲我清。昔遊有遺咏。枯墨存高莖。故人獨未來。一樽誰與傾。北風吹微雲。莫寒依月生。前望邦溝路。卻指鐵甕城。茅簷卜茲地。江水供晨烹。試問東坡翁。畢老幾此行。奔馳力不足。隱約性自明。早爲歸耕計。免慙老僧榮。僧榮斗野主人也。子瞻將卜居丹陽蒜山下。此亭正當歸路。故云爾。

次韻子瞻題泗州監倉東軒二首

局與嬾嬾渡浮梁。吏隱知君寄一倉。十里遊看飛阜蓋。小軒相對有壺漿。清宵往往投車轄。永日霏霏散

篆香留滯淮南久。仍樂莫年何意復爲郎。
萬斛塵飛日爲霾。無心退食自成齋。梅生紅粟初迎臘。魚躍銀刀正出淮。臥病空看帆度磧。誦詩猶記雪填塔。夾河南北俱形勝。且借高城作兩崖。

答顏復國博

歲晚河水留畫船。一軒脩竹喜蕭然。詩詞溫厚新成格。道論精微近入禪。病後不勝清醞釀。別時仍得舊書傳。欲成古史須咨考。陋巷何因接尺椽。

次韻王定民宣德

彭城寺壁看詩來。顏氏瓢樽偶共開。茅屋未完先鑿沼。竹林成後想宜梅。新詩妙絕難爲繼。高論微低得共陪。第一詞人生不識。茲行尙喜揖君才。

河冰

扁舟多艱虞。與我平日類。初乘滂洋流。旋涉凍淺地。日西陰風作。夜半流漸至。悄然孤寂枕。覺此凝冽氣。河聲噤不喧。燈花結復墜。忽來觸舟去。聲與裂帛似。平明發窗扉。吏卒疆未起。奔騰陣馬過。洶湧晴雲駛。紛紛散環玦。卷卷浮席被。匯流忽騰蹙。曲岸相撐抵。欹危起丘山。汗漫接州泚。連艘恣凌轡。千槳競紛委。剛強初悍頑。潰散終披靡。掃除就虛曠。沿沂弄清泚。我行無疾除。乘流得坎止。偶然迫還期。愧此墮十指。陰陽有定數。開塞亦常理。窮冬治舟行。嗟此豈天意。

復賦河冰四絕

客心凜凜怯寒冰。擁褐無言夜漏深。河伯似知歸意速。風號西北故相禁。
春來歸夢劇飛鳧。夜半流澌擁舳舻。似勝去年彭蠡口。雪封廬岳浪翻湖。
朝來縣令借長船。仍遣千夫上下牽。不惜瓊瑤分衆手。貪看雲片滿河壩。
輕紈破碎珮環流。顛倒鏘鳴亂觸舟。解紼投篙曾不顧。不知何處擁汀洲。

河冰稍解喜呈王適歸

留滯江湖白髮生。西歸猶苦凍崢嶸。春風未到冰先解。河水初深船自輕。
去國偶然經晝夢。逢人稍欲問都城。羈鴻共有成行喜。雙鯉應將尺素迎。

河冰復結復次前韻

懊惱河冰散復生。徂年近已失崢嶸。身留短舫厭厭睡。目送飛鴻一一輕。
引綵低徊疑上坂。打凌辛苦甚攻城。東風憐我歸心速。稍變楊梢百里迎。

題南都留守妙峯亭

我登妙峯亭。欲訪德雲師。春陽被原野。澗渙含流澌。未復桃李色。稍增松桂姿。
子夫東來檣。冉冉將安之。萬物委天運。此身免奔馳。悵然懷舊遊。一丘覆茅茨。
清冷久沮洳。文雅空頽隳。提攜二三子。醉倒春風吹。不見妙峯處。
安知德雲期。南遷久忘友。有獲空自知。歸來覽新構。恍然發深思。
遠行極南海。此地初不移。酌我一斗酒。盡公終日嬉。德雲非公歟。
相對欲無詞。

次韻發運路昌衡淮南見山堂

疊石初成得賜環。未應苔蘚上蒼顏。據鞍華岳旌旄裏。回首淮山夢想間。烽火日傳西塞靜。丘陵應伴壯心閑。終南太白皆公有。肯向庭中更作山。

送戴朝議歸蜀中

岷山招我早歸來。劍閣橫空未易回。北叟忽驚鷓鴣晚。西轅欲及海棠開。避仇賦客新耕耒。因亂詩翁著酒杯。但愛江山無一事。爲言父老莫相猜。

後省初成直宿呈子瞻二首

掖垣初罷斧斤響。棟宇猶聞松桂香。江海暫來俱野客。雲霄並直愧華堂。月明似與人煙遠。風細微聞禁漏長。諫草未成眠未穩。始知天上極清涼。射策當年偶一時。對床夜雨失前期。廬間還往無多地。夢裏追尋亦自疑。螭墨屢乾期已久。囊封希上出猶遲。茅簷半破松筠老。歸念蕭然欲語誰。

次韻子瞻送陳睦龍圖出守潭州

海上石橋餘折棟。大舶記君過鐵甕。東行萬里若乘空。老蜃長鯨應入轡。波搖風卷臥不起。免教髀肉鞍磨痛。歸來過我話艱苦。驚汗津津尙流汞。海涯風物畫成圖。錯落天吳兼紫鳳。至今想象隔人事。往往風濤吹晝夢。長沙欲往厭飛楫。幸有千兵作迎送。文章清逸世少比。科第崢嶸聲自重。遠行屢屈衆所歎。出祖誰攀身故動。明朝鼓角背王城。莫聽單于吹曉弄。

子雍奉使三韓。繼時在南都。見其往返。故此詩言之。

送千之姪西歸

京洛東遊歲月深。相逢初喜解微吟。夢中助我生池草。別後同誰飲竹林。文字成家憐汝在。風流似舊慰人心。便將格律傳諸弟。王謝諸人無古今。

駕幸親賢宅。曾隨駕諸公。

日日南風夜氣煩。一聲鳴蹕萬人看。禁溝飛水清黃道。涼殿分冰遍從官。急雨未成昏觀闕。微飈稍覺泛和巒。相看揮汗塵埃裏。散髮何人舊不冠。

次韻子瞻飲道者院池上。

雨氣涼侵殿。河流滲入池。黃梁淪魚子。白酒瀉鵝兒。風細初生袖。塵清免汗眉。郊行不意得。拂壁看題詩。

答孔平仲惠蕉布二絕。

裘葛終年累已輕。薄蕉如霧氣尤清。應知浣濯衣稜敗。少助晨趨萃蔡聲。燈籠白葛扇裁紈。身似山僧不似官。更得雙蕉縫直掇。都人渾作道人看。

次韻朱光庭司諫喜雨。

焦枯連夏火。洗濯待秋霖。都邑溝渠淨。郊原黍豆深。流膏侵地軸。晴意動風琴。誰似臣居易。先成喜雨箴。

次韻光庭省中書事。

放浪江湖久。情慵安排誰。置從官中。齷踈空與廷和對。開納初還正。觀風二鄙兵。銷真帝力。四方雨足自天功。時將一勺傾滄海。漫使人知達四聰。

送張恕朝奉南京簽判二首。

楚蟹吳柑初著霜。梁園官酒試羔羊。老如計相非無齒。清似留侯未卻糧。杖屨稍通賓客過。穀蔬要遣子孫嘗。詔書委曲如公意。幕府新除朱紱郎。朱紱寒家罷倚門。留都無事最宜親。下車趨走驚隣舍。決獄平反慰老人。相見只今多邂逅。舊遊他日半埃塵。何年重起扁舟興。會作東湖十日賓。

送賈訥朝奉通判眉州

歸念長依落日邊。壺漿今見逆新官。聲傳已覺謳歌遍。身到前知政令寬。民病賢人來已暮。時平蜀道本無難。明年我欲脩桑梓。爲賞庭前荔子丹。眉州倅驪舊有荔支二株甚大。

次韻黃庭堅學士狴毛筆

不悟身邊一斗紅。聖賢隨世亦時中。何人知有中書巧。縛送能書陳孟公。

李誠之待制挽詞二首

脫遺章句事經綸。滿腹龍蛇自屈伸。南駕威聲傳絕域。西征舊恨失姦臣。空留諫疏驚頽靡。終託詩詞話苦辛。而氣如雲未應盡。一雙鬮子亦麒麟。濟南風物在西湖。湖上逢公初下車。談笑樽前伏齊虜。旌旗門外聽除書。一封未奏先焚草。三黜歸來便種蔬。淚落西堂歌酒地。杉松空見歲寒餘。

司馬溫公挽詞四首

白髮三朝舊。青山一布衾。封章留帝所。德澤在人心。未起謳吟切。來歸故託深。楊公不久住。天意定難忱。

又

決策傳賢際。危言變法初。紛紛看往事。一一驗遺書。富貴終何有。清貧只自如。西州不忍過。行哭便回車。

又

區區非爲己。懇懇欲亡生。力盡心終在。身忘勢亦成。遺民拋劍戟。故老半公卿。魏丙生前友。俱傳漢相名。

又

少年真狷淺。射策本龔陳。欲廣忠言地。先收衆棄餘。流離見更化。邂逅捧除書。趙孟終知厥。他人恐罵予。

送表弟程之元知楚州

與君外兄弟。初如一池魚。中年雲雨散。各異澗谷居。客舍復相從。語極長歎歎。青衫奉朝謁。白髮驚晨梳。百年不堪把。一樽歡有餘。清言我未厭。昨夜聞除書。淮南旱已久。疲民食田蔬。話發上供米。仍疏古邗渠。要須賢使君。均此積歲儲。徑乘兩槳去。不待五馬車。別離難重陳。勞徠不可徐。政成得召節。歲晚當歸歟。

送王震給事知蔡州

朝廷入忘返。冠蓋如雲屯。賢哉貴公子。獨以民社言。西臺出命書。落筆波濤翻。東臺典封駁。坐惜日月奔。試劇得上蔡。高臥強東藩。早歲獨多麥。時雨如傾盆。鈴軒省鞭扶。幕府多壺樽。逡巡文字樂。斥去簿領煩。賜環行當至。坐席恐未溫。三槐日成陰。富貴屬曾孫。

送王廷老朝散知虢州

滿腹貯精神。觸手會衆理。一廢十五年。直坐才多爾。我昔遊宋城。憶始識君子。簿書填丘山。賓客亂蜂蟻。

出尋城下宅。屢屣床前履。清談如鋸木。落屑紛相委。解頤自有樂。置酒姑且止。逡巡破黃封。婉婉歌皓齒。風高熊正白。霜落蟹初紫。夜闌意未厭。河斜客忘起。歸來笑僮僕。熱醉未曾爾。江湖一流蕩。歡意日頽弛。西還經舊遊。相逢值新喜。詔催西州牧。門有朱轡柅。都城挽不住。山賊近方侈。提刀索崖谷。撥桴動閭里。居家百無與。王事非有已。何日卻休官。復飲梁王市。

送魯有開中大知洛州次子瞻韻

仲連雖不仕。而非綺與園。逡巡笑談間。屢解戰鬪纒。子敬識二孫。長揖鼓鞶喧。意氣感周郎。振策起江村。二賢繼英風。千載爲高門。曾孫事仁祖。風義夙所敦。臺閣餘故事。父老稱遺言。白髮識公子。十載友元昆。婆娑久不試。俛仰色逾溫。五馬忽嘶鳴。朱輪夾征軒。旌旄隔河至。部曲幾人存。銅虎不可留。芻狗行當燔。秋潦決河防。遺黎化驚魂。憂心念千里。何暇把一樽。西城叩門別。南風吹帽翻。嗟我限出謁。未敢逾短垣。新晴水尙壯。想見民驚奔。安得萬丈堤。止此百里渾。姑爾救一境。誰當理其源。百聞貴一見。尺書爲我論。

欒城集卷第十五

詩八十五首

送陳侗同年知陝府

上書乞江淮。得請臨關河。所得非所願。親友或相訶。丈夫志四方。所遇常逶迤。況當國西屏。形勝古來多。崑渠湧北郭。華岳垂東阿。羌虜昔未平。驛騎如飛梭。間諜時出沒。關梁苦誰何。爾來一清淨。西望多麥禾。魏絳方和戎。先零正投戈。秦人釋重負。道路聞行歌。便當臥齋閣。次第除網羅。時時一嘯咏。未用勤催科。諸孤寄吳越。食口如鴈鵝。時分囊中金。何必手自摩。

次韻李曼朝散得郡西歸留別二首

風波定後得西歸。烏鵲喧呼里巷知。未熟黃梁驚破夢。相看白髮信乘危。豚肩尚有冬深味。蠶器應逢市合時。父老爲公留臘酒。不須猶唱式微詩。懷印徒行尙故衣。邸中掾史見猶疑。千上塚鄉關動。五馬行春雨澤隨。醉裏墜車初未覺。道中破甑復誰悲。西行漫遣親朋喜。早賦陶翁歸去詩。

送程建用宣德西歸

昔與君同巷。參差對柴荆。艱難奉老母。弦歌教諸生。黎藿飽臧穫。布褐均弟兄。貧賤理則窮。禮義日益明。我親本知道。家有月旦評。逡巡戶牖間。時聞歎息聲。善惡不可誣。孝弟神所聽。我見此家人。處約能和平。

它年彼君子。豈復地上行。爾來三十年。遺語空自驚。松阡映天末。苦淚緣冠纓。子親八十五。皤然老人星。安輿及祿養。平反慰中情。月俸雖不多。足備甘與輕。今年復考課。得秩真代耕。倚門老鶴望。策馬飛鴻征。歸來歲云莫。手奉屠蘇觥。我詩不徒作。以遺鄉黨銘。君昔嘗稅居與弊廬東西相望武昌君見其家事知非貧賤人也此語未嘗語人俛仰三十年矣因君西歸作詩言之不覺流涕

次韻子瞻杜介供奉送魚

天街雪霽初通駟。禁籞冰開漸躍魚。十尾煩君穿細柳。一杯勸我莼青蔬。寒樽獨酌偶逢客。佳句相酬不用書。江海歸來叨禁近。空令同巷往來疎。

次韻子瞻招王蘧朝請晚飲

矯矯公孫才不貧。白駒衝雪喜新春。忽過銀闕迷歸路。誤認瑤臺尋故人。訪我不嫌泥正滑。留君深愧酒非醇。歸時九陌鋪寒月。清絕空教僕御羣。

子瞻與李公麟宣德共畫翠石古木老僧謂之憩寂圖題其後

東坡自作蒼蒼石。留取長松待伯時。只有兩人嫌未足。更收前世杜陵詩。

王君貺宣徽挽詞三首

妙年收賈傅。白首貴王陽。志氣文章在。功名歲月長。遺孫依舊德。故吏滿諸方。河朔三持節。斯民定不忘。

又

譎墮神仙侶。飛翔鸞鳳姿。舊逢黃石老。陰許赤松期。歷歷僧伽記。申申鄧傳詞。翻然歸海嶠。無復世人知。

公少年過四州於僧伽塔中見一老僧謂公歸跡祖墓有白兔者君當第一人及第已而果然既登科見張鄧公爲公言吾爲射洪令尉捕得一入疑其行劫吾覺其非是釋之問其所從來則山中隱者也以藥遺我曰此藥可以終天年而無病且約我貴極人臣今方且貴慎勿咎咎道人公終身用其言轍佐公於大名親見公言之

從軍在河上仗鉞喜公來幕府方閑暇歌鍾得縱陪它年老賓佐過國泣樓臺猶有墳碑在仍令故客開今樞密安公厚卿昔與轍同在幕府公家方求厚卿作墓碑

送杜介歸楊州

楊州繁麗非前世城郭蕭條卻古風尚有花畦春雨後不妨水調月明中東都甲第非嫌汝北牖羲皇自屬翁渭洛放船經月事急先鷓鴣邊芳叢

次韻子瞻與鄧聖永承旨同直翰苑懷武昌西山舊遊

我遊齊安十日回東坡桃李初未栽扁舟亂流入樊口山雨未止淫黃梅寒溪聞有古精舍相與推挽登崔嵬山深縣令喜客至寺荒蔓草生經臺黃鵝白酒得野餽藤床竹簟無纖埃可憐遷客畏人見共怪青山誰爲堆行驚晚照催出谷中止亂石傾餘壘古今相望兩令尹謂元結與鄧君也文詞灑落千山隈野人豈復識遺趣過客時爲剗蒼苔五年留滯屐齒禿一朝揮手船頭開玉堂卻憶昔遊處笑問五柳應彫摧滿朝文士蚤貴達馮凌霄漢乘風雷入恭祕殿出華省何曾著足空山來漂流邂逅覽遺躅耳中尙有江聲哀

送楊孟容朝奉西歸

三十始去家四十初南遷五十復還朝白髮正紛然故人從西來鞍馬何聯翩握手得一笑喜我猶生全別離多憂患夢覺非因緣惟餘歸耕計粗有山下田久廢太倉粟空愧鄉黨賢老兄富治行令德齊高年

幸此民事清。未厭軍壘偏。父老攜壺漿。稚子迎道邊。應有故相識。問我何當旋。君恩閱衰病。歸駕行將鞭。
次韻孔武仲學士見贈

羨君耽讀書。日夜論今古。雖復在家人。不見釋手處。意求五車盡。未惜雙目苦。蓬萊倚霄漢。簡牘充棟宇。
學成擅困倉。筆落走風雨。破籠閉野鶴。短草藏文虎。鬢鬚忽半白。兒女無復乳。知君不能薦。愧我終何補。
偶來相就談。日落久未去。歸鞍得新詩。佳句爛如組。古風棄彫琢。遺味比樂府。且復調墳篋。冷然五音舉。
送家定國朝奉西歸

我懷同門友。勢如曉天星。老去髮垂素。隱居山更青。退翁聯科第。俯仰三十齡。仕官守鄉國。出入奉家庭。
鷗鷺性本靜。芷蘭深自馨。新詩得高趣。衆耳昏未聽。笑我老憂患。奔走如流萍。冠裳強包裹。齒髮坐彫零。
晚春首歸路。朱轡照長亭。縣令迎使君。綵服導輜駟。長歎或垂涕。平反知有令。此樂我已亡。雖達終不寧。
次韻劉貢父省上示同會二首

流落江湖東復西。歸來未洗足間泥。偶隨鵬翼培風上。時得衙香滿袖攜。落筆逡巡看倬直。醉吟清絕許
分題。相望魯衛雖兄弟。終畏鄰封大國齊。
掖垣不復限東西。賓客來衝霧雨泥。白酒黃封開澗澗。朱纓青籠落提攜。五花愧我連書判。三道高君免
試題。誰遣松蒿同一谷。凌雲他日恐難齊。

次韻孔武仲三舍人省上

君不見西都校書宗室叟。東魯高談鼓瑟手。偶然同我西掖垣。並立曉班分左右。龍文百斛世無價。
屬二

瓦釜楞然但升斗。諸兄落落不可望。兩季幸背分餘光。大孔奮飛自南鄉。聯翩羣鴈相追翔。渠家冠蓋尤堂堂。

送顧子敦奉使河朔

去年送君使河東。今年送君使河北。連年東北少安居。慷慨憐君色自得。河流西決不入土。千里汗漫被原隰。壯夫奔亡老稚死。粟麥無苗安取食。君憂臣辱自古然。自說過門三不入。忠誠一發鬼神輔。心念既通。謀計集。堤防旋立村落定。波浪欲收蛟蜃泣。二年歸國未爲久。故舊相看髮猶黑。成功豈在延世下。好勇真令腐儒服。此時爲國頌河平。當使君名長不沒。

席上再送

人言虎頭癡。河作河朔遊。黃河六七月。不辨馬與牛。單車徑北渡。橫身障西流。虎頭亦不癡。志在萬戶侯。徜徉歷三邊。歸借坐上籌。腰垂黃金印。不受白髮羞。此計雖落落。但問有志不。臨歧且一醉。行役方未休。

次韻孔文仲舍人醖醢

蒼虵凍不死。輕素暖仍歸。落葉時吹面。繁香自撲幃。光疑真照夜。枝軟或牽衣。似厭風霾苦。應思霧雨霏。開樽迎最盛。掃地見初稀。賴有清陰在。金波肯發揮。

送錢水制赴廣東都監

家聲遠繼河西守。遊宦多便嶺外官。南海無波閑闕舸。北堂多暇得羞蘭。忽聞常棣歌離索。應寄寒梅報好安。它日扁舟定歸計。仍將犀玉付江湍。

次韻曾子開舍人四月一二日扈從二首

萬人齊仗足聲勻。翠輦徐行不動塵。夾道譁呼通老穉。從官雜選數徐陳。旌旗稍放龍蛇卷。旒冕初看日月新。天遣雨師先灑道。農夫不復誤占辛。農家常以上辛占麥。辛深則麥熟。今年正月八日得。

衣冠雙日款蓬萊。簾脫瓊鉤扇不開。清曉連驚三殿啓。翠華遙自九天來。晨光稍稍侵黃蓋。瑞霧霏霏著禁槐。千雨翟車觀禮罷。歸時滿載德風迴。是日內外命婦皆會景靈。你瞻三宮肅然。雍穆不言而化。諸公之家有能言之者。

再和

病起江南力未勻。強將冠劍拂埃塵。木雞自笑真無用。芻狗何勞收已陳。行從鑾旗風日細。側聽廟樂管絃新。誰知四載勤勞後。併舉成功祚泣辛。宸心惻惻念汙萊。南籩西池閉不開。長樂鳴鞘千乘出。願成薦鬯萬方來。從臣暗泣新官柳。父老行依輦路槐。雙闕影斜朱戶啓。都人留看屬車回。

次韻張昌言給事省中直宿

還家未暇拂塵衣。攜被重來趁落暉。省戶鳴騶久分散。宮槐栖鶻共翻飛。周廬見月風蠶靜。斜漢橫空星斗稀。多病心身怯清禁。故山依約夢西歸。

次韻貢父子開直宿

擲簡搖毫氣吐虹。興餘庭藥詠殘紅。今宵文字知無幾。鼾睡簾中笑二公。

去年冬轍以起居郎入侍邇英講不逾時遷中書舍人雖忝冒愈深而瞻望清光與日俱遠追記當

時所見作四絕句呈同省諸公

邇英肅肅曉霜清。玉宇時聞稿葉零。風過都城吹廣內。萬人笑語落中庭。

銅餅灑遍不勝寒。雨點勻圓凍未乾。回首曠曠朝日上。槐龍對舞覆衣冠。

早歲西廡跪直言。起迎天步晚臨軒。何知老侍曾孫聖。欲泣龍髯吐復吞。

和步入政過所試。前瞻望天表。最為親近。

講罷淵然似不勝。詩書默已契天心。高宗問答終垂世。未信諸儒測淺深。

次韻張問給事喜雨

已收蠶麥無多日。旋喜山川同一雲。禾黍趁時青覆壟。池塘流潤綠先文。兩宮尙廢清晨集。中禁初消永夜薰。倉粟半空民望足。深耕疾耨肯忘君。

次韻宋搆朝請歸守彭城

得郡迎親願不違。書來無復寄當歸。馬馳未覺西南遠。鳥哺何辭日夜飛。湖水欲平官舍好。茶征初復訟氓稀。平反聞道加餐飯。五袴應須換破衣。

次韻劉貢父西掖種竹

竹迷誰定知迷否。趁取滂沱好雨初。栽向鳳池吹律處。斷從芸閣殺青餘。迎風一嘯朝回早。弄月相差直宿疎。應怪籍成林下客。相看不飲作除書。

仲馮方作左史必與貢父並直於此。

次韻劉貢父省中獨直

簾深巧爲隔朝暎。竹密時能引雀喧。朝罷宿醒還續夢。靜中諸妄稍歸根。坐曹聞道仍分省。出沐誰當與並軒。竹簾茅簷它日事。重因遺詠記君恩。

得告家居次韻貢父見寄

君恩賜告許歸來。雨後中庭有綠苔。起問日高三丈久。臥聞車過九門開。泥封連日傳新語。腕脫知君有軼才。十八二十二兩日除月猥多待得晴乾追後乘。未應塵土熱如灰。

黃幾道郎中同年挽詞二首

溫恭天賦此心良。惠愛人知政術長。井水無波任餅綆。牛刀投隙應宮商。分符出遍名城守。攜被歸從華省郎。不到汝陰遺恨遠。坐令湖水滅清光。

早歲相從能幾時。淮陽花發正游嬉。鳴弓矍相人如堵。席地滄浪柳作帷。十載舊遊真是夢。一時佳客尙存誰。遙聞葬日車千兩。瀆酒絲中寄一悲。轍昔與幾道相遇於陳陳守張聖民相與游從甚密逮今將三十年當時賓客在者少矣而葬道復化去言之懷惻無已

和王定國寄劉貢父

度嶺當年惜遠行。過淮今日似前生。留連秋思江侵海。搖蕩春心花滿城。欲寄尺書慵把筆。偶聞佳句獨含情。何時復看清虛會。醉聽箏箏促柱聲。

故濮陽太守贈光祿大夫王君王路詞二首

落落承平佐。英英嗣世風。芝蘭託庭戶。鸞鵠峙椅桐。結客賢豪際。傾財緩急中。悲傷聞故老。淪謝未衰翁。

又

吳中試良守。濮上繼嘉聲。平賦權家恨。蠲租盜俗清。家貧久未葬。身去獨留名。天報多男子。終存好弟兄。
韓幹三馬

老馬側立鬃尾垂。御者高拱持青絲。心知後馬有爭意。兩耳微起如立錐。中馬直視翹右足。眼先已動心先馳。僕夫旋作奔佚想。右手正控黃金羈。雄姿駿發最後馬。回身奮鬣真權奇。圉人頓轡屹山立。未聽決驟爭雄雌。物生先後亦偶爾。有心何者能忘之。畫師韓幹豈知道。畫馬不獨畫馬皮。畫出三馬腹中事。似欲譏世人。莫知伯時一見笑。不語告我韓幹非畫師。

書郭熙橫卷

鳳閣鸞臺十二屏。屏上郭熙題姓名。崩崖斷壑人不到。枯松野葛相欹傾。黃散給舍多肉食。食罷起愛飛泉清。皆言古人不復見。不知北門待詔白髮垂冠纓。袖中短軸纔半幅。慘澹百里山川橫。巖頭古寺擁雲木。沙尾漁舟浮晚晴。遙山可見不知處。落霞斷鴈俱微明。十年江海興不淺。滿帆風雨通宵行。投篙楫杙便止宿。買魚沽酒相逢迎。歸來朝中亦何有。包裹觀闕圍重城。日高因睡心有適。夢中時作東南征。眼前欲擬要真物。拂拭束絹付與汾陽生。

題王生畫三蠶蜻蜓二首

飢蠶未得食。宛轉不自持。食蠶聲如雨。但食無復知。老蠶不復食。矯首有所思。君畫三蠶意。還知使者誰。
又

蜻蜓飛翾翾。向空無所著。忽然逢飛蚊。驗爾飢火作。一飽困竹稍。凝然反冥寞。若無飢渴患。何貴一簞樂。

贈寫真李道士

君不見景靈六殿圖。功臣進賢大羽東西陳。能令將相長在世。自古獨有曹將軍。嵩高李師棹頭笑。自言弄筆通前身。百年遺像誰復識。滿朝寇劍多偉人。據鞍一見心有得。臨臆相對疑通神。十年江海鬢半脫。歸來俛仰慚簪紳。一揮七尺倚牆立。客來顧我誠似君。金章紫綬本非有。綠簔黃菊甘長貧。如何畫作白衣老。置之茅屋全吾真。

次韻子瞻題郭熙平遠二絕

亂山無盡水無邊。田舍漁家共一川。行遍江南識天巧。臨窗開卷兩茫然。斷雲斜日不勝秋。付與騷人滿目愁。父老如今亦才思。一蓑風雨釣槎頭。

次韻錢總待制秋懷

壯心老自消。秋思悲不怨。中懷不堪七。那用日食萬。朝陽淨塗潦。白露霑草蔓。夾衣搜故褚。酒貨積新券。狙猿便林藪。冠帶愁檻圈。夢追赤松游。食我青精飯。歸心久已爾。佳句聊復勸。近聞洮東將。閒出邊馬健。禪王坐受縛。右袂行將獻。念此愧無功。歸歟適吾願。

宿滎陽寧氏園

喧卑背城市。曠蕩臨溪水。車流泝絕壁。河潤及桃李。居人有佳思。過客得新喜。中橋一回顧。欲入迷所自。

滎陽唐高祖太宗石刻像并敘

滎陽大海院高齋石像二。高不數寸。而姿製甚妙。唐高祖爲鄭州刺史。太宗方幼而病甚。禱之卽愈。因

各爲一碑刻彌勒佛。且記其事。至今皆在。元祐二年九月。祭告永裕陵。過而觀焉。作小詩以授院僧。誰言膚寸像。勝力妙人天。欲療衆生病。陰扶濟世賢。身微須覆護。眼淨照幾先。豈爲成功報。猶應歷劫緣。

次韻劉貢父從駕

一經空記弟傳兄。舊德終慙比長卿。扈駕聯翩來接武。登科先後憶題名。竹林共集連諸子。棣萼相輝賴友生。它日都門俱引去。不應廣受獨華榮。

次韻劉貢父和韓康公憶其弟持國二首

霜風琴瑟卷梧蕉。燕處超然夜寂寥。羽客信來丹鼎具。石淙夢斷水聲遙。赤松作伴誰當見。黃鵠高飛未易招。劍履終身定何益。勤勞付與沛中蕭。愛君憂世老彌深。特操要須得失臨。晚歲飛騰推有德。故鄉安穩信無心。小邦近似西山隱。元氣終當北斗斟。聖主方求三世舊。老臣何止一遺簪。

聞京東有道人號賀郎中者唐人也其徒有識之者作詩寄之

賀老稽山去不還。鏡湖獨掉釣魚船。南來太白尋無處。卻作郎官又幾年。岱下迎鸞驚典謁。家山施藥愍耕田。試窮腳力追行迹。亦使今生識地仙。

送家安國赴成都教授三絕

城西社下老劉君。春服舞雩今幾人。白髮弟兄驚我在。喜君浮宦亦天倫。微之先生門人。惟僕與子瞻。兄復禮與退翁。兄皆仕耳。垂白相逢四十年。猖狂情味老俱闌。論兵頓似前賢語。莫作當年故目看。

石室多年款誌平。新書久瀕里中生。遣師今見朝廷意。文律還應似兩京。

送歐陽辯

我年十九識君翁。鬚髮白盡顙頰紅。奇姿雲卷出翠阜。高論河決生清風。我時少年豈知道。因緣父兄願承教。文章疎略未足云。舉止猖狂空自笑。公家多士如牛毛。揚眉抵掌氣相高。下客遂巡愧知己。流枿低昂隨所遭。卻來京洛三十載。重到公家二君在。伯亡仲逝無由追。淚落數行心破碎。京城東西正十里。雨落泥深早塵起。衣冠纏繞類春蠶。一歲相從知有幾。去年叔爲尙書郎。家傳舊業行有望。今年季作澶淵吏。米鹽騷屑何當起。前輩今無一二存。後來幸有風流似。黃河西行淤沒屋。桑柘如雲麥禾熟。年豐事少似宜君。飽讀遺書心亦足。

送韓康公歸許州

功成不願居。身退有餘勇。心安里閭適。望益縉紳重。朝爲北闕辭。莫犯南河凍。人知疎公達。王命顯父送。百壺山泉溢。千兩春雷動。旋聞二季賢。繼以一章控。詔書未云可。廷論已爭竦。茲行迫寒食。歸及掃先壠。萬人擁道看。一子腰金從。爾曹勿驚嗟。令德勸勤種。

三日上辛祈穀除日宿齋戶部右曹元日賦二絕句寄呈子瞻兄

七度江南自作年。去年初喜奉椒槃。冬來誤入文昌省。連日齋居未許還。

今歲初辛日正三。明朝春氣漸東南。還家強作銀幡會。雪底蒿芹欲滿籃。

北客南來歲欲除。燈山火急萬人扶。

登山例以北使見日立。

欲觀翠輦巡游盛。深卻南宮鎖鑰拘。

次韻王欽臣祕監集英殿井

碧甃涵雲液。銅瓶響玉除。汲花攢點罷。灑霧喚班初。龍餅煎無數。螭研滴有餘。從官方醉飽。一醉解清虛。

集賢殿考試罷二首

振鷺紛紛未著行。初從江海覘清光。卷聲風雨中庭起。筆勢雲煙累幅長。病眼尙能分白黑。衆毛空復數驪黃。禁中已許公孫第。得失何私物自忙。

問蔡肇求李公麟畫觀音德雲

衰病相侵眼漸昏。青燈細字苦勞神。遍看大軸知無力。聽誦奇篇賴有人。前日鼓旗聞苦戰。明朝雷雨出潛鱗。殿廡困極唯思睡。卻憶登科似後身。

五月一日同子瞻轉對

好事桓靈寶。多才願長康。何嘗爲人畫。但可設奇將。夕聚要當散。能分慰所望。清新二大士。昇我夜燒香。

次韻劉貢父題文潞公草書

羸病不堪金束腰。永懷江海舊漁樵。對床貪聽連霄雨。奏事驚同朔旦朝。大耿功名元自異。中茅服食舊相要。一封同上憐狂直。詔許昌言賴有堯。

韓康公挽詩三首

鷹揚不減少年時。墨作龍蛇紙上飛。應笑學書心力盡。臨池寫遍未裁衣。

韓康公挽詩三首

又

耆年時一二。新第闕西南。好客心終在。忘懷日縱談。規模人共記。風味我猶諳。誰是羊曇首。回車意不堪。

又

師曠聞弦日。相如作賦年。雖慙衆人後。貪值主文賢。北道初聞召。南江正遠遷。平生闕親近。遺恨屬新阡。

送王宗望郎中赴河東漕

春初戎馬掠河壩。屬國倉皇不解鞍。未免驅民餽邊食。旋聞奉使輟郎官。年高轉覺精神勝。慮穩要令事業安。持節近看葱嶺雪。擁裘應慣鴈門寒。

送高士敦赴成都兵鈐

楊雄老病久思歸。家在成都更向西。邂逅王孫馳駟騎。丁寧父老問耕犁。禪房何處不行樂。壁像君家有舊題。德厚不妨三世將。時平空自萬夫齊。

鴻盧草堂圖

昔爲太室游。盧巖在東麓。直上登封壇。一夜靈生足。徑歸不復往。巒壑空在目。安知有十志。舒卷不盈幅。一處一盧生。裘褐蔭喬木。方爲世外人。行止何須錄。百年入篋笥。大馬同一束。嗟子縛世累。歸來有茅屋。江干百畝田。清泉映脩竹。尙將逃姓名。豈復上圖軸。

秦虢夫人走馬圖二絕

秦虢風流本一家。豐枝穠葉映雙花。欲分妍醜都無處。夾道遊人空嘆嗟。

朱幘玉勒控飛龍。笑語喧譁步驟同。馳入九重人不見。金鈿翠羽落泥中。

韓幹二馬

玉帶胡奴騎且牽。銀髮白鼻兩爭先。八坊龍種知何數。乞與岐邠並錦韉。

試制舉人呈同舍諸公二首

垣中不減臺端峻。池上來從柱下嚴。同直舊曾連月久。慙來還喜二公兼。僕頃與孫莘老同在諫垣與彭器資同在四掖直言已

許侵彈奏新告行。聞振滯淹。顧我龕官何所與。西曹只合論茶鹽。

早歲同科止六人。中年零落半埃塵。卻將舊學收新進。幾誤今生是後身。骭髀別都遺老驥。沈埋祕府愧

潛鱗。制科前輩今獨張公安道一人。後來未用。惟張去華而已。憐君尙勝劉蕢在。白首諸侯呼上賓。

次韻張去華院中感懷

登朝已老似王陽。脫葉何堪霧雨涼。案上細書憎蟻黑。禁中新酒愛鵝黃。臨墀野菊偏能瘦。倚檻青松解

許長。仕宦不由天祿開。坐曹終日漫皇皇。轍頃自續溪除校書郎未至京除右司諫竟不入館故以爲恨

送周思道朝議歸守漢州三絕

早緣民事失茶官。解印重來十二年。美惡一周還自復。始知東里解言天。

梓潼東南甲乙州。同時父子兩諸侯。玉湍時出守梓州它年我作西歸計。兄弟還能得此不。

酒壓郵筒憶舊醅。花傳丘老出新圖。漢州官酒蜀中推第一趙昌畫花撲斝丘文播亦西州所無也此行真勝成都尹。直爲房公百頃湖。

此
页
空
白

欒城集卷第十六

詩一百二十首

程之元表弟奉使江西次前年送赴楚州韻贈別

送君守山陽。羨君食淮魚。送君使鍾陵。羨君江上居。憐君喜爲吏。臨行不歎歎。紛紛出歌舞。綠髮照瓊梳。歸鞍蹈涼月。倒盡清樽餘。嗟我病且衰。兀然守文書。齒疎懶食肉。一飯甘青蔬。愛水亦已乾。塵土生空渠。清貧雖非病。簡易由無儲。家使赤腳嫗。何煩短轅車。君船繫東橋。茲行尙徐徐。對我竟不飲。問君獨何歎。

表弟程之邵奉議知泗州

馬有千里足。所願百里程。馬心自爲計。安用終日行。何人志四方。欲買千金輕。吾弟有儁才。見事心眼明。二年坐比部。萬口傳佳聲。談笑頑狡伏。何曾用敲榜。艱難得銅虎。洗眼長淮清。民事不足爲。但當食魚烹。負重貴餘力。過飽多傷生。不見大路馬。垂頭畏繁纓。

次韻子瞻書黃庭內景卷後贈蹇道士拱辰

君誦黃庭內外篇。本欲洗心不求仙。夜际片月墮我前。黑氛剝盡朝日妍。一暑一寒久自堅。體中風行上通天。亭亭孤立孰傍緣。至哉道師昔云然。旣已得之戒不傳。知我此心未虧蹇。指我嬰兒藏谷淵。言未絕口行已旋。我思其言夜不眠。

次韻子瞻好頭赤

沿邊壯士生食肉。小來騎馬不騎竹。翻然赤手挑青絲。捷下巔崖試深谷。牽入故關榆葉赤。未慣中原暖風日。黃金絡頭依圍人。俛聽北風懷所歷。

送葆光蹇師遊廬山

建城中。有狂人。縱酒罵市無與親。敲門訪我何逡巡。頭蓬面垢氣甚真。截河引水登崑崙。下洗尺宅骨髓勻。告我入室要自門。仙翁道師豈遺君。歸來插足九陌塵。獨遊凝祥芳草春。蕭然孤鶴鳴雞羣。子欲不死存谷神。海山微明朝日暎。丹成寄子勿妄云。出入無朕窮無垠。相思一笑君乃信。

同子瞻次梅聖俞舊韻題鄉舍木山

江槎出沒浮犀牛。波濤掀天谷爲洲。江寒水落驚霜秋。危根瘦節鳴寒流。脆朽吹去誰鑿鏤。連峯疊嶂立會會。吾家此山不易得。十年棄置空自尤。猿號鶴唳豈無意。委蛇怪我懷羔裘。西歸父老拍手笑。笑憶翁子躬薪樵。去時三山今有五。不問故園惟一丘。

次韻子瞻送千乘千能

少年食糠覈。吐去願一官。躬耕遇斂穫。不知以爲歡。謂言一飛翔。要勝終屈蟠。朝廷未遑入。江海失所安。多憂變華髮。照影慙雙鸞。恩從萬里歸。獨喜大節完。日食太倉米。餼中有餘紈。奇窮不當爾。自信處此難。長女聞孀居。將食淚滴槃。老妻飽憂患。悲吒摧心肝。西飛問黃鸝。誰當救飢寒。二子憐我老。輦致心一寬。別久得會合。喜極成辛酸。忽聞倚門望。有書驚歲闌。深情見緩急。欲報非琅玕。勸爾勤孝友。慎毋慕衣冠。滯滯自成井。放瀉當生瀾。豈有白雪駒。舉足無和鑾。

題王詵都尉畫山水橫卷三首

摩詰本詞客。亦自名畫師。平生出入輞川上。鳥飛魚泳嫌人知。山光盎盎著眉睫。水聲活活流肝脾。行吟坐詠皆目見。飄然不作世俗詞。高情不盡落縑素。連峯絕澗開重帷。百年流落存一二。錦囊至軸酬不訾。誰令食肉貴公子。不學父祖驅熊羆。細氈淨几讀文史。落筆璀璨傳新詩。青山長江豈君事。一揮水墨先淋漓。手中五尺小橫卷。天末萬里分毫釐。謫官南出止均潁。此心通達無不之。歸來纏裹任紈綺。天馬性在終難羈。人言摩詰是前世。欲比顧老疑不癡。桓公崔公不可與。但可與我寬衰遲。

憐君將帥雖有種。多君智惠初無師。篇章俊發已可駭。丹青妙絕當誰知。自言五色苦亂目。況乃旨酒長傷脾。手狂但可時弄筆。口病未免多微詞。歌鐘一散任池館。幅巾靜坐空書帷。偶從禪老得真趣。此身不早非財訾。世間翻覆岸爲谷。猛獸相食虎與熊。逝將得意比春夢。獨取妙語傳清詩。眼看官釀瀉酥酪。未與村酒分醇漓。解鞍駿馬空伏櫪。寄書黃狗閑生鼈。江山平日偶有得。不自圖寫渾忘之。臨窗展卷聊自適。磬礮豈復冠裳羈。欲乘漁艇發吾興。願入野寺嗟兒癡。行纏布襪雖已具。山中父老應嫌遲。我昔得罪遷南夷。性命頃刻存篙師。風吹波蕩到官舍。號呼誰復相聞知。小園畜蟻防橘蠹。南人畜蟻於園中。蟻緣木食蠶。雖鄰家何葉相接而蟻不相過亦一異耳。空庭養蜂收蜜脾。讀書一生空自笑。賣鹽竟日那復詞。城中清溪可濯漱。城上連峯堪幕帷。十千薄俸聊足用。魚多米賤憂無訾。東坡居士最岑寂。岌然深叢見狐羆。坐隅止鷗偶成賦。槃中食螻時作詩。憐君富貴可炙手。一時出走羞啜醢。澤傍憔悴凡幾歲。胸中芥蒂無一釐。江山別來今久矣。不獨能言能畫之。同朝執手不容久。笑我野馬初受羈。袖中短卷墨猶溼。傍人笑指吾儕癡。方

求農圃救貧病。它年未用譏樊遲。

次韻子瞻十一月旦日鎖院賜酒及燭

銅鑲玉鎖閉空堂。腕脫初驚筆札忙。紅燭遙憐風雪暗。黃封微瀉桂椒香。光明坐覺幽陰破。溫暖深知覆育長。明日白麻傳好語。曼聲微繞殿中央。

送周正孺自考功郎中歸守梓潼兼簡呂元鈞三絕

白髮熙寧老諍臣。凜然心膽大於身。吾儕坐看馮唐去。誰起雲中廢棄人。十年符竹守吾州。故吏相逢嘲土牛。毋謂徐公不堪用。諸人自與世沈浮。東道如聞近稍安。乘驄按部凜生寒。忽逢太守能相下。俱是從來言事官。

雪中訪王定國感舊

昔游都城歲方除。飛雪紛紛落花絮。徑走城東求故人。馬蹄旋沒無尋處。翰林詞人呼巨源。笑談通夜倒清樽。住在城西不能返。醉臥吉祥朝日曛。相逢卻說十年事。往事皆非隔生死。惟有飛雲似昔時。許君一醉那須起。蘭亭俛仰迹已陳。黃公酒壚愁殺人。君知聚散翻覆手。莫作吳楚乘朱輪。

次韻王定國見贈

枯木無枝不記年。寒灰誰遣強吹然。南遷不折知非妄。未老求閑愈覺賢。屢出詩章新管籥。偶開畫卷小山川。簿書填委慙君甚。撥去歸來粗了眠。

王子雉龍圖挽詞

帝子乘鸞已列仙。遺芳留得衆孫賢。俊科蚤與寒儒競。禁從終償白髮年。輦路聯鑣驚往事。圃田回首泣新阡。舊聞推歷知天命。看熟黃梁定洒然。

次韻李彖秀才來別子瞻仍謝惠馬

小牀臥客笑元龍。彈缺無輿下舍中。五馬不辭分後乘。輕裘初許弊諸公。隨人射虎氣終在。徒步白頭心頗同。遙想據鞍橫槩處。新詩一一建安風。

呂司空挽詞三首

少年輕富貴。一意在詩書。共恨經綸晚。纔收老病餘。寡言知德勝。善應本中虛。卒相承平業。謳歌元祐初。

又

將相家聲近。勳名晚歲隆。給扶安舊德。賜府壓羣公。不見彌縫迹。空推翼戴功。山公舊多可。寒士泣清風。

又

罷郡來清潁。微官憶宛丘。頽垣那可住。隱几若將休。復起民欣願。全歸天不留。世間反覆手。有德竟無憂。

公罷潁川。退居於陳。轍爲陳學官。時請見焉。

范蜀公挽詞三首

能言人盡爾。有立世終稀。憂國常先衆。謀身亦勇歸。見奇初或笑。要極未應非。僅似西山老。終身止食薇。

又

賦傳長嘯久。書奏鍾鍾新。共歎文章手。終爲禮樂人。遺風滿臺閣。好語落簪紳。欲取襄雄比。終非骨鯁臣。

又

劍外東來日。城西卻住年。高齋留寓宿。旅食正蕭然。謂愜聞投石。詩新看涌泉。清樽寄苦淚。一洒葉墳前。

范百嘉百歲昆仲挽詞二首

少年何敏銳。才氣伏諸生。展卷五行下。揮毫萬字傾。百年殊未艾。一病竟無歲。誰謂從夫子。同開鬱鬱城。

又

季子尤高爽。顏家早哭回。白頭生便爾。黃壤遽相催。舊草誰收拾。新松剩插栽。悲傷有伯氏。諸子尙嬰孩。

安厚卿樞密母夫人挽詞二首

家起側微中。身兼富貴終。慈仁本宜壽。勤約自成風。大府寧居久。名邦賜沐雄。共傳生子福。仍指讀書功。

又

早歲參戎幙。開門對粉牆。初聞寡兄弟。共羨好姑章。一別飛騰速。全歸福祿長。遺芳在子舍。它日望巖廊。

題李公麟山莊圖二十首并敘

伯時作龍眠山莊圖。由建德館至垂雲泝。著錄者十六處。自西而東。凡數里。巖嶒隱見。泉源相屬。山行者路窮於此。道南溪山清深。秀峙可游者有四。曰勝金巖。寶華巖。陳彭澗。鵲源。以其不可緒見也。故特著於後。子瞻既爲之記。又屬轍賦小詩。凡二十章。以繼摩詰輞川之作云。

建德館

龍眠淥淨中。微吟作雲雨。幽人建德居。知是清風主。

墨禪堂

此心初無住。每與物皆禪。如何一丸墨。舒卷化山川。

華嚴堂

佛口如瀾翻。初無一正定。畫作正定看。於何是佛性。

雲薊閣

清溪便種稻。秋晚連雲熟。不待見新春。西風薊自足。

發真塢

山開稍有路。水放亦成川。游人得所息。真意方澹然。

薊茅館

山居少華麗。牽茅結淨屋。此間不受塵。幽人亦新沐。

瓔珞巖

泉流逢石缺。脈散成寶網。水神瓔珞看。山是如來想。

棲雲室

石室空無主。浮雲自去來。人間春雨足。歸意帶風雷。

祕全庵

世道自破碎。全理未常遠。溪山亦何有。永覺平日非。

延華洞

共恨春不長。逡巡就搖落。一見洞中天。真知世間惡。

澄元谷

石門日不下。潭鏡月長臨。細細溪風渡。相看識此心。

雨花巖

巖花不可攀。翔藥久未墮。忽下幽人前。知子觀空坐。

泠泠谷

層崖落飛泉。微風泛喬木。坐遣谷中人。家家有琴筑。

玉龍峽

白龍晝飲潭。脩尾掛石壁。幽人欲下看。雨雹晴相射。

觀音巖

倚崖開翠屏。臨潭置苔石。有所獨無人。君心得未得。

垂雲泚

未見垂雲泚。其如歸興何。路窮雙足熱。爲我洗磐陀。

勝金巖

置馬步巖間。巖前得平地。肴蔬取行簞。粗飽有餘味。

寶華巖

團團寶華巖。重重蔭珍木。歸來得商鼎。試鬻溪邊綠。

陳彭潔

蒼壁立精鐵。縣泉瀉天紳。山行見已久。指與未來人。

鵲源

溪深龜魚驕。石瘦椿楠勁。借子木蘭船。寔我芒鞋病。四時皆記
伯時所畫

將使契丹九日對酒懷子瞻兄并示坐中

黃華已向初旬見。白酒相携九日嘗。更少一枝心自覺。春同斗粟味終長。蘭生庭下香時起。玉在人前坐亦涼。千里使胡須百日。整將中子治書囊。

題王誥都尉設色山卷後

還君橫卷空長歎。問我何年便退休。欲借巖阿著茅屋。還當溪口泊漁舟。經心蜀道雲生足。上馬胡天雪滿裘。萬里還朝徑歸去。江湖浩蕩一輕鷗。

次韻子瞻相送使胡

朔雪胡沙試此身。青羅便面紫狐巾。擁爐代北隨飛鴈。頓足江東有臥麟。欺酒壺冰將送臘。照溪梅萼定先春。漢家五餌今方驗。更愧當年歎息人。

歐陽文忠公夫人挽詞二首

先生才蓋世家。事少經心。流落初相遇。委蛇志益深。功名入圖史。文字刻璆琳。有助知由內。騶虞欲重吟。

又

好禮忘耆老。持家歷盛衰。謹嚴終致一。貧富各從宜。晚歲仍聞道。臨終竟不疑。外人傳一二。猶得載銘詩。

歐陽伯和仲純挽詞二首

之人雖蚤病。對客每清言。不信疾爲累。要稱學有原。蘧蔭視名器。果蓏指乾坤。長短何須問。傳家已抱孫。

又

仲氏氣無前。爲文思湧泉。飄然落筆地。時出疾邪篇。椽榦要經雪。驂駟待著鞭。淒涼悲故客。不及見華顛。

奉使契丹二十八首

次莫州通判劉涇韻二首

北國亦知岐有夷。何嘗烽火報驚危。擁爐絕漠聞嘉語。緩帶臨邊出好詩。約我一樽迎嗣歲。待君三館已多時。從今無事唯須飲。文字聲名人自知。

平世功名路甚夷。不勞談說更騎危。早年拭目看成賦。近日收心聞琢詩。古錦屢聞新得句。弊貂方競苦寒時。南還欲向春風飲。寒柳凋枯恐未知。

贈知雄州王崇極二首

趙北燕南古戰場。何年千里作方塘。煙波坐覺胡塵遠。皮幣遙知國計長。勝處舊聞荷覆水。此行猶及蟹經霜。使君約我南來飲。人日河橋柳正黃。

主辰使例以人日還至雄州

城裏都無一寸閑。城頭野水四汗漫。與君但對湖光飲。久病偏須酒令寬。何氏溝塍布棋局。李君智略走珠槃。應存父老猶能說。有意功名未必難。

贈右番趙侍郎

霜須顧我十年兄。朔漠陪公萬里行。駢馬貂裘寒自煖。連牀龜息夜無聲。同心便可忘苛禮。異類猶應服至誠。行役雖勞思慮少。會看黎棗及春生。

古北口道中呈同事二首

前一首呈趙侍郎。後一首呈二副使。

獨臥繩牀已七年。往來殊復少縈纏。心游幽闕鳥飛處。身在中原山盡邊。梁市朝回塵滿馬。蜀江春近水序天。枉將眼界疑心界。不見中宵氣浩然。笑語相從正四人。不須嗟歎久羣離。及春煮菜過邊郡。賜火煎茶約細君。目暖山蹊冬未雪。寒生胡月夜無雲。明朝對飲思鄉嶺。夷漢封疆自此分。

絕句二首

亂山環合疑無路。小徑縈回長傍溪。髣髴夢中尋蜀道。興州東谷鳳州西。日色映山才到地。雪花鋪草不曾消。晴寒不及陰寒重。攬篋猶存未著貂。

過揚無敵廟

行祠寂寞寄關門。野草猶知避血痕。一敗可憐非戰罪。太剛嗟獨畏人言。馳驅本爲中原用。嘗享能令異域尊。我欲比君周子隱。誅彤聊足慰忠魂。

燕山

燕山如長蛇。千里恨夷漢。首銜西山麓。尾掛東海岸。中開哆箕畢。末路牽一線。卻顧汝漠平。南來獨飛鴈。居民異風氣。自古習耕戰。上論召公奭。禮樂比姬旦。次稱望諸君。術略亞狐管。子丹號無策。亦數游俠冠。割棄何人斯。腥臊久不澣。哀哉漢唐餘。左衽今已半。王帛非足云。子女擢蹈踐。區區用戎索。久爾麩郡縣。從來帝王師。要在悔亡亂。攻堅甚攻玉。乘瑕易冰泮。中原但堂治。敵勢要自變。會當挽天河。洗此生齒萬。

趙君偶以微恙乘駟車而行戲贈二絕句

鄰國知公未可風。雙駟借與兩輪紅。他年出塞三千騎。臥畫輜車也要公。高屋寬箱虎豹棚。相逢燕市不相親。忽聞中有京華語。驚喜開簾笑殺人。

會仙館二絕句

北嶂南屏恰四周。西山微缺放溪流。胡人置酒留連客。頗識峯巒是勝游。嶺上西行雙石人。臨溪照水久逡巡。低頭似愧南來使。居處雖高已失身。

出山

燕疆不過占北關。連山漸少多平田。奚人自作草屋住。契丹駢車依水泉。橐駝羊馬散川谷。草枯水盡時一遷。漢人何年被流徙。衣服漸變存語言。力耕分穫世爲客。賦役希少聊偷安。漢奚單弱契丹橫。目視漢使心淒然。石塘竊位不傳子。遺患燕薊逾百年。仰傾呼天問何罪。自恨遠徂從祿山。此皆燕人語也。

奚君宅

在中京南

奚君五畝宅。封戶一成田。故壘開都邑。遺民雜漢編。不知臣僕賤。漫喜殺生權。燕俗嗟猶在。婚姻未許連。

惠州者

聞南朝逃叛者多在其間

孤城千室閉重闔。蒼莽平川絕四鄰。漢使塵來空極日。沙場雪重欲無春。羞歸應有李都尉。念舊可憐徐舍人。會逐軍于渭橋下。歎呼齊拜屬車塵。

神水館寄子瞻兄四絕

十一月二十六日是大風

少年病肺不禁寒。命出中朝敢避難。莫倚皂貂欺朔雪。更催靈火煑鉛丹。馬上作李若芝守一法似有功

夜雨從來相對眠。茲行萬里隔胡天。試依北斗看南斗。始覺吳山在目前。誰將家集過幽都。逢見胡人問大蘇。莫把文章動蠻貊。恐妨談笑臥江湖。虜廷一意問中原。言語綢繆禮亦虔。顧我何功慙陸賈。囊裝聊復助歸田。

木葉山

奚田可耕鑿。遼土直沙漠。蓬棘不復生。條幹何由作。茲山亦沙阜。短短見叢薄。冰霜葉隨盡。鳥獸紛無託。乾坤信廣大。一氣均美惡。胡爲獨窮陋。意似鄙夷落。民生亦復爾。詬汙不知怍。君看齊魯間。桑枯皆沃若。麥秋載萬箱。蠶老簇千箔。餘梁及狗彘。衣被遍城郭。天工本何心。地力不能博。遂令堯舜人。獨不施禮樂。

虜帳

虜帳冬住沙陀中。索羊織葦稱行宮。從官星散依冢阜。氈蘆窟室欺霜風。春梁煑雪安得飽。擊兔射鹿夸強雄。朝廷經略窮海宇。歲遺繒絮消頑凶。我來致命適寒苦。積雪向日堅不融。聯翩歲旦有來使。屈指已

復過奚封禮成卽日卷廬帳釣魚射鵝滄海東秋山旣罷復來此往返歲歲如旋蓬彎弓射獵本天性拱
手朝會愁心胸甘心五餌墮吾術勢類畜馬游樊籠祥符聖人會天意至今燕趙常耕農爾曾飲食自謂
得豈識圖霸光和戎

十日南歸馬上口占呈同事

南轅初喜去龍庭入塞猶須閱月行漢馬亦知歸意速朝陽已作故人迎經冬舞雪長相避屈指新春旋
復生想見雄州饋生菜菜盤酪粥任縱橫

傷足

少年謬聞道直往寡所疑不知避礙嶮造次逢顛危中歲飽憂患進退每自持長存鄙夫計未免達士嗤
前日使胡罷晝夜心南馳中塗冰塞川混漾無津涯僕夫執轡前我心志止之馬眩足不禁拉然臥中抵
異域非所息據鞍幾不支昔嘗誦楞嚴聞有乞食師行乞遭毒刺痛劇侵肝脾念覺雖覺痛無痛痛覺知
念極良有見遂與凡夫辭我今亦悟此先佛豈見欺但爾不卽證欲往常遲遲咄哉後來心當與初心期

春日寄內

春到燕山冰亦消歸驂迎日喜嫖姚久行胡地生華髮初試東風脫弊貂插髻小幡應正爾點齏生菜爲
誰挑附書勤掃東園雪到日青梅未滿條

渡桑乾

北渡桑乾冰欲結心畏窮廬三尺雪南渡桑乾風始和水開易冰應生波窮廬雪落我未到到時墜白如

磐陀會同出入凡十日。腥羶酸薄不可食。羊脩乳粥差使人。風隧沙場不宜客。相攜走馬渡桑乾。旌旆一返無由還。胡人送客不忍去。久安和好依中原。年年相送桑乾上。欲話白溝一惆悵。

送文太師致仕還洛三首

國老無心豈爲身。五年朝謁慰簪紳。元臣事業通三世。舊將威名服四鄰。遍閱後生真有道。欲談前事恐無人。比公惟有凌雲楹。歲歲何妨雨露新。

齊魯元勳古太師。寂寥千載恐無之。昔歸整縮經邦手。後起還當問道時。入謁何曾須掖侍。到家依舊擁旌麾。孔公靈壽固應在。秋晚香山訪佛祠。

西都風物漢唐餘。天作溪山養退居。盈尺好花扶几杖。拂天脩竹倚庭除。白頭伴侶誰猶健。率意壺飧夕已疎。公昔與司馬公同居洛下常與諸老爲真率之會酒肴果蔬隨有而具我欲試求三畝宅。從公它日賦歸歟。先人昔游洛中有小宅之未暇耳

李公麟陽關圖二絕

百年摩詰陽關語。三疊嘉榮意外聲。誰遣伯時開縞素。蕭條邊思坐中生。西出陽關萬里行。彎弓走馬自忘生。不堪未別一盃酒。長聽佳人泣渭城。

學士院端午帖子二十七首

皇帝閣六首

溽暑避華構。清風迎早朝。楓槐高自舞。冰雪晚初消。

南訛初應曆。五日未生陰。靈藥收農錄。薰風拂舜琴。

又

皇心本夷曠。一氣自炎涼。不廢荆吳舊。民風見未央。

又

九門已散秦醫藥。百辟初頒凌室冰。飲食祈君千萬壽。良辰更上辟兵繒。
雨遲麥粒尤堅好。日麗蠶絲轉細長。入夏民間初解慍。宮中時舉萬年觴。
汴上初無招屈亭。沅湘近在國南垆。太官漫解供新糴。諫列猶應記獨醒。

太皇太后閣六首

決獄初迎雨。開倉旋取陳。青黃今接夏。飢疫免憂春。

又

簾密風時度。宮深日倍長。紵羅隨節賜。黍麥趁新嘗。

又

執熱寧忘濯。清心自釋煩。東朝聞好語。畏日解餘暄。

又

出磨玉塵除舊廩。捧箱綵縷看新絲。一年豐樂今將半。兩殿歡聲外得知。

舟楫喧呼招屈處。禽魚鼓舞放生中。百官卻拜臯羹賜。凶去方知舜有功。
玉殿清虛過暑天。草廬煩促念民編。外家近許遷新宅。不遣司農費一錢。

皇太后閣六首

壽康朝謁蚤。長信燕閒多。不有圖書樂。其如晝漏何。

又

玉宇宜朱夏。壺冰生晚涼。深心念行喝。清夜久焚香。

又

蠶宮罷採搗。暴室獻朱黃。翁呷霜紈動。闌班綵縷長。

又

六宮無事著嬉游。百藥初成及早收。蒿歎還羞十二節。椿年自占八千秋。
萬壽仍榮長命縷。虛心不著赤靈符。民間風俗疑當共。天上清高定爾無。
楊子江心瀉鏡龍。波如細縠不搖風。宮中驚捧秋天月。長照人心助至公。

皇太妃閣五首

曉起鐘猶凝。朝回露欲乾。逡巡下清蹕。委曲問平安。

又

壓蔗出寒漿。敲冰簇畫堂。人間正杳暑。天上絕清涼。

又

九夏清齋奉至尊。消除癘疫去無痕。太醫爭獻天師艾。瑞霧長縈堯母門。
紈扇新裁冰雪餘。清風不隔紵羅疎。飛昇漫寫秦公子。榮謝應憐漢婕妤。
渺渺金河入禁垣。漸臺雨過碧波翻。共傳太液龍舟穩。不似南方兢渡喧。

夫人閣四首

脩廈欺晴日。重簾度細風。羣仙不煩促。長在廣寒宮。

又

尋芳空茂木。鬪草得幽蘭。歌舞纖絳健。嬉游玉佩珊。

又

新煮青筠稻米香。旋抽獨蠶薄羅光。剩堆雕俎添崖蜜。爭作輕衫薦壽觴。
御溝遶殿細舞聲。飛灑彤墀曉氣清。開到石榴花欲盡。陰陰高柳一彈鳴。

次韻門下劉侍郎直宿寄蘇左丞

雷雨連年起臥龍。穆然臺閣有清風。一時畫諾雖云舊。此日都俞本自公。
松竹經霜俱不改。鹽梅共鼎固非同。一篇和徧東西府。六律更成十二宮。

次韻張耒學士病中二首

一臥憐君三十朝。呼醫仍苦禁城遙。靈根自逐新陽發。病枿從經野火燒。
勿燥未須尋麩麩。囊空誰與典

絳蕉。何時匹馬隨街鼓。睡起頻驚脾肉消。
塵垢汗人朝復朝。病中吟嘯夜方遙。長空鴈過疑相答。虛幌螢飛坐恐燒。稍覺新霜試松竹。未應寒雨敗
梧桐。從來百鍊身如劍。火滅重磨未遽銷。

次韻張君病起二首

壯年得疾勢能支。不廢霜螯左手持。漸喜一杯留好客。未應五斗似當時。口中舌在時聞句。雪裏心安不
問師。去臥淮陽從病守。功名他日許君期。
老去生經廢不行。鏡中白髮見空驚。解將冲氣通枯指。易甚新陽發舊莖。一悟少年難久恃。不妨多病卻
長生。文章繆忝推前輩。服食從來亦強名。

此页空白

欒城集卷第十七

賦八首

巫山賦

過瞿唐之長江兮。蔚巫山之嵯峨。雲孤興其勃勃兮。北風慨其揚波。山嶽峯而直上兮。越至神女之所家。峯連屬以十二兮。其九可見而三不知。蹊遂蕪滅而不可陟兮。玄猿黃鵠四顧而鳴悲。覽松柏之青青兮。紛其若江上之菰蒲。維其大之不可知兮。有橈雲之脩柯。蔓草蒙茸以下翳兮。飛泉潔清而無沙。亭亭孤峯。其下叢木交錯而不明兮。若有美人慘然而長嗟。斂手危立以右顧兮。舒目遠望。恍然而有所懷。儼峨峨其有禮兮。盛服寂寞而無譁。臨萬仞之絕嶮兮。獨立千載而不下。願追懷楚襄之放意肆志兮。泝江千里而遠來。離國去俗兮。徘徊而不能歸。悲神女之不可以朝求而夕見兮。想遊步之逶遲。築陽臺於江干兮。相氛氣之參差。惟神女之不可以求得兮。此其所以爲神。汪洋其無心兮。豈其猶有懷乎世之人。朝雲蔚其晨興兮。暮雨紛以下注。變化倏忽不可測兮。俄爲鳥而騰去。忽然而爲人兮。佩玉鏘以琅琅。愛江流之清波兮。安燕處乎高唐。彼蛟龍之多智兮。尙不可執以置學。高丘深其蒼蒼兮。悅誰識其有無。

屈原廟賦

淒涼兮秭歸。寂寞兮屈氏。楚之孫兮原之子。伉直遠兮復誰似。宛有廟兮江之浦。予來斯兮酌以醑。吁嗟神兮生何喜。九疑陰兮湘之涘。鼓桂楫兮蘭爲舟。橫中流兮風鳴厲。忽自溺兮曠何求。野莽莽兮舜之丘。

舜之牆兮。繚九周。中有長遂兮。可駕以遊。揉玉以爲輪兮。斲冰以爲之軌。伯翳俯以御馬兮。皋陶爲予參乘。慘然愍予之強死兮。泫然涕下而不禁。道予以登夫重丘兮。紛古人其若林。悟伯夷以太息兮。焦衍爲予而歔歔。古固有是兮。予又何怪乎當今。獨有謂予之不然兮。夫豈柳下之展禽。彼其所處之不同兮。又安可以謗予。抱關而擊析兮。余豈責以必死。宗國郎而不救兮。夫子舍是安去。予將質以重華兮。蹇將語而出涕。予豈如彼婦兮。夫不仁而出訴。慘默默予何言兮。使重華之自爲處。予惟樂夫揖讓兮。坦平夷而無憂。朝而從之遊兮。顧子使予昌言。言出而無忌兮。暮還寢而燕安。嗟平生之所好兮。旣死而後能。然彼鄉之人兮。孰知予此歎。忽友顧以千載兮。喟故宮之頽垣。

缸硯賦并敘

先蜀之老有姓滕者。能以藥煑瓦石。使軟可割如土。嘗以破釀酒缸爲硯。極美。蜀人往往得之。以爲異物。余兄子瞻嘗遊益州。有以其一遺之。子瞻以授余。因爲之賦。

有物於此。首枕而足履。大胸而大膺。杯首而箕制。其壽百年。骨肉破碎而獨化爲是。其始也。生乎黃泥之中。其成也。出乎烈火之下。尾銳而腹皤。長頸而巨口。鋪糟啜酒。終日醉飽。外堅中虛。膚密理解。偶與物鬪。脅漏內稿。棄於路隅。瓦礫所汝。忽然逢人。藥石包裹。不我謂瑕。治以鼎鼎。烹煎不辭。斧鑿見剖。一爲我形。沃我以水。汗我以煤。處我以几。子旣博物之識。已否。客曰。嗟夫。物之成也。則必固有毀也。邪。物之毀也。則又不可謂棄也。邪。旣成而毀者。悲其棄也。旣棄而復用者。又悲其用也。是亦大惑而已矣。且以予觀之。昔子則非開口而受溼。迦辛含酸而不得守。子之性者。邪。今子則非坦腹而受污。模糊彌漫而不得保。子之

正者邪。且其飲子以水也。不若飲子以酒。以物汙子也。不若使子自保。子果以此自悲也。則亦不見夫諸毛之捽拔。諸楮之爛靡。殺身自鬻。求效於此。吐詞如雲。傳示萬里。子不自喜而欲其故。則吾亦謂子惡名而喜利。棄溪而嗜美。終身陷溺而不知止者。可足悲矣。

登真興寺樓賦

季夏六月。子瞻與張戶曹。琥同遊真興寺。晚登寺後重閣。南望連山如畫。山前有白鷺十數。杳杳飛去。東南望五丈原。原有白雲如覆釜。慨然思孔明之遺迹。作書與轍曰。可以賦此。賦曰。

涉六月之徂暑兮。溯秦川而遠望。樓馮高而遽遽兮。曰將薄乎西方。牛羊相從而下來兮。孤煙特起於蒼茫。南望連山之參差兮。奔走相屬而騰驤。桀業峨其雄高兮。惟太白與終南。林阜蔚以扶拱兮。浩合沓而穰穰。若羣馬之相追逐兮。忽鬱怒而狂章。駢交首以磨頸兮。紛絕馳於四方。日將入而山陰兮。天黝黝而茫茫。淡平雲之凝碧兮。白鷺歸以勦翔。裊裊其彌遠兮。聲斷絕而復揚。眇將沒而猶見兮。飄若仙人之不可望。曠羣歸於何所兮。徂南澗之泱泱。回東望夫脩隆兮。隱高原曰五丈。思古人而不可見兮。涕橫流以浪浪。雲塊軋其不起兮。若覆釜而在上。嗟一日之所見兮。蓋千變以異狀。忽已去而莫執兮。夫豈勝乎追想。強馳詞於千里兮。增異日之惆悵。維古事之亦然兮。偶一世之所向。非有意於求慕兮。徒今世之追賞。雖孔明其何益於五丈兮。使無原其忘亮。覽川原而思古兮。悅亡弓之遺軫。

超然臺賦并敘

子瞻既通守餘杭。三年不得代。以轍之在濟南也。求爲東州守。既得請高密。其地介於淮海之間。風俗

朴陋四方賓客不至。受命之歲。承大旱之餘孽。驅除螟蝗。逐捕盜賊。廩卹飢饉。日不遑給。幾年而後少安。顧居處隱陋。無以自放。乃因其城上之廢臺而增葺之。日與其僚覽其山川而樂之。以告轍曰。此將何以名之。轍曰。今夫山居者知山林。居者知林。耕者知原。漁者知澤。安於其所而已。其樂不相及也。而臺則盡之。天下之士奔走於是。非之場。浮沈於榮辱之海。罵然盡力而忘反。亦莫自知也。而達者哀之。二者非以其超然不累於物故邪。老子曰。雖有榮觀。燕處超然。嘗試以超然命之可乎。因爲之賦以告曰。

東海之濱。日氣所先。巋高臺之陵空兮。溢晨景之絜鮮。幸氛翳之收霽兮。逮朋友之燕閒。舒堙鬱以延望兮。放遠目於山川。設金羈與玉鞞兮。清醪潔其如泉。奏絲竹之憤怨兮。聲激越而眇緜。下仰望而不聞兮。微風過而激天。曾陟降之幾何兮。棄溷濁乎人間。倚軒楹以長嘯兮。袂輕舉而飛翻。極千里於一瞬兮。寄無盡於雲煙。前陵阜之洶湧兮。後平野之澗漫。喬木蔚其蓁蓁兮。興亡忽乎滿前。懷故國於天末兮。限東西之嶮艱。飛鴻往而莫及兮。落日耿其夕躔。嗟人生之漂搖兮。寄流楫於海壖。苟所遇而皆得兮。遑旣擇而後安。彼世俗之私已兮。每自予於曲全。中變潰而失故兮。有驚悼而汎瀾。誠建觀之無不可兮。又何有於憂患。顧遊宦之迫隘兮。常勤苦以終年。盍求樂於一醉兮。滅膏火之焚煎。雖晝日其猶未足兮。埃明月乎林端。紛旣醉而相命兮。霜凝蹙而跼躄。馬躑躅而號鳴兮。左右翼而不能鞍。各雲散於城邑兮。徂清夜之旣闌。惟所往而樂易兮。此其所以爲超然者邪。

余少而多病。夏則脾不勝食。秋則肺不勝寒。治肺則病肺。平居服藥。殆不復能愈。年三十有二。官於宛丘。或憐而受之。以道士服氣法行之。暮年二疾良愈。蓋自是始有意養生之說。晚讀抱朴子書。言服氣與草木之藥。皆不能致長生。古神仙真人。皆服金丹。以爲草木之性。埋之則腐。煑之則爛。燒之則焦。不能自生。而況能生人乎。余既汨沒世俗。意金丹不可得也。則試求之草木之類。寒暑不能移。歲月不能敗者。惟松柏爲然。古書言松脂流入地下。爲茯苓。茯苓又千歲則爲琥珀。雖非金石。而其能自完也。亦久矣。於是求之名山。屑而淪之。去其脈絡。而取其精華。庶幾可以固形養氣。延年而卻老者。因爲之賦。以道之。詞曰。

春而榮。夏而茂。憔悴乎風霜之前。摧折乎冰雪之後。閱寒暑以同化。委糞壤而兼朽。茲固百草之微細。與衆木之凡陋。雖復效骨革於刀几。盡性命於杵臼。解急難於俄頃。破奇邪於邂逅。然皆受命淺薄。與時變遷。朝菌無日。蟪蛄無年。苟自救之不暇。矧他人之足延。乃欲擷根莖之么末。假臭味以登仙。是猶託疲牛於千里。駕鳴鳩而升天。則亦辛勤於澗谷之底。槁死於峯崖之顛。顧桑榆以竊歎。意神仙之不然者矣。若夫南澗之松。拔地千尺。皮厚犀兕。心堅鐵石。鬚髮不改。蒼然獨立。流膏液於黃泉。乘陰陽而固結。象鳥獸之蹲伏。類龜鼈之閉蟄。外黝黑以鱗皴。中絜白而純密。上灌莽之不犯。下螻蟻之莫賊。經歷千歲。化爲琥珀。受雨露以彌堅。與日月而終畢。故能安魂魄而定心志。卻五味與穀粒。追赤松於古上。以百歲爲一息。顏如處子。綠髮方目。神止氣定。浮遊自得。然後乘天地之正。御六氣之辨。以遊夫無窮。夫又何求而何食。

墨竹賦

與可以墨爲竹。視之良竹也。客見而驚焉。曰：今夫受命於天，賦形於地，涵濡雨露，振蕩風氣，春而萌芽，夏而解弛，散柯布華，逮冬而遂。性剛絜而疎直，姿嫋娟以閑媚。涉寒暑之徂變，傲冰雪之凌厲。均一氣於草木，嗟壤同而性異。信物生之自然，雖造化其能使。今子研青松之煤，運脫兔之毫，睥睨牆堵，振洒繒綃。須臾而成，鬱乎蕭騷，曲直橫斜，穠纖庫高，竊造物之潛思。賦生意於崇朝，子豈誠有道者耶？與可聽然而笑曰：夫子之所好者道也，放乎竹矣。始子隱乎崇山之陽，廬乎脩竹之林，視聽漠然，無槩乎予心。朝與竹乎爲游，莫與竹乎爲朋。飲食乎竹間，偃息乎竹陰。觀竹之變也多矣。若夫風止雨霽，山空日出，猗猗其長，森乎滿谷。葉如翠羽，筠如蒼玉。澹乎自持，淒兮欲滴。蟬鳴鳥噪，人響寂歷。忽依風而長嘯，眇掩冉以終日。箏含籀而將墜，根得土而橫逸。絕澗谷而蔓延，散子孫乎千億。至若叢薄之餘，斤斧所施，山石犖塉，荆棘生之。蹇將抽而莫達，紛旣折而猶持。氣雖傷而益壯，身以病而增奇。淒風號怒乎隙穴，飛雪凝沍乎陂池。悲衆木之無賴，雖百圍而莫支。猶復蒼然於旣寒之後，凜乎無可憐之姿。追松柏以自偶，竊仁人之所爲。此則竹之所以爲竹也。始也余見而悅之，今也悅之而不自知也。忽乎忘筆之在手，與紙之在前。勃然而興，而脩竹森然。雖天造之無朕，亦何以異於茲焉？客曰：蓋子聞之庖丁解牛者也，而養生者取之。輪扁斲輪者也，而讀書者與之。萬物一理也，其所從爲之者異爾。況夫夫子之託於斯竹也，而予以爲有道者則非耶？與可曰：唯唯。

黃樓賦

熙寧十年秋七月乙丑，河決於澶淵，東流入鉅野，北溢于濟，南溢于泗。八月戊戌，水及彭城下。余兄子

瞻適爲彭城守水未至使民具畚鍤畜土石積芻茭完窒隙穴以爲水備故水至而民不恐自戊戌至九月戊申水及城下有二丈八尺塞東西北門水皆自城際山雨晝夜不止子瞻衣製履屨廬於城上調急夫發禁卒以從事令民無得竊出避水以身帥之與城存亡故水大至而民不潰方水之淫也汗漫千餘里漂廬舍敗冢墓老弱蔽川而下壯者狂走無所得食槁死於丘陵林木之上子瞻使習水者浮舟楫載糗餌以濟之得脫者無數水旣涸朝廷方塞澶淵未暇及徐子瞻曰澶淵誠塞徐則無害塞不塞天也不可使徐人重被其患乃請增築徐城相水之衝以木堤捍之水雖復至不能以病徐也故水旣去而民益親於是卽城之東門爲大樓焉堽以黃土曰土實勝水徐人相勸成之轍方從事於宋將登黃樓覽觀山川弔水之遺迹乃作黃樓之賦其詞曰

子瞻與客遊於黃樓之上客仰而望俯而歎曰噫嘻殆哉在漢元光河決瓠子騰蹙鉅野衍溢淮泗梁楚受害二十餘歲下者爲汙澤上者爲沮洳民爲魚鼈郡縣無所天子封祀泰山徜徉東方哀民之無辜流死不藏使公卿負薪以塞宣房瓠子之歌至今傷之嗟惟此邦俯仰千載河東傾而南洩蹈漢世之遺害包原隰而爲一窺吾墉之摧敗呂梁齟齬橫絕乎其前四山連屬合圍乎其外水洄洑而不進環孤城以爲海舞魚龍於瑄壑閱帆檣於睥睨方飄風之迅發震鞀鼓之驚駭誠蟻穴之不救分閭閻之橫潰幸冬日之旣迫水泉縮以自退棲流枿於喬木遺枯蚌於水裔聽澶淵之奏功非天意吾誰賴今我與公冠冕裳衣設几布筵斗酒相屬飲酣樂作開口而笑夫豈偶然也哉子瞻曰今夫安於樂者不知樂之爲樂也必涉於害者而後知之吾嘗與子馮茲樓而四顧覽天宇之宏大繚青山以爲城引長河而爲帶平臬衍

其如席。桑麻蔚乎旆旆。畫阡陌之從橫。分園廬之向背。放田漁於江浦。散牛羊於煙際。清風時起。微雲灑
霽。山川開闔。蒼莽十里。東望則連山參差。與水皆馳。羣石傾奔。絕流而西。百步湧波。舟揖紛披。魚鼈顛沛。
沒人所嬉。聲崩震雷。城堞爲危。南望則戲馬之臺。巨佛之峯。歸乎特起。下窺城中。樓觀翺翔。崑峨相重。激
水旣平。眇莽浮空。駢洲接浦。下與淮通。西望則山斷爲玦。傷心極目。麥熟禾秀。離離滿隰。飛鴻羣往。白鳥
孤沒。橫煙澹澹。俯見落日。北望則泗水滌漫。古汴入焉。匯爲濤淵。蛟龍所蟠。古木蔽空。烏鳥號呼。賈客連
檣。聯絡城隅。送夕陽之西盡。導明月之東出。金鉦湧於青嶂。陰氛爲之辟易。窺人寰而直上。委餘彩於沙
磧。激飛楹而入戶。使人體寒而戰栗。息洶洶於羣動。聽川流之蕩滈。可以起舞相命。一飲千石。遺棄憂患。
超然自得。且子獨不見夫昔之居此者乎。前則項藉劉戊。後則光弼建封。戰馬成羣。猛士成林。振臂長嘯。
風動雲興。朱閣青樓。舞女歌童。勢窮力竭。化爲虛空。山高水深。草生放墟。蓋將問其遺老。旣已灰滅。而無
餘矣。故吾將與子弔古人之旣逝。閔河決於疇昔。知變化之無在。付杯酒以終日。於是衆客釋然而笑。頽
然就醉。河傾月墮。攜扶而出。

欒城集卷第十八

辭五首

御風辭題鄭州列子祠

子列子行御風。風起蓬蓬。朝發於東海之上。夕散於西海之中。其餘冷然。其怒勃然。衝擊隙穴。震蕩宇宙。披拂草木。奮厲江海。強者必折。弱者必從。俄而休息。天地肅然。塵埃皆盡。欲執而視之。不可得也。蓋歸於空。今夫子晝無以食。夜無以寢。鄰里忽之。弟子疑之。則亦鄭東野之窮人也。然而徐行不見。徒步疾行不見。車馬與風皆逝。與風皆止。旬有五日而後反。此亦何功也哉。子列子曰。嘻。子獨不見夫衆人乎。貧者菴蒲以爲履。斲柳以爲屐。富者伐檀以爲輻。象駟以爲服。因物之自然。以致千里。此與吾初無異也。而何謂不同乎。苟非其理。履屐足以折趾。車馬足以毀體。萬物皆不可御也。而何獨風乎。昔吾處乎蓬華之間。止如枯株。動如槁葉。居無所留。而往無所從也。有風瑟然。拂吾蘆而上。攝衣從之。一高一下。一西一東。前有飛鳶。後有遊鴻。雲行如川。奕奕溶溶。陰陽變化。顛倒橫從。不眎海嶽。光蕩青紅。蓋雜陳於吾前者。不可勝窮也。而吾方黜聰明。遺心胸。足不知所履。手不知所馮。澹乎與風爲一。故風不知有我。而吾不知有風也。蓋兩無所有。譬如風中之飛蓬耳。超然而上。薄乎雲霄。而不以爲喜也。拉然而下。隕乎坎井。而以爲凶也。夫是以風可得而御矣。今子以子爲我。立乎大風之隧。凜乎恐其不能勝也。蹙乎恐其不能容也。手將執而留之。足將騰而踐之。目眩耀而憂墜。耳洶湧而知畏。紛然自營。子不自安。而風始不安。子躬矣。子輕如

鴻毛。彼將以爲千石之鍾。子細如一指。彼將以爲十仞之墉。非傾而覆之。拔而投之不厭也。況欲與之道遙。翱翔放於大空乎。子雖蹈后土而倚嵩華。亦將有時而窮矣。古之至人。入水而不濡。入火而不熱。苟爲無心。物莫吾攻也。而獨疑於風乎。於是客起而歎曰。廣矣大矣。子之道也。吾未能充之矣。風未可乘。姑乘傳而東乎。

上清辭宮在太白山。
同子瞻作。

帝蕩蕩其無尊兮。居深高乎九關。顧后土之茫昧兮。若世人之觀天。雲冥冥其無見兮。曰其下維神姦。山重深而海廣兮。憂百鬼之傷人。屬神媪以九土兮。畀海若以九川。時節降以督視兮。下斗鬼之神君。吁嗟君兮。吾不可得而訊也。庸使我待之人兮。其使我以爲神也。朝求兮山顛。夕采兮澗涘。取荷華兮菱實。拾芳蘭兮白芷。鹿伎伎兮來置。魚揖揖兮趨餌。秋風高而稻熟兮。寒泉冽其清泚。爲酒醴以跪酌兮。斷白茅而爲委。嗟天上其何食兮。畏神君之不吾以。進屏息以薦恪兮。退俯偃而仰俟。爲善得福兮。畀惡以死。恐懼受賜兮。怠傲獲罪。玉食有不享兮。會潢汗蕨微之不棄。謂神君之不可知兮。何好惡之吾似。跨脩龍之百尋兮。騰怒髮而上指。從千騎之飄忽兮。拂長劍其天倚。殞星殃於太極兮。霍雲散而風靡。還祕殿之清深兮。目流電其不可仰視。望威神而股栗兮。知其中之人耳。致吾有以薦誠兮。庶其可得而祀也。

楊樂道龍圖哀辭并敘

嘉祐五年三月。轍始以選人至流內銓。是時楊公樂道以天章閣待制調銓之官吏。見予於稠人中。曰。聞子求舉直言。若必無人。敢願得備數。轍曰。唯。既而至其家。一見坐語。如舊相識。明年。予登制科。公以

諫官爲考官祕閣。又明年四月公薨。方其病也。予見於其寢。莫然無言曰。死矣。將以寂滅爲樂。蓋予之識公始三歲矣。三歲之中。不過數十見。公齒甚長。予甚少。公已貴。予方貧賤。見之輒歡樂笑語。終日不厭。釋然忘其老且貴也。蓋公死。士大夫相與痛惜其不幸。而予又竊有以私懷之。公本河東人。家世將家。有功於國。公始以文詞得官。其後將兵南方。與蠻戰。亦有功。其爲將。能與士卒均勞苦。飲食比其最下者。而軍行常處其先。以此得其死力。常學李靖兵法。知其出入變化之節。其稱曰。今之人才不及古人。多將輒爲所昏。嘗於南方以數千卒自試。自度可以復益數千人而不亂。然公之與人。謹畏循循。無所迂。平居遇小事。若不能決。人皆怪其能。將以破賊。疑其無以處之。不知其中有甚勇者。人不及也。蓋其謹畏循循者。所以爲勇。而人莫知之。卒時年五十有六。素病瘦。甚羸。然平居讀書勤苦。過於少年。好爲詩。喜大書。皆可愛。有子一人。生始二歲。將卒。名之曰祖仁。既卒。家無遺財。以故衣斂。仰於官及其友人以葬。以克養其家。將以七月葬于洛陽。五月。其家以其柩歸。作哀辭以遺其紼者。歌之。辭曰。

嗟夫楊公。歸來兮。洛之上。其土厚且溫。生年五十六。有子以祭兮。何慕而不若人。天子憐爾。贈金孔多兮。家可以不貧。平生不爲惡。死而有遺愛兮。雖亡則存。家本將家。有功而不墜兮。配祖以孫。爲人至此。非有不足兮。可以無憾。而人爲悲辛。嗟夫楊公歸來兮。家有弱子。恃爾神。

劉凝之屯田哀辭并敘

元豐三年九月辛未。廬山隱居劉凝之卒于山之陽。其孤格書來赴曰。君昔知吾兄。既又識吾父。今不幸至於大故。其爲詩使挽者歌之。以厚其葬。十月乙酉。葬于清泉鄉。書不時至。緩不及事。乃哭而爲之。

辭。始予自蜀遊京師。識凝之長子恕。道原博學強識。能通三墳五典。春秋戰國歷代史記。下至五代分
裂。皆能言其治亂得失。紀其歲月。辨其氏族。而正其同異。上下數千歲。如指諸左右。其爲人剛中少容。
是非非非。未嘗以語假人。人多疾之。翰林學士司馬公方受詔。紬書東觀。以君爲屬。公以直名當世。而
君尤甚。雖公亦嚴憚之。士知君者曰。君非獨然。君父凝之始以剛直不容於世俗。棄官而歸。老於廬山。
二十年矣。君亦非久於此者也。旣而君得請以歸。養其親。三年得疾不起。今年春。予以罪謫高安。過君
之廬。傷君之不復見。拜凝之於牀下。其容晬然以溫。其言肅然以厲。環堵蕭然。饘粥以爲食。而遊心塵
垢之外。超然無感感之意。凜乎其非今世之士也。然予之見凝之。始得道士法。卻五穀。糞棗以爲食。氣
清而色和。及其沒也。晨起衣冠。言語如平時。無疾而終。予然後知君父子皆有道者。然道原一斥不用。
遂往而不能返。凝之隱居絕俗。三十餘年。神益彊。氣益堅。盡其天年。物莫能傷。其清則同。而其擴達自
遂。道原不及也。辭曰。

伯夷之清。百世而一人兮。其生也。微以爲食。餓死於首陽。世之士謂清不可爲兮。計較得失。以和爲臧。信
和之可以浮沈而自免兮。彼爲和者何三黜之皇皇。曰爲道者不與命謀兮。非和實得。非清實喪。若凝之
爲父。與原之爲子兮。絜廉不撓。冰清而玉剛。如世之言當皆折兮。原何獨短。凝何獨長。要長短之不可以
命人兮。適天命之不可常。惟溷濁之不可居。而狷潔之難久兮。吾將與凝乎同鄉。

鮮于子駿諫議哀辭并敘

中山鮮于子駿。弱冠而仕。老而不得志。買田於陽翟。蓋將終焉。元祐元年。始召爲諫議大夫。朝廷以得

人相慶。而子駿亦不敢以老爲辭。意將有所建焉。居數月。得足疾。不能造朝。卽自引去。得請淮陽。未幾。以不起聞。士之識與不識。皆爲之出涕。夫死生得喪。非子駿之憂。而有志不獲。爲可悲也。子駿於書無所不讀。而善屬文。晚節爲楚詞。得古之遺思。其文與蜀郡文與可相上下。與可沒將十年。而子駿亡。蜀人皆悲思之。其子頡求予爲挽歌。作楚辭以授之。以爲子駿之意也。

登嵩高兮捫天。涉清潁兮波瀾。中休息兮故韓。有美人兮來居。曳佩玉兮長裾。內諒直兮外脩。車還軫兮莫予留。築室兮疏流。植榦兮蒔芳。雪積兮中谷。曰予俟兮春陽。春風至兮百鳥鳴。升高禾兮雨亦晴。鳴一再兮驚人。時不予兮徂征。美人兮駕長離。來逡巡兮往奔馳。命不可兮奈何。號帝關兮訴予。予攀木蘭兮茹紫芝。子飲石泉兮濯流波。不妄食兮裴回。莫之飽兮不飢。游於斯兮伏斯。命有盡兮孰違。心不滅兮亭亭。倚嵩少兮長歎。

詩六首

太白山祈雨詞

同子瞻作

田漫漫。耕挹挹。拔陳草。生九穀。人功盡。雨則遠。苗不穗。莩不米。哀將飢兮。山巖巖。奠南西。嗟我民。匪神依。伐山木。莪稷黍。求旣多。訴不已。猶我許兮。山爲灰。石爲炭。水泉沸。百草爛。神予我。早奪之。孰爲是。驕不威。尙可弛兮。雷馮空。雨騰淵。誅孽妖。反豐年。顧千里。瞬三日。神在堂。龍爲役。是何惜兮。雨旣止。百穀復。築場壤。治困篋。爲酒醴。伐豚羔。舞長袖。擊鳴鼉。匪以報兮。

舜泉詩并敘

始余在京師。遊宦貧困。思歸而不能。聞濟南多甘泉。流水被道。蒲魚之利。與東南比。東方之人多稱之。會其郡從事闕。求而得之。既至。大旱幾歲。赤地千里。渠存而水亡。問之。其人曰。城南舜祠有二泉。今竭矣。越明年夏。雖雨而泉不作。人相與驚曰。舜其不復享耶。又明年夏。大雨霖。麥禾荐登。泉始復發。民驩曰。舜其尚顧我哉。泉之始發。潞爲二池。醴爲石渠。自東南流於西北。無不被焉。灌漑播灑。蒲蓮魚鼈。其利滋大。因爲詩。使祠者歌之。詩曰。

歷山崑崙。虞舜宅焉。虞舜徂矣。其神在天。其德在人。其物在泉。神不可親。德用不知。有冽斯泉。下民是祇。泉流無疆。有永我思。源發于山。施于北河。播于中逵。匯爲澄波。有鼈與魚。有菱與荷。蒞毒是洩。汙濁以流。埃壙消亡。風火滅收。叢木敷榮。勞者所休。誰爲旱災。靡物不傷。天地耗竭。泉亦淪亡。民咸不寧。曰不享耶。時雨旣澍。百穀旣登。有流泫然。彌坎而升。溝洫滿盈。鰕黽沸騰。匪泉實來。帝實顧余。執其羔豚。蘋藻是蒞。帝今在堂。泉復如初。

銘二首

彭城漢祖廟試劍石銘

漢高皇帝廟有石。高三尺六寸。中裂如破竹。不盡者寸。父老曰。此帝試劍石也。熙寧十年。蜀人蘇軾爲彭城守。弟轍實從入廟。觀石而爲之銘曰。

維漢之興。三代無有。提劍一呼。豪傑奔走。厥初自試。山石爲剖。夜斷長蛇。旦泣神母。指麾東西。秦項授首。

歛然三尺。一夫之偶。大人將之。山嶽頽仆。用巨物靈。不復凡手。武庫焚蕩。帝命下取。歸然斯石。不尙有舊。鳳味石硯銘

北苑茶冠天下。歲貢龍鳳團。不得鳳凰山味。潭水則不成。潭中石蒼黑。堅緻如玉。以爲研。與筆墨宜。世初莫知也。熙寧中。太原王頤始發其妙。吾兄子瞻始名之。然石性薄。厚者不及寸。最後得此。長博豐碩。蓋石之傑。子瞻方爲易傳。日効於前。與有功焉。爲之銘曰。陶土塗鑿崖石。玄之蠹。穎之賊。涵清泉。悶重谷。聲如銅。色如鐵。性滑堅。善凝墨。棄不取。長歎息。招伏羲。揖西伯。發祕藏。與有力。非相待。誰爲出。

頌二首

筠州聰禪師得法頌并敘

禪師聰公。昔以講誦爲業。晚游淨慈本師之室。誦南嶽思大本和尙口吞三世諸佛語。迷悶不能入。一日爲本燒香。本曰。吾疇昔爲汝作夢。甚異。汝不悟卽死。不可不勉。師茫然不知所謂。旣而禮僧伽像。醒然有覺。知三世可吞無疑也。趨往告本。本曰。向吾夢汝吞一世界一剃刀。汝今日始從迷悟。是始出家。真吾子也。乃擊鼓升座。爲衆說此事。聰作禮涕泣而罷。聰住高安聖壽禪院。予嘗從之問道。聰曰。吾師本公未嘗以道告人。皆聽其自悟。今吾亦無以告子。子從不告門。久而入道。乃爲頌曰。

道不可告。告卽不得。以不告告。是真告。敕香嚴辭去。得之瓦礫。臨濟不喻。至愚而悉。非愚非瓦。皆汝之力。有不至此。是非出家。夢吞剃刀。髮落如花。遊行四方。物莫能遮。終亦不告。獨障其邪。弟子度者。如恆河沙。

等軒頌

南豐張君家有等軒。問我何者。是平等法。我告張君。物之不齊。何所不有。長短大小。淨穢好醜。雜然首陳。參差不等。亂我身心。耳目鼻口。欲求平等。了不可得。忽然覺知。身心本空。萬物亦空。諸差別相。皆是虛妄。無有失性。熟爲不等。等爲一空。尙無平等。何處復有不平等者。遍觀萬物。無等不等。是謂真實平等法已。

欒城集卷第十九

新論三首

新論上

古之君子。因天下之治。以安其成功。因天下之亂。以濟其所不足。不誣治以爲亂。不援亂以爲治。援亂以爲治。是愚其君也。誣治以爲亂。是脅其君也。愚君脅君。是君子之所不忍。而世俗之所徼幸也。故莫若言天下之誠勢。請言當今之勢。當今天下之事。治而不至於安。亂而不至於危。紀綱粗立而不舉。無急變而有緩病。此天下之所共知。而不可欺者也。然而世之言事者。爲大則曰無亂。爲異則曰有變。以爲無亂。則可以無所復爲。以爲有變。則其勢常至於更制。是二者皆非今世之忠言。至計也。今世之弊。患在欲治天下。而不立爲治之地。夫有意於爲治。而無其地。譬猶欲耕而無其田。欲買而無其財。雖有鉏耰車馬。精心強力。而無所施之。故古之聖人。將治天下。常先爲其所無。而補其所不足。使天下凡可以無患。而後徜徉翺翔。惟其所欲爲。而無所不可。此所謂爲治之地也。爲治之地既立。然後從其所有而施之。植之以禾。而生禾。播之以菽。而生菽。藝之以松柏。梧。檟。叢。莽。樸。檉。無不盛茂。而如意。是故施之以仁義。動之以禮樂。安而受之。而爲王。齊之以刑法。作之以信義。安而受之。而爲霸。督之以勤儉。厲之以勇力。安而受之。而爲強國。其下有其地。而無以施之。而猶得以安存。最下者。抱其所有。俛俛然無地而施之。撫左而右動。鎮前而後起。不得以安全。而救患之不給。故夫王霸之略。富強之利。是爲治之具。而非爲治之地也。有其地而

無其具。其弊不過於無功。有其具而無其地。吾不知其所以用之。昔之君子。惟其才之不同。故其成功不齊。然其能有立於世。未始不先爲其地也。古者伏羲神農黃帝。既有天下。則建其父子。立其君臣。正其夫婦。聯其兄弟。殖之五種。服牛乘馬。作爲宮室衣服器械。以利天下。天下之人。生有以養。死有以葬。歡樂有以相愛。哀感有以相弔。而後伏羲神農黃帝之道。得行於其間。凡今世之所謂長幼之節。生養之道者。是上古爲治之地也。至於堯舜三代之君。皆因其所闕而時補之。故堯命羲和。曆日月以授民時。舜命禹平水土。以定民居。命益驅鳥獸以安民生。命棄播百穀以濟民飢。三代之間。治其井田溝洫步畝之法。比閭族黨州鄉之制。夫家卒乘車馬之數。冠昏喪祭之節。歲時交會之禮。養生除害之術。所以利安其人者。凡皆已定。而後施其聖人之德。是故施之而無所齟齬。舉今周官三百六十人之所治者。皆其所以爲治之地。而聖人之德不與也。故周之衰也。其詩曰。雖無老成人。尙有典刑。由此言之。幽厲之際。天下亂矣。而文武之法猶在也。文武之法猶在。而天下不免於亂。則幽厲之所以施之者不仁也。施之者不仁。而遺法尙在。故天下雖亂。而不至於遂亡。及其甚也。法度大壞。欲爲治者。無容足之地。泛泛乎如乘舟無楫。而浮乎江湖。幸而無振風之憂。則悠然唯水之所漂。東西南北。非吾心也。不幸而遇風。則覆沒而不能止。故三季之極。乘之以暴君。加之以虐政。則天下塗地而莫之救。然世之賢人。起於亂亡之中。將以治其國家。亦必於此焉。先之。齊桓用管仲。辨四民之業。連五家之兵。卒伍整於里。軍旅整於郊。相地而征。川澤各致其時。陵阜陸墜。各均其宜。邑鄉縣屬。各立其正。舉齊國之地。如畫一之可數。於是北伐山戎。南伐楚。九合諸侯。存邢衛。定魯之社稷。西尊周室。施義於天下。天下稱伯。晉文反國。屬其百官。賦職任功。輕關易道。通商寬

農懋穡勸分省財足用利器明德舉善援能政平民阜財用不匱然後入定襄王救宋衛大敗荆人於城濮追齊桓之烈天下稱之曰二伯其後子產用之於鄭大夫種用之於越商鞅用之於秦諸葛孔明用之於蜀王猛用之於苻堅而其國皆以富強是數人者雖其所施之不同而其所以爲地者一也夫惟其所以爲地者一也故其國皆以安存惟其所施之不同故王霸之不齊長短之不一是二者不可不察也當今之世無惑乎天下之不躋於大治而亦不陷於大亂也祖宗之法具存而不舉百姓之患略備而未極賢人君子不知尤其地之不立而罪其所施之不當種之不生而不知其無容種之地也是亦大惑而已矣且夫其不躋於大治與不陷於大亂是在治亂之間也徘徊徬徨於治亂之間而不能自立雖授之以賢才無所爲用不幸而加之以不肖天下遂敗而不可治故曰莫若先立其地其地立而天下定矣

新論中

治國而爲其地非聖人而後然也古之君子莫不皆然而其不然者則僅存之國也人之治其家也其最上者爲虞舜其次爲魯閔而其次猶得爲天下之良人其下者乃有不慈不孝置其不慈不孝蓋自其得爲良人以上至於爲舜其所以治其身上以事其父母下以化服其妻子者不同而其所以爲主者子耕于田婦織于室養其雞豚殖其菜茹無失其時以養生送死雖舜與天下之良人均也舜而不然不得以爲舜天下之人不然不得以爲良人何者是亦治家之地焉耳而至於爲國而豈獨無之昔者文王之治岐也耕者九一故周公因之建爲步畝溝洫之制何者其所因者治世之成法也孔子之治魯也魯人獵較孔子亦獵較何者其所因者衰世之餘制也當戰國之強諸侯無道然孟子亦以爲有王者起今之諸

侯不可盡誅。惟教之不改而後誅之。故漢之興也。因秦之故。而不害其爲漢。唐之興也。因隋之故。而不害其爲唐。由是觀之。則夫享國之長短。致化之薄厚。其地能容之。而不能使之也。地不能使之長短。薄厚。然長不得地。則無所效其長。厚不得地。則無所致其厚。故夫有地而可以容。有所爲者。舉而就之可也。當今之世。祖宗之法。或具存而不舉。或簡略而不備。具存而不舉。是有地而不耕也。簡略而不備。是地有所廢。缺而不完也。欲築室者。先治其基。基完以平。而後加石木焉。故其爲室也。堅。今之治天下。則不然。蓋嘗論之。自五代以來。強臣專國。則天下震動而易亂。自吾祖宗削而漸磨之。則今世可以粗安。凡今世之所恃以爲安者。惟無強臣而已。然恃其一之粗安也。而盡忘其餘。故嘗以爲當今天下有三不立。由三不立。故百患並起。而百善並廢。何者。天下之吏。媮墮苟且。不治其事。事日已敗。而上不知使。是一不立也。天下之兵。驕脆無用。召募日廣。而臨事不獲其力。是二不立也。天下之財。出之有限。而用之無極。爲國百年。而不能以富。是三不立也。基未平也。加之以其所欲爲。是故興一事而百弊作。動一役而天下困。投足而遇陷。窸側身而入河海。平居猶懼有患。而況求以馳騁於其上哉。固不可矣。今夫夷狄之患。是中國之一病也。吾欲拒之。則有以爲拒之之具。和之。則有以爲和之之費。以天下而待一國。其爲有餘力也。固亦宜矣。而何至使天下皆被其患。今也。天下幸而無它患難。而惟西北之爲畏。然天下之力。亦已因而不能支矣。一歲之入。不能供一歲之出。是非特納賂之罪也。三事不立之過也。故三事立。爲治之地。旣成。賂之則爲漢文帝。不賂則爲唐太宗。賂與不賂。非吾爲國治亂之所在也。治亂之所在。在乎其地之立與不立而已矣。天下之事。因循而維持之。以至於漸不可舉。猶曰。是養之未至也。乘舟中流。釋其楫而聽水之所之。旋於

涸洑格於洲浦。以爲是固然也。其爲無具亦已甚矣。以今之時。天子仁恕。士大夫好善。天下之風俗。不至於朋黨亂正。誣罔君子也。世之清議。凜然在矣。公卿之欲有爲以濟斯世。誰有言者。而曰吾有所待。是徒空言非事實也。故爲之說曰。居之以強力。發之以果敢。而成之以無私。夫惟有私者。不可以果敢。果於一不果於二。天下將以爲言不果者。不可以強力。力雖強而輒爲多疑之所敗。天下之人。惟能爲是三者。則足以排天下之堅強。而納之於柔懦。擾天下之怨怒。而投之於不敢。惟不能爲是三者。則足以敗天下之賢才。而卒之以不能有所建。是故無私而果敢。果敢而強力。以是三者治天下之三不立。以立爲治之地。爲治之地既立。然後擇其所以施之。天下將無所不可治。

新論下

天下之未治也。患三事之不立。苟其既立。則患其無以施之。蓋君子爲國。正其綱紀。治其法度。皆可得而知也。惟其所以施之。則不可得而知。周公之治周也。修其井田。封建百辟。可得而知也。其所以使天下歸周者。不可得而知也。孔子之治魯也。墮其三都。誅其亂政。可得而知也。其所以使羔豚不飾。賈男女別於道者。不可得而知也。孟子之所以治邾者。正其疆界。五口之家。桑麻雞豚。必具可得而知也。其所以使之至於王者。不可得而知也。孔子孟子之所汲汲以教人者。在其不可得而知。而其可得而知者。不詳論也。曰。是有意於治者能之。然而亦不可去也。故其得爲是國也。必舉之以爲先。由是觀之。治國之地。聖人無之。不得以施其聖。然而聖人之道。有所高遠而不可及者矣。其於孔子之門。所謂政事。而冉有子路之所能者。治國之地也。子路曰。千乘之國。攝乎大國之間。加之以師旅。因之以飢饉。由也爲之。可使有勇。且知

方也。冉有曰：方六七十，如五六十，求也爲之，可使足民。如其禮樂，以俟君子。是亦自以爲能爲其地，而未
有以施之云爾。然夫子許其能之，而不以爲大賢。則夫子之道深矣。遠矣。夫子平居朝夕孜孜以教人者，
惟所以自修其身，而其所以修其政事者，未嘗言也。蓋亦嘗言之矣。曰：謹權量，審法度，修廢官，興滅國，繼
絕世，舉逸民，所重民食，喪祭是九者，凡所以爲政而未足也。故繼之曰：寬則得衆，信則人任焉。敏則有功，
公則說。是四者，所以成之焉耳。其意以爲旣成而後以其平居自修之身施之。故記曰：君子篤恭而天下
平。爲有此具也。君子脩其身，無所施之，則不立。治其政事，無以施之，則不化。當三代之治也，天下之事，無
不畢舉。雖後世之君，猶得守其法度，以爲無過。惟無暴君，則天下可安。故伊尹之訓太甲曰：從諫弗拂，先
民時若，以爲如是，而可以爲治已矣。古之人言治天下，若甚易然。今之人以爲大言而不信，不知其有此
地也。悲夫。世之君子，孜孜以修其身，恭儉忠信，欲以施之天下，終身而不見其成，則以爲古之人欺我也。
夫苟以爲古之人欺我，雖有爲之者，蓋勉強而爲之也。夫苟不欲而強爲之，則其心益不自信，而道日疎。
夫以不信之心，行日疎之道，以治無以爲地之國，是以功不可成，而患日至。故莫若退而立其爲治之地，
爲治之地旣立，則身脩而天下可化也。

欒城集卷第二十

策問三十五首

殿試武舉策問一首

問王者之兵不貴詐謀奇計。至於臨敵制勝。良將豈可少哉。朕以天下爲度。懷柔四夷。而西戎背誕。腰領未得。凡吾接之以恩信。懷之以禮義者。固有道矣。若夫示之以形。禁之以勢。使之望而不敢犯。犯而無所得者。其術何由。伐其謀。散其黨。使之退而不得安。安而不能久者。其道何以。夫隱兵於民。井田之舊法也。材官府兵。猶行於後世。而保甲之復。民以爲勞。以車卽戰。丘甸之遺制也。武剛鹿角。猶見於近事。而車牛之役。世以爲非。古者兵有奇正。旋相爲用。如環之無端。其出入之法。今幾絕矣。敵有陰陽。客主異宜。易之則敗。其先後之節。將何施焉。淮陰之伐趙。勝亦幸耳。使左車之說行。則計將安出。仲達之卻蜀。非其功也。使孔明而不死。則勝將孰在。子大夫講於兵家之利。而明於當世之務。審矣。其以所聞著之于篇。朕將覽焉。

南省進士策問一首

問三代漢唐之法。行於前世。而施之於今。輒以不效。何也。昔者蓋嘗取經界之舊法。以爲方田。采府衛之遺意。以爲鄉兵。舉黜陟之墜典。以爲考課矣。然而爲方田。則民擾而不安。爲鄉兵。則民勞而無益。爲考課。則吏欺而難信。三者適所以爲患。不若其已也。孟子有言。爲高必因丘陵。爲下必因川澤。爲政必因先王。

之道。凡今世之法。駸駸近古矣。政之近古。天下之所以治也。然而如彼三者。獨何哉。豈古之法。遂不可施之於今歟。抑亦救之不自其本。爲之不得其道。以至於此也。

河南府進士策問三首

問。法立於上。則俗成於下。故兩漢之間。經各有師。師各有說。異師殊說。相攻如仇讎。異己者。雖善不從。同己者。雖惡不棄。下逮魏晉。爭者少止。然後學者相與推究衆說。從其所長。至唐而傳疏之學具。由是學者始會于一。數百年之間。凡所以經世之用。君臣父子之義。禮樂刑政之本。何所不取於此。然而窮理不深。而講道不切。學者因其成文而師之。以爲足矣。是以問者立取士之法。使人通一經。而說不必舊。法旣立矣。俗必自此而變。蓋將人自爲說而守之耶。則兩漢之俗是矣。將舉天下而宗一說耶。則自唐以來傳疏之學是矣。夫上能立法。以救弊而已。成其俗者。必在於士。將使二弊不作。其將何處而可哉。

問。三代之治。以禮樂爲本。刑政爲末。後世反之。儒者言禮樂之效。與刑政之弊。其相去甚遠。然較其治亂盛衰。其比後世。若無以大相過者。蓋夏后氏自禹再傳而失國。亂者三世。商人再衰而復興。周人一遷而不振。其賢於漢唐。其實無幾。至於漢文帝。唐太宗。克己裕人。海內安樂。雖三代之盛王。何以加之。夫禮樂刑政。其功之異。豈特如此而已。今自祖宗創業。百有餘年。法令脩明。上下相維。四方無虞。求之前世。未有治安若今之久者。然而儒者論其禮樂。常以爲不若三代。此豈誠不若耶。爲習其名而未稽其實也。不然。世之治安。則不在禮樂歟。宜一有以斷之。

問。孟子言五畝之宅。植之以桑。則五十者可以衣帛。雞豚狗彘。無失其時。則七十者可以食肉。數罟不入

洿池。則魚鼈不可勝食。斧斤以時入山林。則材木不可勝用。誠哉是言也。雖然。孟子將何以行之。豈將立法設禁以驅之歟。夫立法設禁而無刑以待之。則令而不行。有刑以待之。則彼亦何罪。請言孟子將何以行此。

私試進士策問二十八首

問。昔者承五代之亂。天下學者凋喪。而仕者益寡。雖有美才良士。猶溺於耕田養生之樂。不肯棄其鄉閭。而効力於官事。當此之時。至調富民而爲官。夫豈不甚病矣哉。及天下大定。學者漸已尊顯。勤勞勸誘。數十年之間。而後士人彷彿繼起。則天下之官。爲之盡滿。而無所置之。是以頃者立任子之限。減進士之額。繩以苛法。抑以細過。使之久而不調。然後官吏歲以漸減。凡今一歲之調。蓋不足以償其休老物故者。然則數十歲之後。無乃將復有向者乏人之患歟。夫古之聖人。維能於其未然而預防之。故無後憂。昔者。惟不能於其至少之時。而爲其過多之慮。是以惟務進之。而有今日之弊。夫民惟其誘而進之。則進而不知伏。抑而排之。則無聊而引去。天下要亦有不絜不屑之士。不可恃爵祿之利。以爲可以必致也。故願於其未然而求其所以進之。而可以使今無冗員之弊。退之。而可以使後無乏人之患者。此亦天下之深慮也。問。學者之論周禮。或以爲周公之書。或以爲戰國陰謀之書。二者孰爲得之。今觀其書。亦有所不知者二焉。夫公邑爲井田。而鄉遂爲溝洫。此二者。一夫而受田百畝。五口而一夫。爲役百畝。而稅之十一。舉無以異也。然而井田自一井而上。至於一同。而方百里。其所以通水之利害。溝洫澮三。溝洫之制。至於萬夫。爲地三十二里有半。其所以通水之利者。遂溝洫澮川五。夫利害同而法制異。爲地少而用力博。此其所未

知者一也。五家爲比。比有比長。五比爲閭。閭有閭胥。四閭爲族。族有族師。五族爲黨。黨有黨正。五黨爲州。州有州長。五州爲鄉。鄉有一正卿。及有軍旅之事。則以比長爲伍長。閭胥爲兩司馬。族師爲卒長。黨正爲族師。州長爲師帥。卿爲軍將。故凡官之在鄉者。軍一起而皆在軍矣。起軍之法。自五口以上。家以一人爲兵。一人爲役。而家之處者甚衆。而官吏舉皆在外。將誰使治之。此其不可知者二也。故願與學者究之。問學者莫不求學孔子。今考於傳記。而觀其行事。蓋有所不通者焉。語曰。佛肸召。子欲往。又曰。子見南子。子路不說。學者以爲孔子急於行道而爲此。夫孔子之於衛靈公。語及兵事。不說而去。於陽貨。時其亡而見之。蓋亦不欲見也。而孟子亦云。惡夫枉尺而直尋者。然則彼二事者。獨何歟。致於仕魯爲司寇。從而祭。膾肉不至。不稅冕而行。且夫仕而至於司寇。君臣之義。不爲淺矣。膾肉不至而行。何其輕君臣之義。而重區區之微禮哉。此明於輕重者之所不爲也。或曰。膾肉不至。仲尼以爲禮將從此而大壞。此所謂知幾者。夫爲大臣。知禮之將亡。不救而去。則又安用夫大臣者。故此將有微眇難見之意。而世或未之思焉。學者所宜辨之。

問古之爲國者。必有所尙。夏忠商質而周文。儒者以爲此三者如循環。百世而無窮。然則今世之所尙者何耶。夫不必聖人而後有所尙。然則今世之所尙者。其以爲忠耶。則小民多詐。而爭訟並起。非所以爲忠也。以爲質耶。則金玉錦繡。不爲之節。而文詞熾於天下。非所以爲質也。以爲文耶。則禮樂不備。冠昏喪祭之義。至爲淺薄。非所以爲文也。然則今世其無所尙耶。蓋亦有之而未之見耶。其果有之也。則亦可用耶。不可用耶。其明著其說。

問。古之學者。其爲學必遲。而信道必篤。蓋非其遲則不能至於篤也。故子夏之門人。始於洒掃應對進退。而孟子亦云。君子之於道。欲其自得。自得之則資之深。資之深則取之左右逢其原。夫待其自得也。非久而何。昔者孔子五十而後學易。方今薄才下士之所謂甚遲而可怪者也。故夫當今之世。無惑乎其無信道之士也。古之養士者。莫善於太學。而今太學之教。一日之所爲必若干。取方冊之難知者而悉論之。不待其問而先告之。無先後。無少長。無賢愚。其問同而其功等。其上者無以優游翱翔。以寬綽其心。而其下者勉強困躓。不暇於爲善。故其學也必遠。而守道必不篤。何者。非其自得之也。夫人之才。譬如草木焉。雨以濡之。風以動之。則其長也可立而待。有宋人焉。握之而自以爲喜。此孟子所以太息其不知學也。然而寬以待之。則太學之法。將必有所大變。而後可變法者不可不預立其說也。

問。古者禮備而費少。今者費愈多而禮愈闕。古者七世之廟。分而爲七。今者七世之廟。合而爲一。古者一歲大祭。天者四。五歲大祭。宗廟者再。今者三歲迭用其一。而略其餘。古者命士以上。皆有廟。今至於公卿大夫無之。古者天子五載一巡守。遠者十二年一巡守。今者非郊祀校獵不出於郊。以今之至簡省也。而財至於不給。則古之甚繁者。宜其無以供之。然以古之甚繁。而不至於大費。則今之簡省。而至於不給者。何也。凡今之人。皆以費故。棄先王之禮。是以禮日益壞。以爲今之世。有周公仲尼。其將亦畏費而止歟。其將亦略備其禮。而不至於大費歟。然而今之所以至於大費。而不可省者。或亦有故也。其思所以省之。而無害之說。而著于篇。

問。茶之有權與稅。非古也。特就其便於今者言之。有以爲權便曰。凡所以備邊養兵者。皆出於權。然江淮

之間。以私荼死者。不可勝計。此則仁人之所不忍爲也。而何便於權。以稅爲便。則夫邊鄙兵革之用。將何以供之。且夫稅之入。其不足以當權之利。亦易見矣。而特以不忍驅民而納之陷穽。是以去權而爲稅。今欲復反其舊。冒行殺人之害。而就夫區區養兵之利。則何以爲仁。求以生民。而國用至於困乏。則何以爲智。蓋將以生民而富國。兼收仁智之實。而並享之者。必將有說也。

問。君子能盡人之情。而不能盡物之變。盡物之變。惟精者能之。古之君子。專一而無侈心。是以益治鳥獸。棄治稼穡。夔治鐘磬。羲和治曆。皆以聰明睿智之才。而盡力於一物。終其身而不去。至於後世。官者至以爲氏。故當此之時。天下之事。無不畢舉。今者四方旣平。非有勤勞難治之政。而當世之務。每每廢墜。而不理。蓋鐘律之不和。河之不循道。此一二事者。百有餘年。而莫有能辦之者。是豈非務於速進。而恥以一物自盡之過歟。夫古之君子。往往老於小官。終身而不厭。則上之所以使之者。誠有道也。安得斯道而由之。以使斯人之復如古也。

問。今世法唐以爲治。上自百官刑法禮儀。下至州郡兵民賦役。要之以唐爲準。譬如商之於夏。周之於商。事無不考焉者。然天下之廣。方制萬里。夷狄不作。兵革不用。四方之貢。不絕於道路。而國用常苦於不足。唐自天寶以來。府衛之兵廢。租庸之法壞。收茶鹽權酒酤。其法與今略等。然而天下分裂。天子之地至少。征伐相繼而起。而憲文武宣之世。方鎮稍定。則財用未嘗有所匱乏。與今世無異。至於齊蔡三晉。各以數州之地。養數萬之兵。內以抗衡京師。外以備禦鄰敵。綽然有餘。亦不如今之將帥。仰給於大農也。夫法與唐類。地多於唐。費用不若唐之多。而府庫之蓄。無以大相過者何也。其必有能辨之。

問。方今天下患於兵多。故銷兵之說。人人知之。然獨未覩夫兵少之爲患也。方今天下患於財少。故求財之術。人人講之。然獨未覩夫多財之爲累也。夫銷兵之患。有甚於兵多。而多財之累。有甚於財少。衆人知目前之利。而不爲歲月之計。故儒者非之。儒者操根本之論。而不救急切之害。故衆人遲之。今將救目前之病。使兵多財少之患去。全歲月之計。使兵少財多之弊不見。其將何道而可。

問。舜受天下於堯。故郊饗宗堯。不敢廢堯之祀。禹受天下於舜。而其郊宗皆其祖考。夫推舜之心。以及於禹。則禹必將兼祀堯舜。而後可。今也不然。不獨廢堯而且忘舜。何也。夫受其成業。而黜其祀。雖少恩者不爲。而謂禹行之乎。其故安在。

問。古之言治者。必曰禮樂。禮樂之於人。譬如飲食。未有一日而不相從者。故士之閑居。無故不去琴瑟。行則有佩玉之音。登車則有和鸞之節。身蹈於禮。而耳屬於樂。如此而後邪辟不至。蓋自秦漢以來。士大夫不師古。始然。其朝廷鄉黨之間。起居飲食之際。亦未嘗無禮。而樂獨盡廢。士有終年未嘗聞樂。而不知其非者。於是。有以疑樂之可去。而以古人爲非矣。不然。請言樂之不立。而士之所以不如古者安在。

問。西漢自孝武之後。崇尚儒術。至於哀平。百餘年間。士之以儒生進用。功業志氣。可紀於世者。不過三四。而武夫文吏。皆著節當世。其業與儒者遠甚。及至東漢。雖光武兵革之後。而儒者遂顯。其後世道凌遲。其所以扶危持顛。皆出於學者。而他人不與。夫兩漢之用儒。其實無以相過。而士之優劣相遠如此。何也。

問。古者建國。設官分職。以爲政本。近代因循雜亂。無復統紀。朝廷深惟其弊。推本宗周。旁摭宇文氏。以易其制。惟周官分建六職。各帥其屬。以治百事。仰以奉天地鬼神。外以御諸侯四夷。下以治士農工商。至於

草木鳥獸無不咸在。可謂備矣。宇文氏雖參考其舊。以命庶工。而典籍亡逸。不可究知。其兵戎之官。多設於六卿之外。今將遠法宗周。則宇文之遺法。固將在所去取。然則凡官之以武事設者。當領於六官耶。其亦將特設而後可也。

問。周官三百六十。所以治王之畿內者。其畿外諸侯。國自有官。大國三卿。次國二卿。小國一卿。亦皆有屬。以治其事。是以六官之屬。足以治畿內而止矣。今四方郡縣。自一介之吏。該命於朝廷。則六官之外。當得羨吏以典其職。以階易官。蓋出於此。然而設階之法。始於散官。而散官之興。近自魏晉。因魏晉之遺俗。以間三代之舊典。竊以爲未盡也。其將何脩而後。可以復三代之故也哉。

問。古者取士於鄉。而養之於學。觀其德行道藝。而進之以官。故其得人也全。今也雖鄉取而學養之。然其試之也。獨取其藝。而德行之舉。不復並立。凡今之士。雖有內懷德義。而無藝以自將。則不免廢於有司。故其得人也偏。今將略其藝文。而取其行義。凡科舉之法。所以杜請謁而絕情故者。一切盡廢。則奔競朋黨之風。必扇於下。豈古之學校。遂不可復耶。其具論之于篇。

問。古者兵出於民。而兵戰以車。車馬介冑。皆民力也。民之於兵。可謂勞矣。三時務農。一時講武。鋤耰錢鏹之人。而驅之以干戈之事。民之於兵。可謂疎矣。然而古者以甚勞之民。用至疎之兵。而民以爲安。四夷賓服。其故何也。近世兵民旣分。凡兵之器用。皆給於官。且暮教戰。不擇四時。民可謂逸。而兵可謂習矣。然其所以安萬民而威四夷者。亦何以遠過於古。若夫正兵旣練。而又兼連伍保之兵。民兵旣設。而不試以征伐之事。此又今世之新意。其所以勤兵裕民者。可謂至矣。至於異同得失之辨。其詳著于篇。

問古者爲貨泉以權物之輕重。今所在鑄錢。數日益多。制日益少。可謂錢輕矣。然而金帛米粟。賈日益賤。而錢之行於市者。日益少。有錢重之弊。夫當重者反輕。而當輕者反重。其說安在。將救其失。其術何以問孔子與老子同時。孔子以禮樂教人。而老子以清淨無爲爲宗。孔子蓋嘗問禮於老子。未有一言非之者。夫孔老豈同道者哉。後世孟軻韓愈。皆學於孔子。然孟子之於楊朱墨翟。韓子之於浮屠氏。皆訟言攻之。嫉之如仇讎。夫韓孟之賢。不過於孔子。而楊朱浮屠之害。無異於老子。或釋而不問。或排而不置。其說安在。

問漢武帝攘卻四夷。拓地千里。後世賴以爲強。唐太宗誅滅胡虜。兵不折北。民不告病。用兵之利。前世無與爲比。然而武帝之治安。不若文景之多。而太宗之功。無補中國之治亂。是以儒者終莫之善也。夫儒者之說勝。則帝王之武功沒。世而無聞。不世之功成。則中國先受其害。二者不可合併。然高宗之伐鬼方。文王之征玁狁。聖人有所不免。則武帝太宗之功業。其終不善於儒者何也。

問河之爲害遠矣。自漢已來。東決則盡太山之麓。西決則盡西山之趾。凡二山之間。數千里之地。丘陵險阻。河皆堙而平之。存者無幾矣。蓋禹之治水也。以爲河所從來者高。水湍悍難以行平地。數爲敗。乃斷二渠以引其河。自二渠之廢。而河乃恣行。不可備禦。夫河決不東則西。豫以二渠待之。則雖決而有以受之。乃不爲害。此聖人之遺跡也。今將訪而復之。以待河之暴。其可否何說。

問韓非明老子。而以刑名游說諸侯。李斯師孫卿。而以詐力事秦。至於焚詩書。殺儒士。其終皆陷於大戮。原其所學。皆本於聖人。而其所施設。則鄉黨之士所不忍爲。夫豈其學有以致之歟。蓋老子孫卿其教之善。雖弊不至於敗亂天下。然則二子之學。其所以失之。而至此者何也。學之不詳。毫釐之差。或致千里。學

士大夫可不辨之乎。

問堯舜之德盛矣。然孔子稱周監於二代。郁郁乎文哉。何者。世相近。事相若。而人情未遠也。儒者常稱二帝三代。雖其道德之隆。世世師之。至於禮樂刑政。將以師之。今世亦已難矣。今自五代以上。其文物政事之備。未有若隋唐之善者。自祖宗已來。采前世之舊。而施之於時。亦未有若隋唐之多者也。然其或因或革。而當否存焉。蓋亦有時異事異。久遠而不可復者歟。其亦有因習俗而重改作。可復而未暇者歟。其相與講習而著其宜焉。

問古者有罪不免於刑。失誤有贖。親賢有議。眚災有赦。未聞有赦天下者也。自漢以求。赦始及天下。而言政者病之。蓋成周之隆。成康之際。刑措不用。而漢孝文唐太宗之盛。天下斷獄。歲不過數十。當此之時。雖有赦何所施之。後世法令滋章。而姦宄不禁。刑之不能正。而赦之不能救。數赦則民玩於法。而不赦則上所不忍。其將何施而可。

問三代以田養民。而取之以什一。其民盡力於耕。則足以自養。上之人以時平其政令。而民受其賜。既已厚矣。自戰國之禍。田制既壞。賦法隨弊。天下之民。仰困於租稅。而俯困於兼并。其害不可言矣。是以漢自文景以來。賜民田租。孝弟力由。鰥寡孤獨。金帛布絮之奉。歲時不絕。考之於古。則所謂惠而不知爲政者也。然自漢氏絕而復興。其民思之不忘。其恩澤之結於民。豈不至哉。惟三代仁政。其紀綱法度。既不可遽復。而漢室賜予之惠。府庫之積。力有所不逮。然則將以厚民。其術安在。

問。三代聖人以禮樂治天下。動容貌。出詞氣。逡巡廟堂之上。而諸侯承德。四夷向風。何其盛哉。至其後世。稍衰。桓文迭興。而維持之。要之以盟會。齊之以征伐。既已卑矣。然春秋之後。吳越放恣。繼之以田常三晉之亂。天下遂爲戰國。君臣之間。非詐不言。非力不用。相與爲盜跖之行。猶恐不勝。雖桓文之事。且不行矣。而況於文武成康之舊歟。及秦并天下。風俗日惡。不可復改。雖漢唐之隆。格之以商周之盛。蓋已愧矣。夫三代之間。其民更桀紂之禍。與戰國何異。然聖人一出。禮義復興。天下和洽。不若後世寂寥無聞。獨何故歟。豈帝王之道。古今一變。遂不可復反乎。不然。何漢唐之陋如此。

問。秦滅經籍。漢興易詩書禮春秋復存。而樂遂喪。然自孔子弟子散亡。天下學者。爭立異說。各尊所聞。以相攻。而聖人之道。日以湮沒。頃者。朝廷患之。掃除傳疏。而著以新說。天下庶幾由此以識聖人之遺意。然易詩書禮皆立學官。春秋雖不用。而其書亦不廢。惟大樂淪棄。漫滅無文。無所考信。嗚呼。士生於今。去聖久遠。師法不傳。幸明天子慨然深愍遺墜。而興之。而六經不備。豈不闕甚矣哉。意者求之它書。推其端而究其末。引而伸之。猶可得而觀也。請誦其所取焉。

問。漢收河南地。兵不再駕。唐復河隴。未嘗用兵。今朝廷兵甲之精。卒伍之練。蓋近世所未有也。是以收洮泯。略蘭會。大功旣遂。四夷震疊。有志之士。蓋以心馳於燕薊之兆矣。夫能稼而能穡。所以爲良農也。能獲而能烹。所以爲善獵也。故夫拓國而安邊。唐漢之間。必有良策焉。其試言之。

私試武學策問二首

問。古之善戰者。必以兩擊一。旣爲之正。又爲之奇。故我之受敵者一。而敵之受敵者二。我一而敵二。則我

佚而敵勞。以佚擊勞。故曰。三軍之衆。可以使之必受敵而無敗。自唐季以來。古之陣法。遺散而不講。今世用兵之將。置陣而不知奇正。夫置陣而不知奇正。猶作樂而不用五聲。飪食而不用五味。宮竭而商不繼。甘窮而酸不輔。一變而盡矣。不可復用也。今將推古法。求奇正之意。而施之行陣。其亦可得歟。兵法曰。先出奇戰爲正。後出爲奇。又曰。奇亦爲正之正。而正亦爲奇之奇。所謂奇正者。將合爲一陣。歟。將離爲二陣。歟。學者所宜辨之。

問。古稱淮陰侯善用兵。然觀其所以勝者。亦若有天幸焉。淮陰之攻趙也。廣武君請以輕兵絕其饗道。而堅壁以老其師。其攻齊也。人或說龍且以相持不戰。而陰招齊之亡城。此二計者。淮陰實難之。幸其計之不用。是以能克。然而使此計誠行。淮陰豈坐受縛者耶。其必有以待之。請言其說。

上海图书馆藏书



A541 212 0006 1487B

